

Awadhi Easy-to-Read Version

Language: अवधी (Awadhi)

Provided by: Bible League International.

Copyright and Permission to Copy

Taken from the Awadhi Easy-to-Read Version © 2005 by Bible League International.

PDF generated on 2017-08-25 from source files dated 2017-08-25.

a1ae5774-2ca2-500b-8aeb-2c74229c4519

ISBN: 978-1-5313-1308-1

यसायाह

१ इ सबइ परमेस्सर क दर्सन अहइ जउन आमोस क पूत यसायाह यहूदा अउर यरूसलेम क बारे लखेस ह। यसायाह एँन दर्सन क यहूदा क राजा लोगन उज्जियाह, योताम, आहाज अउ हिजकिय्याह क समय मँ लखे रहा।

आपन लोगन क खिलाफ परमेस्सर क सिकाइत

२ हे सरग अउ धरती, यहोवा क वाणी सुना ! यहोवा कहत ह,

“मइँ आपन बच्चन क परवान चढ़ाएँ अउर ओका मजबूत स बढइ मँ मदद किहेउँ,

किन्तु उ पचे मोहसे विद्रोह किहन।

३ बैल आपन सुआमी क जानत ह

अउर गदहा उ जगह क जानत ह जहाँ ओकर सुआमी ओका चारा देत ह।

किन्तु इस्राएल क लोग मोका नाही पहिचानतेन।

उ पचे मोर आपन अहइँ किन्तु मोका नाही समुझतेन ह।”

४ इस्राएल रास्टर पापे अउ दोख स भरि गवा अहइ। जउन कि भारी बोझे क समान ह जेका लोगन क उठाइ क होइ। उ पचे बुरे परिवारन स बुरे अउ दुट्ट बच्चन क समान अहइँ। उ पचे यहोवा क तजि दिहन। उ पचे इस्राएल परमेस्सर क पवित्तरता क अपमान किहन। उ पचे ओका तजि दिहेन अउर ओकरे संग अजनबी जइसा बेउहार किहन।

५ परमेस्सर कहत ह, “मइँ तू सबइ लोगन क अउर दण्ड काहे देत रहउँ ? मइँ तू पचन्क दण्ड दिहेउँ, मुला तू पचे नाही बदल्या। तू पचे मोरे बिरूद्ध विद्रोह करत ही रह्या। अब हर मूँडे घायल अहइ अउ हर हिरदय दुखी अहइ। ६ तोहरे सबन गोड़े क तलुअन स लइके मूँडे क ऊपरी हींसा तलक तोहरे बदन क हर अंग घावन स भरा अहइ। ओनमाँ चोट लगी अहइँ अउर फूटे भए फोडन अहइँ। तू पचे आपन फोडन क कउनो परवाह नाही किह्या। तोहार पचन्क घाव न तउ साफ कीन्ह ग अहइँ नही ओनका ढका गवा अहइ।

७ “तोहार सबन्क धरती बर्बाद होइ ग अहइ। तोहार पचन्क नगर आगी मँ बरि गवा अहइँ। तोहार पचन्क धरती तोहार पचन्क दुस्मनन हथियाइ लिहेन। तोहार पचन्क भुईया अइसे

उजारि दीन्ह ग अहइ कि जइसे दुस्मनन क जरिये उजाड़ा गवा कउनो प्रदेश होइ।”

यरूसलेम क चितउनी

८ सिय्योन क बितिया (यरूसलेम) अब तजि भए सिबिर जइसा होइ गवा। उ ककड़ी क खेत मँ एक अइसा झोपड़ी क नाई अहइ जेका फसल काटइ क पाछे छोड़ दीन्ह गवा होइ। इ उ नगरी क समान अहइ जेका घेर लीन्ह गवा होइ। ९ इ फुरइ अहइ किन्तु फुन भी सक्तीसाली यहोवा कछू लोगन क हुआँ जिअत रहइ बरे छोड़ दीन्ह ग रहा। सदोम अउर अमोरा सहरन क समान हमार पूरी तरह बिनास नाही कीन्ह गवा रहा। परमेश्वर सच्ची सेवा चाहत ह

१० हे सदोम क मुखिया लोगो, यहोवा स सँदेसा सुना। हे अमोरा क लोगो, परमेस्सर क उपदेसन पइ धियान द्या। ११ परमेस्सर कहत ह, “मोका इ सबइ सबहिं बलियन नाही चाही। मइँ तोहार पचन्क भेड़िन अउ पसुअन क चर्बी क काफी होमबलियन लइ चुका हउँ। बर्धन, मेमनन, बोकनन क खून स मइँ परसन्न नाही हउँ। १२ तू लोग जब मोहसे मिलइ आवत अहा तउ मोरे आँगन क हर वस्तु रौंद डावत अहा। अइसा करइ बरे तू पचन्स कउन कहेस ह ?

१३ “बेकार क बलियन तू पचे मोका जिन चढ़ावत रहा। जउन सुगंधित सामग्री तू पचे मोका अर्पित करत अहा, मोका ओहसे घिना अहइ। नवा चाँद क दावतन, बिस्राम अउर सबित मोहसे सहन नाही होइ पउतेन। आपन पवित्तर सभन क बीच जउन बुरे करमन तू पचे करत अहा, मोका ओनसे घिना अहइ। १४ तोहार पचन्क माहवारी बैठकन अउर सबइ सभा स मोका आपन सम्पूर्ण मन स घिना अहइ। इ सबइ सभन मोरे बरे एक भारी भरकम बोझ स बन गइ अहइ। अउर ओन बोझन क उठावत अब मइँ थक चुका हउँ।

१५ “तू लोग हाथ उठाइके मोर पराथना करब्या, किन्तु मइँ तोहार सबन कइँती लखइ तलक नाही। तू लोग जियादा स जियादा पराथना करब्या, किन्तु मइँ तोहार सबन्क सुनइ तलक क मना कइ देब काहेकि तोहार सबन्क हाथ खून स सना अहइँ।

१६ “आपन क धोइ अउ आपन क पवित्तर करी। तू पचे जउन बुरे करम करत अहा ओनका मोर आँखि क नजर स दूर करा। ओन बुरे कामन क तजा ! १७ अच्छे करम करब सीखा। दूसर लोगन क संग निआव करा। जउन लोग दूसर लोगन क सतावत हीं, ओनका दण्ड द्या। अनाथ बच्चन क

अधिकारन बरे संघर्ष करा। जउन मेहररून क मनसेधू मरि गवा अहई, ओनका निआव दियावइ बरे पैरवी करा।”

१८ यहोवा कहत ह, “आवा, हम एँन बातन पइ विचार करी। तोहार सबन्क पाप गहरा लाल रंग क नाई अहई मुला ओनका धोवा जाइ सकत ह अउर बरफ क नाई उज्ज्वर होइ सकत ह। तोहार पचन्क पाप लाल कपड़ा क नाई सुखे अहई, किन्तु उ सबइ ऊन क नाई उज्ज्वर होइ सकत अहा।

१९ “अगर तू पचे मोर कही बातन पइ धियान देत अहा, तउ तू पचे इ धरती क नीक वस्तुअन पउब्या। २० किन्तु अगर तू पचे सुनइ समना करत अहा तू पचे मोरे खिलाफ होत अहा, अउर तोहार दुस्मनन तू पचन्क नस्ट कइ डाइहीं।” यहोवा इ सबइ बातन खुद ही कहे रहा।

यरूसलेम परमेस्सर बरे बिस्सास क जोगग नाही अहइ

२१ परमेस्सर कहत ह, “यरूसलेम कइँती लखा। यरूसलेम एक ठु अइसी नगरी रही जउन मोहमाँ बिस्सास राखत रही अउर मोर अनुसरण करत रही। उ रण्डी क नाई कउनो कारण बन गई? अब उ मोर अनुसरण नाही करत। यरूसलेम क निआव स परिपूर्ण होइ चाही। यरूसलेम क बसइयन क, जइसे परमेस्सर चाहत ह, वइसे ही जिअइ चाही। किन्तु अब तउ हुवाँ हत्तियारन रहत ही।

२२ “तू पचन क नेकी चाँदी क समान अहई जउन अब बेकार अउर असुद्ध समुझा जात ह। इ उ दाखरस का नाई अहइ जउन कि बहोत जियादा पानी क कारण पतरा होइ गवा अहइ। २३ तोहार पचन्क सासक विद्रोही अहई अउर चोरन क साथी अहई। तोहार पचन्क सबहिँ सासक घूस लेइ चाहत हीं। गलत काम करइ बरे उ पचे घूस क धन लइ लेत हीं। तोहार पचन्क सबहिँ सासक लोगन्क ठगइ बरे मेहनताना लेत हीं। तोहार पचन्क सासक अनाथ बच्चन क सहारा देइ क जतन नाही करतेन। तोहार पचन्क सासक ओन मेहररून क जरूरतन पइ कान नाही देतेन जेनकर मनसेधू मर चुके अहई।”

२४ एन सबइ बातन क कारण, सुआमी सर्वसक्तिमान यहोवा अरथात इसराएल क सर्वसक्तीमान कहत ह, “हे मोर बैरियो मई तू पचन्क दण्ड देवउँ। तू पचे मोका अब अउर जियादा नाही सताइ पउब्या। २५ जइसे लोग चाँदी क साफ करइ बरे खार मिले भए पानी क प्रयोग करत हीं, वइसे ही मई तोहार

पचन्क सबहिँ खोट दूर करवउँ। सबहिँ निरर्थक वस्तुअन तू पचन लइ लेवउँ। २६ जइसे निआव क करवाइयन तोहरे सबन्क लगे सुरु मँ रहेन अब वइसे ही निआव क करवइया मई फुन स वापिस लिआउब। जइसे सलाहकार बहोत पहिले तोहरे सबन क लगे हुवा करत रहेन, वइसे ही सलाहकार तोहरे पचन्क लगे फुन होइहीं। तू पचे तब फुन नेक अउर बिस्सासी नगरी कहवउब्या।”

२७ नीक फइसला अब सिय्योन क दीन्ह जाई अउ उ आजाद होइ जाइ। परमेस्सर उ लोगन क निआव देइ जउन अब हुवाँ रहत हीं। २८ मुला सबहिँ अपराधियन अउर पापियन जउन यहोवा क अस्वीकार किहेस ह, क पूरी तरह स तोड़ दीन्ह जाइ अउ बरबाद कइ दीन्ह जाइ।

२९ भविस्स मँ, तू लोग ओन बाँझबृच्छन बरे ओन बिसेस बगीचन बरे, जेनका पूजइ बरे तू पचे चुने रह्या, लज्जित होइहीं। ३० इ एह बरे घटित होइ काहेकि तू लोग अइसे बाँझ बृच्छन जइसे होइ जाब्या जेनकर पातियन मुरझात होइ। तू पचे एक अइसे बगियन क नाई होइ जाब्या जउन पानी क बिना मर रहा होइ। ३१ बरिआर लोग झुरान काठे क नान्ह नान्ह टुकन जइसा होइ जइहीं अउर उ सबइ लोग जउन काम करिहीं, उ पचे अइसी चिनगारियन क समान होइहीं जेनसे आगी लागि जात ह। उ सबइ बरिआर लोग अउर ओनकर काम बरइ लागिहीं अउर कउनो भी मनई अइसा नाही होइ जउन उ आगी क रोकि पाई।

१ आमोस क पूत यसायाह यहूदा अउर यरूसलेम क बारे मँ इ संदेस लखेस।

२ आखिरी दिना मँ यहोवा क मन्दिर उ पर्वते पाई बनावइ जाइ

जउन आपन अगल-बगल क सबहिँ पर्वतन मँ सबसे ऊँचा होइ।

सबइ रास्ट्रन क लोगन हुवाँ बाढ़ क नाई आइ।

३ अनेक लोग इ कही सरू करि,

“आवा, हमका यहोवा क पर्वते पइ,

याकूब क परमेस्सर क मंदिर मँ जाइ चाही।

उ हमका आपन जिन्नगी विधि क सिच्छा देइ अउर हम ओकर अनुसरण करब।”

सिय्योन पर्वत पइ यरूसलेम मँ स परमेस्सर क उपदेसन क संदेस सरू करी

अउर हुवाँ स उ समूचइ संसार मँ चलि जाइ।

४ तब परमेस्सर सबहिँ देसन क निआवी होइ।

परमेस्सर बहोत स लोगन क विवादन निपटारा करी

अउर उ सबइ लोग लड़ाई बरे अपने हथियारन क प्रयोग करब बंद कइ देइहीं।

आपन तरवारन स उ पचे हरे क फार बनइहीं अउर उ पचे आपन भालन क पौधन क काटइ क दौराती क रूपे में काम में लइहीं।

लोग दूसर लोगन क खिलाफ लड़ब बंद कइ देइहीं।

लोग जुद्ध बरे कबहुँ प्रसिच्छित नाही होइहीं।

५ हे याकूब क परिवार, तू पचे यहोवा क अनुसरण करा।

६ हे यहोवा, तू याकूब (इस्राएल) क घरे स पीछे मुड़ि गवा ह, जबकि उ तोहार लोग अहइ। तोहार लोग पूरी तरह स पूरब (असीरिया) क कबूल कइ लिहेन ह, अउ तोहार लोग पलिस्तियन (पस्चिम) क नाई भविस्स बतावइ क सुरू करइ दिहेन ह। तू लोग ओन विचित्र विचारन क पूरी तरह स स्वीकार कइ लिहेस ह। ७ हाँ, तोहार धरती सोना अउ चाँदी स भरि गइ अहइ, अउ हुवाँ क धन-सम्पत्ति क गना न जाइ। हुवाँ अनगिनत जुद्ध क घोड़न रथन भी अहइ। ८ मुला ओनकर धरती मूरतियन स भी भरी पड़ी अहइ; तोहार लोग एनका खुद की आकार दिहेस ह, अपने हाथन स ओका बनाएन ह अउर उ पचे ही ओनकर पूजा करत हीं। ९ लोग बुरा स बुरा होइ ग अहइ। लोग बहोत नीच होइ ग अहइ। हे परमेस्सर, निहचय ही तू ओनका छिमा करब्या, का तू अइसा करब्या ?

१० जा, कतहूँ कउनो गड़हा में या कउनो चट्टाने क पाछे लुकाइ जा। तू परमेस्सर स डेराअ अउर ओकर महान सक्ति क समन्वा स ओझर हीइ जा।

११ अहंकारी लोग अहंकार करब तजि देइहीं। अहंकारी लोग धरती पइ लाज स मूँड नीचे निहुराइ लेइहीं। उ समय सिरिफ यहोवा ही ऊँच ठउर पइ बिराजमान होइ।

१२ यहोवा एक खास दिन क योजना बनाएस ह। उ दिन, यहोवा अहंकारियन अउर बड़बोलन लोगन क सजा देइ। तब ओन अहंकारी लोगन क साधारण बनाइ दीन्ह जाइ। १३ उ सबइ अहंकारी लोग लवानोन क लम्बे देवदार वृच्छन क समान अहइ। उ पचे बासान क बाँझ वृच्छन जइसे अहइ किन्तु परमेस्सर ओन लोगन क दण्ड देइ।

१४ उ सबइ अहंकारी लोग ऊँच पहाड़ियन जइसे लम्बे अउर पहाड़न जइसे ऊँच अहइ। १५ उ पचे अहंकारी लोग अइसे अहइ जइसे लम्बी अउ ऊँच मीनारन तथा मजबूत परकोटा होइ। किन्तु

परमेस्सर ओन लोगन क दण्ड देइ। १६ उ सबइ अहंकारी लोग तर्सीस क बिसाल जहाउन के समान अहइ। एन जहाउन में महत्वपूर्ण चिजियन भरी अहइ। किन्तु परमेस्सर ओन अहंकारी लोगन क सजा देइ।

१७ उ समय, लोग अहंकार करब तजि देइहीं। उ सबइ लोग जउन अब अहंकारी अहइ, धरती पइ खाले निहुराइ दीन्ह जइहीं। फिन उ समय केवल यहोवा ही ऊँचा बिराजमान होइ। १८ सर्बहि मूरतियन लवार देवता खतम होइ जइहीं। १९ लोग चट्टानन सबइ गुफा अउर धरती क भीतर जाइ लुकइहीं। उ पचे यहोवा अउर ओकर महान सक्ति स डर जइहीं। अइसा उ समय होई जब यहोवा धरती क हिलावइ बरे खड़ा होइ।

२० उ समय, लोग आपन सोने, चाँदी क मूरतियन क दूर लोकाइ देइहीं (एन मूरतियन क लोग एह बरे बनाए रहेन कि लोग ओनका पूजि सकइं।) लोग ओन मूरतियन क धरती क ओन बिलन में लोकाइ देइहीं जहाँ चमगादड़ अउर छुछुंदर रहत हीं। २१ फुन लोग चट्टानन क गुफन में छुप जइहीं। उ पचे यहोवा अउर ओकर महान सक्ति स डेराइके अइसा करिहीं। अइसा उ समय घटित होइ जब यहोवा धरती क हिलावइ बरे खड़ा होइ।

२२ ओ इस्राएल क लोगो। तू पचन्क आपन रच्छा बरे दूसर लोगन पइ निर्भर रहब तजि देइ चाही। उ सबइ तउ मनई मातर अहइ अउर मनई मरि जात ह। एह बरे, तू पचन्क इ नाही सोचइ चाही कि उ पचे परमेस्सर क समान सक्तिसाली अहइ।

३ १ इ सबइ बातन मई तू पचन्क बतावत हउं, तू पचे समुझ ल्य। सर्वसक्तिसाली यहोवा सुआमी, ओन सर्बहि वस्तुअन क छोरि लेइ जेन पइ यहूदा अउ यरूसलेम निर्भर रहत हीं। परमेस्सर समूचइ भोजन अउ जल भी छोरि लेइ। २ परमेस्सर सर्बहि नायकन अउ महाजोधन क छोरि लेइ। सर्बहि निआवा धीसन, भविस्सवक्तन, जूतिसियन अउ बुजुर्गन क परमेस्सर छोरि लेइ। ३ परमेस्सर सेनानायकन अउर प्रसासनिक नेतन क छोरि लेइ। परमेस्सर सलाहकारन अउर ओन बुद्धिमान क छोरि लेइ जउन जादू करत हीं अउर भविस्स बतावइ क जतन करत हीं।

४ परमेस्सर कहत ह, “मई जवान बच्चन क ओनका नेता बनाइ देवउं। बच्चन ओन पइ राज करिहीं। ५ हर मनई आपुस में एक दूसर क बिरुद्ध होइ जाइ। नवयुवक बड़के बूढ़न क आदर नाही

करिहीं। साधारण लोग महत्वपूर्ण लोगन क आदर नाही देइहीं।”

६ उ समय, आपन ही परिवारे स कउनो मनई आपन ही कउनो भाई क धरि लेइ। उ मनई आपन भाई स कही, “काहेकि तोहरे लगे एक ठु ओढ़नाबा, तउ तू हमार नेता होब्या। एन सबहिं खण्डरहन क तू नेता बनजा।”

७ किन्तु उ भाई टाड़ होइके कही, “मइँ तू पचन्क सहरा नाही दइ सकत। मोरे घरे काफी भोजन अउ ओढ़ना नाही बाटइ। तू मोका आपन मुखिया नाही बनउब्या।”

८ अइसा एह बरे होइ काहेकि यरूसलेम टोकर खाएस अउर उ बुरा किहस। यहूदा क पतन होइ गवा अउर उ परमेस्सर क अनुसरण करब तजि दिहस। उ पचे जउन कहत ही अउर जउन करत ही उ यहोवा क खिलाफ अहइ। उ पचे यहोवा क महिमा बरे विद्रोह किहन।

९ लोगन क चेहरन पइ जउन भाव अहइँ ओनसे साफ देखाइँ देत ह कि उ सबइ बुरा करम करइ क अपराधी अहइँ। किन्तु उ पचे एन अपराधन क छुपावत नाही अहइ, बल्कि ओन पइ गर्व करत भए आपन पापन क डोंडी पीटत हीं। उ पचे ढीठ अहइँ। उ पचे सदोम नगरी क लोगन जइसे अहइँ। ओनका इ बात क परवाह नाही अहइ कि ओनके पापे क कउन लखत अहइ। इ ओनके बरे बहोत बुरा होइ। आपन ऊपर एतनी बड़की विपद उ पचे खुद बोलाएन ह।

१० अच्छे लोगन क बताइ द्या कि ओनके संग अच्छी बातन घटिहीं। जउन नीक करम उ पचे करत हीं, ओनकर सुफल उ पचे पइहीं। ११ किन्तु बुरे लोगन बरे इ बहोत बुरा होइ। ओन पइ बड़ी विपद टूट पड़ी। जउन बुरे करम उ पचे किहेन ह, ओन सबन बरे ओनका सजा दीन्ह जाइ। १२ मोर लोगन क बच्चन बेरहमी स सतइहीं। ओन पइ मेहररूअन राज करिहीं। हे मोर लोगो, तोहार पचन्क अगुआ तू पचन्क बुरे राहन पइ लइ जइहीं। सही मारग स उ पचे तू पचन्क भटकाइ देइहीं।

आपन लोगन क बारे मैं परमेस्सर क निर्णय

१३ यहोवा आपन लोगन क विरोध मैं मुकदमा लइइ बरे खड़ा होइ। उ आपन लोगन क निआव करइ बरे खड़ा होइ। १४ बुजुर्गन अउ अगुवा

लोग जउन काम किहेन ह यहोवा ओनके बिरुद्ध मुकदमा चलाइ।

यहोवा कहत ह, “तू लोग अंगूरे क बागन क (यहूदा क) बारि डाय़ा ह। तू पचे गरीब लोगन क चिजियन क लइ लिहा अउर उ सबइ वस्तुअन अबहिं भी तोहरे पचन्क घरन मैं अहइँ। १५ मोरे लोगन क सतावइ क अधिकार तू पचन्क कउन दिहस ? गरीब लोगन क मुँहे क बल धूरि मैं ढकेलइ क अधिकार तू पचन्क कउन दिहस ?” मोर सुआमी, सर्वसक्तीमान यहोवा इ सबइ बातन कहे रहा।

१६ यहोवा कहत ह, “सिय्योन क मेहररूअन बहोत घमण्डी होइ गइ अहइँ। उ पचे मूँडी उटाए भए अउर अइसा आचरण करत भए, जइसे उ पचे दूसर लोगन स उत्तिम होइँ, एहर-ओहर घुमति रहत हीं। उ सबइ मेहररूअन आपन आखिन मटकावत रहत हीं तथा आपन गोड़े क पाजेब झंकारत भइ एहर-ओहर टुमकत फिरत हीं।”

१७ सिय्योन क अइसी मेहररूअन क मूँडे पइ मोर सुआमी फोड़न निकारी। यहोवा ओन मेहररूअन क गंजा कइ देइ। १८ उ समय, यहोवा ओनसे उ सब चिजियन छोरी लेइ जउने पइ ओनका नाज रहा : गोड़न क सुन्नर पाजेब, सूरज अउर चाँद जइसे देखाइवाले कंठहार, १९ बुन्दे, कंगना अउर ओढ़नी, २० माथापट्टी, गोड़े क झाँझर, कमरबंद, इत्र क सीसियन अउ ताबीज जेनका उ पचे आपन कंठहारन मैं धारण करत रहिन। २१ मुहरदार अंगूठियन, नाके क बालियन, २२ उत्तिम ओढ़ना, टोपियन, चदरन, बटुअन, २३ दर्पण, मलमले क कपड़न, पगड़ीदार टोपियन अउर लम्बा दुसालन।

२४ उ समय मैं सुगंधित इत्र जउन अबहुँ अच्छा सुगंध देत अहइ, ओकर उ सुगंध सड़ा भवा फफूद क संग दुर्गन्ध मैं बदल जाइ। अब उ पचे कमर-बंध पहिरत हीं, किन्तु उ समय पहिरइ क बस ओनके लगे रस्सन होइहीं। इ समय उ पचे आपन बार मैं सुसोभित जूड़न बाँधत हीं, किन्तु उ समय ओनकर मूँड मुड़वाइ दीन्ह जइहीं। ओनके एक ठु बार तलक नाही होइ। *अब ओनके लगे सुन्नर पोसाकन अहइँ। किन्तु उ समय ओनके लगे सिरिफ सोक वस्त्र होइहीं। ओकर सुन्नरता क चीन्ह दासिता क चीन्ह मैं बदलि जाइ।

२५ तू पचन्क मनइयन तरवारन स काटि जाइ अउर तोहार मेहरारूअन जुद्ध मैं मारि जाइ। २६ नगर दुआर क निअरे सभा ठउरन मैं रोउब

*३ :२४ अनेके ... होइ “इ दिखावत ह कि उ पचे दास होइ जाइ।”

बिलखब अउर दुःख ही फइला होइ। यरूसलेम उ मेहरारू क नाई हर चीज स वंचित होइ जाइ जेकर सब कछू चोर अउ लुटेरन लूट गवा होइ। उ धरती पइ बइठी अउर बिलखी।

१ उ समय, सात सात मेहररूअन एक ठु मनसेधू क दबोच लेइहीं अउर ओहसे कहिहीं, “आपन खाइ क बरे हम आपन रोटियन क जुगाड़ खुद कइ लेब, आपन पहिरइ बरे ओढ़ना हम खुद बनाउब। बस तू हमसे बियाह कइ ल्या। इ सबइ काम अपने बरे हम खुद कइ लेब। बस तू हमका आपन नाउँ द्या। कृपा कइके हमरी सरम पइ पर्दा डाइ द्या।”

२ मुला इ मुसीबत क समइ मँ भी यहोवा क पौधा इस्राएल क सेवकन क खुस करिहीं। इ एक सुन्नर अउ सम्मानित क रास्ट्र होइ। ३ सिय्योन अउर यरूसलेम मँ जिअत बचा भवा सबइ लोग परिवत्तर कहलाउब्या। यरूसलेम मँ उ पचे ही अहइ जेकर नाउँ क जिअत रहइ बरे जिन्नगी क पुस्तक मँ सूचीबंध कीन्ह गवा रहेन।

४ यहोवा सिय्योन क मेहररूअन क असुद्धता क धोइ देइ। यहोवा यरूसलेम स खून क धोइ क बहाइ देइ। यहोवा निआव क चेतना क प्रयोग करी अउर बिना कउनो पच्छपात क निर्णय लेइ। वह दाहक चेतना क प्रयोग करी अउर हर वस्तु क सुद्ध कइ देइ। ५ तब परमेस्सर इ साबित करी कि उ आपन मनइयन क संग अहइ। उ दिन क समय, धुँए क एक बादर क रचना करी अउर रात क समय एक चमचमात लपट स मिली भइ आगी। इ सबइ चीन्ह सिय्योन पर्वते पइ, लोगन क हर सभा क ऊपर अउर उ सहर मँ ओकरे हर भवन क ऊपर परगट होइहीं। सुरच्छा बरे हर मनई क ऊपर एक आवरण छाड़ जाइ। ६ मण्डप क इ आवरण एक ठु सुरच्छा ठउर होइ। इ आवरण लोगन क सूरज क गर्मी स बचाइ। मण्डप क इ आवरण सब प्रकार क बाढ़न अउ बर्खा स बचइ क एक सुरच्छत ठउर होइ।

इस्राएल परमेस्सर क खास उपवन

१ अब मइँ आपन मीत बरे एक ठु गीत गाउब। इ गीत मोरे मीत क अंगूर क बागीचा क बारे मँ अहइ।

ओकरे लगे अंगूर क इ बागीचा बहोत उपजाऊ पहाड़ी पइ अहइ।

२ मोर मीत धरती खोदेस अउ काँकड़ पाथर हटाइके ओका साफ किहेस अउर हुवाँ पइ अंगूरे क उत्तम बेलन रोपि दिहस।

फुन खेत क बीच मँ उ अंगूर क रस निकारइ क कुण्ड बनाएस।

मीत क आसा रही कि हुवाँ उत्तम अंगूर होइहीं। किन्तु हुवाँ जउन अंगूर लाग रहेन उ सबइ बुरा रहेन।

३ तउ परमेस्सर कहेस: “हे यरूसलेम क लोगो, अउर यहूदा क बसइयो,

मोर अउ मोरे अंगूर क बाग क बारे मँ निर्णय करा।

४ मइँ अउर क आपन अंगूर क बाग क बारे कइ सकत रहेउँ?

मइँ उ सब किहेउँ जउन कछू भी मइँ कइ सकत रहेउँ।

मोका उत्तम अंगूरन क लगइ क आसा रही,

किन्तु हुवाँ अंगूर बुरे ही लागेन।

इ अइसा काहे भवा ?

५ “अब मइँ तोहका बताउब कि आपन अंगूर क बगीचा बरे मइँ का कछू करउँ :

उ कँटेहरी झाड़ी जउन खेते क रच्छा करत ह मइँ उखाड़ि देब,

अउर ओन झाड़ियन क आगी मँ बारि देबउँ।

पाथर क परकोटा तोड़िके भहराइ देब।

बगिया क रौंदि दीन्ह जाइ।

६ मइँ अंगूरे क बगीचे क खाली खेते मँ बदली देबउँ।

कउनो पउधन क काटा-छाँटा नाही जाइ

अउर नाही कुदाल स मिटी क खोदी जाइ।

एँह बरे हुवाँ सिरिफ काँटा

अउर खरपतवार उगीहीं।

मइँ बादरन क आदेस देब कि उ सबइ हुवाँ न बरिसइँ।”

७ सर्वसक्तीसाली यहोवा क अंगूरे क बगीचा इस्राएल क रास्ट्र अहइ, अउर अंगूरन क बेलन यहूदा क राजा अहइँ।

यहोवा निआव क आसा किहे रहा,

किन्तु हुवाँ हत्तिरा दबदबा रही।

यहोवा निस्पच्छता क आसा किहस,

किन्तु हुवाँ बस मदद माँगइवालन क रोना रहा जेनके संग जुल्म कीन्ह गवा रहा।

८ सराप ओनका जउन मकान दर मकान लेत ही चला जात ही अउर एक खेत क पाछे दूसर खेत अउर दूसर क पाछे तीसर खेत तब तलक घेरत ही चला जात ही जब तलक कउनो अउर बरे कछू भी जगह नाही बची रहत। अइसे लोगन क इ भूइया मँ अकेले ही रहइ पड़ी। ९ सर्वसक्तीसाली यहोवा क मइँ मोहसे इ कहत भए सुना ह, “अब लखा हुवाँ बहोत सारे भवन अहइँ किन्तु मइँ तोहसे

कसम लडके कहत हउँ कि उ सब सबहिं भवन नस्त कइ दीन्ह जइहीं। अबहिं हुवाँ बड़के बड़के भव्य भवन अहइँ किन्तु उ सबइ भवन उजड़ जइहीं।^{१०} उ समय दस एकड़ भुइँया क अंगूरन स एक ही बेरल दाखरस तइयार होइ, अउर दस बोरी बिअन स एक बोरी अनाज पइदा होइ।”

^{११} तू पचन्क धिक्कार अहइ, तू लोग अलख भिन्सारे उठत ह अउर अब सराब पिअइ क ताक मँ रहत ह। राति क देर तलक जागत भए दाखरस पिअके धुत होत अह।^{१२} तू आपन प्रतिभोज मँ दाखरस पीअत ह अउर वीणा, ढोल, बाँसुरी अउर अइसे ही दूसर बाजन यत्न स संगीत सुनत ह तू पचे ओन बातन पइ दृस्टि नाहीं डउत्या जेनका यहोवा किहस ह! तू उ चिजियन क भी नाहीं लखेस ह जेका यहोवा आपन हाथन स बनाएस ह। एँह बरे तू लोगन बरे इ बहोत बुरा होइ।

^{१३} यहोवा कहत ह, “मारे लोगन क बंदी बनाइके कैदी क रूप मँ लइ जावा जाइ, काहेकि उ पचे मोका नाहीं जानतेन। अउ महत्वपूर्ण लोग भूख स झुझत रही। अउर आम लोग बहोत पियासा होइ जइहीं।^{१४} फुन ओनकर मउत होइ जाइ अउर सियोल, जियादा स जियादा लोगन क निगलि जाइ। मउत क उ परदेस आपन असीम मुँह पसारी अउर उ पचे सबहिं महत्वपूर्ण अउर साधारण लोग अउर हुल्लड़ मचावत उ पचे सबहिं खुसियन मनावत अउर सियोल मँ धँसि जइहीं।”

^{१५} ओन लोगन क नीच देखाँवा जाइ। उ सबइ बड़के लोग आपन मूँड़ नीचे लटकाए धरती कइँती लखिहीं।^{१६} सर्वसक्तीसाली यहोवा निआव क संग निर्णय देइ, अउर लोग जान लेइहीं कि उ महान अहइ। पवित्तर परमेस्सर ओन बातन क करी जउन उचित अहइँ, अउर लोग ओका आदर देइहीं।^{१७} इस्राएल क लोगन स परमेस्सर ओनका आपन देस छोड़वाइ देइ। धरती वीरान होइ जाइ। भेड़िन जहाँ चइहीं, चली जइहीं। उ धरती जउन कबहुँ धनवान लोगन क रही, ओह पइ भेड़िन घूमा करिहीं।

^{१८} ओन लोगन क बुरा होइ, उ पचे आपन अपराध अउर आपन पापन क आपन पाछे अइसे ढोवत अहइँ जइसे लोग रस्सन स छकड़न हींचत हीं।^{१९} ओह, तू कहत हीं, “ओका उ हाली करी द्या जे उ करइ बरे जात अहा, ताकि हम एकाँ लख सकत हीं! यहोवा जउन चाहत ह ओका होइ द्या ताकि हम जान सकि कि असल मँ इ का अहइ।”

^{२०} ओन लोगन क बुरा होइ जउन कहा करतेन कि अच्छी बातन बुरी अहइँ, अउर बुरी बातन

अच्छी अहइँ। उ सबइ लोग सोचा करत हीं कि प्रकास अँधेरा बाटइ, अउर अँधेरा प्रकास अहइ। ओन लोगन क विचार अहइ कि कड़ुवा, मीठ अहइ अउर मीठ कड़ुवा अहइ।^{२१} बुरा होइ ओन अभिमानियन क जउन खुद क बहोत चतुर मानत हीं। वे पचे सोचा करत हीं कि उ पचे बहोत बुद्धिमान अहइ।^{२२} बुरा होइ ओनकर जउन दाखरस पिअइ बरे जाना माना जात हीं। दाखरस क मिस्रन मँ जेनका कुसलता हासिल अहइ।^{२३} अउर यदि तू पचे ओन लोगन क रिस्वत दइ द्या तउ उ पचे एक अपराधी क भी छोड़ देइहीं। किन्तु उ पचे अच्छे मनई क भी निस्पच्छता स निआव नाहीं होइ देतेन।^{२४} अइसे लोगन क साथ बुरी बातन घटिहीं। ओनकर सन्तान पूरी तरह वइसे ही बर्बाद होइ जइहीं जइसे घास फूस आगी मँ बारि दीन्ह जात हीं। ओनकर सन्तान उ कंद मूल क तरह नस्त होइ जइहीं जउन मरिके धूरि बन जात ह। ओनकर सन्तान अइसे बर्बाद कइ दीन्ह जइहीं जइसे आगी फूलन क बारि डावत ह अउर ओकर राखी हवा मँ उड़ि जात ह।

अइसे लोग सर्वसक्तीसाली यहोवा क उपदेसन क पालन करइ स इन्कार कइ दिहन ह। ओ लोग इस्राएल क पवित्तर परमेस्सर क कथन स बइर किहन ह।^{२५} एह बरे यहोवा आपन लोगन स बहोत जियादा कोहाइ गवा ह। यहोवा आपन हाथ उटाएस अउर ओनका दण्ड दिहस। हिआँ तक कि पवंत भी डेराइ ग रहेन। गलियन मँ कूड़न क तरह ल्हासन बिच्छी पड़ी रहिन। किन्तु यहोवा अबहिं भी कोहान अहइ। ओकर हाथ लोगन क दण्ड देइ बरे अबहिं भी उठा भवा बाटइ।

इस्राएल क सजा देइ बरे
परमेस्सर फउजन लिआइ

^{२६} लखा! परमेस्सर दूर देसन क लोगन क संकेत देत अहइ। परमेस्सर एक ठु झण्डा उठावत अहइ, अउर ओन लोगन क बोलावइ बरे सीटी बजावत अहइ।

कउनो दूर देस स दुस्मन आवत अहइ। उ दुस्मन हाली ही देस मँ घुसि आइ। उ पचे बड़ी तेजी स अगवा बढ़त अहइँ।^{२७} दुस्मन कबहुँ थका नाहीं करत या कबहुँ नीचे नाहीं गिरत। दुस्मन कबहुँ न तउ ओघात ह अउर न ही सोवत ह। ओनकर हथियारन क कमर बंद सदा कसा रहत हीं। ओनकर जूतन क तस्मन कबहुँ टूटतेन नाहीं ह।^{२८} दुस्मन क बाण पैना अहइँ। ओनकर सबहिं धनुस बाण छोड़इ बरे तइयार अहइँ। ओनकर

घोड़न क खुर चट्टानन जइसे कठोर अहइँ। ओनकर रथन क पाछे धूरि क बादर उठा करत ही।

२९ दुस्मन गरजत ह, अउर ओनकर गरजब सेर क दहाड़ क जइसा अहइ। उ एतना तीव्र अहइ जेतना जवान सेर क गरजब। दुस्मन जेनके खिलाफ जुद्ध करत अहइ ओनके ऊपर गुर्गत ह अउर ओन पइ झपट पड़त ह। उ ओनका हुवाँ स घसीट लइ आवत ह अउर हुवाँ बचावइवाला कउनो नाही होत। किन्तु ओनके बच पावइ क कउनो वजह नाही। ३० तउ, उ दिन उ “सिंह” समुद्र क तरगन क नाई दहाड़न मारी अउर बंदी बनाए गए लोग धरती ताकत रहि जइहीं, अउर फुन हुवाँ अँधेरा अउर दुःख ही रहि जाइ। इ घने बादर मँ समूचइ प्रकास अँधेरा मँ बदलि जाइ।

यसायाह क नबी बनइ बरे परमेस्वर क बुलावा

६ १ जउने बरिस उज्जिय्याह क मउत भइ, मइँ आपन अद्भुत सुआमी क दर्सन किहेउँ। उ एक बहोत ऊँच सिंहासन पइ विराजमान रहा। ओकर लम्बे चोगे स मंदिर भर गवा रहा। २ यहोवा क चारिहुँ कइँती साराप सरगदूतन खड़ा रहेन। हर साराप सरगदूतन क छः छः पंख रहेन। एनमाँ स दुइ पंखन क प्रयोग उ पचे आपन मुँह क ढकइ क बरे किया करत रहेन अउर दुइ पंखन क प्रयोग आपन गोड़न क ढकइ बरे करत रहेन अउर दुइ पंखन क उ पचे उड़इ क कामे मँ लिआवत रहेन। ३ हर सरगदूत दूसर सरगदूत स गोहराइ गोहराइ के कहत रहेन, “पवित्तर, पवित्तर, पवित्तर सर्वसक्तीसाली यहोवा परम पवित्तर अहइ। यहोवा क महिमा सारी धरती पइ फइली अहइ।” सरगदूतन क वाणी क स्वर बहोत ऊँच रहेन। ४ सरगदूतन क आवाज स दुआरे क चौखटन हिल उठिन अउर फुन मंदिर धुआँ स भरइ लाग।

५ मइँ बहोत डेरा गएउँ। मइँ कहेउँ, “अरे, नाही। मइँ तउ बर्बाद होइ जाब। मइँ ओतँना सुद्ध नाही हउँ कि परमेस्वर स बातन करउँ अउर मइँ अइसे लोगन क बीच रहत हउँ जउन ओतने सुद्ध नाही अहइँ कि परमेस्वर स बातन कइ सकइँ। किन्तु फुन भी मइँ उ राजा, सर्वसक्तीमान यहोवा क दर्सन कइ लिहेउँ ह।”

६ हुवाँ वेदी पइ आगी बरत रही। ओन साराप सरगदूतन मँ स एक उ आगी मँ स चिमटा स

एक दहकत भवा कोइला उठाइ लिहेउँ। ७ तब उ दहकत भए कोइला स मोरे मुँह क धुआइ दिहस अउर कहेस, “जब इ दहकत कोइला तोहरे ओठन क छुइ, तउ तू जउन बुरे करम किह्या ह, उ सबइ तोहमाँ स खतम होइ जाइ अउर तोहार पाप धोइ जाइ।”

८ एकरे पाछे मइँ आपन यहोवा आवाज सुनेउँ। यहोवा कहेस, “मइँ केका पठइ सकत हउँ? हमरे बरे कउन जाइ?” तउ मइँ कहेउ, “मइँ हिआँ हउँ। मोका पठवा।”

९ फिन यहोवा बोला, “जा अउर लोगन स कहा, ‘धियान स सुना, किन्तु समुझा जिन। निआरे स लखा, किन्तु बूझा जिन।’ १० लोगन क लोगन क समझइ क छुमता क कठिन कइ द्या। ओनका सुनन मँ मुसकिल कइ देइ अउर लखइ नाही सकी। जदि तू अइसा नाही करव्या, तउ होइ सकत ह उ आपन आँखन स लखि सकत ही, आपन कानन स सुनि सकत ही, अउर आपन हिरदइ स समुझ सकत ही अउर तउ उ पचे पछुतावा करी अउर चिकित्सा पाइ।”

११ मइँ फुन पूछेउँ, “सुआमी, मइँ अइसा कब तक करत रहउँ?”

यहोवा जवाब दिहेस, “तू तब तलक अइसा करत रहा, जब तलक देस उजरिके बर्बाद न होइ जाइ।”

१२ यहोवा लोगन क दूर चले जाइ पइ मजबूर करी। इ देस मँ बड़के-बड़के छेत्र उजड़ जइहीं। १३ उ देस मँ सिरिफ दस प्रतिशत लोग ही बचा रहि जइहीं, अउर दुस्मन ओका बर्बाद करइ बरे फुन स आइ। इ सबइ लोग बँझ बूच्छ क नाई होइहीं। जब उ काट दिहे जाइ अउ ओकर सिरिफ टूँठ बचा रहि जात ह, उ टूँठ फुन स नवा टहरी उगात ह अउर एकाँ डार बनाइ ड़ावत ह। इ टूँठ पवित्तर बिया स बढेस ह।

आराम पइ बिपत्ति

७ १ आहाज, योताम क पूत रहा। योताम उज्जिय्याह क पूत रहा। ओनहीं दिनन मँ रसीन आराम क राजा भवा रहा अउर इस्राएल पइ रमल्ल्याह क पूत पेकह राजा रहा। जउने दिनन यहूदा पइ आहाज सासन करता रहा, रसीन अउ पेकह जुद्ध बरे यरूसलेम पइ चढ़ बइटेन। किन्तु उ पचे इ सहर क हराइ नाही सकेन।

१६ :१३ दुस्मन ... आइ या, “होइ सकत ह उ वापिस आइ क कोसिस करी, मुला देस बर्बाद करी दीन्ह जाइ।”

२ दाऊद क साही घराना क इ सँदेसा मिला, “आराम अउ इस्राएल क फउजन आपुस में मिली गए रहेन अउर एक संग सिबिर लगाएस ह।”

राजा आहाज जब इ खबर सुनेस तउ उ अउर ओकर पूरजा बहोत डेराइ गएन। उ पचे आँधी में हिलत भए जंगल क वृच्छन क नाई डर स काँपइ लागेन।

३ तबहिं यसायाह स यहोवा कहेस, “तोहका अउर तोहार पूत सार्यासूब क आहाज क लगे जाइके बतियाइ चाही। तू उ ठउरे पइ आवा, जहाँ ऊपर क तलाव में पानी गिरा करत ह। इ उ गली में अहइ जउन धोबी-घाट कइँती जात ह।

४ “आहाज स जाइके कइया, होसियार रहा, किन्तु साथ ही सान्त भी रहा। डेराअ जिन। ओन दुइनउं मनइयन रसीन अउ रमल्याह क पूतन स जिन डेराअ। उ पचे दुइ मनई तउ बरी भइ काठन क नाई अहइ। पहिले उ पचे दहका करत रहेन किन्तु अब उ पचे, बस धुआँ मात्र रहि ग अहइ। रसीन, आराम अउ रमल्याह क पूत कोहान अहइ।

५ आराम, एप्रैम क प्रदेसन अउ रमल्याह क पूत तोहरे खिलाफ सबइ योजना बनाइ रखे अहइ। उ पचे कहेन, ६ “हमका यहूदा पइ चढाई करइ चाही। हम अपने बरे ओका बाँटि लेब। हम ताबेल क पूत क यहूदा क नवा राजा बनाउब।”

७ मोर सुआमी यहोवा क कहब बाटइ, “ओकर योजना सफल नाहीं होइ। उ कबहुँ पूरी नाहीं होइ। ८ जब तलक दमिस्क क राजा रसीन अहइ, तब तलक इ नाहीं घटी। इस्राएल अब एक ठु रास्टर अहइ किन्तु पैसंठ बरिस क भीतर इ एक रास्टर नाहीं रही। ९ जब तलक इस्राएल क राजधानी सोमरीन अहइ अउर जब तलक सोमरोन क राजा रमल्याह क पूत बाटइ तब तलक ओनकर सबइ योजना सफल नाहीं होइहीं। जदि इ संदेस पइ तू बिस्सास नाहीं करब्या तउ लोग तोह पइ बिस्सास नाहीं करिहीं।”

इम्मानुएल—परमेस्सर हमरे संग अहइ

१० यहोवा आहाज स आपन बात जारी राखत भए कहेस, ११ यहोवा बोला, “इ सबइ बातन फुरइ अहइ, एका खुद साबित करइ बरे कउनो संकेत माँग ल्या। तू जइसा भी चाहा वइसा संकेत माँग सकत ह। उ संकेत चाहे गहिरे मउत क पहँटा स होइ अउर चाहे आकासन स भी ऊँच कउनो ठउरे स।”

१२ किन्तु आहाज कहेस, “सबूत क रूप मैं मई कउनो संकेत नाहीं माँगब। मई यहोवा क परीच्छा नाहीं लेब।”

१३ तब यसायाह कहेस, “हे दाऊद क साही परिवार, होसियार होइके सुना। तू लोगन क धीरज क परीच्छा लेत अहा। का इ तोहरे बरे काफी नाहीं अहइ, अब तू मोर परमेस्सर क परीच्छा लेत अहा? १४ एह बरे, मोर सुआमी परमेस्सर तू पचन्क इ संदेसा देब:

लखा जवान लड़की क! उ गर्भवती अहइ।

उ एक ठु पूत क जनम देइ।

उ इ पूत क नाउं इम्मानुएल राखी।

१५ इम्मानुएल दहिउ अउ सहद खाइ।

उ इहइ तरह रही जब तलक उ इ नाहीं सीख जात उत्तम क चुनब अउर बुरे क नकारब।

१६ किन्तु जब तलक उ भला क चुनब अउर बुरे क तजब जानी

एप्रैम अउ आराम क धरती उजाइ होइ जाइ।

“आजु तू ओन दुइ राजा लोगन स डेरात अहा।

१७ किन्तु तोहका यहोवा स डेराइ चाही। काहेकि यहोवा तोह पइ विपत्ति क समय लिआवइवाला अहइ। उ सबइ विपत्तियन तोहरे लोगन पइ अउर तोहरे पचन्क पिता क परिवारे क लोगन पइ अइहीं। विपत्ति क इ समय ओन सबहिं विपत्तियन मैं जियादा बुरा होइ जउन समइ एप्रैम यहूदा स अलग भवा ह, तब स अबइ तलक घटी बाटइ। एकरे बरे परमेस्सर का करी? परमेस्सर अस्सूर क राजा क तोहसे लड़ावइ बरे लिआइ।

१८ “उ समय, यहोवा ‘माखियन’ क बुलाइ। (फिलहाल उ सबइ माखियन मिस्र क जलधारन क निअरे अहइ।) अउर यहोवा ‘मधुमाखियन’ क बुलाइ। (फिलहाल उ सबइ मधुमाखियन अस्सूर देस मैं रहत हीं।) इ सबइ दुस्मन तोहरे देस मैं अइहीं। १९ इ सबइ दुस्मन चट्टानी छेत्रन मैं, रेगिस्ताने मैं जल धारन क निअरे झाड़ियन क आस-पास अउर पानी पिअइ क जगहन क इर्द-गिर्द आपन डेरन डइहीं। २० यहोवा यहूदा क दण्ड देइ बरे अस्सूर क प्रयोग करी। अस्सूर उस्तरा क नाई प्रयोग करी बरे भाड़े पइ लेइ जाइ। इ अइसा होइ जइसे यहोवा यहूदा क मूँड अउ गोड़े क बाल क मूँडन करत होइ। इ अइसा होइ जइसे यहोवा यहूदा क दाढ़ी मूँडत होइ।

२१ “उ समय, एक मनई बस एक जवान गाय अउ दुइ भेड़न ही बस जिअत रखि पाइ। २२ उ

सबइ सब एतना दूध देइहीं जउन उ मनई क देहिउ खाइ बरे काफी होइ। उ देस मँ बाकी बचा भवा हर मनई देहिउ अउर सहृद ही खावा करी।^{२३} आजु इ धरती पइ हर खेते मँ एक हजार अंगूरे क बेलन अहई। अंगूरे क हर बगिया क कीमत एक हजार चाँदी क सिक्का क बराबर अहई। किन्तु एन खेतन मँ खरपतवार अउर काँटन भरि जइहीं।^{२४} इ धरती जंगली होइ जाइ अउर ओकर प्रयोग एक सिकारघर क रूप मँ ही होइ सकी।^{२५} एक समय रहा जब एन पहाड़ियन पइ लोग काम किया करत रहेन अनाज पइदा करत रहेन। किन्तु उ समय लोग हुआँ नाहीं जावा करिहीं। उ धरती खरपतवारन अउर काँटन स भरि जाइ। ओन ठउरन पइ बस भेड़िन अउर मवेशी ही घूमा करिहीं।”

अस्सूर हाली ही आइ

८ ^१यहोवा मोसे कहेस, “लिखइ बरे माटी क बड़की स तख्ती ल्या अउर ओह पइ सुआ स इ लिखा, महेशालाल्हशबज (अर्थात् ‘हिआँ हाली ही लूटमार अउ चोरियन होइहीं।”)

^२मई कछु अइसे लोग बटोरेउँ जिन पइ साच्छी होइ बरे बिस्सास कीन्ह जाइ सकत रहा। इ सबइ लोग रहेन याजक ऊरिय्याह जकर्याह जउन जेबरेक्याह क पूत रहा। उ लोग मोका निहारत रहेन जउन टेम मँ मई एन बातन क लखे रहेन।

^३फुन मई ओन नबिया क लगे गएँ। मोर ओकरे संग संग रहइ क पाछे, उ गर्भवती भइ अउर ओकरे एक पूत भवा। तब यहोवा मोसे कहेस, “तू बेटवा क नाउँ महेशालाल्हशबज राखा।^४ काहेकि एहसे पहिले कि बचवा, ‘महतारी’ अउर ‘बाप’ कहब सीखइ, ओहसे पहिले ही दमिस्क अउ सोमरोन क समूचइ धनदौलत क छोरि लेइ अउर ओन वस्तुअन क अस्सूर क राजा क दइ देइ।”

^५यहोवा मोसे फुन कहेस। ^६मोर सुआमी कहेस, “इ सबइ लोग सीलोह क तालाब स सान्त पानी क लेइ स इन्कार करत हीं। इ सबइ लोग रसीन ^७अउ रमल्ल्याह पूत क असान्त पानी क लेइ क प्राथमिकता दिहिस। ^८किन्तु एह बरे मई, यहोवा, अस्सूर क राजा अउर ओकर समूची सक्ति क तोहरे विरोध मँ लइके आउब। उ पचे परात नदी क खउफनाक बाढ़ क तरह अइहीं। इ अइसा होइ जइसे किनारन क तोड़त बोरत नदी उफना पड़त ह। ^९जउन पानी उ नदी स उफनिके

निकरी उ यहूदा मँ भरि जाइ अउर यहूदा क प्रायः बोर देइ।

“इम्मानूएल, इ बाढ़ क पानी तब तलक फइलत चली जाइ जब तलक तोहरे पचन्क समूचइ देस मँ बाढ़ न आ जाइ।”

^{१०}हे जातियो, तू सबहिं जुद्ध बरे तइयार रहा।

तू पचन्क हराइ दीन्ह जाइ।

अरे, सुदूर क देसो, सुना,

तू सबहिं जुद्ध बरे तइयार रहा।

तू पचन्क हराइ दीन्ह जाइ।

^{११}आपन जुद्ध क जोजनन क रचा।

तोहार जोजनन हराइ दीन्ह जइहीं।

तू अपनी फउजन क हुकुम द्या।

तोहार उ सबइ हुकुम बेकार होइ जइहीं।

काहेकि परमेस्सर हमार संग अहइ।

यसायाह क चितउनी

^{१२}यहोवा आपन महान सक्ति क संग मोसे कहेस। यहोवा मोका चितउनी दिहिस कि मई एन दूसर लोगन क नाई न बनउँ। यहोवा कहेस, ^{१३}“तू पचन क इ नाहीं सोचइ चाही कि इ सडयंत्र सिरिफ इ कारण स रचा गवा अहई कि लोग अइसा कहत ह! नाहीं, तू पचन क उ बातन स डेरात नाहीं चाही जे बातन स उ पचे डेरात अहई।”

^{१४}तू पचन्क बस सर्वसक्तीमान यहोवा स डेराइ चाही। तू पचन्क बस उहइ क आदर करइ चाही। तू पचन्क उहइ स डेराइ चाही। ^{१५}जदि तू पचे यहोवा क आदर रखब्या अउर ओका पवित्र मनब्या तउ उ तोहरे पचन बरे एक ठु सुरच्छित ठउर होइ। किन्तु तू पचे ओकर आदर नाहीं करल्या। एह बरे परमेस्सर एक ठु अइसी चट्टान होइ ग अहइ जेकरे ऊपर तू लोग भहराब्या। उ एक अइसी चट्टान होइ ग अहइ जेह पइ इस्राएल क दुइ परिवार टोकर खइहीं। यरूसलेम क सबहिं लोगन क फँसावइ बरे उ एक फन्दा बन गवा ह।

^{१६}(इ चट्टान पइ बहोत स लोग भहरइहीं। उ पचे गिरहीं अउर चकनाचूर होइ जइहीं। उ पचे जाल मँ पड़ितीं अउर धइ लीन्ह जइहीं।)

^{१७}यसायाह कहेस, “एक ठु समझौता करा अउर ओह पइ मोहर लगाइ द्या। भविस्स बरे, मोरे उपदेसन क रच्छा करा। मोर चलन क लखत भाए क टैम ही अइसा करा।” ^{१८}उ वाचा इ अहइ:

“मई सहायता पावइ बरे यहोवा क प्रतीच्छा करब।

^{१६} : ६ रसीन आराम क एक राजा। इ लगभग ७४०-७३१ इ. पू. सासन किहेस।

यहोवा याकूब क घराने स लज्जित अहइ ।

उ ओनका लेखइ तलक नाही चाहत ह ।

किन्तु मई यहोवा क प्रतीच्छा करब ।

उ हमार रच्छा करी ।”

१८ “मई अउर मोर बच्चा इस्राएल क लोगन बरे संकेत अउर प्रमाण अहई। हम उ सर्वसक्तीमान यहोवा क जरिये पठवा ग अहइ, जउन सिय्योन पर्वते पइ रहत ह ।”

१९ कछू लोग कहा करत हीं, “भविस्स बतावइवालन अउर जादूगान स पूछा, का करब अहइ ?” (इ सबइ भविस्स बतावइवालन अउर जादूगर फुस-फुसाइके बोलत हीं । इ सबइ लोगन पइ इ प्रभाव डावइ बरे कि ओनके लगे अर्न्तदृष्टि अहई, उ पचे चुपचाप बातन करत हीं ।) किन्तु मई तू पचन्क बतावत हूँ कि लोगन क आपन परमेस्सर स सहायता माँगइ चाही । उ पचे भविस्स बतावइवालन अउर जादूगर मरे भए लोगन स पूछिके बतावत हीं कि का करइ चाही ? किन्तु भला जिअत लोग मरे भएन स कउनो बात काहे पूँछइ । २० तू पचन्क सिच्छन अउर वाचा क अनुसार चलइ चाही । जदि तू पचे एन हुकुमन क पालन नाही करब्या तउ होइ सकत ह तू गलत हुकुमन क पालन करइ लागा । (इ सबइ हुकुमन उ सबइ अहई जउन जादूगरन अउ भविस्स बतावइवालन क जरिये मिलत हीं । इ सबइ हुकुमन बेकार अहई । ओन हुकुमन पइ चलिके तू पचन्क कछू नाही मिली ।) २१ जदि तू पचे ओन गलत हुकुमन पइ चलब्या, तउ तोहरे पचन्क देस पइ विपत्ति आइ अउर भूखमरी फइली । लोग भूखा मरिहीं । फुन उ पचे कोहाइ जइही अउर आपन राजा अउर आपन देवतन क खिलाफ बातन कहिहीं । एकरे पाछे उ पचे मदद बरे परमेस्सर कईती निहरिहीं । २२ अगर आपन देस मँ उ पचे चारिहूँ तरफ लखिहीं तउ ओनका चारिहूँ कईती विपत्ति अउर चिन्ताजनक अँधियारा हीं देखाइ देइ । लोगनक उ अंधकार स भरा दुःख ओनका देस तजइ पइ मजबूर करी अउर उ सबइ लोग जउन उ अँधेरे मँ फँसा होइहीं, आपन आपका ओहसे अजाद नाही कराइ पइहीं ।

एक नवा दिन आवइ क अहइ

१ पहिले लोग सोचा करत रहेन कि जबूलन अउर नफ्ताली क धरती महत्वपूर्ण नाही अहइ । किन्तु पाछे परमेस्सर उ धरती क महान बनाइ । समुद्र क लगे क धरती पइ, यरदन नदी क पार अउ गलील मँ गैर यहूदी लोग रहत हीं ।

२ जदपि आनु इ सबइ लोग अंधकार मँ निवास करत हीं, किन्तु एनका महान प्रकास रूप मँ दर्सन होइ । इ सबइ लोग एक अइसे अँधियारा मँ रहत हीं जउन मउत क देस क नाई अहइ । किन्तु उ “अद्भुत जोति” ओन पइ प्रकासित होइ ।

३ तू इ जाति क बढ़ोतरी करब्या, का तू नाही करब्या ? तू ओकर खुसहाली क बढ़ाउब्या, का इ सही नाही अहइ ? इ सबइ लोग तोहार मौजूदगी मँ अइसे ही खुस होइ जइसे लोग कटनी क समय पइ खुस होत ह, या इ सबइ वइसी ही खुस होइ जइसी जुद्ध मँ लूटा भवा चिजिनन क आपुस मँ बाँटइ क समय मँ खुसी मनावत हीं । ४ अइसा काहे होइ ? काहेकि तू पचन्क इ भारी जूए क तोड़ी देब्या जउन अत्याचारी लोग तोहार कंधा पइ धरेस ह । तू पचे एकाँ वइसा ही हराउब्या जइसा तू पचे मिद्यानियन क हराए रह्या !

५ हर उ कदम जउन जुद्ध मँ आगे बढ़ा, बर्बाद कइ दीन्ह जाइ । हर उ वर्दा जेइ पउ लहू क धब्बन बाटेन, बर्बाद कइ दीन्ह जाइ । इ सबइ वस्तुअन आगी मँ झोंकि दीन्ह जइहीं । ६ इ सब कछू तब घटी जब उ बिसेस बच्चा क जनम होइ । परमेस्सर हमका एक ठु पूत प्रदान करी । इ पूत लोगन क अगुवाइ बरे उत्तरदायी होइ । ओकर नाउँ होइ : “अद्भुत, उपदेसक, सामर्थी परमेस्सर, पिता चिर अमर अउ सान्ति क राजकुमार ।” ७ ओकरे राज्ज मँ सक्ति अउर सान्ति क निवास होइ । दाउद क बंसज, उ राजा क राज्ज क लगातार विकास होत रही । उ राजा नेकी अउ निस्पच्छ निआव क आपन राज्ज क सासन मँ हमेसा हमेसा उपयोग करत रही ।

उ सर्वसक्तीमान यहोवा आपन प्रजा स गहिर पिरम राखत ह अउर ओकर इ गहिर पिरम ही ओहसे अइसे काम करावत ह ।

परमेस्सर इस्राएल क सजा देइ

८ याकूब क लोगन क खिलाफ मोर यहोवा एक आगया दिहेस । इस्राएल क खिलाफ दीन्ह गइ उ आगया क पालन होइ । ९ तब एपरैम क हर मनई क अउर हिआँ तलक कि सोमरोनक मुखिया लोगन क इ पता चलि जाइ कि परमेस्सर ओनका सजा दिहे रहा ।

आजु उ सबइ लोग अभिमानी अउ बड़बोला अहई । उ सबइ लोग कहा करत हीं, १० “होइ सकत ह इ सबइ ईटन भहराइ जाइ किन्तु हम एकर अउर जियादा मजबूत पाथरन स निर्माण करब । सम्भव अहइ इ सबइ नान्ह नान्ह बूच्छ काट गिराव

जाइँ। किन्तु हम नवा नवा वृच्छ खड़ा कइ देब अउर इ सबइ वृच्छ बिसाल तथा मजबूत वृच्छ होइहीं।”

११ तउ यहोवा इस्राएल क लोगन क खिलाफ जुद्ध करइ बरे हुसकाइ। यहोवा रसीन क सत्रुअन क ओनकर विरुद्ध लइ आई। १२ यहोवा पूरब स आराम क लोगन क अउ पच्छिम स पलिस्तियन क लिआइ। उ सबइ सत्रु आपन फउज स इस्राएल क हराइ देइहीं। किन्तु परमेस्सर इस्राएल स तब भी कुपित रही। यहोवा तब भी लोगन क सजा देइ क तत्पर रही।

१३ परमेस्सर लोगन क सजा देइ, किन्तु उ पचे फुन भी पाप करब नाहीं छोड़िहीं। उ पचे परमेस्सर कइती नाहीं मुड़िहीं। उ पचे सर्वसक्तिमान यहोवा क अनुसरण नाहीं करिहीं। १४ तउ यहोवा इस्राएल क मूड अउ पूँछ काट देइ। एक ही दिन मैं यहोवा ओकर साखा अउर ओकरे तने क लइ लेइ। १५ (हिआँ मूँड क अरथ अहइ अग्रज तथा महत्वपूर्ण अगुवा लोग अउर पूँछ स अरथ अहइ अइसे नबी जउन झूठ बोला करत हीं।)

१६ उ सबइ लोग जउन अगुवाइ करत हीं ओनका बुरे मारग पइ लइ जात हीं। जउन लोग ओनके पाछे चलत हीं, बर्बाद कइ दीन्ह जइहीं। १७ इ सबइ सबहिं लोग दुस्त अहइँ। एह बरे यहोवा एन युवकन स खुस नाहीं अहइ। यहोवा ओनकर राँड अउरत अउ ओनकर अनाथ लरिकन पइ दाय्या नाहीं करी। काहेकि इ सबइ लोग दुस्त अहइँ। इ सबइ लोग अइसे काम करत हीं जउन परमेस्सर क खिलाफ अहइँ। इ सबइ लोग झूठ बोलत हीं। तउ परमेस्सर एन लोगन क बरे कुपित बना रही अउ सजा देत रही।

१८ बुराई एक टु छोटकी सी आगी अहइ, आगी पहिले घास फूस अउर काँटन क बारत ह, फुन उ बड़की बड़की झाड़ियन अउ जंगल क बारइ लागत ह अउर अंत मैं जाइके उ बियापक आगी का रूप लइ लेत ह अउर हर वस्तु धुँआ बनिके ऊपर उड़ि जात ह।

१९ सर्वसक्तिमान यहोवा कुपित अहइ। एह बरे इ पूरेस भसम होइ जाइ। उ आगी मैं सबहिं लोग भसम होइ जइहीं। कउनो मनई आपन भाई तलक क बचावइ क जतन नाहीं करी। २० तब ओनके आस-पास, जउन भी कछू होइ, उ पचे ओका जब दाहिन कइती लेइहीं, या बाई कइती स लेइहीं, भूखा ही रइहीं। फुन उ सबइ लोग आपुस मैं आपन ही परिवार क लोगन क खाइ लगिहीं। २१ (अर्थात् मनस्से, एप्रेम क खिलाफ लड़ी अउर एप्रेम

मनस्से क खिलाफ लड़ाइ करी अउर फुन दुइनउँ ही यहूदा क खिलाफ होइ जइहीं।)

यहोवा इस्राएल स अबहिं भी कोहान अहइ। यहोवा ओकर लोगन क सजा देइ बरे अबहिं भी तत्पर अहइ।

२० ओन नेम बनावइवालन क लखा अउर जउन अनिआव स भरा नेम बनाइके लिखत हीं। अइसे नेम बनावइवाले अइसे नेम बनाइके लिखत हीं जेहसे लोगन क जिन्नगी दूभर होत ह। २ उ पचे गरीब लोगन क खिलाफ नेम बतावइ बरे उचित मार्ग स हटत ही। उ पचे राँड क जब्त करत हीं अउर अनाथन क हिआँ चोरी करत हीं।

३ अरे ओ, नेम क बनावइवालो, जब तू पचन्क, जउन काम तू पचे किहा ह, ओनकर हिसाब देइ क होइ तब तू पचे का करब्या? सुदूर देस स तोहार पचन्क बिनास आवत अहइ। मदद बरे तू पचे केकरे लगे दउड़ब्या? तोहार पचन्क धन अउर तोहार पचन्क सम्पत्ति तोहार सबन्क रच्छा नाहीं करि पइहीं। ४ तू पचन्क एक टु बंदी क नाई खाले निहुरइ ही होइ। तू पचे मुर्दा क नाई धरती मैं भहराइके परणाम करब्या किन्तु ओहसे तू पचन्क कउनो मदद नाहीं मिली। परमेस्सर तब भी कुपित रही। परमेस्सर तू पचन्क दण्ड देइ बरे तब भी तत्पर रही।

५ परमेस्सर कही, “मई एक छड़ी क रूप मैं अस्सूर क प्रयोग करब। मई किरोध मैं भरिके इस्राएल क सजा देइ बरे अस्सूर क प्रयोग करब। ६ अइसे लोगन क खिलाफ, जउन पाप करम करत ही जुद्ध करइ बरे मई अस्सूर क पठउब। मई ओन लोगन स कोहान हउँ अउर ओन लोगन स जुद्ध करइ बरे मई अस्सूर क आदेस देब। अस्सूर ओन लोगन क हराइ देइ अउर फुन ओनसे कीमती वस्तुअन छोरी लेइ। अस्सूर बरे इस्राएल गलियन मैं पड़ी उ धूरि जइसा होइ जेहसे उ आपन ओइन तले रउँदी।

७ “किन्तु अस्सूर इ नाहीं समुझत ह कि मई ओकर प्रयोग करब। उ इ नाहीं सोचत कि उ मोर एक साधन अहइ। अस्सूर तउ बस दूसर लोगन क नस्ट करइ चाहत ह। अस्सूर की तउ मात्र इ जोजना अहइ कि उ बहोत स जातियन क नस्ट कइ देइ। ८ अस्सूर आपन मने मैं कहत ह, ‘मोर सबहिं राजकुमार राजा लोगन क समान अहइँ। ९ कलनो नगरी कर्कमास क जइसी अहइ अउर हमात नगर अर्पद नगर क जइसा अहइ। सीमरोन क नगरी दमिस्क नगर क जइसी अहइ। १० मई एन सबहिं बुरे राजजन क हराइ दिहेउँ ह अउर

अब एन पइ मोर अधिकार अहइ। जउने मूरतियन क उ पचे लोग पूजा करत हीं, उ पचे यरूसलेम अउ सोमरोन क मूरतियन स जियादा अहइ।^{११} मइँ सोमरोन अउ ओकर मूरतियन क पराजित कइ दिहेउँ। मइँ यरूसलेम अउ ओकर मूरतियन का भी जेनका ओकर लोग बनाएन ह पराजित कइ देबउँ।”

^{१२} मोर सुआमी जब यरूसलेम अउ सिय्योन पर्वते क बरे, जउन ओकर योजना अहइ, ओकर बातन क करब खतम कइ देइ, तउ यहोवा अस्सूर क सजा देइ। अस्सूर क राजा बहोत अभिमानी अहइ। ओकर घमंड ओहसे बुरे करम करवाएस ह। तउ परमेस्सर ओका सजा देइ।

^{१३} अस्सूर क राजा कहा करत ह, “मइँ बहोत बुद्धिमान अहउँ। मइँ खुद आपन बुद्धि अउ सक्ति स अनेक महान कारज किहेउँ ह। मइँ बहोत स जातियन क हराएउँ ह। मइँ ओनकर धन छोर लिहेउँ ह अउर ओनके लोगन क दास बनइ लिहेउँ ह। मइँ एक बहोत सक्तीसाली मनई हउँ।^{१४} मइँ खुद आपन हाथन स ओन सब लोगन क धन दौलत अइसे लइ लिहेउँ ह जइसे कउनो मनई चिरइयन क घोंसलन स अण्डन उठाइ लेत ह। चिरइयन जउन अक्सर आपन घोंसलन अउ अण्डन क तजि जात हीं अउर उ घोंसला क रखवारी करइ बरे कउनो भी नाहीं रहि जात। हुवाँ आपन पखनन अउ आपन चोंच स सोर मचावइ अउर लड़ाइ करइ बरे कउनो पंछी नाहीं होत। एह बरे लोग अण्डन क उठाइ लेत हीं। इहइ तरह धरती क सबहि लोगन क उठाइ लइ जाइ स रोकइ बरे कउनो भी मनई हुवाँ नाहीं रहा।”

^{१५} कुल्हाड़ा उ मनई स नीक नाहीं होत, जउन कुल्हाड़ा क चलावत ह। कउनो आरा उ मनई स नीक नाहीं होत, जउन उ आरे स काटत ह। किन्तु अस्सूर क विचार अहइ कि उ परमेस्सर स भी जियादा महत्वपूर्ण अउर बलवान अहइ। जउन ओका उठावत ह अउर कउनो क सजा देइ बरे ओकर प्रयोग करत ह।^{१६} अस्सूर क विचार अहइ कि उ महान अहइ किन्तु सर्वसक्तिमान यहोवा अस्सूर क दुर्बल कइ डावइवाली महामारी पठइ अउर अस्सूर आपन धन अउ आपन सक्ति क वइसे ही खोइ बइटी जइसे कउनो बेराम मनई आपन सक्ति गँवाइ बइठन ह। फुन अस्सूर क बैभव बर्बाद होइ जाइ। इ उ आगी क समान होइ जउन उ समय तलक बरत रहत ह जब तलक सब कछू खतम नाहीं होइ जात।^{१७} इस्राएल क प्रकास (परमेस्सर) एक आगी क समान होइ। उ

पवित्तरतम लपट क नाई होइ। उ उ आगी क दाई होइ जउन खरपतवार अउर काँटन क तत्काल वार डावत ह।^{१८} अउर फुन बढिके बइके बइके बृच्छन अउर अंगूरे क बगीचन क वार देत ह अउर आखिर मँ सब कछू बर्बाद होइ जात ह हिओ तलक कि लोग भी। अइसा उ समइ होइ जव परमेस्सर अस्सूर क बर्बाद कइ देइ। अस्सूर सडत-गलत लट्टा क जइसा होइ जाइ।^{१९} जंगल मँ होइ सकत ह थोड़ा स बृच्छ खड़ा रहि जाएँ। पर उ सबइ एतना थोड़ा स होइहीं कि कउनो बच्चा तलक गन सकी।

^{२०} उ समइ, उ सबइ लोग जउन इस्राएल मँ जिअत रइहीं, यानी याकूब क बंस क इ सबइ लोग उ मनई पइ निर्भर नाहीं करत रइहीं जउन ओनका मारत पीटत ह। उ सबइ सचमुच उ यहोवा पइ निर्भर करब सीख जइहीं जउन इस्राएल क पवित्तर परमेस्सर अहइ।^{२१} याकूब क बंस क उ सबइ बाकी बचे लोग सक्तीसाली परमेस्सर क फुन अनुसरण करइ लगिहीं।

^{२२} जदपि तोहार इस्राएली लोग सागर क रेत कणन क समान अहइ तब पर ओनमाँ स कछू ही वापस मुड़ आवइ काहेकि परमेस्सर क निआव बाढ़ क नाई आवत हीं जउन हरेक चिजियन क पूरी तरह नास कइ देब।^{२३} मोर सुआमी सर्वसक्तिमान यहोवा, इ प्रदेश क निहचय ही बर्बाद करी।

^{२४} मोर सुआमी सर्वसक्तिमान यहोवा कहत ह, “हे! सिय्योन मँ बसइया लोगो, अस्सूर स जिन डेराअ। उ भविस्स मँ तू पचन्क आपनी छड़ी स इ तरह पीटी जइसे पहिले मिस्र मँ तू पचन्क पीटे रहा। इ अइसा होइ जइसे माना तू पचन्क नोस्कान पहाँचावइ बरे अस्सूर कउनो लाठी क प्रयोग करत रहत होइ।^{२५} किन्तु थोड़े समइ क पाछे मोर किरोध सांत होइ जाइ, मोका संतोख होइ जाइ कि अस्सूर तू पचन्क काफी सजा दइ दिहस ह।”

^{२६} एकरे पाछे सर्वसक्तिमान यहोवा अस्सूर क कोडन स मारी। जइसा पहिले यहोवा जब ओरेब क चट्टान पइ मिद्यानियन क हराए रहा, तब भवा रहा। वइसा ही उ समइ होइ जब यहोवा अस्सूर पइ हमला करी। पहिले यहोवा मिस्र क सजा दिहे रहा। उ समुदर क ऊपर छड़ी उठाए रहा अउर मिस्र आपन लोगन क लइ गवा रहा। यहोवा जब अस्सूर स आपन लोगन क रच्छा करी, तब भी अइसा ही होइ।

^{२७} अस्सूर तू पचन्पइ बिपत्तियन लियाइ। उ सबइ बिपत्तियन अइसे बोझन क नाई होइहीं, जेनका तू पचन आपन ऊपर एक जुए क रूप मँ

उठावइ ही होइ। किन्तु फुन तोहार पचन्क गर्दन पइ उ जुए क उतारके लोकावा जाइ। उ जुआ तोहार पचन्क सक्ति (परमेस्सर) क जरिये तोरि दीन्ह जाइ।

इस्राएल पइ अस्सूर क फउज क हमला

२५ अय्यात क निअरे फउजन प्रवेस होइ। मिसरोन, मिग्रोन यानी “खलिहानन” क फउजन रउँदि डइहीं। फउजन एकरे खाइ क चीज क “कोठिलन” (मिकमास) में रखि देइहीं। २६ “पार करइ क ठउर” (माबरा) स फउजन नदी पार करिहीं। उ सबइ फउजन जेवा मँ राति बितइहीं। रामा डेराइ जाइ। साउल क गिबा क लोग निकरिके परइहीं।

२७ हे गल्लीम क पुत्री चिल्ला! हे लैसा सुना! हे, अनातोत मोका जवाब द्या। २८ मदसेना क लोग भागत परात अहइँ। गेबीम क लोग लुकान अहइँ। २९ आजु फउज नोब मँ टिकी अउर यरूसलेम क पर्वते पइ सिय्योन पइ चढ़ाई करइ क तैयारी करी।

३० लखा! हमार सुआमी सर्वसक्तीमान यहोवा बिसाल वृच्छ (अस्सूर) क काटि गिराई। यहोवा आपन महान सक्ति स अइसा करी। बड़के अउर महत्वपूर्ण लोग काट गिरावा जइहीं। उ पचे महत्वहीन होइ जइहीं। ३१ यहोवा आपन कुल्हाड़ा स जंगल क काटि डाइ। अउर लवानोन क बिसाल वृच्छ (मुखिया लोग) गिर पड़िहीं।

सान्ति क राजा आवत अहइ

१ एक ठू अंकुर क नाई जे उ पेड़ स उगत ह जउन कटा जात रहा, एक ठू अंकुर (पूत) यिसै क ठूँठ (परिवार) स उगब सुरू होइ। हाँ, इ अब डार यिसै क जड़ स उगी। २ उ पूत मँ यहोवा क आतिमा होइ। उ आतिमा विवेक, समझबूझ, मार्ग दर्शन अउ सक्ति क आतिमा होइ। उ आतिमा ३ इ पूत क यहोवा क समुझइ अउर ओकर आदर करइ मँ मदद देइ। उ इ पूत यहोवा क आदर करी अउर एहसे उ खुस होइ।

इ पूत वस्तुअन जइसी देखॉइ देत रही होइ, ओकरे अनुसार लोगन क निआव नाही करी। उ सुनी, सुनाई क आधार पइ ही निआव नाही करी। ४-५ उ गरीब लोगन क निआव ईमानदारी अउर सच्चाई क साथ करी। धरती क दीन जनन बरे जउन कछु करइ क उ निर्णय लेइ, ओहमाँ उ पच्छपात रहित होइ। जदि उ निर्णय करत ह कि लोगन पइ मार पड़इ तउ उ आदेस देइ अउर ओन लोगन पइ मार पड़ी। जदि उ निर्णय करत ह कि

ओन लोगन क मउत होइ चाही तउ उ आदेस देइ अउर ओन दुस्सन क मउत क घाट उतार दीन्ह जाइ। नेकी अउर सच्चाई इ पूत क सक्ति प्रदान करी। ओकरे बरे नेकी अउर सच्चाई एक अइसे कमर बंद क नाई होइहीं जेका उ आपन कमर क चारिहुँ कइँती लपेटत ह।

६ ओकरे सासन काल मँ मेमना अउर जंगली भेड़िया साति स एक साथ रइहीं। चीता अउ बोकरी क बच्चा एक संग सान्ति स पड़ा रइहीं। बच्छवन, सेर अउर साँड़ आपुस मँ सान्ति क साथ रइहीं। एक ठू नान्ह सा गदला ओकर अगुवाई करी। ७ गइयन अउर रीछिन सान्ति क संग संग आपन खइया क खइहीं। ओनकर बच्चन साथे-साथे बइठा करिहीं अउर आपुस मँ एक दूसर क नोस्कान नाही पहाँचइहीं। सेर गइयन क नाई घास चरिहीं ८ अउर हिआँ तलक कि साँप भी लोगन क नोस्कान नाही पहाँचइहीं। काले नाग क बिल क लगे एक गदला तलक खेल सकी। कउनो भी गदला बिसैला नाग क बिले मँ हाथ डाइ सकी।

९ इ सबइ बातन देखॉवत हीं कि हुवाँ सब कहूँ सान्ति होइ। कउनो मनई कउनो दूसर क नोस्कान नाही पहाँचाइ। मोर पवित्तर पर्वत क लोग वस्तुअन क नस्त नाही करइ चइहीं। काहेकि लोग यहोवा क फुरइ जान लेइहीं। उ सबइ ओकरे गियान स अइसे परिपूर्ण होइहीं जइसे सागर जल स परिपूर्ण होत ह।

१० उ समय यिसे क परिवार मँ एक खास मनई होइ। एक मनई एक झंडा क समान होइहीं। इ “झंडा” देखॉई कि समुचय रास्ट्रन क ओकरे आसपास बटोर जाइ चाही। इ सबइ रास्ट्र ओहसे पूछा करिहीं कि ओनका का करइ चाही? अउर उ ठउर, जहाँ उ होइ, भय्यता स भरि जाइ।

११ अइसे समइ मँ, मोर सुआमी फुन आपन लोगन क एक संग जमा करी। उ आपन लोगन मँ स जिअत भवा क अस्सूर, उत्तरी मिस्र, दक्खिनी मिस्र, कुस, एलाम, बाबुल, हमात तथा समूचइ संसार मँ फइला भवा अइसे ही सुदूर देसन मँ “वापिस खरीदी।” १२ परमेस्सर सब लोगन बरे संकेत क रूप मँ झंडा उठाइ। इस्राएल अउ यहूदा क लोग आपन-आपन देसन क तजइ बरे मजबूर कीन्ह ग रहेन। उ सबइ लोग धरती पइ दूर-दूर फइल ग रहेन किन्तु परमेस्सर ओनका परस्पर बटोरी।

१३ उ समय एप्रैम यहूदा स जलन नाही रखी। यहूदा क कउनो दुस्मन नाही बची। यहूदा एप्रैम क बरे कउनो कस्ट पइदा नाही करी। १४ बल्कि

एप्रैम अउ यहूदा पलिस्तिनयन पइ हमला करिहीं ।
इ सबइ दुइनउ देस उड़त भए ओन पच्छियन क
नाई होइहीं जउन कउनो नान्ह स जनावर क धरइ
बरे झपट्टा मारत ही । एक संग मिलिके उ सबइ
दुइनउ पहिले क धन दौलत लूट लेइहीं । एप्रैम
अउ यहूदा एदोम, मोआब अउ अम्मोनी क लोगन
पइ कब्जा कइ लेइहीं ।

१५ यहोवा कोहाइ जाइ अउर जइसे उ मिस्र
क सागर क दुइ हीसा मँ बाँट दिहे रहा, उहइ
तरह परात नदी पइ तु आपन हाथ उटाइ अउर
ओह पइ वार करी । जेहसे उ नदी सात नान्ह
धारन मँ बाँटि जाइ । इ सबइ नान्ह जलधारन गहिर
नाहीं होइहीं । लोग आपन जूतन पहिरे भए पैदल
चलिके ओनका पार कइ लेइहीं । १६ परमेस्सर क
लोग जउन हुवाँ छूट ग रहेन अस्सूर क तजि देइ
बरे राह पाइ जइहीं । इ वइसा ही होइ, जइसा उ
समय भवा रहा, जब परमेस्सर लोगन क मिस्र स
बाहेर निकारिके लिआवा रहा ।

परमेस्सर क स्तुति गीत

१२ १ उ समइ तू कहब्या :
“हे यहोवा, मइ तोहार गुण गावत हउँ !
तू मोहसे कोहान अहा
किन्तु अब मोहे पइ किरोध जिन करा ।
तू मोहे पइ आपन पिरम देखाँवा ।”
२ परमेस्सर मोका बचावत ह ।
मोका ओह पइ भरोसा अहइ ।
मोका कउनो अउर डर नाही अहइ ।
उ मोका बचावत ह ।
यहोवा ही मोर सक्ति अहइ ।
उ मोका बचावत ह, अउर मइ ओकरे बरे स्तुति
गीत गावत हउँ । §
३ तू आपन जल मुक्ती क झरना स ग्रहण करा ।
तबहिं तू खुस होब्या ।
४ फुन तू कहब्या,
“यहोवा क स्तुति करा ! ओकरे नाउँ क तू उपासना
किया करा ।
उ जउन कार्य किहेन ह ओकर लोगन स बखान
करा ।
तू ओनका बतावा कि उ केतना महान अहइ ।”
५ तू यहोवा क स्तुति गावा ।
काहेकि उ महान कार्य किहेस ह ।

इ सुभ समाचार क जउन परमेस्सर क अहइ, सारी
दुनियाँ फइलावा
ताकि सबहिं लोग इ सबइ बातन जान जाएँ ।
६ हे सिय्योन क लोगो, आनन्द क साथ खुस रहा,
काहेकि इस्राएल क पवित्रर बीज तोहरे बीच एक
सक्तिसाली
मार्ग क रूप मँ अहइ ।

बाबुल क परमेस्सर क दर्सन

१३ १ परमेस्सर क बाबुल क बारे मँ इ सोक संदेस
अहइ । इ दर्सन आमोस क पूत यसायाह
दुआरा लखा ग रहा । २ परमेस्सर कहेस:
“इ बंजर पर्वत पइ ध्वज उटावा ।
ओन लोगन क गोहरइ
अउर आपन हाथ संकेत क रूप मँ हलाइ के ओन
लोगन क बतावा कि
उ पचे सज्जन मनइयन क प्रवेस दुआर पइ
अहइ ।
३ “मइ इ सबइ फउजन क आदेस दिहउँ
जउन जुद्ध बरे आपन आपका समर्पित कइ दिहेस
ह ।
उ मइ हउँ जउन इ सबइ जोद्धन क बोलाएस ह ।
मइ आपन गुस्सा देखाउब्या ।
मइ उ जोद्धन पइ गर्व करत हउँ जउन मोर सेवा
करइ बरे बहोत खुस अहइ ।
४ “पहाइ मँ एक जोरदार सोर भवा ह ।
तू उ सोर क सुना ।
इ सोर अइसा लागत ह जइसे बहोत ढेर सारे
लोगन क ।
बहोत सारे देसन क लोग आइके बटुरा अहइ ।
सर्वसक्तिमान यहोवा आपन फउज क एक संग
बोलावत अहइ ।
५ यहोवा अउर इ सेना कउनो दूर क देस स आवत
अहइ ।
इ सबइ लोग छितिज क पार स किरोध परगट
करइ आवति अहइ ।
यहोवा इ सेना क उपयोग अइसे करी जइसे कउनो
किसी सस्त्र क उपयोग करत ह ।
इ फउज सारे देस क बर्बाद कइ देइ ।”
६ यहोवा क निआव क खास दिन आवइ क
अहइ । एह बरे रोआ । अउ खुद आपन बरे
दुःखी ह्वा । समय आवत अहइ जब सत्रु तोहार
सम्पत्ति चुराइ लेइ । सर्वसक्तीमान परमेस्सर

§१२ :२ यहोवा ... गावत हउँ साब्दिक “यहोवा मोर सक्ती अहइ अउर परमेस्सर अहइ । अउर उ मोर उद्धार बन गवा अहइ ।” इ मूसा क जीत क गीत अहइ । लखा निर्गमन १५ :२

वइसा करवाइ। ७ लोग आपन हिम्मत छोड़ि देइहीं अउर डर लोगन क दुर्बल बनाइ देइ। ८ हर कउनो भयभीत होइ। डर स लोगन क अइसे दुःखइ लगिहीं जइसे कउनो बच्चा क जन्मइवाली महतारी क पेट दुःखइ लागत ह। ओनकर मुँह लाल होइ जइहीं, जइसे कउनो आगी होइ। लोग अचरजे मँ पड़ि जइहीं काहेकि ओनकर सबहिं पड़ोसियन क मुँहे पइ भी भय देखाई देइ।

बाबुल क खिलाफ परमेस्सर क निआव

१ लखा, यहोवा क खास दिन आवइ क अहइ। उ एक खउफनाक दिन होइ। परमेस्सर महान किरोध मँ देस क बिनास कइ देब। उ पाप क उ भुइया स निकार देब। १० आकास करिया पड़ि जइहीं, सूरज अउ चाँद नाही चमकिहीं। तारन आपन तारा-मण्डल मँ नाही टिमटिमाइ।

११ परमेस्सर कहेस, “मइ इ दुनियाँ लोगन क उ बुरा चिजियन जउन उ किहेस ह क बरे जिम्मवार ठहरउब। मइ लोगन क उ सेखी क नस्ट करब जउन दूसर लोगन बरे अरथ होइ। १२ हुवाँ बस थोड़े स लोग ही बचिहीं। जइसे सोना क मिलब दुर्लभ अहइ, वइसे ही हुवाँ लोगन का मिलब दुर्लभ होइ जाइ। किन्तु जउन लोग मिलिहीं, उ पचे निखालिस सोना स भी जियादा मूल्यवान होइहीं। १३ आपन किरोध स मइ आकास क हलाइ देबउँ। धरती आपन धुरी स डिगाइ दीन्ह जाइ।”

इ सब उ समय घटी जब सर्वसक्तीमान यहोवा आपन किरोध दसाँइ। १४ तब बाबुल क निवासी अइसे परइहीं जइसे धायल हिरन परात ह। उ पचे अइसे परइहीं जइसे बगैर गड़रिये क भेड़ी परात ह। हर कउनो मनई पराइके आपन देस अउर आपन लोगन कइती मुड़ आई। १५ किन्तु बाबुल क लोगन क पाछा ओनकर दुस्मन नाही छोड़िहीं अउर जब सत्रू कउनो मनई क धर पकड़ी तउ उ ओका तलवार क घाट उतारि देइ। १६ ओनकर घरे क हर वस्तु चुराइ लीन्ह जाइ। ओनकर पत्नियन क संग कुकरम कीन्ह जाइ अउर ओनकर नान्ह नान्ह गदेलन क लखत पीटि पीटिके मार डावा जाइ।

१७ परमेस्सर कहत ह, “लखा, मइ मादी क फउजन स बाबुल पइ हमला कराउब। मादी क फउजन जदि सोना अउ चाँदी क भुगतान लइ भी लेइहीं तउ भी उ पचे ओन पइ हमला करब बंद नाही करिहीं। १८ फउजन बाबुल क नउजवान मनइयन क धनुस क छिन-भिन कइ देब्या। उ पचे

नान्ह लरिकन पइ दायी नाही देखाँइ या गदेलन तलक भी करूणा नाही करिहीं।

१९ “तब बाबुल, सबइ समराज्ज मँ सबन त सुन्नर, कसदी क चमत्कारी गर्व क पूरी तरह स बर्बाद कइ दीन्ह जाब। इ उहइ तरह होइ जइसा परमेस्सर सदोम अउर अमोरा क नास किहे रहा! २० किन्तु बाबुल क सुन्नरपन बना नाही रीग। भविस्स मँ हुवाँ लोग नाही रइहीं। अराबी क लोग हुवाँ आपन तम्बू नाही गड़िहीं। गड़रियन चरावइ बरे हुवाँ आपन भेड़िन क नाही लिअइहीं। २१ जउन पसु हुवाँ रइहीं उ सबइ बस रेगिस्तान क पसु ही होइहीं। बाबुल मँ आपन घरन मँ लोग नाही रहि पइहीं। घरन मँ जंगली कुत्तन अउ बड़के कुकुरन चिल्लइहीं। घरन क भितरे जंगली बोकुरन बिहार करिहीं। २२ बाबुल क बिसाल भवनन मँ जंगली कुकुरन अउर सियारन गुराँइ। बाबुल बर्बाद होइ जाइ। बाबुल क अंत निअरे अहइ अब बाबुल क बिनास मँ अउर जियादा देरी नाही होइ।”

इस्राएल घरे लउटी

१४ १ जब यहोवा याकूब क सुख देइ अउर इस्राएल क फुन आपन लोगन क रूप मँ चुनी उ ओनका क ओकर आपन धरती मँ बसाइ। उ समइ मँ कछू बिदेसियन ओकर संग सामिल होइ जाइ अउर याकूब क परिवार क निअबर बन जाइ। २ उ सबइ जातियन इस्राएल क धरती बरे इस्राएल क लोगन क फुन वापस लइ लेइहीं। दूसर जातियन क उ सबइ मेहरारू मनसेधू इस्राएल क दास होइ जइहीं। बीते भए समय मँ ओन लोग इस्राएल क लोगन क बलपूर्वक आपन दास बनाए रहेन। इस्राएल क लोग ओन जातियन क हरइहीं अउर फुन इस्राएल ओन पइ हुकूमत करी। ३ यहोवा तोहर मेहनत क खतम करी अउर तोहका आराम देइ। पहिले तू दास हुवा करत रह्या, लोग तोहका कड़ी मेहनत करइके मजबूर करत रहेन किन्तु यहोवा तोहार इ कड़ी मेहनत क अब खतम कइ देइ।

बाबुल क राजा क बारे मँ एक गीत

४ उ समय बाबुल क राजा क बारे मँ तू इ गीत गावइ लगब्या :

उ राजा दुट्ट रहा जब उ हमार सासक रहा।

किन्तु अब ओकरे राज्ज क अन्त भवा।

५ यहोवा दुट्ट सासकन क राज दण्ड तोड़ देत ह।

यहोवा ओनसे ओनकर सक्ति छोरि लेत ह।

६ बाबुल क राजा किरोध मैं भरिके लोगन क पीटा करत ह ।

उ दुट्ट सासक लोगन क पीटब कबहुँ बंद नाहीं किहस ।

उ दुट्ट राजा किरोध मैं भरिके लोगन पइ राज किहस ।

उ लोगन क साथ बुरे कामन क करब नाहीं तजेस ।

७ किन्तु अब सारा देस आराम मैं अहइ ।

देस मैं सान्ति अहइ ।

लोग अब उत्सव मनाउब सुरू किहेन ह ।

८ तू एक बुरा सासक रह्या,

अउर अब तोहार अन्त भवा ह ।

हिआँ तलक की चीड़ क बृच्छ भी सुस्त अहइ ।

लबानोन मैं देवदार का बृच्छ भगन अहइ ।

बृच्छ इ कहत हीं, “जउन राजा हमका गिराए रहा ।

आजु उ राजा क हीं पतन होइ ग अहइ,

अउर अब उ राजा कबहुँ खड़ा नाहीं होइ ।”

९ अधोलोक, यानी मउत क प्रदेश उत्तेजित अहइ काहेकि तू आवत अहा ।

अधोलोक तोहार बरे संसार क

प्रमुखन क आत्मा क उठावत रहा हीं ।

अधोलोक तोहार स्वागत करइ बरे

सिंहासन स ओन प्राचीन राजा लोगन क खड़ा करत हीं ।

१० इ सबइ प्रमुख तोह पइ हँसी उड़इ अउर कहिहीं,

“तू भी अब हमरी तरह मरा भवा सरीर अहा ।

अब लोग तोहार बरे भी उहइ गीतन लेखब जउन उ पचे मोरे बरे लेखेस ह ।”

११ तोहरे अभिमान क मउत क लोक मैं खाले उतारा गवा ।

तोहार अभिमानी आत्मा क अवाइ क घोसणा तोहरी वीजन क संगीत करत ह ।

तोहरे बदन क माखियन खाइ जइहीं ।

तू ओन पइ अइसे ओलरब्या माना उ पचे तोहार बिछुउना होइ ।

कीरन अइसे तोहरी देह क ढक लेइहीं माना कउनो कमरी होइ ।

१२ हे भोर क तारा,

तू धरती पइ भहराइ पड़या ।

हे पेड़ तू सबहिं रास्टर क कमजोर बनाइ दिहेस,

किन्तु तोहका अब काटिके गिराइ दीन्ह गवा !

१३ तू हमेसा आपन स कहत रह्या,

“मई अकासन पइ आरोहण करब

अउर परमेस्सर क तारन क ऊपर अपना सिंहासन कायम करब

अउर देवी पर्व जप्पा क चोटी पइ बैठब,

जहाँ पइ जप्पा क सबन त ऊँची चोटीयन पइ देवतन अकतूर होत ह ।

१४ मई बादरन क वेदी तलक जाब ।

मई सर्वोच्च परमेस्सर जइसा बनब ।”

१५ किन्तु वइसा नाहीं भवा ।

तू परमेस्सर क संग ऊपर अकासे मैं नाहीं जाइ पाया ।

तोहका अधोलोक क खाले गहिर पताल मैं लइ आवा गवा ।

१६ लोग जउन तोहका टकटकी लगाइके लखा करत हीं,

उ सबइ तोहरे बरे सोचा करत हीं ।

लोगन क आजु इ देखौत ह कि तू बस मरा भवा अहा, अउर लोग कहा करत हीं,

“का इहइ उ मनई अहइ जउन धरती क सारे राजजन मैं भय फइलावा भवा अहइ ?

१७ का इ उहइ मनई अहइ जउन नगर बर्बाद किहेस अउर जउन धरती क उजाड़ मैं बदल दिहस ?

का इ उहइ मनई अहइ जउन लोगन क जुद्ध मैं बन्दी बनाएस

अउर ओनका आपन घरन मैं नाहीं जाइ दिहस ?”

१८ धरती क हर राजा सान स मउत क पाएस ।

हर कउनो राजा क मकबरा बना अहइ ।

१९ किन्तु हे बुरे राजा, तोहका तोहरी कबर स निकारि बहावा दीन्ह ग अहइ ।

तू एक ठु गिरी भई ल्हास अहा

जका जुद्ध मैं मारा गवा,

अउर दूसर फउजी ओका रौदन चला गएन ।

अब तू अइसा देखौवत अहा जइसे दूसर मरे मनई देखौत हीं ।

तोहका कफन मैं लपेटा गवा ह ।

२० बहोत स अउर भी राजा लोग मरेन ।

ओनके लगे आपन-आपन कबर अहइ ।

किन्तु तू ओनमाँ नाहीं मिलब्या ।

काहेकि तू आपन ही देस क बिनास किह्या ।

आपन ही लोगन क तू बध किहा ह ।

जइसा बिनास तू मचाए रह्या ।

२१ ओकरी सन्तानन क बध तइयारी करा ।

तू ओनका मउत क घाट उतारा काहेकि ओनकर पिता अपराधी अहइ ।

अब कबहुँ ओकरे पूत नाहीं होइहीं ।

ओकर सन्तानन अब कबहुँ भी संसार क आपन नगरन स नाहीं भरिहीं ।

तोहार सन्तानन वइसा करत नाहीं रहिहीं।
तोहरी सन्तानन क वइसा करइ स रोक दीन्ह
जाइ।

२२ सर्वसक्तिमान यहोवा कहेस, “मई खड़ा
होब अउर ओन लोगन क खिलाफ लड़ब। मई
मसहूर नगर बाबुल क उजारि देवउँ। बाबुल क
सबहिं लोगन क मई नस्ट कइ देव। मई ओनकर
सन्तानन, पोते-पोतियन अउर सन्तानन क मेट
देवउँ।” इ सबइ सब बातन यहोवा खुद कहे रहा।

२३ यहोवा कहे रहा, “मई बाबुल क बदल डाब।
उ ठउर मँ पसुअन क बास होइ, न कि मनइयन
क। उ ठउर दलदल क प्रदेश बनि जाइ। मई
‘विनास क झाड़ू’ स बाबुल क बाहेर कइ देव।”
सर्वसक्तिमान यहोवा इ सबइ बातन कहे रहा।

परमेस्सर अस्सूर क भी दण्ड देइ

२४ सर्वसक्तिमान यहोवा एक बचन दिहे रहा।
यहोवा कहे रहा, “मई बचन देत हउँ, कि इ सबइ
बातन ठीक वइसे ही घटिहीं, जइसे मई एनका
सोचेउँ ह। इ सबइ बातन ठीक वइसे ही घटिहीं
जइसे कि मोर योजना अहइ। २५ मई आपन देस मँ
अस्सूर क राजा क नास करब आपन पहाड़न पइ
मई अस्सूर क राजा क आपन गोड़न तले कुचरि
डाउब। उ राजा मोरे लोगन क आपन दास बनाइके
ओनकर कन्धन पइ एक जूआ रख दिहेस ह। यहदा
क गर्दन स उ जूआ उठाइ लीन्ह जाइ। उ बिपत्ति
क उठावा जाइ। २६ मई आपन लोगन बरे अइसी
ही योजना बनावत हउँ। सबहिं जातियन क सजा
देइ बरे, मई आपन सक्ति क प्रयोग करब।”

२७ यहोवा जब कउनो योजना बनावत ह तउ
कउनो भी मनई उ योजना क रोक नाहीं सकत।
यहोवा लोगन क सजा देइ बरे जब आपन हाथ
उठावत ह तउ कउनो भी मनई ओका रोक नाहीं
सकता।

पलिस्तियन क परमेस्सर क सँदेसा

२५ इ दुःखद सँदेसा उ बरिस दीन्ह गवा रहा जब
राजा आहाज क मउत भइ रही।

२९ हे, पलिस्तियो क प्रदेशो! तू बहोत खुस
अहा काहेकि जउन राजा तोहका मार लगावा
करत रहा, आजु मर चुका अहइ। किन्तु तोहका
असलियत मँ खुस नाहीं होइ चाही। इ फुरइ अहइ
कि ओकरे सासन क अंत होइ चुका अहइ। किन्तु
उ राजा क पूत अबहिं आइके राज करी अउ उ
एक अइसे साँप क समान होइ जउन खउफनाक
नागन क जन्म दिया करत ह। इ नवा राजा तू

लोगन बरे एक टु बड़के फुर्तिले खउफनाक नाग
क जइसा होइ। ३० किन्तु मोरे दीन जन सुरूच्छा
पूर्वक खात पिअत रहि पइहीं। ओनकर सन्तानन
भी सुरच्छित रइहीं। मोरे दीनजन, सोइ सकिहीं
अउर सुरच्छित अनुभव करिहीं। किन्तु तोहरे
परिवार क भूख स मार डाउब अउर तोहार सबहिं
बचे भए लोग मरि जइहीं।

३१ हे नगर दुआर क बासियो, रोवा!
नगर मँ बसइयो तू लोग, चीखा-चिल्ला!
पलिस्ती क तू सब लोगो डेराइ जाब्या।
तोहार हिम्मत गरम मोम क नाई टेघरिके ढल
जाइ।

उत्तर दिसा कइती लखा!

हुवाँ धूरि क एक बादर अहइ।

लखा, अस्सूर स एक फउज आवति अहइ।

उ फउज क सबहिं लोग बलवान अहइ।

३२ उ फउजी आपने नगर मँ दूत पठइहीं।

दूत आपन लोगन स का कहिहीं?

उ पचे एलान करिहीं: पलिस्ती हार गवा, किन्तु
यहोवा सिष्योन क सुदृढ़ बनाएस ह,
अउर ओकर दीन्ह जन हुवाँ रच्छा पावइ क
गएन।

मोआब क परमेस्सर क सँदेसा

१ इ दुःखद सँदेस मोआब क बारे मँ अहइ:
१५ एक राति मोआब मँ स्थित आर नगर लूटा
गवा,

उ तहस नहस कइ दीन्ह गवा।

एक राति मोआब मँ स्थित आर नगर लूटा गवा,

उ नगर तहस नहस कइ दीन्ह गवा।

२ राजा क घराना अउ दिबोन क निवासी आपन
दुःख रोवइ क ऊँचके पइ पूजा ठउरन पइ
चला गएन।

मोआब क निवासी नवो अउर मेदबा बरे रोवत हीं।
ओन सबहिं लोग आपन दाढ़ी अउ मूँड़ आपन
सोक दर्सावइ बरे मुड़वाए रहेन।

३ मोआब मँ सब कहुँ घरन अउ गलियन मँ,
लोग सोक वस्त्र पहिरिके हाय हाय करत हीं।

४ हेसबोन अउ एलाले नगरन क निवासी बहोत
ऊँच सुर मँ विलपत अहइ।

बहोत दूर यहस क नगरी तलक उ विलाप उनका
जाइ सकत ह।

हिआँ तलक कि फउजी भी डेराइ ग अहइ।

उ सबइ फउजी भय स काँपत अहइ।

५ मोर मन दुःख स मोआब बरे रोवत अहइ।

लोग कहुँ सरण पावइ बरे दउड़त अहइ।

उ पचे सुदूर जोआर मैं जाइ क भागत अहइँ।
लोग दूर क देस एगलतसलीसिय्या क परात
अहइँ।

लोग लूहीत क पहाड़ी चढ़ाइ पइ रोवत बिलखत
भए परात अहइँ।

लोग होरोनैम क मार्ग पइ अउर उ पचे बहोत ऊँच
ऊँच सुर मैं बिलखत भए जात अहइँ।

६ निमूरीम क नाला अइसे झुराइ गवा जइसे
रेगिस्तान झुरान होत ह।

सबहिं गेहुँअन क पउधा काटइ क पहिले मुरझा
गएन।

सबइ घास खतम होइ गएन।

हुवाँ कछू भी हरा नाही बचा बाटइ।

७ तउ लोग जउन कछू ओनके लगे अहइ ओका
बटोरा करत हीं, अउर मोआब क तजत हीं।

ओन वस्तुअन क लइके उ पचे नाले (पाप्लर या
अराबा) स सीमा पार करत अहइँ।

८ मोआब मैं हर कहुँ विलाप ही सुनाई देत ह।

दूर क नगर एगलैम मैं लोग बिलखत बाटेन।
बेरेलीम नगर क लोग विलाप करत अहइँ।

९ दीमोन **नगर क जल खून मैं बदलि गवा अहइ।
अउर मइँ दीमोन पइ अबहिं अउर बिपत्तियन
डाउव।

मोआब क कछू निवासी सत्रु स बचि गवा अहइँ।
मइँ ओन लोगन क खाइ बरे सेरन क पठउव।

१६ १ सेला क नगर स मेमनन यहूदा क
नवा राजा बरे नज़राना पठावा : तू पचन्क
रेगिस्तान स होत भए सिय्योन क बिटिया क
पठवा।

२ मोआब क मेहररूअन उ बे सहारे नान्ह चिरइयन
क जइसा अहइँ

जउन आपन घोंसला स धरती पइ गिर गवा ह।

उ पचे अर्नीन नदी क पार करइ बरे इधर-उधर
दउड़त अहइ।

३ उ सबइ विन्ती करत अहइँ, “हमार मदद करा !

बतावा हम का करी !

तू हमका मुसीबत स अइसा बचावा

जइसा दोपहर क धूप स एक आंधर छाया हमका
बचावत ह।

हम सत्रुअन स भागत अही।

तू हमका छुपाइ लिया।

हम का तू सत्रुअन क हाथन मैं पड़इ न द्या।”

४ ओन मोआब बासियन क आपन घर तजइ क
मजबूर कीन्ह गवा रहा।

एह बरे तू ओनका आपन धरती पइ रहइ द्या।

तू ओनके सत्रुअन क छुपाइ लिया।

इ लूट रुक जाइ।

सत्रु हार जइही अउर अइसे मनसेधू दूसर क
नोस्कान करत हीं,

इ धरती स उखड़िहीं।

५ फुन एक ठु नवा राजा आइ।

इ राजा दाउद क घराने स होइ।

उ सच्चाई स पूर्ण, करूणावाला अउ दयालु होइ।

इ राजा निआब कर्ता अउ निस्पच्छ होइ।

उ खरे अउ नीक काम करी।

६ हम सुना ह कि मोआब क लोग
बहोत अभिमानी अउ घमण्डी अहइँ।

इ सबइ लोग हिंसक अहइँ अउ बड़ा बोले भी।

एनकर बड़ा बोल फुरइ नाही अहइ।

७ समूचा मोआब देस आपन अभिमान क कारण
कस्ट उठाई।

मोआब क सारे लोग विलाप करिहीं।

उ सबइ लोग बहोत दुःखी रइहीं।

उ पचे अइसी वस्तुअन क इच्छा करिहीं जइसी
ओनके लगे पहिले हुवा करत रहीं।

उ पचे कीरहरासत मैं बने भए अंजीर क पूडन क
इच्छा करिहीं।

८ उ सबइ लोग बहोत दुःखी रहा करिहीं काहेकि
हेसबोन क खेत अउर सिबमा क अंगूर क
बेलन मैं अंगूर नाही लगाइ पावत अहइँ।

बाहेर क सासकन अंगूर क बेलन क काट फेकेन
ह।

याजेर क नगरी स लइके रेगिस्ताने मैं दूर दूर
तलक सत्रु क फउजन फइल गइ अहइँ।

उ पचे सागर क किनारे तलक जाइ पहाँची अहइँ।

९ “मइँ ओन लोगन क साथ विलाप करब जउन
याजेर अउ सिबमा क निवासी अहइँ

काहेकि अंगूर नस्ट कीन्ह गएन।

मइँ हेसबोन अउ एलाले क लोगन क साथ सोक
करब

काहेकि हुवाँ फसल नाही होइ।

हुवाँ गर्मी क कउनो फल नाही होइ।

हुवाँ पइ आनन्द क ठहाके भी नाही होइहीं।

१० अंगूरे क बगिया मैं आनन्द नाही होइ अउर न
ही हुवाँ गीत गावा जइहीं।

**१५ :९ दीमोन साइद इ दिवोन नगर अहइ। इ नाउँ क आवाज हिब्रू सव्द क जइसा अहइ जेकर अरथ
अहइ “खून”।

मई कटनी क समय क सारी खुसी खतम कइ देव ।
दाखरस बनवइ बरे अंगूर तउ तइयार अहइ,
किन्तु उ सबइ बर्बाद होइ जइहीं ।
११ एह बरे मई मोआब बरे बहोत दुःखी हउँ ।
मई कीरहरैम बरे बहोत दुःखी हउँ ।
मई ओन नगरन बरे बहोत जियादा दुःखी हउँ ।
१२ मोआब क निवासी आपन ऊँचे पूजा क ठउरन
पइ जइहीं ।

उ सबइ लोग पराथना करइ क जतन करिहीं ।
किन्तु उ सबइ ओन सबहिं बातन क लखिहीं ।
जउन कछू घटि चुकी अहइ, अउर उ पचे पराथना
करइ क दुर्बल होइ जइहीं ।”

१३ यहोवा मोआब क बारे मँ पहिले अनेक दाई इ
सबइ बातन कहे रहा । १४ अउर अब यहोवा कहत
ह, “तीन बरिस मँ (उ रीति स जइसे किराये क
मजदूर समय गनत ह) उ पचे सबहिं मनई अउर
ओनकर उ सबइ वस्तुअन जेन पइ ओनका गर्व
रहा, नस्ट होइ जइहीं । हुवाँ बहोत थोड़े स लोग
बचिहीं, बहोत स नाही ।”

आराम बरे परमेस्सर क सँदेसा

१७ इ दमिस्क बरे दुःखद सँदेसा अहइ ।
यहोवा कहत ह कि दमिस्क क साथ मँ
बातन घटिहीं :
“दमिस्क जउन आज नगर अहइ किन्तु कल उ
उजड़ि जाइ ।

दमिस्क मँ बस टूटे फूटे भवन ही बचिहीं ।
२ अरोएर क नगरन क लोग तजि जइहीं ।
ओन उजड़े भए नगरन मँ भेड़िन क खरका खुली
धुमिहीं ।
हुवाँ कउनो ओनका डरावइवाला नाही होइ ।
३ समारिया, एप्रैम क गढ़ नगर ध्वस्त होइ
जइहीं ।

दमिस्क क सासन क अन्त होइ जाइ ।
इस्राएल अउर आराम दुइनउँ देसन मँ इ सबहिं
घटना एक समान घटिहीं ।
दुइनउँ देस आपन सक्ति अउर महिमा खोइ देव ।”
सर्वसक्तीमान यहोवा बताएस कि इ सबइ बातन
होइहीं ।

४ ओन दिनन याकूब अपनी सारी सम्पत्ति खोइ
देइ ।

याकूब वइसा होइ जाइ जइसा मनई रोग स दुबला
होइ ।

५ उ समय क सजा अइसा होइ जइसे रपाईम
घाटी मँ फसल काटइ क समय होत ह । मजदूर
ओन पउधन क बटोरत ही जउन खेते मँ उपजत

हीं । फुन उ पचे ओन पउधन क बालन क काटत
हीं अउर ओनसे अनाजे क दाना निकारत हीं ।

६ उ समय ओह समय क समान होइ जब लोग
जैतून क फसल उतारत हीं । लोग जैतून क बूच्छन
स जैतून झाड़त हीं । किन्तु बूच्छ क चोटी पइ
प्रायः कछू फल तब भी बचा रहत हीं । चोटी
क कछू डारन पइ चार पाँच जइतून क फल छूट
जात हीं । ओन नगरन मँ भी अइसा ही होइ ।
सर्वसक्तीमान यहोवा इ सबइ बातन कहे रहा ।

७ उ समय लोग परमेस्सर कइँती निहरिहीं ।
परमेस्सर, जउन ओनकर रचना किहेस ह । उ सबइ
इस्राएल क पवित्र कइँती मदद खातिर लखिहीं ।
८ लोग ओन वेदियन पइ बिस्वास करब खतम कइ
देइहीं जेनका उ पचे खुद आपन हाथन स बनाए
रहा । असेरा देवी क जेन खम्मन अउ धूप बारइ
क वेदियन क उ पचे आपन अँगुरियन स बनाए
रहा, उ पचे ओन पइ भरोसा करब बंद कइ देइहीं ।

९ उ समय, सबहिं गढ़-नगर उजड़ि जइहीं । उ सबइ
नगर अइसे पर्वत अउर जंगलन क समान होइ
जइहीं, जइसे उ पचे इस्राएलियन क आवइ स
पहिले हुवा करत रहेन । बीते भए दिनन मँ हुवाँ स
सबहिं लोग दूर भाग गए रहेन काहेकि इस्राएल
क लोग हुवाँ आवत रहेन । भविस्स मँ इ देस
फुन उजड़ि जाइ । १० अइसा एह बरे होइ काहेकि तू
आपन उद्धारकर्ता परमेस्सर क बिसराइ दिहा ह ।
तू इ याद नाही राख्या कि परमेस्सर ही तोहार
सरणस्थल अहइ ।

तू सुदूर जगहन स बहोत नीक अंगूर क बेलन
लिआए रह्या । तू अंगूरे क बेलन क रोप सकत ह
किन्तु ओन पउधन मँ बढवार नाही होइ । ११ एक
दिन तू आपन अंगूर क ओन बेलन क रोपब्या अउर
ओनकर बढवार क जतन करब्या । अगवा दिन,
उ सबइ पउधन बड़इ भी लगिहीं किन्तु फसल
उतारइ क समय जब तू ओन बेलन क फल बटोरइ
जाब्या तब लखब्या कि सब कछू झुराइ चुका
अहइ । एक बेरामी सबहिं पउधन क अंत कइ देइ ।

१२ हे लोगन क भीड़ क सुना,
उ गर्जत भवा समुद्र क नाई आवाज करत हीं !
हे भीड़ क सोर सुना, उ सागर क ज्वार-भाट क
टकराइ क नाई आवाज करत ह ।

१३ हाँ उ भीड़ ओनहीं लहरन जइसे अहइ ।
मुला उ पचे सबहिं लहरन क नाई पराइ जाइ जब
परमेस्सर ओनका झिड़की !
लोग उ भूमे क नाई होइहीं जेकरी पहाड़ी पइ हवा
उड़ावत फिरत ह ।

लोग वइसे ही होइ जइही जइसे आँधी क जरिया वस्तुअन क उखाड़े जात अहइ।
 आँधी ओनका उड़ावत ह अउर दूर लइ जात ह।
 १४ उ रात लोग बहोत ही डेराइ जइहीं।
 सुबह होइस पहिले, कछू भी नाही बच पाई।
 तउ सत्रुअन क हुवाँ कछू भी हाथ नाही आई।
 उ पचे हमार धरती कईती अइहीं, किन्तु हुवाँ भी कछू नाही होइ।

इथोपिया बरे परमेस्सर क सँदेसा

१८ १उ धरती क लखा जउन इथोपिया क नदियन क साथ-साथ फइली अहइ। इ धरती मँ कीडे-मकोड़े भरे पड़ा अहइ। तू ओनके पखनन क भिन्नाहट सुन सकत ह। २इ धरती लोगन क सरकण्डन क नदियन स सागर क पार पर पठवत ह।

हे तेज चलइवाले हरकारो, एक अइसी जाति क लोगन क लगे जा

जउन लम्बे अउर सक्तीसाली अहइ! एन लम्बे सक्तीसाली लोगन स सब कहुँ क लोग डेरात हीं।

उ पचे एक बलवान जाति क लोग अहइ। ओनकर जाति दूसर जातियन क हराइ देत ह। उ पचे एक अइसे देस क अहइ जेका नदियन बाँट देत हीं।

३उ अइसे ओन लोगन क सावधान कइ द्या कि ओनके संग कउनो बुरी घटना घटइ क अहइ। उ जाति क साथ घटत भइ इ घटना क दुनिया क सब लोग लखिहीं।

लोग एका इ तरह साफ साफ लखिहीं, जइसे पहाड़ पइ लगे भए झण्डे क लोग निहारत हीं।

एन लम्बे अउर सक्तीसाली मनइयन क साथ जउन बातन घटिहीं,

ओनके बारे मँ इ धरती क सबहिं निवासी सुनिहीं। एका उ पचे एतनी स्पस्टता स सुनिहीं जेतनी स्पस्टता स जुद्ध स पहिले बजइवाले नरसिंहे क अवाज सुनाई देत ह।

४ यहोवा कहेस, “जउन ठउर मोरे बरे तइयार कीन्ह ग अहइ, मइ उ ठउर पइ होब। मइ चुपचाप एन बातन क घटत भए लखब। गर्मी क एक सुहावने दिन दोपहर क समय जब लोग अराम करत रहे होइहीं (यह तब होइ जब कटनी क गर्म समय होइ, बरखा नाही होइ, बस अलख सुबह क ओस ही पड़ी।) ५ तबहिं कउनो बहोत भयानक बात घटी। इ उ समय होइ जब फूल खिल चुका होइहीं अउर ओनकर बढ़त होत रही होइ। किन्तु फसल

उतारइ क समय स पहिले ही दुस्मन आइ अउर एन पउधन क काटि डाइ। सत्रु आइके अंगूरे क सबइ लता क तोरि डाइ अउर ओनका कहुँ दूर लोकाइ देइ। ६ अंगूरे क इ सबइ बेलन सिकारी पहाड़ी पंछियन अउर जंगली जानवरन क खाइ बरे छोड़ि दीन्ह जाइ। गर्मियन मँ पंछी एन दाख क सबइ लता मँ बसेरा करिहीं अउर उ सर्दी मँ जंगली पसु एन दाख क सबइ लता क चरिहीं।”

७ उ समय, लम्बे अउर सक्तीमान लोगन क सर्वसक्तीमान यहोवा क एक खास भेंट क रूप मँ चढ़ाई जाई। सब कहुँ क लोग एन लोगन स डेरात हीं। इ सबइ एक सक्तीसाली रास्टर क लोग अहइ। उ पचे बिदेसी भासा बोलइ। इ रास्टर दूसर रास्टर क लोगन क जीतइ लेइ। इ सबइ एक अइसे देस क अहइ, जउन नदियन स बाँटा अहइ। इ भेंट यहोवा क ठउर, सिय्योन पर्वत पइ स्वीकार करी जाई।

मिस्र बरे परमेस्सर क सँदेसा

१९ १ मिस्र क बारे मँ दुःखद सँदेसा : लखा ! एक उड़त भए बादर पइ यहोवा आवत अहइ। यहोवा मिस्र मँ प्रवेस करी अउर मिस्र क सारे लबार देवता डर स थर थर काँपइ लगिहीं। मिस्र वीर रहा किन्तु ओकर बहादुरी मोम क तरह टेघरिके बहि जाइ।

२ परमेस्सर कहत ह, “मइ मिस्र क लोगन क आपुस मँ ही एक दूसर क खिलाफ जुद्ध करइ बरे हुस्काउब। लोग आपन ही भाइयन स लड़िहीं। पड़ोसी, पड़ोस क विरोध मँ होइ जाइ। नगर, नगर क विरोध मँ अउर राज्ज, राज्ज क खिलाफ होइ जाइ। ३ मिस्र क लोग चक्कर मँ पड़ि जइहीं। उ सबइ लोग आपन लबार देवतन क अउर बुद्धिमान लोगन स पूछिहीं कि ओनका का करइ चाही। उ पचे लोग आपन ओझन अउ जादूगरन स पूछताछ करिहीं किन्तु ओनकर सलाह बेकार होइ।” ४ सुआमी, सर्वसक्तीमान यहोवा कहेस: “मइ (परमेस्सर) मिस्र क कठोर सुआमियन क सौंपब। एक सक्तीसाली राजा लोगन पइ राज करी।”

५ नील नदी क पानी झूराइ जाइ। नदी क तल मँ पानी नाही रही। ६ सबहिं नदियन स दुर्गन्ध आवइ लागी। मिस्र क नहरन झूराइ जइहीं। हवाँ पानी नाही रहइ। पानी क सबहिं पउधन सड़ जइहीं। ७ उ पचे सबहिं पउधन जउन नदी क किनारे उगे होइहीं, झूराइके उड़ि जइहीं। हिआँ तलक कि उ

सबइ पउधन भी, जउन नदी क सबन ते चौड़े हीँसा मँ होइहीं, बेकार होइ जइहीं।

५ “मछुआरे, अउर उ सबइ लोग जउन नील नदी स मछुरियन पकड़ा करत हीँ, दुःखी होइके त्राहि-त्राहि कइ उठिहीं। उ पचे आपन भोजन बरे नील नदी क सहारे पइ अहइँ किन्तु उ झुराइ जाइ। १. उ सबइ लोग जउन कपड़ा बनावा करत हीँ, बहोत जियादा दुःखी होइहीं। ए लोगन क सन क कपड़ा बनावइ बरे पटसन क जरूरत होइ किन्तु नदी क झुराइ जाइ स सने क पौधन क बढ़ोतरी नाही होइ पाई। २. पानी ऐकट्टा करइ बरे बाँध बनावइवाले लोगन क पास काम नाही रहि जाइ। तउ उ पचे बहोत दुःखी होइहीं।

११ “सोअन नगर क मुखिया मूरख अहइँ। फिरौन क बुद्धिमान मन्त्री गलत सलाह देत हीँ। उ सबइ मुखिया लोग कहत हीँ कि उ पचे बुद्धिमान अहइँ। ओनकर कहव अहइ कि उ पचे पुराना राजा लोगन क सन्तान अहइँ। किन्तु जइसा उ पचे सोचत हीँ, वइसे बुद्धिमान नाही अहइँ।” १२ हे मिस्र, तोहार बुद्धिमान मनसेधु कहाँ अहइँ? ओन बुद्धिमान लोगन क सर्वसक्तीमान यहोवा मिस्र बरे जउन योजना बनाएस ह, ओनकर पता होइ चाही। ओन लोगन क, जउन होइवाला अहइ, तू पचन्क बतावइ चाही।

१३ सोअन क मुखिया मूरख बनाइ दीन्ह ग अहइँ। नोप क मुखिया लोग झूठी बातन पइ बिस्वास किहेन ह। तउ मुखिया लोग मिस्र क गलत राहे पइ लइ जात हीँ। १४ यहोवा मुखिया लोगन क उलझन मँ डाइ दिहस ह। उ सबइ भटक ग अहइँ अउर मिस्र क गलत राहे पइ लइ जात अहइँ। उ पचे नसे मँ धुत अइसे लोगन क नाई अहइ जउन बेरामी क कारण धरती मँ लउटत अहइँ। १५ मिस्र क बरे कउनो वुछ, नाही कइ पाइ। (फिन चाहे उ सबइ मूँड होई या पूँछ, “खजूरे क डारि होइ या सरकंडा।” अर्थात् “महत्व स पूर्ण होइ या बगैर महत्व क लोग।”)

१६ उ समय, मिस्र क निवासी डेरान मेहररूअन क नाई होइ जइहीं। उ सबइ सर्वसक्तीमान यहोवा स डेरइहीं। यहोवा लोगन क सजा देइ बरे हाथ उठाइ अउर लोग डेराइ जइहीं। १७ मिस्र मँ सब लोगन बरे यहूदा क प्रदेश भय क कारण होइ। मिस्र मँ कउनो भी यहूदा क नाउँ सुनिके डेराइ जाइ। अइसा एह बरे होइ काहेकि सर्वसक्तीमान यहोवा सबइ खउफनाक घटना क घटावइ बरे

जोजना बनाएस ह। १८ उ समइ मँ, मिस्र मँ अइसे पाँच सहर होइहीं जहाँ लोग कनान क भाखा (यहुदी भाखा) बोलिहीं। एनँ नगरन मँ एक नगर क नाउँ “नास क नगरी” ११ होइ। लोग सर्वसक्तीमान यहोवा क अनुसरण क प्रतिगया करिहीं।

१९ उ समय मिस्र क बीच मँ यहोवा बरे एक वेदी होइ। मिस्र क सीमा पइ यहोवा क आदर देइ बरे एक ठु स्मारक होइ। २० इ इ बात क प्रतीक होइ कि सर्वसक्तीमान यहोवा सक्तीमान कार्य करत ह। जब कबहुँ लोग मदद बरे यहोवा क गोहरइहीं, यहोवा मदद पठई। यहोवा लोगन क बचावइ अउर ओनकर रच्छा करइ बरे एक मनई पठइ। उ मनई ओन मनइयन क ओन दूसर लोगन स बचाई जउन ओने साथ बुरी बातन करत हीँ।

२१ फुरइ उ समय, मिस्र क लोग यहोवा क जानिहीं। उ सबइ लोग परमेस्सर स पिरैम करिहीं। उ सबइ लोग परमेस्सर क सेवा करिहीं अउर बहोत स बलियन चढ़इहीं। उ सबइ लोग यहोवा क मनौतियन मनिहीं अउर ओन मनौतियन क पालन करिहीं। २२ यहोवा मिस्र क लोगन क सजा देइ। फुन यहोवा ओनका (चंगा) छिमा कइ देइ अउर उ पचे यहोवा कइँती लउटि अइहीं। यहोवा ओनकर पराधनन सुनी अउर ओनका छिमा कइ देइ।

२३ उ समय, हुवाँ एक अइसा राजमार्ग होइ जउन मिस्र स अस्सूर जाइ। फुन अस्सूर स लोग मिस्र मँ जइहीं अउर मिस्र स अस्सूर मँ। मिस्र अस्सूर क लोगन क संग परमेस्सर क उपासना करी। २४ उ समय, इस्राएल अस्सूर अउ मिस्र आपुस मँ एक होइ जइहीं अउर पृथ्वी पइ सासन करिहीं। इ सासन धरती बरे वरदान होइ। २५ सर्वसक्तीमान यहोवा एन देसन क आसीर्वाद देइ। उ कही, “हे मिस्रियो! तू पचे मोर लोग अहा। हे अस्सूर क लोगो, उ मइँ हउँ जउन तोहका बनाएस। हे इस्राएलियो, तू अहा। मइँ तू सबन क आसीर्वाद देउँ ह!”

अस्सूर मिस्र अउ इथोपिया क हराइ

२० १ सर्गोन अस्सूर क राजा रहा। सर्गोन तर्तान क नगर क खिलाफ जुद्ध करइ बरे असदोद पठएस। तर्तान हुवाँ जाइके सहर पइ कब्जा कइ लिहस। २ उ समय आमोस क पूत यसायाह क जरिये यहोवा कहेस, “जा, अउर अपने कमर स सोक वस्त्र उतारिके लोकावा। अपने गोड़न क जूतियन उतारि द्या।” यसायाह

१११९:१८ नास क नगरी इ एक सव्द क खेल अहइ। मिस्री नाउँ क अरथ “सूरज क देस” अहइ।

यहोवा क हुकुम क पालन किहस अउर उ बगैर कपड़न अउ बगैर जूतन क एहर-ओहर घूमा ।

३ फुन यहोवा कहेस, “यसायाह तीन बरिस तलक बगैर कपड़न अउर बगैर जूतियन पहिरे एहर-ओहर घूमत रहा ह । मिस्र अउ इथोपिया बरे इ एक संकेत अहइ कि ४ अस्सूर क राजा मिस्र अउ इथोपिया क हराइ । अस्सूर हुवाँ क बंदियन क लइके, ओनकर देसन स दूर लइ जाइ । बूढ़े मनई अउ जवान लोग बगैर कपड़न अउ नंगे गोड़न लइ जावा जइहीं । उ पचे पूरी तरह स नंगा होइहीं । मिस्र क लोग लजाइ जइहीं । ५ जउन लोग मदद बरे इथोपिया कइती लखा करत रहेन, उ सबइ टूट जइहीं । जउन लोग मिस्र क महिमा स चकित रहेन उ पचे लज्जित होइहीं ।”

६ समुद्र क लगे बसइया लोग, उ पचे कहिहीं, “हम मदद बरे ओन देसन पइ बिस्सास कीन्ह । हम पचे ओनके लगे धावत गए ताकि उ पचे हमका अस्सूर क राजा स बचाइ लें किन्तु ओन देसन क लखा कि ओन देसन पइ ही जब कब्जा कइ लीन्ह गवा तब हम कइसे बच सकित रहे”

परमेस्सर क बाबुल क सँदेसा

२१ १ सागर क रेगिस्तान क बारे मँ दुःखद सँदेसा :

रेगिस्ताने स कछू आवइवाला अहइ, इ नेगव स आवत हवा जइसा आवति बाटइ ।

इ कउनो खउफनाक देस स आवति अहइ ।

२ मई कछू लखेउँ ह जउन बहोत ही भयानक अहइ अउर घटइ ही वाला अहइ ।

मोका गद्दार तोहका धोखा देत भए देखौत ही ।

मई लोगन क तोहार पचन्क धन छोरत भए लखत हउँ ।

एलाम, तू जा अउर जुद्ध करा !

मादै, तू आपन फउजन लइके नगर क घेरि ल्या अउर ओका हरावा ।

मई उ बुराई क अन्त करब जउन उ नगर मँ बाटइ ।

३ मई इ सबइ भयानक बातन लखेउँ अउर अब मई बहोत डेराइ गएउँ ह ।

डर क मारे पेट मँ दर्द होत अहइ ।

इ दर्द जच्चा क पीरा जइसा अहइ ।

जउन बातन मई सुनत हउँ, उ सबइ मोका बहोत डेरावत अहइ ।

जउन बातन मई लखत हउँ, ओनके कारण मई डर क मारे काँपइ लागत हउँ ।

४ मई चिन्तित हउँ अउर भय स थर-थर काँपत हउँ ।

मोर सुहावनी साँझ डर क रात बन गई ह ।

५ लोगन सोचत हीं, सब कछू ठीक अहइ ।

लोग कहत हीं, “चौकी तइयार करा

अउर ओह पइ आसन बिछावा, खा, पिआ ।”

किन्तु मोर कहब अहइ,

“मुखिया लोगो! खड़ा ह्वा अउर जुद्ध क तइयारी करा ।”

उहइ समय फउजी कहत अहइँ,

“पहरून क तैनात करा ।

अधिकारी लोगो, खड़ा होइ जा अउर आपन ढालन क झलकावा !”

६ मोर सुआमी मोका इ सबइ बातन ह, “जा अउर नगर क रच्छा बरे कउनो मनई क हेरा ।

७ जदि उ रखवारा घुड़सवारन क, गदहन क या ऊँटन क कतारन क लखइँ तउ ओका होसियारी क साथ सुनइ चाही ।”

८ तउ फुन उ पहरूनआ जोर स बोला पहरूनआ कहेस,

“मोर सुआमी, मई हर दिन चौकीदार क बुर्ज पइ चौकादारी करत आएउँ ह ।

हर राति मई खड़ा भवा पहरा देत रहत हउँ ।

९ मुला लखा! उ पचे आवत अहइँ ।

मोका घुड़सवारन क कतारन देखौइ देत अहइँ ।”

फुन सँदेसवाहक कहेस,

“बाबुल हार गवा,

बाबुल धरती पइ ध्वस्त कीन्ह गवा ।

ओकरे मिथ्या देवन क सबहिं मूरतियन धरती पइ लुढ़काइ दीन्ह गइन

अउर उ सबइ चकनाचूर हो गइन ह ।”

१० यसायाह कहेस, “हे खरिहाने मँ अनाज क तरह रौंदे भए मोर लोगो, मई सर्वसक्तीमान यहोवा, इस्राएल क परमेस्सर स जउन कछू सुना ह, सबइ तू पचन्क बताइ दीन्ह ह ।”

एदोम क परमेस्सर क सँदेसा

११ दूमा बरे दुःखद सँदेसा ।

सेईर स मोका कउनो गोहराएस ।

उ मोहसे कहेस, “हे पहरून, रात अबहिं केतनी बाकी बची बाटइ ?

अबहिं अउर केतनी देर इ रात रही ।”

१२ पहरूनआ कहेस,

“भोर होइ क अहइ मुला राति फुन स आई ।

अगर तोहका कउनो बात पूछब अहइ

तउ लउट आवा अउर मोहसे पूछ ल्या ।”

अब बरे परमेस्सर क सँदेसा

१३ अरब बरे दुःखद सँदेसा

हे ददानी क काफिले,
तू रात क रेगिस्तान में कछू वृच्छन क लगे गुजार
ल्या।

१४ कछू पियासे यात्रियन क पिअइ क पानी द्या।
तेमा क लोगो, ओन लोगन क खइया क द्या जउन
जात्रा करत अहई।

१५ उ सबइ लोग अइसी तरवारन स परात अहई
जउन ओनका मारइ क तत्पर रहेन।
उ सबइ लोग ओन धनुसन स बचिके परात रहेन
जउन ओन पइ छूटइ बरे तने भए रहेन।
उ सबइ भीसण लड़ाइ स परात रहेन।

१६ मोर सुआमी यहोवा मोका बताए रहा कि
अइसी बातन घटिहीं। यहोवा कहे रहा, “एक
बरिस मैं (एक अइसा ढंग जेहसे मजदूर किराये
क समय क गनत ह।) केदार क वैभव बर्बाद होइ
जाइ। १७ उ समय केदार क थोड़े स धनुसधारी,
प्रतापी फउजी ही जिअत बच पइहीं।” इस्राएल
क परमेस्सर यहोवा मोका इ सबइ बातन बताए
रहा।

यरूसलेम बरे परमेस्सर क सँदेसा

२२

१ दिव्य दर्सन क घाटी क बारे मैं दुःखद
सँदेसा :

तू लोगन क साथ क भवा ह ?
काहे तू पचे आपन घरन क छतन पइ छिपत
अहा ?

२ बीत गए समय मैं इ सहर बहोत व्यस्त सहर रहा।
इ सहर बहोत सोरगुल स भरा अउर बहोत खुस
रहा।

किन्तु अब बातन बदलि गइन।

तोहार लोग मारा गएन
किन्तु तरवारन स नाहीं,
अउर उ पचे मारा गएन किन्तु जुद्ध मैं लड़ते समय
नाहीं।

३ तोहार सबहिं सैनिक अधिकारी पराइ गएन,

किन्तु उ सबहिं बिना हथियारन क पकड़ि गवा।
उ सबहिं खोजा गएन अउर एक साथ पकड़ा गएन,
जबकि उ फ़राइके कहूँ दूर भाग गए रहेन।

४ एह बरे मई कहत हउ, “मोरी कइती जिन लखा,
बस मोका रोवइ द्या !

यरूसलेम क बिनास पइ मोका सान्त्वना देइ बरे
मोरी कइती जिन लपका।”

५ यहोवा एक खास दिन चुनेस ह। उ दिन हुवाँ
बगावत अउर भगदड़ मचि जाइ। दिव्य दर्सन
क घाटी मैं लोग एक दूसर क रौद डइहीं।
नगर क चार दीवारी ओकर नीव स उखाड़ फेंकी
जाइ। घाटी क लोग पहाड़े पइ के लोगन क ऊपर
चिल्लाइहीं। ६ एलाम क घुडसवार फउजी आपन-
आपन तरकसन लड़के घोड़न पइ चढ़े भए जुद्ध क
प्रस्थान करिहीं। किर क लोग आपन ढालन स
आवाज करिहीं। ७ तोहार इ खास घाटी मैं फउजन
आइ जुटिहीं। घाटी रथन स भरि जाइ। घुडसवार
फउजी क नगर दुआरन क समन्वा तैनात कीन्ह
जइहीं। ८ तब यहूदा क रच्छा-अवरण ९ हटाइ
लेइ जाइ। लोग जंगल-महल मैं जमा कइ भए
हथियारन क लइ बरे जाब्या।

१-११ तू पचन्क दाऊद क नगर क चहारदीवारी
क दरारन क लख सकत हीं। तउ तू पचे मकानन
क गनइ सुरू करब्या यह तय करइ बरे कि ओहमाँ
स कतना मकान क धवस्त करइ क जरूरत,
दीवार क मरम्मत करइ बरे होइ। तू पचे निचली
तालाब ११ स पानी भी जमा करइ सुरू करब्या।
तू पचे दूसर तालाब १२ दीवारन क बीच मैं सहर
क निचला भाग मैं पुराने तालाब १३ स पानी जमा
करइ बरे बनाउब्या। फुन भी उ परमेस्सर पइ
तोहार पचन्क भरोसा नाहीं होइ जउन एँन सबइ
वस्तुअन क बनाएस ह। तू पचे ओकरी (परमेस्सर)
कइती नाहीं लखब्या जउन बहोत पहिले एँन सबइ
वस्तुअन क रचना किहे रहा। १२ तउ, मोर सुआमी
सर्वसक्तीमान यहोवा लोगन स ओनके मरे भए
मीतन बरे विलाप करइ अउर दुःखी होइ बरे कही।
लोग आपन मूँड़ि मुँडवाइ लेइहीं अउर सोक-
वस्त्र धारण करिहीं। १३ किन्तु लखा ! अब लोग

१२:५ दिव्य दर्सन क घाटी संभवता किदरोन क घाटी यरूसलेम अउर जैतून पहाड़े क बीच मैं स्थित
अहइ। अनेक प्रमुख अधिकारियन क कबर इ घाटी क पूरब कइती मैं रहेन।

१२:६ रच्छा-अवरण एकर अरथ होइ सकत ह १ यहोवा रच्छक क रूप मैं। २ यरूसलेम क दीवार।
या ३ पवित्र जगह क बचाना इ देखावत ह कि परमेस्सर लोगन क रच्छा करत ह।

१२:९-११ निचली तालाब दाऊद क नगर क दक्खिन छोर पइ ऊपरी तालाब क ठीक नीचे क तालाब।

*२२:९-११ दूसर तालाब सम्भवतः इ ऊपरी तालाब अहइ।

†२२:९-११ पुराने तालाब सम्भवतः नगर क पूरबी ढलानन पइ जिअव क झरन्ना पइ क तालाब।

खुस अहई। लोग खुसियन मनावत अहई। उ सबइ लोग कहत अहई :

“मवेसियन क मारा, भेड़िन क बध करा।

हम उत्सव मनाउव।

तू पचे आपन खइया क खा अउर आपन दाखरस पिआ।

खा अउर पिआ काहेकि भियान तउ हमका मरि जाब अहइ।”

१४ सर्वसक्तिमान यहोवा इ सबइ बातन मोहसे कहे रहा अउर मई ओनका अपने काने स सुने रहेउँ : “तू पचे बुरे करम करइ क अपराधी अहा अउर मई निहचय क साथ कहत हउँ कि इ अपराध क छिमा कीन्ह जाइ स पहिले ही तू पचे मरि जाब्या।” मोर सुआमी सर्वसक्तीमान यहोवा इ सबइ बातन कहे रहा।

सेबना बरे परमेस्सर क सँदेसा

१५ मोर सुआमी सर्वसक्तीमान यहोवा मोहसे इ सबइ बातन कहेस। उ सेबना नाउँ क सेवक क लगे जा। उ महल क प्रबन्ध-अधिकारी अहइ।

१६ ओहसे पूछ्या, “उ का करत अहा ? का हिआँ ओकरे परिवार क कउनो मनइ गड़ा भवा अहइ ? उ हिआँ एक कबर काहे मनावत अहा ?”

यसायाह कहेस, “लखा इ मनई क ! इ एक ऊँच जगहिया पइ आपन कबर मनावत अहइ। आपन कबर मनावइ बरे इ चट्टान क काटत अहइ।

१७-१८ “हे मनसेधू, यहोवा तोहका कुचरि डाइ। यहोवा तोहका बाँधके एक ठु नान्ह स गंदे क तरह गोल बनाइके कउनो बिसाल देसे मँ लोकाइ देइ अउर हुवाँ तोहार मउत होइ जाइ।”

यहोवा कहेस, “तोहका आपन रथन पइ बड़ा अभिमान रहा। किन्तु उ दूर देस मँ तोहरे नवे सासक क लगे अउर भी नीक रथ अहई। ओकरे महल मँ तोहार रथ महत्वपूर्ण नाही देखाइ देइहीं।

१९ हिआ मई तोहका तोहार महत्व स पूर्ण काम स ढकेल के बाहेर करब। तोहरे महत्व क पूर्ण काम स तोहार नवा मुखिया तोहका दूर कइ देइ।

२० उ समय मई आपन सेवक एत्याकीम क जउन हिज्जक्याह क पूत अहइ, बोलाउव २१ अउर तोहार चोगा लइके उ सेवक क पहिराइ देब। तोहार राजदण्ड भी मई ओका दइ देब। जउन महत्वक पूर्ण काम तोहरे पास अहइ, मई ओका भी उहइ क दइ देब। उ सेवक यरूसलेम क लोगन अउर यहूदा क परिवार बरे पिता क समान होइ।

२२ “यहूदा क भवन क चाभी मई उ मनसेधू क गले मँ डाँइ देब। अगर उ कउनो दुआर क खोली

तउ उ दुआर खुला ही रही। कउनो भी मनई ओका बंद नाही कइ पाई। जदि उ कउनो दुआर क बंद करी तउ उ दुआर बंद होइ जाइ। कउनो भी मनई ओका खोल नाही पाई। उ सेवक पिता क घरे मँ एक सिंहासन क समान होइ। २३ मई ओका एक अइसी खूँटी क समान सुदृढ़ बनाउव जेका बहोत सख्त तखत मँ टोका गवा ह। २४ ओकरे पिता क घर क सबहिं माननीय अउर महत्व स पूर्ण वस्तुअन ओकरे ऊपर लटकहीं। सबहिं वयस्क अउर नान्ह बच्चन ओह पइ निर्भर रहिहीं। उ सबइ लोग अइसे होइहीं जइसे नान्ह नान्ह पात्र अउर बड़ी बड़ी सुराहियन ओकरे ऊपर लटकत होई।

२५ “उ समय, उ खूँटी (सेबना) जउन अब एक बड़े कटोर तखे मँ गाड़ी भइ खूँटी अहइ, दुबल होइके टूट जाइ। उ खूँटी धरती पइ गिर पड़ी अउर उ खूँटी पइ लटकी भइ सबहिं वस्तुअन बर्बाद होइ जइहीं। तब उ प्रत्येक बात जउन मई उ सँदेसा मँ बताए रहेउँ, घटित होइ। इ सबइ बातन घटिहीं काहेकि एनका यहोवा कहे अहइ।”

लबानोन क परमेस्सर क सँदेसा

२३ १ सोर क बारे मँ दुःखद सँदेसा :
हे तर्सीस क जहाजो, दुःख मनावा। तोहार बंदरगाह उजाड़ दीन्ह गवा ह।

एन जहाजन पइ जउन लोग रहेन, ओनका इ समाचार उ समय बतावा ग रहा

जब उ पचे कित्तियन क देस मँ आपन राहे जात रहेन।

२ हे सागरे क निचके बसइया लोगो, रूका अउर सोक मनावा !

हे, सीदोन क सौदागरो सोक मनावा, सीदोन तोहरे सँदेसावाहक समुद्र पर जावा करत रहेन।

ओ लोग तोहका धन दौलत स भरि दिहेन।

३ उ सबइ लोग अनाजे क तलास मँ समुद्र मँ जात्रा करत रहेन।

सोर क उ सबइ लोग नील नदी क आस पास जउन अनाज पैदा होत रहा, ओका मोल लइ लेत रहा करत रहेन

अउर फुन उ अनाज क दूसर देसन मँ बेचा करत रहेन।

४ हे सीदोन, तोहका सर्म आवइ चाही।

काहेकि अब सागर अउर सागर क किला कहत हः मई सन्तान रहित हउँ।

मोका जच्चा क बेदना क गियान नाही अहइ।

मई कउनो बच्चे क जनम नाही दिहेउँ।

मई युवती व युवक क पालिके बड़ा नाही किहेउँ।

५ मिस्र सोर क खबर सुनी
अउर इ खबर मिस्र क दुःख देइ।
६ तोहार जलयान तर्सीस क लउटि जाइ चाही।
हे सागरतट वासियो ! दुःखे मँ बूड़ जा।
७ बीते दिनन मँ, तू पचे सोर क महिमा स आनन्द
लिहा।
इ नगरी सुरू स ही विकसित होत रही, उ नगर
क लोग नगरन स कहूँ दूर बसइ बरे जात्र
किहेन।
८ सोर क नगर बहोत सारे नेता पैदा किहेस।
हुवाँ क बइपारी राजपूतन क समान होत हीं
अउर उ सबइ लोग वस्तुअन खरीदत अउ बेचत
हीं।
उ पचे हर कहूँ आदर पावत हीं, तउ कउन सोर क
खिलाफ जोजनन रचेस ह।
९ हाँ, सर्वसक्तीमान यहोवा उ सबइ जोजना बनाए
रहा।
उहइ ही ओनका महत्व स पूर्ण न बनावइ क
निहचय किहे रहा।
१० हे तर्सीस क जहाजो तू पचे अपने देस क लउटि
जा।
तू पचे सागरे क अइसे पार करा जइसे उ नान्ह स
नदी होइ।
कउनो भी मनई अब तू सबन्क नाहीं रोकी।
११ यहोवा आपन हाथ सागर क ऊपर फइलाएस ह
अउर राज्जन क कँपाइ दिहस।
यहोवा कनान देस क बारे मँ आदेस दइ दिहस
कि ओकरे गदियन क नस्ट कइ दीन्ह जाइ।
१२ यहोवा कहत ह, “हे ! सीदोन क कुंवारी बिटिया,
तोहका बर्बाद कीन्ह जाइ।
अब तू अउर जियादा आनन्द न मनाइ पाई।”
किन्तु सोर क निवासी कहत हीं, “हमका किन्तीम
बचाई।”
किन्तु अगर तू सागरे क पार कइके किन्तीम जा
हुवाँ भी तू चैन क ठउर न पउब्या।
१३ एह बरे सोर क निवासी कहा करत हीं,
“बाबुल क लोग हम क बचइहीं।”
किन्तु तू बाबुल क लोगन क धरती पइ लखा।
एक देस क रूप मँ आजु बाबुल क कउनो अस्तित्व
नाहीं अहइ।
बाबुल क ऊपर अस्मूर चढाई किहस
अउर ओकरे चारिहुँ ओर बुर्जियन बनाएस।
फउजियन सुन्नर घरन क सब धन लूट लिहन।
अस्मूर बाबुल क जँगली पसुअन क घर बनाइ
लिहस।
उ पचे बाबुल क खण्डहरन मँ बदल दिहन।

१४ तउ तर्सीस क जलयानो तू पचे बिलाप करा।
तोहार सबन्क सुरच्छा ठउर (सोर) बर्बाद होइ
जाइ।

१५ सत्तर बरिस तलक लोग सोर क बिसरि
जइहीं। (इ समय, कउनो राजा क सासनकाल क
बराबर समय माना जात रहा।) सत्तर बरिस क
पाछे, सोर एक रण्डी क नाई होइ जाइ। इ गीत
मँ:

१६ हे रण्डी ! जेका मनसेधूअन बिसराइ दिहन।

तू आपन वीणा उठावा अउर इ नगर मँ धूमा।

तू आपन गीत क अच्छी तरह बजावा,

तू अक्सत आपन गीत गावा करा।

तबहिं तोहका लोग फुन स याद करिहीं।

१७ सत्तर बरिस क पाछे, परमेस्वर सोर क
समस्या पइ विचार करब। सोर फुन आपन मजदूरी
एक रण्डी क नाई धरती क सबहिं रास्ट्रन क
संग बइपार कइके प्राप्त करइ लागी। १८ किन्तु
सोर जउने धन क कमाई ओका रख नाहीं पाई।
सोर उ लाभ क जउन उ बइपार मँ कमाएस ह,
यहोवा बरे सुरच्छत रहीं। सोर ओका ओन लोगन
क देइ जउन यहोवा क सेवा करत अहा। एह बरे
यहोवा क सेवक भर पेट खइया क खइहीं अउर
नीक ओढ़ना पहिरिहीं।

परमेस्वर इस्राएल क सजा देइ

२४ १ लखा ! यहोवा इ धरती क बर्बाद करी।
यहोवा भूचालन क जरिये इ धरती क
मरोड़ देइ। यहोवा लोगन क कहूँ दूर जाइ क
मजबूर करी। २ उ समय, हर कउनो क संग एक
जइसी घटनन घटिहीं, साधारण मनई अउ याजक
एक जइसे होइ जइहीं। सुआमी अउर सेवक
एक जइसे होइ जइहीं। दासियन अउर ओनकर
सुआमियन एक समान होइ जइहीं। मोल लेइवाले
अउर बेसइवाले एक जइसे होइ जइहीं। कर्जा
लेइवालन अउर कर्जा देइवालन लोग एक जइसे
होइ जइहीं। धनवान अउर दीन लोग एक जइसे
होइ जइहीं। ३ सबहिं लोगन क हुवाँ स ढकेल
बाहेर कीन्ह जाइ। सारी धन दौलत छोरी लीन्ह
जइहीं। अइसा एह बरे घटी काहेकि यहोवा
अइसा ही आदेस दिहस ह। ४ देस उजड़ जाइ
अउर दुःखी होइ। दुनिया खाली होइ जाइ अउर उ
दुर्बल होइ जाइ। इ धरती क महान नेता सक्तिहीन
होइ जइहीं।

५ इ धरती उ लोगन दुआरा दूसित कइ दीन्ह
ग अहइ जउन एह पइ रहत हीं। अइसा कइसा
होइ गवा ? लोग परमेस्वर क सिच्छा क विरोध

मँ गलत काम किहेन। लोग परमेस्वर क नेमन क पालन नाहीं किहेन। बहोत पहिले उहइ लोग परमेस्वर क संग एक करार किहे रहेन। किन्तु परमेस्वर क समन्वा कीन्ह गवा उ करार क उ पचे उल्लंघन किहेस। ६इ धरती क रहइवाले लोग अपराधी अहईं। एह बरे परमेस्वर इ धरती क नस्ट करइ क निहचय किहस। ओन लोगन क सजा दीन्ह जाइ अउर हुवाँ थोड़े स लोग ही बचि पइहीं।

७ अंगूर क बेलन मुरझात अहईं। नई दाखरस क कमी पड़ति अहइ। पहिले लोग खुस रहेन। किन्तु अब उ पचे ही लोग दुःखी अहईं। ५ लोगन आपन खुसी बियक्त करइ तजि दिहे अहईं। खुसी क सबहि ध्वनियन रुकि गइ बाटिन। खँजरियन अउ वीणन क आनन्द स भरा संगीत खतम होइ चुका अहइ। ९ अब लोग दाखरस पिअत अहईं, तउ खुसी क गीत नाहीं गउतेन। अब जब मनई दाखरस पिअत ही, तब उ ओका कडुई लागत ह।

१० इ सहर क एक नीक स नाउँ अहइ, “गडबड स भरा”, इ नगर क बिनास कीन्ह गवा। लोग घरन मँ नाहीं घुस सकतेन। दुआर बंद होइ चुका अहईं। ११ गलियन मँ दुकानन पइ लोग अबहुँ भी दाखरस क पूँछत हीं, किन्तु समूची खुसी जाइ चुकी अहइ। आनन्द तउ दूर कइ दीन्ह ग अहइ। १२ नगर बरे बस बिनास ही बचत अहइ। दुआर तलक चकनाचूर होइ चुका अहईं।

१३ फसल क समय लोग जइतून क वृच्छ स जइतून क गिरावा करिहीं। किन्तु केवल कछू ही जइतून वृच्छन पइ बचिहीं! जइसे अंगूरे क फसल उतारइ क पाछे थोड़ा स अंगूर बचे रहि जात हीं,

अइसा ही इ धरती क रास्ट्रन क संग होइ।

१४ बचे भए लोग ऊँची आवाज़ मँ स्तुति करीं।

दूरगामी देस क लोग यहोवा क महानता क स्तुति करिहीं अउर उ पचे, खुस होइहीं।

१५ उ सबइ लोग कहा करिहीं, “पूर्व क लोगो, यहोवा क तारीफ करा।

दूर देस क लोगो,

इस्राएल क परमेस्वर यहोवा क नाउँ क गुण गान करा।”

१६ इ धरती पइ हर कहूँ हम परमेस्वर क स्तुति क गीत सुनब।

एँन गीतन मँ परमेस्वर क स्तुति होइ।

किन्तु मई कहत हउँ, “मई बरबाद होत रहत हउँ। मई जउन कछू भी लखत हउँ सब कछू खउफनाक अहइ।

गद्दार लोग, लोगन क विरोधी होत रहत हीं,

अउर ओनका चोट पहाँचावत हीं।”

१७ मई धरती क बसइयन पइ खतरा आवत लखत हउँ।

मई ओनके बरे भय, गइहन अउर फँदन लखत हउँ।

१८ लोग खतरे क सुनिके

डर स काँपि जइहीं।

कछू लोग, पराइ जइहीं

किन्तु उ सबइ गइहन अउर फँदन मँ जाइ गिरिहीं अउर ओन गइहन स कछू चढिके बचि निकरि अइहीं,

किन्तु उ पचे फुन दूसर फँदन मँ फँसिहीं।

ऊपर अकासे क छाती फटि जाइ जाइसे बाढ़ क दुआर खुलि गवा होइ।

बाढ़न आवइ लगिहीं अउर धरती क नेंव डगमग हिलइ लागी।

१९ भूचाल आइ

अउर धरती फट जाइहीं।

२० संसार क पाप बहोत भारी अहईं।

उ भारे स दबिके इ धरती गहराइ जाइ।

इ धरती कउनो झोपड़ी स काँपी

अउर नसे मँ धुन्त कउनो मनई क तरह धरती गिर जाइ।

इ धरती बनी न रही।

२१ उ समय यहोवा सब क निआव करी।

उ समय यहोवा अकासे मँ सरग क फउजन अउर धरती क राजा उ निआव क विषय होइहीं।

२२ एन सबन क एक संग एकट्टा कइ दीन्ह जाइ।

ओनमाँ स कछू काल कोठरी मँ बन्द होइहीं

अउर कछू कारागार मँ रइहीं।

किन्तु अंत मँ बहोत समय क पाछे, एन सबन्क निआव होइ।

२३ यरूसलेम मँ सिय्योन क पहाड़े पइ यहोवा राजा क रूप मँ राज्ज करी।

अग्रजन क समन्वा ओकर महिमा होइ।

ओकर महिमा एँतनी भव्व होइ कि चँदा व्याकुल होइ जाइ,

सूरज लजाइ जाइ।

परमेस्वर क एक स्तुति-गीत

१ हे यहोवा, तू मोर परमेस्वर अहा।

२५ मई तोहरे नाउँ क स्तुति करत हउँ अउर

मई तोहका सम्मान देत हउँ।

तू अनेक अदभुत कार्य किहा ह।

जउन भी सब्द तू बहोत पहिले कहे रह्या उ सबइ पूरी तरह स फुरइ अहईं।

हर बात वइसी ही घटी जइसी तू बताए रह्या ।
 २ तू नगर क नस्ट किहा ।
 उ नगर सुदृढ़ चहरदीवारी स संरच्छित रहा ।
 किन्तु अब उ मात्र पाथरन क ढेर रहि गवा ।
 परदेसियन क महल नस्ट कइ दीन्ह गवा ।
 अब ओकर फुन स निर्माण नाही होइ ।
 ३ सामर्थी लोग तोहार महिमा करिही ।
 कूरर जातियन क नगर तोहसे डेरइही ।
 ४ यहोवा तू निर्धन लोगन बरे जउन जरूरतमंद
 अहइ, सुरच्छा क ठउर अहा ।
 अनेक बिपत्तियन ओनका पराजित करइ क आवत
 हीं किन्तु तू ओनका बचावत ह ।
 तू एक अइसा भवन अहा जउन ओनका तूफानी
 बर्खा स बचावत ह
 अउर तू एक अइसी हवा अहा जउन ओनका गर्मी
 स बचावत ह ।
 बिपत्तियन खउफनाक आँधी अउर घनघोर बर्खा
 जइसी आवत ह ।
 बर्खा देवारन स टकरात ह अउर खाले बहि जात
 ह
 किन्तु मकाने मँ जउन लोग अहइ, ओनका
 नोस्कान पहोंचावत ह ।
 ५ नारा लगावत भए दुस्मन ललकारेस ।
 घोर दुस्मन चुनौती देइ क ललकारेस ।
 किन्तु तू हे परमेस्वर, ओनका रोक लिहा ।
 उ सबइ अइसे रहेन जइसे गर्मी कउनो खुस्क
 जगह पइ ।
 तू ओन कूरर लोगन क विजय गीत अइसे रोक
 दिहे रह्या जइसे सघन मेघन क छाया गर्मी
 क दूर करत ह ।

आपन सेवकन बरे परमेस्वर क भोज

६ उ समय, सर्वसक्तीमान यहोवा इ पर्वते प
 सबहिं रास्ट्रन बरे एकटु भोज क प्रबंध करी ।
 भोजे मँ स्वादिस्ट खइया क अउ दाखरस परोसा
 जाइ । भोज मँ नर्म अउ मजेदार गोस्त परोसा
 जाइ ।

७ किन्तु अब लखा, एक अइसा पर्वा अहइ जउन
 सबहिं जातियन अउर सबहिं मनइयन क ढके
 अहइ । इ पर्दे क नाउँ अहइ, “मउत ।” ८ किन्तु
 मउत क हमेसा बरे अंत कइ दीन्ह जाइ अउर
 मोर सुआमी यहोवा हर आँखी क आँसु पोंछ देइ ।
 बीते समय मँ ओकर सबहिं लोग समिन्दा रहेन ।
 यहोवा ओनकर लज्जा क इ धरती पइ स हरण कइ
 लेइ । इ सब कछु घटी काहेकि यहोवा कहे रहा,
 अइसा होइ ।

९ उ समय लोग अइसा कहिही,
 “लखा इ हमार परमेस्वर अहइ ।
 इ उहइ अहइ जेकर हम बाट जोहत रहे ।
 इ हमका बचावइ क आवा अहइ ।
 हम आपन यहोवा क प्रतीच्छा करत रहे ।
 एह बरे हम खुसियन मनाउब अउर खुस होब कि
 यहोवा हमका बचाएस ह ।”
 १० इ पहाड़े पइ यहोवा क सक्ति अहइ
 अउर मोआब पराजित होइ ।
 यहोवा सत्वरु क अइसा कुचिर डाइ
 जइसे भूसा कुचरा जात ह जउन खाद क ढेर मँ
 होत ह ।
 ११ यहोवा आपन हाथ अइसे पसारी जइसे कउनो
 तैरत भवा मनई फइलावत ह ।
 तब यहोवा ओन सबहिं वस्तुअन क एकट्टा करी
 जेन पइ लोगन क गर्व अहइ ।
 यहोवा ओन सबहिं सुन्नर वस्तुअन क बटोर लेइ
 जेनका उ पचे बनाए रहेन
 अउर उ एन वस्तुअन क लोकाइ देइ ।
 १२ यहोवा लोगन क ऊँच देवारन क नस्ट कइ देइ ।
 यहोवा ओनके सुरच्छा ठउरन क नस्ट कइ देइ ।
 यहोवा ओनका धरती क धूरि मँ पटक देइ ।

परमेस्वर क एक स्तुति-गीत

२६ १ उ समय, यहूदा क लोग इ गीत गइही :
 यहोवा हमका मुक्ति देत ह ।
 हमार एक सुदृढ़ नगरी अहइ ।
 हमरे नगर क सुदृढ़ परकोटा अउ सुरच्छा अहइ ।
 २ ओकरे दुआरन क खोला ताकि भले लोग ओहमाँ
 प्रवेश करइ ।
 उ सबइ लोग परमेस्वर क जिन्नगी क खरी राहे
 का पालन करत हीं ।
 ३ हे यहोवा, तू हमका सच्चा सान्ति प्रदान करत
 ह ।
 तू ओनका सान्ति दिया करत ह, जउन तोहरे भरोसे
 अहइ
 अउर तोह पइ बिस्सास रखत हीं ।
 ४ एह बरे सदा ही यहोवा पइ बिस्सास करा ।
 काहेकि “यहोवा याह” ही तोहार हमेसा सर्वदा बरे
 सरण क ठउर होइ ।
 ५ किन्तु अभिमानी नगर क यहोवा निहुराएस ह
 अउर हुवाँ क निवासियन क उ सजा दिहेस ह ।
 यहोवा उ ऊँच बसी नगरी क धरती पइ गिराएस ।
 उ एका धूरि मँ मिलावइ गिराएस ह ।
 ६ तब दीन अउ नमर लोग नगरी क खण्डहरन क
 आपन गोड़े तले रौंदि देइही ।

७ खरापन खरे लोगन क जिअइ क ढंग अहइ ।
 खरे लोग उ राहे पइ चलत हीं जउन सोझ अउ
 सच्ची होत ह ।
 परमेस्सर, तू उ राहे क चलइ बरे सुखद
 व सहल बनावत ह ।
 ८ किन्तु हे परमेस्सर ! हम तोहरे निआव क मारग
 क बाट जोहत अही ।
 हमार मन तोहका अउर तोहरे नाउँ क सुमिरन करइ
 चाहत ह ।
 ९ मोर मत राति भर तोहरे साथ रहइ चाहत ह
 अउर मोरे अन्दर क आतिमा हर नए दिन क सबेरे
 तोहरे साथ रहइ चाहत ह ।
 जब धरती पइ तोहार निआउ आइ,
 लोग खरी जिन्नगी जिअइ सीख जइहीं ।
 १० जदि तू सिरिफ दुट्ट पइ दाया देखावत रह्या
 तउ उ कबहुँ भी अच्छे करम करब नाहीं सीखी ।
 दुट्ट जन चाहे भले लोगन क बीच मँ रहइ मुला
 तब उ भी बुरे करम करत रही ।
 उ दुट्ट कबहुँ भी यहोवा क बड़प्पन नाहीं देख
 पाइ ।
 ११ हे यहोवा तू ओनका सजा देइ क तत्पर अहा
 किन्तु उ पचे एका नाहीं लखतेन ।
 हे यहोवा तू आपन लोगन पइ आपन असीम पिरम
 देखावत अहा
 जेका लखिके दुट्ट जन लज्जित होइ जात हीं ।
 तोहार दुस्मन आपन ही पापे क आगी मँ जरिके
 भसम होइ जइहीं ।
 १२ हे यहोवा, हमका कामयाबी तोहरे ही कारण
 मिली ह ।
 तउ कृपा कइके हमका सान्ति द्या ।
 यहोवा आपन लोगन क नवा जीवन देइ
 १३ हे यहोवा, तू हमार परमेस्सर अहा
 किन्तु पहिले हम पइ दूसर देवता राज करत रहेन ।
 हम दूसर सुआमियन स जुड़े भए रहेन
 किन्तु अब हम इ चाहित ह कि लोग बस एक ही
 नाउँ याद करइँ उ अहइ तोहार नाउँ ।
 १४ अब उ पचे सुआमी जिअत नाहीं अहइँ ।
 उ सबइ भूत आपन कब्रन स कबहुँ भी जिअत
 नाहीं उटिहीं ।
 तू ओनका बर्बाद करइ क निहचय किहे रह्या
 अउर तू ओनकर याद तलक क मेट दिया ।
 १५ हे यहोवा, तू जाति क बढ़ाया ।
 जाति क बढ़ाइके तू महिमा पाया ।
 तू प्रदेस क चउहदी क बढ़ाया ।
 १६ हे यहोवा, तोहका लोग

दुःखे मँ याद करत हीं,
 अउर जब तू ओनका सजा दिया करत ह
 तब लोग तोहार गूँगी पराथनन करत हीं ।
 १७ हे यहोवा, हम तोहरे कारण अइसे होत हँ
 जइसे जच्चा पीरा क झेलत मेहरारू होइ
 जउन बच्चा क जनम देत समय रोवत बिलखत
 अउर पीरा भोगत ह ।
 १८ इहइ तरह हम भी गर्भधारण कइके पीरा भोगित
 ह ।
 हम जनम देइत ह किन्तु सिरिफ वायु क ।
 हम संसार क नवा लोग नाहीं दइ पाए ।
 हम धरती क उद्धार पइ नाहीं लिआए पाए ।
 १९ यहोवा कहत ह,
 “मरे भए तोहार लोग फुन स जी जइहीं ।
 मरे लोगन क देह मउत स जी उठी ।
 हे मरे भए लोगो,
 हे धूरि मँ मिल भवो,
 उठा अउ तू पचे खुस होइ जा ।
 उ ओस जउन तोहका घेरे भए अहइ,
 अइसी अहइ जइसे रोसनी मँ चमकत भइ ओस ।
 धरती ओनका फुन जनम देइ
 जउन अबहि मरे भए अहइँ ।”

निआव पुरस्कार या सजा

२० हे मेरे लोगो, तू पचे आपने कोठरियन मँ जा ।
 आपन क थोड़े समय बरे
 आपन कमरन मँ छिपा ल्या ।
 परमेस्सर क किरोध बहोत जल्द सान्त होइ जाइ ।
 २१ यहोवा धरती क लोगन क पापन क निआव करी
 बरे
 सरग क आपन ठउरे क तजि देइ ।
 धरती अब मरा भवा लोगन क अउर न ढाँपिही ।
 धरती खुद पइ बहाइ गवा खून क राज क फास
 करिहीं ।

२७ ? उ समय, यहोवा लिब्यातान क निआव
 करी
 जउन एक फरार सरप अहइ ।
 यहोवा आपन बड़की अउ सक्तीसाली तरवार क
 उपयोग
 कुंडली मारे सरप लिब्यातान क मारइ मँ करी ।
 यहोवा सागरे क भीमकाय प्राणी क मारि डाइ ।
 २ उ समय, हुवाँ खुसियन स भरा अंगूरे क एक बाग
 होइ ।
 तू पचे ओकर गीत गावा ।
 ३ “मइँ यहोवा, उ बाग का धियान रखब ।
 मइँ बागे क उचित समय पइ सींचब ।

मई बगीचे क रात दिन रखवारी करब
ताकि कउनो भी ओका नोस्कान न पहोंचाइ
पावइ ।

४ मई कुपित नाही होब ।

जदि काँटा काँटेरी मोका हुवाँ मिलइ तउ मई वइसे
रौदब

जइसे फउजी रौदत चला जात ह अउर ओनका
फूँक डाउब ।

५ लेकिन अगर कउनो मनई मोरी सरण मँ आवइ
अउर मोहसे मेल करइ चाहइ

तउ उ चला आवइ अउर मोहसे मेल करि लेइ ।

६ आवइ वाले दिनन मँ याकूब क लोग उ पउधे क
समान होइहीं जेकर उड़न उत्तिम होत हँ ।

याकूब क बिकास उ पनपते पउधे सा होइ जेह पइ
बहार आई होइ ।

फुन धरती याकूब क बंसजन स भरि जाई जइसे
वृच्छन क फलन स उ भर जात ह ।”

परमेस्सर इस्राएल क खोज निकारत ह

७ यहोवा आपन लोगन क ओतना दण्ड नाही
दिहस ह जेतना उ ओनके दुस्मनन क दिहस ह ।
ओकर लोग ओतने नाही मरेन ह जेतने उ सबइ
लोग मरेन ह जउन एन लोगन क मारइ बरे
परयत्नसील रहेन ।

८ यहोवा इस्राएल क दूर पठइके ओकरे संग
आपन विवाद सुलझाइ लेइ । यहोवा इस्राएल
क उ तेज हवा क झोंके स उड़ाइ दिहस जउन
रेगिस्ताने क गरम लू क समान होत ह ।

९ याकूब क अपराध कइसे छिमा कीन्ह जाइ ?
ओकरे पापन्क कइसे दूर कीन्ह जाइ ? इ सबइ
बातन घटिहीं, वेदी क सबइ सिला चकनाचूर
होइके धूरि मँ मिल जइहीं, लबार देवतन क स्तम्भ
अउर ओनकर पूजा क वेदियन तहस-नहस कइ
दीन्ह जाइ ।

१० इ नगरी नस्ट होइ जाब्या । सब लोग कहूँ
दूर भाग जाब्या । उ नगर एक खुली चरागाह
जइसा होइ जाब । मवेसियन क बच्चन हुआँ घाँस
खाइहीं मवेसी अंगूरे क बेलन स पातियन खाइहीं
होइ । ११ इ सहर उ अंगूर क बेलन क नाई अहइ
जउन फसल काटि स पहिले ही सूख ग अहइ,
काहेकि एकर डारन मरि गवा अहइ । एह बरे डारन
टूटिके गिर ग अहइ । मेहररून ओन डारन जराइ
बरे आई । इ सबइ लोग मूरख अहइ । एह बरे
ओकर बनाइवाला ओकर प्रति दया नाही देखाई ।
ओनकर रचयिता ओनके बरे दयालु नाही होइ ।

१२ उ समय, यहोवा दूसर लोगन स आपन
लोगन क अलग करइ लागी । परात नदी स उ इ
कारज क आरम्भ करी । परात नदी स लइके मिस्र
क नदी तलक यहोवा तू इस्राएलियन क एक-
एक क कइके एकट्टा करी । १३ अस्सुर मँ अबहिं
मोर बहुत स लोग खोए भए अहइ । मोर कछु
लोग मिस्र क पराइ ग अहइ । किन्तु उ समय
तलक एक बिसाल भेरी बजाई जाइ अउर उ सबइ
सबहिं लोग वापिस यरूसलेम आइ जइहीं अउ
उ पवित्तर पर्वत पइ यहोवा क समन्वा उ सबइ
सबहिं लोग निहुरि जइहीं ।

उत्तर इस्राएल क चितउनी

१ सोमरोन क लखा ।
२८ एप्रैम क मदमस्त लोग उ नगर पइ गर्व
करत हीं ।

उ नगर पहाड़ी पइ बसा ह जेकरे चारिहुँ कइँती एक
संपन्न घाटी अहइ ।

सोमरोन क वासी इ सोचा करत हीं कि ओनकर
सहर फूलन मुकुट जइसा अहइ ।

किन्तु उ पचे दाखरस स धुत्त अहइ

अउर इ “सुन्नर मुकुट” मुरझाए पौधा स अहइ ।

३ लखा, मोर सुआमी एक मनई क चुनेस ह जउन
मजबूत अउर वीर अहइ ।

उ व्यक्ति इ देस मँ इ तरह आइ जइसे ओलन अउ
बर्खा क तूफान आवत ह ।

उ देस मँ इ तरह आइ जइसे बाढ़ आवा करत ह ।

उ समारिया क धरती पइ फेंकी ।

४ नसे मँ धुत्त एप्रैम क लोग आपन “सुन्नर मुकुट”
पइ गर्व करत हीं

किन्तु उ नगरी गोड़े तले रौदी जाइ ।

५ उ नगर पहाड़ी पइ बसा अहइ जेकरे चारिहुँ
कइँती एक सम्पन्न घाटी अहइ ।

किन्तु उ “फूलन क सुन्नर मुकुट” बस एक मुरझात
भवा पौधा अहइ ।

उ नगर गर्मी मँ अंजीर क पहिले फले क समान
होई ।

जब कउनो उ पहली अंजीर क लखत ह तउ हाली
स तोड़के ओका चट कइ जात ह ।

६ उ समय, सर्वसक्तीमान यहोवा, “सुन्नर
मुकुट” बनी । उ ओन बचे भए आपन लोगन बरे
“फूलन क सानदार मुकुट” होइ । ६ फुन यहोवा
ओन निआव क अधासन क बुद्धि प्रदान करी
जउन ओकर आपन लोगन क सासन करत
हीं । नगर दुआरन पइ जुद्धन मँ लोगन यहोवा
सक्ति देइ । ७ किन्तु अबहिं उ सबइ मुखिया लोग

मदमस्त अहइँ। याजक अउ नबी सबहिं दाखरस अउर सुरा स धुत्त अहइँ। उ सबइ लइखडात अहइँ अउर खाले भहराइ पडत अहइँ। नबी जब आपन सपनन लखत हीं। निआव क अधीस जब निआव करत हीं तउ उ पचे नसे मँ बूडे भए होत हीं।^५ हर खाइ क मेज उल्टी स भरी भइ अहइ। कहूँ भी कउनो स्वच्छ ठउर नाहीं रहा अहइ।

परमेस्सर आपन लोगन क सहायता करइ चाहत ह

^१ उ पचे कहा करत हीं, इ मनई कउन अहइ ? इ केका सिच्छा देइ क कोसिस करत अहइ ? उ आपन सँदेसा केका समुझावत अहा ? का ओन बच्चन क जेनकर अबहिं-अबहिं दूध छोड़वा गवा अहइ ? का ओन बच्चन क जेनका अबहिं अबहिं आपन महतारियन क छाती स दूर कीन्ह गवा ह ?^{१०} एह बरे यहोवा ओनसे इ तरह बोलत ह जइसे उ पचे दुधमुहाँ बच्चन होई।

“सौ लासौ सौ लासौ
काव लाकाव काव लाकाव
जेइर साम जेइर साम।”[‡]

^{११} फिन यहोवा ओन लोगन स बात करी ओकर होंठ कौपत भए होइहीं अउर उ ओन लोगन स बातन करइ मँ दूसर विचित्र भाखा प्रयोग करी।

^{१२} यहोवा पहिले ओन लोगन स कहे रहा, “हिआँ विस्राम क एक ठउर अहइ। थके माँदे लोगन क हिआँ आवइ द्या अउर विस्राम पावइ द्या। इ सान्ति क ठउर अहइ।”

किन्तु लोग परमेस्सर क सुनइ नाहीं चाहेन।
^{१३} तउ परमेस्सर क बचन कउनो विचित्र भासा क जइसे होइ जइहीं।

“सौ लासौ सौ लासौ
काव लाकाव काव लाकाव
जेइर साम जेइर साम।”

तउ लोग जब चलिहीं तउ पाछे कइँती लुढ़क जइहीं अउर जख्मी होइहीं। लोगन क फँसाइ लीन्ह जाइ अउर उ पचे धरा जइहीं।

परमेस्सर क निआव स कउनो नाहीं बच सकत

^{१४} हे, यरूसलेम क आग्या क नाहीं मानइवाले अभिमानी मुखिया लोगो, तू यहोवा क सँदेसा सुना।^{१५} तू लोग कहत अहा, “हम मउत क संग एक वाचा कीन्ह ह। सेओल (मौत क पहँटा)

क संग हमार एक अनुबंध अहइ। एह बरे हम दण्डित नाहीं होब। दण्ड हम पचन्क नोस्कान पहाँचाए बगैर हमरे पास स निकरि जाइ। आपन चालाकियन अउर आपन झूठन क पाछे हम पचे लुकाइ जावइ।”

^{१६} एन बातन क कारण मोर सुआमी यहोवा कहत ह: “मई एक पाथर एक टु कोने क पाथर सिध्दोन मँ धरती पइ गइब। इ एक अत्यन्त मूल्यवान पत्थर होइ। इ बहोत महत्वपूर्ण पाथर पई ही हर कउनो वस्तु क निर्माण होइ। जेहमाँ बिस्सास होइ, उ कबहुँ धबराई नाहीं।

^{१७} “लोग देवारे क सोझ लखइ बरे जइसे सूत डाइके लखत हीं, वइसे ही मई जउन उचित अहइ ओकरे बरे निआव अउर खरेपन क प्रयोग करब। तू दुट्ट लोग आपन झूठ अउर चालाकियन बरे आपन क छुपावइ क जतन करत अहा, किन्तु तोहका दण्ड दीन्ह जाइ। उ दण्ड अइसा ही होइ जइसे तोहरे सबन्क छुपावइ क ठउरन क नस्ट करइ बरे कउनो तूफान या कउनो बाढ़ आवत होइ।^{१८} मउत क साथे तोहरे वाचा क मेट दीन्ह जाइ। अधोलोक क संग भई तोहार संधि भी तोहार मदद नाहीं करी।

“जब खउफनाक सजा तोहे सबन पइ पड़ी तू पचे कुचरा जाब्या।^{१९} उ हर दाई जब आई तू पचन्क हुवाँ लइ जाइ। तोहार पचन्क सजा भयानक होइ। तू पचन्क भिन्सारे दर भिन्सारे अउर दिन रात सजा मिली।

“जब तू पचे इ कहानी क समुझब्या: ^{२०} कउनो मनसेधू एक अइसे बिछुउना पइ सोवइ क जतन करत रहा जउन ओकरे बरे नान्ह रहा। ओकरे लगे एक कबल रहा जउन एतना चौड़ा नाहीं रहा कि ओका ढाक लेइ। त उ बिछुउना अउर उ कम्बल ओकरे बरे बियर्थ रहेन अउर लखा तोहार वाचा भी तोहरे सबन्क बरे अइसा रही।”

^{२१} यहोवा वइसे ही जुद्ध करी जइसे उ पराजीम नाउँ क पहाड़ पइ किह रहा। यहोवा वइसे ही कोहाइ जाइ जइसे उ गिबोन क घाटी मँ भवा रहा। तब यहोवा ओन कामन क करी जउन ओका निहचय ही करइ क अहइँ। यहोवा कछू बिचित्र काम करी। किन्तु उ आपन काम क कर देइ। ओकर काम कउनो एक अजनबी क काम अहइ।^{२२} अब तू पचन्क इ सबइ बातन क मजाक नाहीं उड़ाइ

[‡]२८:१० सो लासौ ... जेइर साम साँझ इ साइद कउनो हिवरू गीत अहइ। इ गीत क जरिये बच्चन क लिखब सिखावा जात रहा। गीत क अनुवाद इ सब्दन मँ कीन्ह जाइ सकत ह: “एक आग्या हिआँ एक आग्या हुवा, एक नेम हिआँ एक नेम हुवाँ, एक पाठ हिआँ एक पाठ हुवाँ।”

चाही। जदि तू पचे अइसा करब्या तउ तोहार पचन्क बन्धन क रस्सियन अउर जियादा कस जइहीं।

सर्वसक्तीमान यहोवा इ समूचे प्रदेश क नस्ट करइ क ठान लिहस ह। जउन सब्द मई सुने रहेउं, अटल अहई। तउ उ सबइ बातन जरूर घटिहीं।

यहोवा खरा दण्ड देत ह

२३ जउन सँदेसा मई तू पचन्क सुनावत हउं, ओका धियान स सुना। २४ का कउनो किसान आपने खेते क हर समय जोतत रहत ह नाही। का उ माटी क हर समय सँवारत रहत ह नाही। २५ किसान आपन धरती क तइयार करत ह, अउर फुन ओहमाँ बिआ अलग-अलग डावत ह। किसान अलग-अलग बीजन क रोपाई, ढंग स करत ह। किसान सौफ क बिआ बिखेरत ह अउर एक किसान कटिए गोहूँ क बोवत ह। एक किसान खास जगह पइ अउ लगावत ह। एक किसान कटिए गोहूँ क बिअन क खेत क मेंड पइ लगावत ह।

२६ ओकर परमेस्सर ओका सिच्छा देत ह अउर अच्छे तरह स ओका निर्देस देत ह। २७ का कउनो किसान तेज दाँतदार तखन क प्रयोग सौफ क दानन क गहावइ बरे करत ह नाही। का कउनो किसान जीरा क गहावइ बरे कउनो छकड़े क प्रयोग करत ह नाही। एक किसान इ मसालन क बीअन क छिलका उतारइ बरे एक नान्ह स कुबरी क प्रयोग ही करत ह। २८ लोगन क रोटी बनावइ बरे अनाज क पीसइ परी, किन्तु उ पचे लगातार अनाज जिन पीसत रहतेन। एक किसान अनाज क दलइ क बरे अनाज दलइ क पहिया अनाजे पइ फिराइ क परी, किन्तु ओका अनाजे क रौंदइ बरे घोड़न क समूह क जरूरत नाही परी! ठीक इहइ तरह, परमेस्सर आपन लोगन क लगातार सजा नाही देत ह! २९ सर्वसक्तिमान यहोवा स इ पाठ मिलत ह। यहोवा अद्भुत सलाह देत ह। यहोवा फुरइ बहोत बुद्धिमान अहइ।

परमेस्सर क यरूसलेम स पिरैम

२० परमेस्सर कहत ह, “हे अरीएल, अरीएल! तू उ सहर अहइ जहाँ दाऊद छावनी डाए रहा। लोग इ सहर क बरिस दर बरिस पवित्र भोज बरे जातर किहेस। २ किन्तु जब मई अरीएल क अन्त करब्या, तउ हुवाँ सोक अउ विलाप होइ। किन्तु उ तब भी मोर अरीएल होइ!

३ “तब मई तोहका फउजन क सिबिर स घेरउब। मई तोहार विरोध मँ जुद्ध क बुर्ज अउर ढलवान बनाउब। ४ तू पचे धरती पइ गिरि जाब। धूल स तोहार कमजोर धीमा फुसफुसाहत क आवाज अइसा होइ जइसे धरती प कउनो भूत होइ।”

५ तोहार दुस्मन धूर क कण क भाँति अनगिनत होइहीं। तोहार क्रूर अत्याचार अनगिनत होइहीं जइसे भूसे आँधी मँ उड़त भए अहा। ६ सर्वसक्तिमान यहोवा बादरन क गर्जन स, धरती क काँपे स, अउर जहा ध्वनियन स तोहरे लगे आइ। यहोवा दण्डित करी। यहोवा तूफान, तेज आँधी अउर आगी क प्रयोग करी जउन बारिके सबहिं क नस्ट कइ देइ। ७ तउ रात क सपना क नाई जउन कि जागते ही गाइब होइ जात ह अइसा ही अरीएल क चारिहुँ कइती स घेरा भवा फउज अउर ओनके जुद्ध यंत्र जउन कि ओकर खिलाफ घूमत रहत ह, गाइब होइ जात हीं। ८ मुला ओन फउजन क एक सपना जइसा होइ। उ सबइ फउजन उ सब चिजियन न पइहीं जेनका उ पचे चाहत हीं। इ वइसा ही होइ जइसा भूखा मनई भोजन क सपन लखइ अउर जागइ पइ उ आपन क वइसा ही भूखा पावइ। इ वइसा ही होइ जइसे कउनो पिआसा पानी क सपन लखइ अउर जब जागइ तब आपन क पियासा पावइ। सिय्योन क विरोध मँ लड़त भए सबहिं देस फुरइ अइसे ही होइहीं। इ बात ओन पइ खरी उतरी। देसन क उ सबइ चिजियन नाही मिलिहीं जेनका ओनका चाह अहइ।

९ आस्वर्च्य चकित होइ जा अउर अचरज स भरि जा।

तू पचे सबहिं धुत्त होब्या किन्तु दाखरस स नाही। लखा अउर अचरज करा।

तू लडखड़ाब्या अउर भहराइ जाब्या किन्तु सराबे स नाही।

१० यहोवा तोहका सबन्क सोवाएस ह।

यहोवा तोहार आँखिन मूँदि दिहस ह। (तोहार आँखिन नाही अहई)

११ मई तू पचन्क बतावत हउं कि इ सबइ बातन घटिहीं। किन्तु तू पचे मोका नाही समुझ रह्या। मोर सब्द उ किताबे क समान अहई, जउन बन्द अहई अउर जेह पइ एक मोहर लगी बाटइ। १२ तू पचे उ किताबे क एक अइसे मनई क दइ सकत ह जउन पढ़ सकत ह अउर उ मनई स कहि सकत ह कि उ उ किताबे क पढ़इ। मुला उ मनई कही, “मई किताबे क बाँच नाही सकत काहेकि इ बन्द अहइ अउर मई एका खोल नाही सकत।” या तू

उ किताबे क कउनो भी अइसे मनई क दइ सकत ह जउन बाँच नाहीं सकत, अउर उ मनई स कहि सकत ह कि उ उ किताबे क पढ़इ। तब उ मनई कही, “मई इ किताबे क नाहीं बाँचि सकत काहेकि मई पढ़ब नाहीं जानत।”

१३ मोर सुआमी कहत ह, “इ सबइ लोग कहत हीं कि उ पचे मोहसे पिरम करत हीं। आपन मुँहे क सब्दन स उ पचे मोरे बरे आदर परगट करत हीं। मुला ओनकर मन मोहसे दूर अहई। उ आदर जेका उ पचे मोरे बरे देखौवत हीं, बस कोरे मानव नेम अहई जउन उ पचे रट डाए अहई। १४ तउ मई एन लोगन क सक्ति स पूर अउर अचरज भरी बातन करत भए आश्चर्य चकित करत रहब। ओनकर बुद्धिमान मनई समझइ मँ असमर्थ होइ जइहीं।”

१५ धिक्कार अहइ ओन लोगन क जउन यहोवा स बातन छिपावइ क जतन करिहीं। उ पचे सोचत हीं कि यहोवा तउ समझी ही नाहीं। उ सबइ लोग आँधियारा मँ काम करत हीं। उ सबइ लोग आपन मन मँ कहा करत हीं, “हम पचन्क कउनो लख सकत नाहीं। हम पचे कौन अही, एका कउनो मनई नाहीं जानी।”

१६ तू पचे भ्रम मँ पड़ा अहा। तू पचे सोचा करत अहा, कि माटी कोहार क बराबर अहइ। तू पचे सोचा करत अहा कि कृति आपन कर्ता स कह सकत ह, “तू मोर रचना नाहीं किहा ह।” इ वइसा ही अहइ, जइसे गगरी क आपन बनावइवाले कोहार स इ कहब, “तू समझत्या नाहीं तू का करत अहा।”

एक उत्तम समय आवत अहइ

१७ इ फुरइ अहइ : कि लवानोन थोड़े समय पाछे, आपन बिसाल ऊँच बृच्छन बरे सपाट जोते खेतन मँ बदल जाइ अउर सपाट खेत ऊँच-ऊँच बृच्छन वाले सघन जंगलन क रूप लइ लेई। १८ किताबे क सब्दन क बहिरे सुनिहीं, आँधर आँधियारे अउ कोहरे मँ स लखि सकिहीं। १९ यहोवा दीन जनन क खुस करी। दीन जन इस्राएल क उ पवित्तरतम मँ आनन्द मनइहीं।

२० अइसा तब होइ जब नीच अउ कूरर मनई खत्म होइ जइहीं। अइसा तब होइ जब बुरा काम करइ मँ आनन्द लेइवाले लोग चले जइहीं। २१ (उ सबइ लोग दूसर लोगन क बारे मँ झूठ बोला करत हीं। उ पचे कचहरी मँ लोगन क फँसावइ क जतन करत हीं। उ पचे भोले भाले लोगन क नस्ट करइ मँ जुटे रहत हीं।)

२२ तउ यहोवा याकूब क परिवार स कहेस। (इ उहइ यहोवा अहइ जउन इब्राहीम क अजाद किहे रहा।) यहोवा कहत ह, “अब याकूब (इस्राएल क लोग) क लज्जित नाहीं होब होइ। अब ओकर मुँह कबहुँ पिअर नाहीं होइ चाही। २३ उ आपन सबहिँ संतानन क लखी अउर कही कि मोर नाउँ पवित्तर अहइ। एन संतानन क मई आपन हाथन स बनाएउँ ह अउर इ सबइ संतानन मनिहीं कि याकूब क पवित्तर परमेस्वर वास्तव मँ पवित्तर अहइ अउर इ सबइ संतानन इस्राएल क परमेस्वर क आदर देइहीं। २४ उ सबइ लोग जउन गलतियन करत हीं, अब समुझ जइहीं। उ सबइ लोग जउन सिकाइत करत रहत हीं अब निर्देसन क अंगीकार करिहीं।”

इस्राएल क परमेस्वर पइ बिस्सास रखइ चाही

३० यहोवा कहेस, “मोरे एन बच्चन क लखा, इ सबइ मोर बात नाहीं मानतेन। इ सबइ जोजनन बनावत हीं मुला मोर मदद नाहीं लेइ चाहतेन। इ सबइ दूसर जातियन क साथ समझौता करत हीं जबकि मोर आतिमा ओन समझौतन क नाहीं चाहत। इ सबइ लोग आपन मूँडे पइ पाप क बोझ बढ़ावत चला जात बाटेन। २ इ सबइ बच्चन मोहसे कछु नाहीं पूछतेन कि का अइसा करब उचित अहइ। ओनका उम्मीद अहइ कि फिरौन ओनका बचाइ लेइ। उ पचे चाहत हीं कि मिस्र ओनका बचाइ लेइ।

३ “मुला मई तू पचन्क बतावत हउँ कि मिस्र मँ सरण लेइ स तोहार पचन्क बचाव नाहीं होइ। मिस्र तोहार सबन्क रच्छा करइ मँ सफल नाहीं होइ। ४ तोहार पचन्क अगुअन सोअन मँ गवा अहई अउर तोहार पचन्क राजदूत हानेस क चला गवा अहई। ५ किन्तु ओनका निरासा ही हाथे लागी। उ पचे एक अइसे रास्टर पइ बिस्सास करत अहई जउन ओनका नाहीं बचाइ पाइ। मिस्र बेकार अहइ, मिस्र कउनो मदद नाहीं देइ। मिस्र क कारण ओनका अपमानित अउ लज्जित होइ पड़ी।”

यहूदा क परमेस्वर क सँदेसा

६ दक्खिन क गोरूनन बरे दुःखद सँदेसा : नेगव बिपत्तियन अउर खतरन स भरा एक ठु देस अहइ। इ पहँटा सेरन, नागन अउर उड़इवाले साँपन स भरा पड़ा अहइ। किन्तु कछु लोग नेगव स होत भए जात्रा करत अहई उ पचे मिस्र कइती जात अहई। ओन लोग गदहन क पीठन

पइ आपन धन-दौलत लादे भए अहई। ओन लोग आपन खजाना ऊँटन क पीठन पइ लाद रखे अहई अर्थात् इ सबइ लोग एक अइसे देस पइ भरोसा रखे अहई जउन ओनका नाहीं बचाइ सकत।^७ मिस्र ही उ बेकार क देस अहइ। मिस्र क मदद बेकार अहइ। एह बरे मई मिस्र क एक ठु अइसा रहाब कहत हउं जउन निटल्ला पड़ा रहत ह।

^८ अब एका एक चिह्न पइ लिख द्या ताकि सबहि लोग एका लिख सकई। एका एक ठु किताबे में लिख द्या। एनका अन्तिम दिनन बरे लिख द्या। इ सबइ बातन सुदूर भविस्स क साच्छी होइही।

^९ इ सबइ लोग ओन बच्चन क जइसे अहई जउन आपन महतारी-बाप क बात नाहीं मानतेन। उ सबइ लबार अहई अउर यहोवा क सिच्छन क सुनइ तलक नाहीं चाहतेन।^{१०} उ पचे नबियन स कहा करत हीं, “हम क जउन कछू ठीक बातन करइ चाही ओनके बारे मँ दर्सन जिन किया करा। हम क सच्चाई जिन बतावा। हम स अइसी अच्छी बातन कहा, जउन हम क नीक लाग सकत। हमरे बरे केवल अच्छी बातन ही लखा।^{११} जउन बातन फुरइ घटइ क अहई, ओनका लखब बन्द करा। हमरे राहे स हटि जा। इस्राएल क उ पवित्तर परमेस्सर क बारे मँ हम का बताउब बन्द करा।”

यहूदा क मदद केवल परमेस्सर स आवत ह

^{१२} इस्राएल क पवित्तर परमेस्सर कहत ह, “तू लोग यहोवा स इ सँदेसा क मानइ स मना कइ दिहा ह। तू लोग सहायता बरे लड़ाई-झगड़न अउर झूठ पइ निर्भर रहइ चाहत अहा।^{१३} तू पचे काहेकि एन बातन बरे अपराधी अहा, एह बरे तू पचे एक ठु अइसी ऊँच देवार क समान अहा जेहमाँ दरारन आइ चुकी अहई। उ देवार ढह जाइ अउर नान्ह नान्ह टूकन मँ टूटिके ढेर होइ जाइ।^{१४} तू पचे माटी क उ बड़के बर्तन क समान होइ जाब्या जउन टूटि टूटिके नान्ह नान्ह टूकन मँ बिखरि जात ह। इ सबइ टूकन बेकार होत हँ। एन टूकन मँ स तू पचे न तउ आगी स बरत कोयला ही उठाइ सकत ह अउर न ही क उनो जोहड़ स पानी।”

^{१५} इस्राएल क उ पवित्तर, मोर सुआमी यहोवा कहत ह, “जदि तू पचे मोरी कइँती लउट आवा तउ तू पचे बचि जाब्या। जदि तू पचे मोहे पइ भरोसा रखब्या तबहिँ तू पचन्क तोहार सबन्क बल मिली मुला तू पचन्क सान्त रहब होइ।”

मुला तू पचे तउ वइसा करइ ही नाहीं चाहत्या।^{१६} तू पचे कहत अहा, “नाहीं, हम पचन्क घोड़न क जरूरत अहइ जेन पइ चढिके हम पचे दूर पलाइ जाइ।” इ फुरइ अहइ तू पचे घोड़न पइ चढिके दूर पलाइ जाब्या मुला दुस्मन तोहार सबन्क पाछा करी अउर उ तोहारे सबन्क घोड़न स जियादा तेज होइ।^{१७} एक दुस्मन ललकारी अउर तोहार पचन्क सबहिँ लोग ओकरे समन्ना स भाग खड़ा होइ जइही। हुवाँ तू पचे अइसे अकेल्ले बचा रहि जाब्या, जइसे पहाड़ी पइ लगा तोहार पचन्क झण्डे क डण्डा।

परमेस्सर आपन लोगन क मदद करी

^{१८} यहोवा तू पचन्पइ आपन करूणा दर्सावत ह। यहोवा बाट जोहत ह। यहोवा तू पचन्क सुख चैन देइ बरे तइयार खड़ा अहइ। यहोवा खरा परमेस्सर अहइ अउर हर उ मनई जउन यहोवा क मदद क इंतजार मँ अहइ, धन्न (आनन्दित) होइ।

^{१९} हाँ, हे सिय्योन पर्वत पइ रहइ वालो, हे यरूसलेम क बसइयो, तू लोग रोवत बिलखत नाहीं रहब्या। यहोवा तोहरे पचन्क रोवइ क सुनी अउर उ तू पचन्पइ दया करी। यहोवा तोहार पचन्क सुनी अउर उ तोहार पचन्क मदद करी।

^{२०} जदपि मोर यहोवा परमेस्सर तू पचन्क दुःख अउ कस्ट दइ सकत ह अइसे ही जइसे माना उ अइसा रोटी-पानी होइ, जेका तू पचे हर दिन खात-पिअत ह्या। किन्तु असल मँ परमेस्सर तउ तोहार पचन्क सिच्छक अहइ, अउर उ तू पचन्स छिपा नाहीं रही। तू पचे खुद आपन आँखिन स आपन उ सिच्छक क लखब्या।^{२१} तब अगर तू पचे बुरे काम करब्या अउर बुरी जिन्नगी जीब्या (दाहिन कइँती या बाई कइँती) तउ तू पचे आपन पाछे एक आवाज क कहत सुनब्या, “खरी राह इ अहइ। तू पचन्क इहइ राहे मँ चलब अहइ।”

^{२२} तोहरे पचन्क लगे चाँदी सोने स मढी मूरतियन अहई। ओन झूठे देवतन तू पचन्क (पाप पूर्ण) बनाइ दिहेन ह। लेकिन तू पचे ओन झूठे देवतन क सेवा करब तजि देब्या। तू पचे ओन देवतन क कूड़े कचरे अउर मइले चिथड़न क समान दूर लोकउब्या।

^{२३} उ समय, यहोवा तोहरे पचन्बरे बर्खा पठइ। तू पचे खेतन मँ बिआ बोउब्या, अउर धरती तोहरे पचन्बरे भोजन उपजाइ। तू सबन्क भरपूर उपज मिली। तोहार पचन्क पसुअन बरे खेतन मँ भरपूर चारा होइ। तोहरे पचन्क पसुअन बरे हुवाँ बड़ी-बड़ी चरागाहन होइही।^{२४} तोहरे पचन्क

मवेसियन अउ तोहरे सबन्क गदहन क जइसे चारा क जरूरत होइ, उ सब ओनका मिली। खइया क एतना इफरात होइ कि तू पचन्क आपन पसुअन क खाइ बरे भी फावड़न अउर पंजन स चारा क फइलाउव होइ।^{२५} हर पर्वत अउर पहाड़ियन पइ पानी स भरी जल धारन होइहीं। इ सबइ बातन तब घटिहीं जब बहोत स लोग मरि चुकिहीं अउर मीनारन ढहि चुकिहीं।

^{२६} उ समय चाँद क चाँदनी सूरज क धूप जइसी उज्जर होइ जाइ। सूरज क रोसनी आज स सात गुना जियादा उज्जर होइ जाइ। सूरज एक दिन में एतनी रोसनी देइ लागी जितनी उ पूरे सप्ताह में देत ह। इ सबइ बातन उ समय घटिहीं जब यहोवा आपन टूटे लोगन क मरहम पट्टी करी अउर सजा क कारण जउन चोटन ओनका आई अहइ, ओनका चंगा करी।

^{२७} लखा! बहोत दूर स यहोवा क नाउँ आवत अहइ। उ बहोत किरोधित अहइ। उ सँदेसा जउन उ लावत ह भाड़ी वजन क नाई अहइ। ओकर होंठ क सब्द रूखा अहइ, ओकर जीभ एक बरत भए आग जइसी अहइ।^{२८} यहोवा क साँस (आतिमा) एक अइसी बिसाल नदी क तरह अहइ जउन तब तलक चढ़त रहत ह, जब तलक उ गटइ तलक नाही पहुँच जात। यहोवा सबहिं रास्ट्रन क निआव करी। इ वइसा ही होइ जइसे उ ओनका बिनासे क छलनी स छान डावइ। इ नियंत्रन वइसा होइ जइसे घोड़सवार लगाम क जरिया स घोड़ा क नियंत्रन करत ह, यहोवा रास्ट्रन क नियंत्रन करब अउर ओनकर अगुवाइ उ जगह तलक करब जहाँ उ ओनका लेइ जाइ चाहत ह।

^{२९} उ समय, तू पचे खुसी क गीत गउब्या। उ समय ओन रातिन क जइसा होइ जब तू पचे आपन उत्सव मनाउब सुरू करत अहा। तू पचे ओन मनइयन क समान खुस होब्या जउन इस्राएल क चट्टान यहोवा क पर्वत पइ जात समय बाँसुरी क सुनत भए प्रसन्न होत हीं।

^{३०} यहोवा सबहिं लोगन क आपन महान वाणी सुनइ क मजबूर करी। यहोवा लोगन क किरोध क संग खाले आवत भइ आपन सक्तिसाली भुजा लखइ क मजबूर करी। इ भुजा उ महा आगी क नाई होइ जउन सब कछु भसम कइ डावत ह। यहोवा क सक्ति उ आँधी क जइसी होइ जउन तेज बर्खा अउ ओलन क संग आवत ह।^{३१} अस्सूर जब यहोवा क अवाज सुनी तउ उ डेराइ जाइ। यहोवा लाठी स अस्सूर पइ वार करी।^{३२} यहोवा अस्सूर क पीटी अउर इ पिटाई अइसी होइ जइसे

कउनो नगाड़न अउ वीणन पइ संगीत बजावत हउँ। यहोवा आपन सक्तीसाली भुजा (सक्ति) स अस्सूर क हराई।

^{३३} तोपेत क बहोत पहिले स ही तइयार कइ लीन्ह गवा अहइ। राजा बरे इ तइयार अहइ। इ भट्टी बहोत गहिर अउर बहोत चौड़ी बनाई गइ अहइ। हुवाँ काठे क एक बहोत बड़का ढेर अउ आगी मौजूद अहइ। यहोवा क आतिमा बरत भइ गंधक क नदी क रूप में आइ अउर एका भसम कइके नस्ट कइ देइ।

इस्राएल क परमेस्सर क
सक्ति पइ भरोसा रखइ चाही

३१ ^१ ओन लोगन क धिक्कार अहइ जउन मदद पावइ बरे मिस्र कइँती उतरत अहइ। इ सबइ लोग घोड़न चाहत हीं, घोड़न ओनका बचाइ लेइहीं। लोगन क आसा बाटइ कि मिस्र क रथ अउर घुड़सवार सैनिक ओनका बचाइ लेइहीं। लोग सोचत हीं कि उ पचे सुरिच्छत एह बरे अहइ कि इ एक बिसाल सेना अहइ। लोग इस्राएल क पवित्तर (परमेस्सर) पइ भरोसा नाही रखतेन। लोग यहोवा स मदद नाही माँगतेन।^२ किन्तु, यहोवा ही बुद्धिमान अहइ अउर उ यहोवा ही अहइ जउन ओन पइ विपत्तियन ढाइ। लोग यहोवा क आदेस क नाही बदल पइहीं। यहोवा बुरे लोगन (यहूदा) क खिलाफ खड़ा होइ अउर जुद्ध करी। यहोवा ओन लोगन (मिस्र) क खिलाफ जुद्ध करी, जउन ओनका मदद पहाँचावइ क जतन करत हीं।

^३ मिस्र क लोग मात्र मनई अहइँ परमेस्सर नाही। मिस्र क घोड़न मात्र पसु अहइँ, आतिमा नाही। यहोवा आपन हाथ अगवा बढ़ाई अउर सहायक (मिस्र) हार जाइ अउर मदद चाहइवाले लोगन (यहूदा) क पतन होइ। उ पचे सबहिं लोग साथ साथ मिट जइहीं।

^४ यहोवा मोहसे इ कहेस, “जब कउनो सेर या सेर क कउनो बच्चा कउनो पसु क भच्छइ बरे धरत ह तउ उ मरे भए पसु पइ खड़ा होइ जात ह अउर दहाइत ह। उ समय उ सक्तिसाली सेर क कउनो भी डेराइ नाही पावत। अगर चरवाहन आवइँ अउर उ सेर क हाँका करइ लागइँ तउ भी उ सेर डेराइ नाही। लोग केतँना ही सोर करत रहइँ, मुला उ सेर नाही पराई।”

इहइ तरह सर्वसक्तिमान यहोवा सिय्योन पर्वत पइ उतरी। उ पर्वत पइ यहोवा जुद्ध करी।^५ सर्वसक्तिमान यहोवा वइसे ही यरूसलेम क

रच्छा करी जइसे आपन घोंसलन क ऊपर उड़त भइ चिरइयन। यहोवा ओका बचाइ अउर ओकर रच्छा करी। यहोवा ऊपर स होइके निकरि जाइ अउर यरूसलेम क रच्छा करी।

६ हे, इस्राएल क सन्तान! तू पचे परमेस्सर स विद्रोह किहा। तू पचन्क परमेस्सर कइती मुड आवइ चाही। ७ तब लोग ओन सोना चाँदी क मूरतियन क पूजब तजिहीं अउर जेनका तू पचे बनाया ह।

५ अस्सूर क लोग तरवार क जरिये मारि दीन्ह जाइ, मुला उ तरवार कउनो मनई क नाही होइ। हाँ अस्सूर क लोग तरवार स भाग जाइ क कोसिस करी, किन्तु ओनका जवान मनइयन क धइ लेहीं अउ दास बनाइ लेहीं। १ ओन लोगन क पनाह क स्थान क तबाह कीन्ह जाइहीं। ओनकर नेता पराजित कइ दीन्ह जइहीं अउर उ पचे आपन झण्डन क तजि देइहीं। इ सबइ संदेसा उ यहोवा क अहइ जेकर आगी थल (वेदी) सिय्योन पवर्त पइ अहइ। हाँ ओकर भट्टी (वेदी) यरूसलेम मँ अहइ।

मुखिया लोगन क खरा अउर सच्चा होइ चाही

३२ १ लखा, राजा लोग आपन राज्ज क निआव बरे सासन करब्या। अधिकारियन भुइया क निआव करइ बरे सक्ती राखब्या। २ जदि अइसा होइ तउ राजा उ जगहिया क नाई होइ जाइ जहाँ लोग आँधी अउ बर्खा स बचइ बरे आसुर्य लेत हीं। इ झुरान धरती मँ जल धारन क नाई होइ। इ अइसा ही होइ जइसे गरम प्रदेस मँ कउनो बड़की चट्टान क ठण्डी छाया। ३ तब लोग ओका ठीक स देखत ही जउन ओकर आँख लखत ह। लोग ओका धियान स सुनिही जउन ओकर कान सुनत ह। ४ उ पचे लोग जउन उतावला अहइ, उ सबइ सही फैसला लेइहीं। उ सबइ लोग जउन अबहिं साफ साफ नाही बोल पावत हीं, उ पचे साफ साफ अउर जल्दी बोलइ लगिहीं। ५ मूरख लोग महान मनई नाही कहवइहीं। लोग सडचंत्र करइवालन क सम्मान जोगग नाही कहिहीं।

६ एक मूरख मनई तउ बेवकूफी स भरी बातन कहत ह अउर उ आपन मने मँ बुरी बातन क ही जोजनन बनावत ह। मूरख मनई अनुचित कारज करइ क ही सोचत ह। मूरख मनई यहोवा क बारे मँ गलत बातन कहत ह। मूरख मनई भुखान क खइया क खाइ नाही देत। मूरख मनई पियासे लोगन क पानी नाही पिअइ देत। ७ उ मूरख मनई

बुराई क एक हथियार क रूप मँ इस्तेमाल करत ह। उ निर्धन लोगन स झूठ क जरिये बरबाद करइ बरे बुरे बुरे राहन बनावत ह। ओकर इ सबइ झूठी बातन गरीब लोगन क निस्पच्छ, निआव मिलाइ स दूर रखत ह।

५ मुला एक ठु नीक मुखिया नीक काम करइ क योजना बनावत ह अउर ओकर उ सबइ नीक बातन ही ओका एक बढ़िया नेता बनावत ह।

बुरा समय आवत अहइ

१ तोहमाँ स कछू मेहररूअन अबहिं खुस अहइ। तू पचे सुरच्छित अनुभव करति अहा। मुला तू पचन खइ होइके जउन बचन मइँ बोलत हउ ओनका सुनइ चाही। २ मेहररूओ तू पचे अबहिं सुरच्छित अनुभव करति अहा किन्तु एक बरिस पाछे तू पचन विपत्ति आवइवाली अहइ। काहेकि तू पचे अगले बरिस अंगूर एकट्टा नाही करिब्यु एकट्टा करइ बरे अंगूर होइहीं ही नाही।

३ मेहररूओ, अबहिं तू पचे चइन स अहा, किन्तु तू पचन्क डेराइ चाही। मेहररूओ, अबहिं तू पचे सुरच्छित अनुभव करति अहा, किन्तु तू पचन्क चिन्ता नाही करइ चाही। आपन सुन्नर ओढनन क उतारि बहावा अउर सोक वस्त्रन क धारण कइ ल्या। ओन वस्त्रन क आपन कमर पइ लपेट ल्या। २ आपन सोक स भरी छातियन पइ ओन सोक वस्त्रन क पहिर ल्या। विलाप करा काहेकि तोहार खेत उजरि गवा अहइ। तोहार पचन्क अंगूरे क बगीयन जउन कबहुँ अंगूर दिया करत रहेन, अब खाली पड़ा अहइ। ३ मोरे लोगन क धरती बरे विलाप करा। विलाप करा, काहेकि हुवाँ बस काँटन अउ खरपतवार ही उगा करिहीं। विलाप करा इ नगर बरे अउर ओन सब भवनन बरे जउन कबहुँ आनन्द स भरे भए रहेन।

४ लोग इ प्रमुख नगर क छोड़ जइहीं। इ महल अउर इ मीनारन वीरान छोड़ दीन्ह जइहीं। उ पचे जनावरन क माँद जइसे होइ जइहीं। नगर मँ जंगली गदहन बिहार करिहीं। हुवाँ भेड़िन घास चरत फिरिहीं।

५-१६ तब तलक अइसा ही होत रही, जब तलक परमेस्सर ऊपर स हमका आपन आतिमा नाही देइ। अब धरती पइ कउनो अच्छाई नाही अहइ। इ रेगिस्तान स बनी भई अहइ मुला आवइवाले समय मँ इ रेगिस्तान उपजाऊ मैदान होइ जाइ अउर इ उपजाऊ मैदान एक हरे भरे वन जइसा वन जाइ। चाहे जंगल होइ चाहे उपजाऊ धरती हर कहुँ निआव अउ निस्पच्छता मिली। १७ उ नेकी

सदा-सदा क बरे सान्ति अउ सुरच्छा क लियाइ ।
 १८ मोर लोग सान्ति क इ सुन्नर छेत्र मँ बसा
 करिहीं । मोर लोग सुरच्छा क तम्बुअन मँ रहा
 करिहीं । उ पचे निहंचितता क संग सान्ति स पूर्ण
 जगहन मँ निवास करिहीं ।

१९ किन्तु इ सबइ बातन घटई एहमे पहिले उ वन
 क गिरब होइ । उ नगर क पराजित होइ क होइ ।
 २० तू पचन्मँ स कछू लोग हर जलधारा क निअरे
 बिआ बोवत अहा । तू पचे आपन मवेसियन अउ
 आपन गदहन क एहर-ओहर चरइ बरे खुला छोड़
 देत अहा । तू लोग बहोत खुस रहब्या ।

बुराई स जियादा बुराई पइदा होत ह

३३ १ लखा, तू लोग लड़ाई करत अहा अउर
 ओन लोगन क वस्तुअन लूटत अहा अउर
 उ भी अइसे लोगन क जउन कबहुँ कउनो तोहार
 पचन्क वस्तु नाही चोराएन । तू पचे अइसे लोगन
 क धोखा देत रह्या जउन कबहुँ तू पचन्क धोखा
 नाही दिहन । एह बरे जब तू पचे चोरी करब बंद कइ
 देब्या तउ दूसर लोग तोहार वस्तुअन चोरी करब
 सुरू कइ देइहीं । जब तू लोगन क धोखा देब बंद
 कइ देब्या तउ लोग तू पचन्क धोखा देब आरम्भ
 कइ देइहीं । तब तू पचे कहब्या,

२ “हे यहोवा, हम पइ दया करा ।

हम पचे तोहरे सहारे बाट जोहा ह ।

हे यहोवा, हर सुबह तू हमका सक्ति द्या

जब हम विपत्ति मँ होइ, तू हमका बचाइ ल्या ।

३ तोहरी सक्तिसाली ध्वनि स लोग डरा करत हीं
 अउर उ पचे तोहसे दूर भाग जात हीं ।

तोहरी महानता क कारण रास्टर दूर भाग जाती
 हीं ।”

४ तू पचे जुद्ध मँ लूटेस, किन्तु तू पचन्क छीना
 जाइ अउर तोहस लइ लेइ जाइ ! इ अइसा ही होइ
 जइसा टिड्डियन आवा रहा अउर तोहार सारा
 फसल खाइ लेत रहा !

५ यहोवा बहोत महान अहइ, काहेकि उ बहोत
 ऊँचाइ (सरग) पइ रहत ह । यहोवा सिष्योन क
 सच्चाई अउर निआव स भरि दिहेस ह ।

६ हे यरूसलेम, तोहार धार्मिक सभा लगातार
 होत रही । परमेस्सर क बुद्धि अउ गियान कवच
 क नाई होइ जउन तोहार छाती क रच्छा करी ।
 यहोव स तोहार डर अइसा होइ जइसा तू पचन क
 धन क खजाना ।

७ मुला सुना ! सरगदूत बाहेर गोहरावत अहइ
 अउर सान्ति-संदेशवाहक बहोत रोवत अहइ ।
 ८ उच्च मार्गन रौंदा ग अहइ । गलियन मँ कउनो

नाहीं चलत फिरत अहइ । लोगन उ करार क
 उल्लंघन करिहीं जउन उ बनाए रहा । लोग
 साच्छी क जउन गवाही क रूप मँ पेस करि स
 जाइ इन्कार करी । कउनो भी कउनो दूसर लोगन
 क आदर नाही करत । ९ भुईया बेरामी अहइ अउर
 अइसा लागत अहइ कि उ आपन आखरी सांस
 लेत अहइ । लबानोन आपन आखरी सांस लेत
 अहइ अउर सारोन क घाटी झुरान अउ उजाड़
 अहइ । बासान अउ कर्मेल जउन कबहुँ पौधन
 अउर बृच्छन स हरा भरा रहा किन्तु अब हुआँ कछू
 नाही उगत ह ।

१० यहोवा कहत ह, “मई अब खड़ा होब अउर
 आपन बड़कइ देखाउब । अब मई लोगन बरे एक
 महत्वपूर्ण बनब । ११ तू लोग बेकार क काम किहा
 ह । उ सबइ चिजियन भूसा अउर झुरान घासे क
 जइसे अहइ । उ पचे बेकार अहइ । तोहार पचन्क
 आतिमा आगी क नाई होइ जाइ अउर तू पचन्क
 बारि देइ । १२ लोग तब तलक बरत रइहीं जब
 तलक ओनकर हाइन बरिके चूना जइसी नाही
 होइ जाती । लोग काँटन अउर झुरान झाड़ियन क
 समान हाली स बरि जइहीं ।

१३ “दूर देसन क लोगो, जउन काम मई किहेउँ
 ह, तू पचे ओनके बारे मँ सुनत अहा । हे मोरे लगे
 क लोगो, तू पचे मोर सक्ति क समुझत अहा ।”

१४ सिष्योन मँ पापी डेरान अहइ । उ पचे जउन
 बुरे करम किया करत हीं, डर स थर-थर काँपत
 अहइ । उ पचे कहत हीं, “का इ बिनासकारी आगी
 स हम पचन क कउनो बचि सकत ह ? कउन रह
 सकत ह इ आगी क निअरे जउन हमेसा हमेसा
 बरे बरत रहत ह ?”

१५ उ सबइ लोग इ आगी मँ स बचि पइहीं जउन
 अच्छा अहइ, सच्चा अहइ । उ सबइ लोग पइसा
 बरे दुसरन क नोस्कान नाही पहुँचावइ चाहतेन ।
 उ सबइ लोग घूस नाही लेतेन । दूसर लोगन क
 कतल क जोजनन क उ पचे सुनइ तलक स मना
 कइ देत हीं । बुरे करम करइ क जोजनन क उ
 पचे लखब भी नाही चाहतेन । १६ अइसे लोग ऊँच
 ठउरन पइ सुरच्छा क साथ निवास करिहीं । ऊँच
 चट्टानन क गदियन मँ उ पचे सुरच्छित रइहीं ।
 अइसे लोगन क लगे सदा ही खाइ क भोजन अउर
 पिअइ क पानी रही ।

१७ तोहार पचन्क आँखिन उ राजा (परमेस्सर) क
 सुन्नरता क दर्शन करिहीं । तू पचे उ महान भइया
 क लखब्या । १८-१९ बीते भए दिनन मँ तू पचे जउन
 कस्ट उठाया ह, तू पचे ओकरे बारे मँ सोचब्या,
 “दूसर देसन क उ सबइ लोग कहाँ अहइ ? उ सबइ

लोग अइसी बोली बोला करत रहेन, जेका हम समुझ नाहीं सकत रहेन। दूसर देसन क उ सबइ सेवक अउर कर एकट्टा करइवाले कहाँ अहई? उ पचे गुप्तचर जउन हमार सुरच्छा मीनारन क लेखा जोखा लिए रहेन, कहाँ अहई? उ सबइ सब खतम होइ गएन।”

परमेस्सर यरूसलेम क बचाई

२० हमरे धार्मिक उत्सवन क नगरी, सिय्योन क लखा। विस्राम निवास क उ सुन्नर ठउर यरूसलेम क लखा। यरूसलेम उ तम्बू क समान अहइ जेका कबहुँ उखाड़ा नाहीं जाई। उ सबइ खूँटन जउन ओका आपन ठउरे पइ थामे रखत हीं, कबहुँ उखाड़ा नाहीं जइहीं। ओकर रस्सन कबहुँ टुटिहीं नाहीं। २१-२३ हुवाँ हमरे बरे सक्तिसाली यहोवा विस्तृत झरनन अउर नदियन वाले एक ठउरे क समान होइ। किन्तु ओन नदियन पइ कबहुँ सत्रु क नउकन या सक्तिसाली जहाज वाहीं होइहीं। ओन नउकन पइ काम करइवाले तू लोग रस्सियन क नाहीं थामे रख सक्या। तू पचे मस्तूल क मजबूत नाहीं बनाए नाहीं रख सक्या। तउ तू पचे आपन पालन क भी नाहीं खोल पउब्या। काहेकि यहोवा हमार निआवकर्ता अहइ। यहोवा हमारे बरे नेम बनावत ह। यहोवा हमार राजा अहइ। उ हमार रच्छा करत ह। इहइ स यहोवा हमका बहोत सा धन देइ। हिआँ तलक कि अपाहिज लोग भी जुद्ध मँ बहुत सा धन जीत लेइहीं। २४ हुवाँ रहइवाला कउनो भी मनई अइसा नाहीं कही, “मई रोगी हूँ” हुवाँ रहइवाले लोग अइसे लोग अहई जेनकर पाप छिमा कइ दीन्ह गवा अहई।

परमेस्सर आपन दुस्मनन क सजा देइ

३४ १ हे सबहिं रास्टर क लोगो, पास आवा अउर सुना। तू सब लोगन क धियान स सुनइ चाही। हे धरती अउ धरती पइ क सबहिं वासियो, हे जगत अउ ऐह मँ स आइ सबहिं वस्तुओ, तू सबन्क एन बातन क सुनइ चाही। २ यहोवा सबहिं देसन अउर ओनकर फउजन पइ कोहान अहइ। यहोवा ओन सब क बर्बाद कइ देइ। उ ओन सबहिं क मरवाइ डाइ। ३ ओनकर ल्हासन बाहेर बहाइ दीन्ह जइहीं। ल्हासन स दुर्गन्ध उठी अउर पहाड़ क ऊपर स खून खाले क बही। ४ अकास चर्मपत्र क नाई लपेटिके मूँदि दीन्ह जइहीं। ग्रह तारन मरिके अंगूरे क बेल या अंजीर क पत्तन क नाई गिरइ लगिहीं। अकासे क सबहिं तारन टेघर जइहीं। ५ यहोवा कहत ह,

“अइसा उ समय होइ जब अकासे मँ मोर तरवार खून मँ सन जाइ।”

लखा! यहोवा क तरवार एदोम क काटि डाइ। यहोवा ओन लोगन क अपराधी ठहराएस ह तउ ओन लोगन क मरब ही होइ। ६ यहोवा क तरवार मेमना अउर बोकुरियन क खून स लतपत होइ गवा अहइ। अउर भेड़ा क गुर्दन क चर्बी स चिकनाई गवा अहइ। काहेकि यहोवा निहचइ किहस ह बोसरा मँ कल्लेआम होइ उ समइ बहोत सारे लोग एदोम मँ मारइ जाइहीं। ७ तउ भेड़न, मवेसी अउ हट्टे कट्टे जंगली बर्धन मारा जइहीं। धरती ओनकर खून स भरि जाइ। माटी ओनकी चर्बी स पट जाइ।

८ अइसी बातन घटिहीं काहेकि यहोवा सजा देइ क एक समय तय किहस ह। यहोवा एक साल अइसा चुन लिहस ह जेहमाँ लोग आपन ओन बुरे कामन बरे जउन सिय्योन क खिलाफ किहेन ह, जरूर ही भुगतान कइ देइहीं। ९ एदोम क नदियन अइसी होइ जइहीं जइसे माना उ सबइ गरम तारकोल क होइ। एदोम क धरती बरत भइ गंधक अउ तारकोल क समान होइ जाइ। १० उ पचे आगे रात दिन बरा करिहीं। कउनो भी मनई उ आगी क रोकि नाहीं पाई। एदोम स सदा धुआँ उठा करी। उ धरती सदा सदा बरे बर्बाद होइ जाइ। उ धरती स होइके फुन कबहुँ कउनो नाहीं गुजरा करी। ११ उ धरती परिदन अउर नान्ह-नान्ह जनावरन क होइ जाइ। हुवाँ कुचकुचवन अउर कउअन क बास होइ। परमेस्सर उ धरती क “सूनी उजाड़” भुईया मँ बदल देइ। इ वइसी ही होइ जइसी इ सूस्टि स पहिले रही। १२ स्वतंत्र मनई अउर मुखिया लोग खतम होइ जइहीं। ओन लोगन क हुकूमत करइ बरे हुवाँ कछू भी नाहीं बची।

१३ हुवाँ क सबहिं सुन्नर भवनन मँ काँटन अउर जंगली झाड़ियन जमि अहई। जंगली कुकुरन अउर कुचकुचवन ओन मकानन मँ बास करिहीं। परकोटन स जुकत नगरन क जंगली जानवर आपन निवास बनाइ लेइहीं। हुवाँ जउन घास जमी ओहमाँ बड़के बड़के पंछी रइहीं। १४ हुवाँ जंगली बिल्लियन अउर लकड़ बग्घन साथ रहा करिहीं अउर जंगली बोकुरियन हुवाँ आपन मीतन क बोलइहीं। राति क जीवजन्तु हुवाँ आपन बरे आसुर्य खोजत फिरिहीं अउर हुवइ विस्राम करइ बरे आपन जगह बनाइ लेइहीं। १५ साँप हुवाँ आपन घर बनाइ लेइहीं। हुवाँ साँप आपन अण्डन दिया करिहीं। अण्डन फूटिहीं अउर ओन अँधियारा स भरे जगहन स रगत भए साँप क बच्चन बाहेर

निकरिहीं। हुवाँ मरी चिजियन क खाइवाले पंछी एक क पाछे एक एकट्टा होत चला जइहीं।

^{१६}यहोवा क चर्म-पत्र क लखा। पढा ओहमाँ का लिखा अहइ। कछू भी नाहीं छूटा अहइ। उ चर्म-पत्र में लिखा अहइ कि उ पचे सबहिँ पसु पंछी एकट्टा होइ जइहीं। एह बरे परमेस्सर क मुँह इ आदेस दिहन अउर ओकर आतिमा ओनका एक संग एकट्टा कइ दिहस। परमेस्सर क आतिमा ओनका परस्पर एकट्टा करी।^{१७} परमेस्सर ओनके साथ का करी, इ उ निहचय कइ लिहस ह। एकरे पाछे परमेस्सर ओनके बरे एक जगह चुनेस। परमेस्सर एक रेखा हीचेस अउर ओनका ओनकर धरती देखाइ दिहस। एह बरे उ धरती सदा सदा पसुअन क ही होइ जाइ। उ पचे हुवाँ साल दर रहत साल चला जइहीं।

परमेस्सर आपन लोगन क सुख देइ

३५ ^१झुरान रेगिस्तान बहोत खुसहाल होइ जाइ। रेगिस्तान खुस रही अउर एक फूल क नाई विकसित होइ।^२ उ रेगिस्तान खिलत भए फूलन स भरि उठी अउर आपन खुसी देखावइ लागी। अइसा लागी जइसे रेगिस्तान आनन्द में भरा नाचत होइ। इ रेगिस्तान अइसा सुन्नर होइ जाइ जइसा लवानोन क बन बाटइ, कर्मल क पहाड़ अहइ अउर सारोन क घाटी अहइ। अइसा एह बरे होइ, काहेकि सबहिँ लोग यहोवा क महिमा क दर्सन करिहीं। लोग हमरे परमेस्सर क महानता क लखिहीं।

^३दुर्बल बाँहन क फुन स सक्ति स भरा बनावा। दुर्बल घुटनन क मजबूत करा।^४ लोग डेरान अहइँ अउर असमंजस में पड़ा अहइँ। ओन लोगन स कहा, “सक्तिसाली बना। डेराअ जिन।” लखा तोहार पचन्क परमेस्सर आइ अउर तोहार पचन्क दुस्मनन क जउन उ पचे किहन ह, ओकर सजा देइ। उ आइ अउर तू पचन्क तोहार सबन्क प्रतिफल देइ अउर तोहार पचन्क रच्छा करी।^५ फुन तउ आँधर लखइ लगिहीं। ओनकर आँखिन खुल जइहीं।^६ लूले लंगड़े लोग हिरन क तरह नाचइ लगिहीं अउर अइसे लोग जउन अबहिँ गुँगन अहइ, खुसी क गीत गावइ मैं आपन वाणी क उपयोग करइ लगिहीं। अइसा उ समय होइ जब मरूभूमि मैं पानी क झरनन बहइ लगिहीं। झुरान धरती पइ झरनन बहिँ चलिहीं।^७ लोग अबहिँ जत क रूप मैं मृग मरीचिका क लखत हीँ किन्तु उ

समय जल क फुरइ सरोवर होइहीं। झुरान धरती पइ कुअँन होइ जइहीं। झुरान धरती स जल फूट बही। जहाँ एक समय जंगली जनावरन क राज रहा, हुवाँ लम्बे लम्बे पानी क पउधन जमि पइहीं।

^५ उ समय, हुवाँ एक राह बन जाइ अउर इ राजमार्ग क नाम होइ “पवित्तर मार्ग।” उ राह पइ असुद्ध लोगन क चलइ क अनुमति नाहीं होइ। कउनो भी मूरख उ राहे पइ नाहीं चली। बस परमेस्सर क पवित्तर लोग ही ओह पइ चला करिहीं।^९ उ सड़क पइ कउनो खतरा नाहीं होइ। लोगन क नोस्कान पहाँचावइ बरे उ सड़क पइ सेर नाहीं होइहीं। कउनो भी भयानक जन्तु हुवाँ नाहीं होइ। उ सड़क ओन लोगन बरे होइ जेनका परमेस्सर अजाद किहेस ह।

^{१०} परमेस्सर आपन लोगन क अजाद करी अउर उ सबइ लोग फुन लउटिके हुवाँ अइहीं। लोग जब सिय्योन पइ अइहीं तउ उ पचे खुस होइहीं। उ पचे सदा-सदा बरे खुस होइ जइहीं। ओनकर खुसी ओनकर माथन पइ एक मुकुट क नाई होइ। उ पचे आपन खुसी अउ आनन्द स पूरी तरह भरि जइहीं। सोक अउ दुःख ओनसे दूर बहुत दूर चले जइहीं।

अस्सूर क यहूदा पइ हमला

३६ ^१हिजकिय्याह यहूदा क राजा रहा अउर सन्हेरीब अस्सूर क राजा रहा। हिजकिय्याह क सासन क चउदहवें बरिस मैं सन्हेरीब यहूदा क किलाबन्द नगरन स जुद्ध किहन अउर उ ओन नगरन क हराइ दिहन।^२ लाकीस स सन्हेरीब आपन सेनापति अउर बहोत सारे सेना क यरूसलेम मैं यहूदा क राजा हिजकिय्याह क लगे आपन माँगन क बतावइ बरे पठएस। उ ऊपरवाले तालाब क कइँती जात भवा नाला पइ रुक गएस जउन धोबी लोगन क खेत क सड़क पइ रहा।

^३ यहूदा क तीन अधिकारी ओसे मिलइ बरे गएन। इ सबइ लोग रहेन: महल क देखरेख करइवाला हिल्किय्याह क पूत एल्ल्याकीम, लिपिकार सेब्ना, अउर कागजात क संभारिके रखइ क काम करइवाला आसाप क पूत योआह।

^४ सेनापति ओनसे कहेस, “तू लोग, राजा हिजकिय्याह स जाइके इ सबइ बातन कहा : महान राजा अस्सूर क राजा कहत ह:

“तू आपन सहायता बरे कउने पइ भरोसा रखत ह? ^५ मइँ तू पचन्क बतावत हउँ कि

^{१३६}:२ नाला एक गड्डा या एक पाइप जेसे पानी क एक जगह स दूसर जगह लइ जावा जात अहइ।

जदि जुद्ध मँ तोहार बिस्सास सक्ति अउर वुसल जोजनन पइ अहइ तउ उ बेकार अहइ । उ सबइ कोरे सब्दन क अलावा कछू नाहीं अहइ । एह बरे तू मोहसे काहे जुद्ध करत अहा ? ६ अब मइँ तोहसे पूछत हउँ, तू मदद पावइ बरे कउने पइ भरोसा करत अहा ? का तू मदद बरे मिस्र क सहारे अहा ? मिस्र तउ एक टूटी भइ लाठी क नाई अहइ । जदि तू सहारा पावइ क ओह पइ टिकव्या तउ उ तू पचन्क बस नोस्कान ही पहाँचाइ अउर तोहरे हाथे मँ एक टु छेद बनाइ देइ । मिस्र क राजा फिरौन पइ कउनो भी मनई क जरिये मदद पावइ क भरोसा नाहीं कीन्ह जाइ सकत ।

७ “मुला होइ सकत ह तू कहा, “हम मदद पावइ बरे आपन यहोवा परमेस्वर पइ भरोसा रखित ह ।” किन्तु मइँ सुना अहइ कि हिजकिय्याह यहोवा क वेदियन क अउर आराधना क ऊँच ठउरन १ क बर्बाद कइ दिहस ह अउर यहूदा अउ यरूसलेम क लोगन स कहेस, “तू हिआँ यरूसलेम मँ बस एक इहइ वेदी पइ उपासना किया करव्या ।”

८ “अगर तू अब भी मोर सुआमी स जुद्ध करइ चाहत अहा तउ अस्सूर क राजा तोहसे इ सौदा करइ चाही : राजा क कहब अहइ, जदि जुद्ध मँ तोहरे लगे घुड़सवार पूरा अहइ तउ मइँ तू पचन्क दुइ हजार घोड़न दइ देब । १ किन्तु एतना होइ पइ तू मोर सुआमी क एक सेवक तलक क नाहीं हराइ पउव्या । ओकर कउनो नान्ह स नान्ह अधिकारी तलक क तू नाहीं हराइ पउव्या । एह बरे तू मिस्र क घुड़सवार अउर रथन पइ आपन भरोसा काहे बनाए रखत अहा ।

१० “अउर अब लखा जब मइँ इ देस मँ आवा रहेउँ अउर मइँ जुद्ध किहे रहेउँ, यहोवा मोरे संग रहा । जब मइँ नगरन क उजाड़ेउँ, यहोवा मोरे संग रहा । यहोवा मोहसे कहा कहत रहा, “खड़ा ह्वा । इ नगरी मँ जा अउर एक ध्वस्त कइ द्या ।””

११ यहूदा क तीनहुँ अधिकारियन, एल्याकीम, सेब्ना अउर योआह सेनापति स कहेस, “कृपा कइके हमरे संग अरामी भासा मँ ही बात करा ताकि एका हम समुझ सकित । तू यहूदी भासा मँ हम से जिन बोला । जदि तू यहूदी भासा क प्रयोग

करव्या, तउ नगर दीवारे क पार क सबहि लोग एका समुझ जइहीं ।”

१२ एह पइ सेनापति कहेस, “मोर सुआमी मोहसे इ सबइ बातन बस तू पचन्क अउर तोहरे पचन्क सुआमी हिजकिय्याह क ही सुनावइ बरे नाहीं पठएस ह । मोर सुआमी मोका एन बातन क ओनका बतावइ बरे पठएस ह जउन लोग नगर परकोटन पइ बइठा अहइ । ओन लोगन क न तउ पूरा खइया क मिलत ह अउर न पानी । तउ ओनका आपन मलमूत्र क तोहरे पचन्क तरह खाब-पिअब होइ ।”

१३ फुन सेनापति खड़ा होइके ऊँच सुर मँ कहेस । उ यहूदी भासा मँ बोला । सेनापति कहेस,

“महासम्राट अस्सूर क राजा क सब्दन क सुना : १४ तू आपन खुद क हिजकिय्याह क जरिये मूरख जिन बनइ द्या, उ तू पचन्क बचाइ नाहीं पाइ । १५ हिजकिय्याह जब इ कहत ह, ‘यहोवा मँ बिस्सास राखा । यहोवा अस्सूर क राजा हमार रच्छा करी । यहोवा अस्सूर क राजा क हमरे नगर क हरावइ नाहीं देइ तउ ओह पइ बिस्सास जिन करा ।’

१६ “हिजकिय्याह क एन सब्दन क अनसुनी करा । अस्सूर क राजा क सुना । अस्सूर क राजा क कहब अहइ, हमका एक टु सन्धि करइ चाही । तू लोग नगर स बाहेर निकरिके मोरे लगे आवा । फुन हर मनई आपन घरे जाइ क अजाद होइ । हर मनई आपन अंगूर क बेलन स अंगूर खाइ क अजाद होइ अउर हर मनई आपन अंजीर क बृच्छन क फल खाइ क अजाद होइ । खुद आपन कुआँ क पानी पिअइ क हर मनई अजाद होइ । १७ जब तलक मइँ आइके तू पचन्क तोहरे पचन्क जइसे एक देस मँ न लइ जाउँ, तब तलक तू पचे अइसा करत रहि सकत ह । उ नवा देस मँ तू पचे बढिया अनाज अउर नवा दाखरस पउव्या । उ धरती पइ तू पचन्क रोटी अउ अंगूर क खेत मिलिहीं ।

१८ “हिजकिय्याह क तू आपन क मूरख जिन बनावइ द्या । उ कहत ह, ‘यहोवा हमार रच्छा करी ।’ किन्तु मइँ तोहसे पूछत हउँ का कउनो दूसर देस क कउनो भी देवता हुवाँ क लोगन क अस्सूर क राजा क सक्ति स

३६:७ वेदी ... ठउरन इ “गौर सरकारी” अउर “मुकुामी” समाधि क ओर इसारा करत ह जउन कि ओकर भुइया पइ इहर-उहर पहाड़ियन पइ होत रहा जहाँ लोग परमेस्वर या झूटे देवता क पूजा करत रहन ।

बचाइ पाइ नाहीं। हम हुवाँ क हर मनई क हराइ दीन्ह।^{१९} हमात अउ अर्पाद क देवता आजु कहाँ अहई? ओनका हराइ दीन्ह गवा अहइ। सपर्वेम क देवता कहाँ अहई? उ सबइ हराइ दीन्ह ग अहई अउर का सोमरोन क देवता हुवाँ क लोगन क मोर सक्ति स बचाइ पाएन? नाहीं।^{२०} कउनो भी देस अथवा जाति क अइसे कउनो भी एक देवता क नाउँ मोका बतावा जउन हुवाँ क लोगन क मोर सक्ति स बचाएस ह। मई सबन्क हराइ दिहेउँ। एह बरे लखा मोर सक्ति स यरूसलेम क यहोवा नाहीं बचाइ पाइ।^१

^{२१} यरूसलेम क लोग एक दम चुप रहेन। उ पचे सेनापति क कउनो जवाब नाहीं दिहन। हिजकिय्याह लोगन क हुकुम दिहे रहा कि उ पचे सेनापति क कउनो जवाब न देई।

^{२२} एकरे पाछे महल क देखरेख करइवाला हिल्किय्याह क पूत एल्याकीम लिपिकार सेब्ना अउर कागजात क संभारिके रखइ क काम करइवाला आसाप क पूत योआह इ देखावइ बरे कि उ दुःखी रहेन आपन ओढ़ना फाड़ि डिएन। उ पचे तीनउँ मनइयन हिजकिय्याह क लगे गएन अउर सेनापति जउन कछ्छू ओनसे कहे रहा, उ सब ओका कहि सुनाएन।

हिजकिय्याह क परमेस्सर स पराथना

३७ ^१ हिजकिय्याह जब सेनापति क सँदेसा सुनेस तउ उ आपन ओढ़ना फाड़ि डिएस। फुन बिसेस सोक वस्त्र धारण कइके उ यहोवा क मंदिर मँ गवा।

^२ हिजकिय्याह महल क सेवक एल्याकीम क राजा क सचिव सेब्ना क अउर याजकन क अगर्जन क आमोस क पूत यसायाह नवी क लगे पठएस। एन तीनउँ ही लोग बिसेस सोक-वस्त्र पहिरे भरे रहेन। ^३ एन लोगन यसायाह स कहेन, “राजा हिजकिय्याह कहेस ह कि आजु क दिन सोक अउर दुःख क एक बिसेस दिन होइ। इ दिन एक अइसा दिन होइ जइसे जब एक बच्चा जन्म लेत ह। किन्तु बच्चा क जन्म देइवाली महतारी मँ जेतनी सक्ति होइ चाही ओहमाँ ओतनी ताकत नाहीं होत। ^४ सम्भव अहइ तोहार परमेस्सर यहोवा, सेनापति क जरिये कही बातन क सुन लेइ। अस्सूर क राजा सेनापति क साक्षात परमेस्सर क बेज्जत करइ पठएस ह। होइ सकत ह तोहार परमेस्सर यहोवा ओन बुरी अपमान स भरी बातन क सुन लिहस ह अउर उ

ओनका एकर सजा देइ। कृपा कइके इस्राएल क ओन थोड़े स लोगन बरे पराथना करा जउन बचे भए अहइ।”

^{५-६} हिजकिय्याह क सेवक यसायाह क लगे गएन। यसायाह ओनसे कहेस, “अपने मालिक क इ बताइ द्या: “यहोवा कहत ह तू पचे सेनापति स जउन सुन्या ह, ओन बातन स जिन डेराअ। अस्सूर क राजा क लरिकन मोर अपमान करइ बरे जउन बातन कहेन ह, ओन बातन स जिन डेराअ। ^७ लखा अस्सूर क राजा क मई एक अफवाह सुनवाउब। अस्सूर क राजा क एक अइसी रपट मिली जउन ओकरे देस पइ आवइ वाले खतरा क बारे मँ होइ। एहसे उ अपने देस वापस लउटि जाइ। उ समय मई ओका, ओकरे आपन ही देस मँ तरवार स मउत क घाट उतार देब।”

अस्सूर क सेना क यरूसलेम क तजब

^{५-९} अस्सूर क राजा क एक खबर मिली, सूचना मँ कहा ग रहा, “इथोपिया क राजा तिहाका जुद्ध करइ आवति अहइ।” तउ अस्सूर क राजा लाकीस क तजिके लिबना चला गवा। सेनापति इ सुनेस अउर लिबना नगर क चला गवा जहाँ अस्सूर क राजा जुद्ध करत रहा। फुन अस्सूर क राजा हिजकिय्याह क लगे दूत पठएस। राजा ओन दूतन स कहेस, ^{१०} “यहूदा क राजा हिजकिय्याह स तू पचे इ बातन कह्या:

“जउने देवता पइ तोहार बिस्सास अहइ, ओहसे तू पचे मूरख जिन बना। अइसा जिन कहा कि “अस्सूर क राजा परमेस्सर यरूसलेम क पराजित नाहीं होइ देइ।”

^{११} लखा, तू पचे अस्सूर क राजा लोगन क बारे मँ सुन ही चुका अहा। उ पचे हर कउनो देस मँ लोगन क संग का कछ्छू किहेन ह। ओनका उ पचे बुरी तरह हराएन ह। का तू पचे ओनसे बचि पउब्या? नाहीं, कदापि नाहीं।

^{१२} का ओन लोगन क देवतन ओनकर रच्छा किहे रहेन? नाहीं। मोर पुरखन ओनका नस्ट कइ दिहन। मोर लोग गोजान, हारान अउ रेसेप क नगरन क बुरी तरह हराइ दिहे रहेन अउर उ पचे एदेन क लोग जउन तलस्सार मँ रहा करत रहेन, ओनका भी हराइ दिहे रहेन। ^{१३} हमात अउर अर्पाद क राजा कहाँ गएन। सपर्वेम क राजा आज कहाँ अहइ? हेना अउर इव्या क राजा अब कहाँ अहई? ओनकर अन्त कइ दीन्ह गवा। उ पचे सबहिं बर्बाद कइ दीन्ह गएन।”

हिजकिय्याह क परमेस्सर स पराथना

१४ हिजकिय्याह ओन लोगन स उ सँदेसा लइ लिहस अउर ओका बाँचेस। फुन हिजकिय्याह यहोवा क मंदिर मँ चला गवा। हिजकिय्याह उ सँदेसा क खोलेस अउर यहोवा क समन्वा रख दिहस। १५ फुन हिजकिय्याह यहोवा स पराथना करइ लाग। हिजकिय्याह बोला : १६ “इस्राएल क परमेस्सर सर्वसक्तीमान यहोवा, तू राजा क समान करूब सरगदूतन पइ बिराजत अहा। तू अउर बस तू ही परमेस्सर अहा, जेकर धरती क सबहिं राजजन पर सासन अहइ। तू सरगन अउर धरती क रचना किहा ह। १७ मोर सुना। आपन आँखिन खोला अउर लखा, कान लगाइके सुना इ सँदेसा क सव्दन क, जेका सन्हेरीब मोका पटाएस ह। एहमाँ तू साक्षात परमेस्सर क बारे मँ अपमान स भरी बुरी बुरी बातन कह्या ह। १८ हे यहोवा, अस्सूर क राजा लोग असल मँ सबहिं देसन अउर हुवाँ क धरती क तबाह कइ दिहेस ह। १९ अस्सूर क राजा लोग ओन देसन क देवतन क बारि डाएन ह किन्तु उ पचे सच्चे देवतन नाहीं रहेन। उ पचे तउ सिरिफ अइसे मूरतियन रहेन जेनका लोग बनाए रहेन। उ सबइ तउ कोरी काठ रहेन, कोरे पाथर रहेन। एह बरे उ पचे खतम होइ गएन। उ सबइ बर्बाद होइ गएन। २० तउ अब हे हमार परमेस्सर यहोवा। अब कृपा कइके अस्सूर क राजा क सक्ति स हमार रच्छा करा। ताकि धरती क सबहिं राजजन क पता चलि जाइ कि तू यहोवा अहा अउर तू ही हमार एकमात्र परमेस्सर अहा।”

हिजकिय्याह क परमेस्सर क उत्तर

२१ फुन आमोस क पूत यसायाह हिजकिय्याह क लगे इ सँदेसा पटाएस, “इ उ अहइ जेका इस्राएल क परमेस्सर यहोवा कहेस ह, ‘अस्सूर क राजा सन्हेरीब क बारे मँ तू मोका पराथना किहेस ह।’

२२ “तउ मोका जउन सन्हेरीब विरोध मँ कहेस, ‘उइ अहइ : सिय्योन क कुवाँरी पुत्री तोहका तुच्छ जानत ह।

उ तोहार हँसी उड़ावत ह।

यरूसलेम क पुत्री

तोहार हँसी उड़ावत ह।

२३ तू मोरे बरे विरोध मँ बुरी बातन कह्या।

तू बालत रह्या।

तू आपन आवाज मोरे विरोध मँ उठाए रह्या।

तू मोका इस्राएल क पवित्तर परमेस्सर क अभिमान भी आँखिन स घूरे रह्या।

२४ मोर सुआमी यहोवा क बारे मँ तू बुरी बातन कहलवावइ बरे तू आपन सेवकन क प्रयोग किहा।

तू कह्या

“मइँ बहोत सक्तिसाली हउँ!

मोरे लगे बहोत स रथ अहइँ।

मइँ आपन सक्ति स लबानोन क हराया

जब मइँ आपन रथन क लबानोन क महान पर्वत क ऊँच सिखरन क ऊपर लइ आएँ।

मइँ लबानोन क सबहिं महान वृच्छ काट डाएँ।

मइँ उच्चतम सिखर स लइके गहिर

जंगलन तलक प्रवेस कइ चुका हउँ।

२५ मइँ बिदेसी धरती पइ कुअँन खनेउँ अउर पानी पिएँ।

मइँ मिस्र क नदियन सुखाइ दिहेँ

अउर उ देस पइ चलिके गएँ ह।”

२६ इ सबइ उ जउन तू कह्या।

का तू इ नाहीं सुन्या कि परमेस्सर का कहेस ?

मइँ (परमेस्सर) बहोत बहोत पहिले ही इ जोजना बनाइ लिहेँ रहे।

बहोत बहोत पहिले ही मइँ एका तइयार कइ लिहे रहेँ अब एका मइँ घटित किहेँ ह।

मइँ ही तू पचन्क ओन नगरन क नस्ट करइ दिहेँ अउर मइँ ही तू पचन्क ओन नगरन क पाथरन क देर मँ बदलइ दिहेँ।

२७ ओन नगरन क निवासी कमजोर रहेन।

उ सबइ लोग भयभीत अउर लज्जित रहेन।

उ पचे खेते क पउधन जइसे रहेन,

उ पचे नई घास क जइसे रहेन।

उ पचे उ घासे क नाई रहेन जउन मकानन क छतन पइ जमा करत ही।

उ घास लम्बी होइ स पहिले ही रेगिस्तान क गरम हवा झुलसाइ दीन्ह जात ह।

२८ तोहार सेना अउ तोहरे जुद्ध क बारे मँ मइँ सब कच्छ जानत हउँ।

मोका पता अहइ जब तू विस्राम किहे रह्या।

जब तू जुद्ध बरे गवा रह्या, मोका तब क भी पता अहइ।

तू जुद्ध स घरे कब लउट्या, मइँ इ भी जानत हउँ।

मोका एकर भी गियान अहइ कि तू मोह पइ कोहान अहा।

२९ तू मोहसे खुस नाहीं अहा अउर

मइँ तोहार अहंकार स भरा अपमान क सुना ह।

तउ मइँ तोहका सजा देब।

मइँ तोहरे नाके मँ नकेल डाउब।

मई तोहरे मुँहे पइ लगाम लगाउब अउर तब मई तोहका मजबूर करब कि तू जउने राहे स आया रह्या, उहइ राहे स मोरे देस क तजिके वापिस चला जा।”

हिजकिय्याह बरे यहोवा क संदेस

३० एह पइ यहोवा हिजकिय्याह स कहेस, “हिजकिय्याह, तू इ देखावइ बरे कि इ सबइ सब्द सच्चा अहई, मई तोहका एक संकेत देब। इ बरिस तू खाइ बरे कउनो अनाज नाही बोया। तउ इ बरिस तू पिछ्ले बरिस क फसल स यूँ ही जम आए अनाजे क खाब्या। अगले बरिस भी अइसा ही होगा किन्तु तीसरे बरिस तू उ अनाजे क खाब्या जेका तू जमाए होब्या। तू आपन फसलन क कटब्या। तोहरे लगे खाइ क भरपूर होइ। तू अंगूरे क बेलन रोपब्या अउर ओनकर फल खाब्या।

३१ “यहुदा क परिवार क कछू लोग बच जइहीं। उ पचे ही लोग बढ़त भए एक बड़की जाति क रूप लइ लेइहीं। उ पचे लोग ओन वृच्छन क नाई होइहीं जेनकर जउन धरती मँ बहोत गहिर जात ही अउर जउन बहोत तगड़े होइ जात ही अउर बहोत स फल देत हीं। ३२ यरूसलेम म कछू ही लोग जिअत बचिके बाहेर जाइ पइहीं। सिय्योन पर्वते स बचे भए लोगन क एक समूह ही बाहेर जाइ पाइ।” सर्वसक्तिमान यहोवा क सुदृढ पिरम ही अइसा करी।

३३ तउ यहोवा अस्सूर क राजा क बारे मँ इ कहेस:

“उ इ नगर मँ नाही आइ।

उ इ नगर पइ एक भी बाण नाही छोड़ी।

उ आपन दालन क मुँह इ नगर कइती नाही करी।

उ इ नगर पइ हमला करइ क बरे माटी क टीला खड़ा नाही करी।

३४ उहइ राहे स जेहसे उ आवा रहा, उ वापस आपन नगर क लउटि जाइ।

इ नगर मँ उ प्रवेस नाही करी।

इ संदेसा यहोवा कइती स अहइ।

३५ यहोवा कहत ह, मई बचाउब अउर इ नगर क रच्छा करब।

मई अइसा खुद आपन बरे अउर आपन सेवक दाऊद बरे करब।”

अस्सूर क फउजी

३६ तउ यहोवा क सरगदूत अस्सूर क सिबिर मँ जाइके एक लाख पचासी हजार फउजी मनइयन क मार डाएस। अगली सुबह जब लोग उठेन, तउ

उ पचे लखेन कि ओनके चारिहूँ कइती मेरे भए फउजियन क ल्हासन बिखरी अहई। ३७ एह पइ अस्सूर क राजा सन्हेरीब वापस लउटिके आपन घरे नीनवे चला गवा अउर हुँवइ रहइ लाग।

३८ एक दिन, जब सन्हेरीब आपन देवता निसूरोक क मंदिर मँ ओकर पूजा करत रहा, उहइ समय ओकर पूत अद्रम्मेलिक अउर सेरेसर तरवार स ओकर कतल कइ दिहस अउर फुन उ पचे असरात क भुईया मँ पराइ गएन। एह बरे सन्हेरीब क पूत एसहँदेन (अस्सूर क) नवा राजा बन गवा।

हिजकिय्याह क बीमारी

३८ १ उ समय क आसपास हिजकिय्याह बहोत बीमार पड़ा। एतना बीमार कि जइसे उ मरि ही गवा होइ। तउ आमोस क पूत यसायाह ओहसे मिलइ गवा। यसायाह राजा स कहेस, “यहोवा तू पचन्क इ सबइ बातन बतावइ बरे कहेस ह: ह्वाली ही तू मरि जाब्या। तउ जब तू मरा, तोहार परिवार का करइ, इ तोहका ओनका बताइ देइ चाही। अब तू फुन कबहुँ नीक नाही होब्या।”

२ हिजकिय्याह उ देवार क नाई करवट लिहस जेकर मुँह मन्दिर कइती रहा। उ यहोवा क पराथना किहस, उ कहेस, ३ “हे यहोवा, कृपा करा, याद करा कि मई सदा तोहरे समन्वा बिस्सास स भरी अउर सच्चे हिरदय क संग जिन्नगी जिएउँ ह। मई उ सबइ बातन किहेउँ ह जेनक तू उत्तिम कहत ह।” एकरे पाछे, हिजकिय्याह ऊँच सुर मँ रोउब सुरू कइ दिहस।

४ यसायाह क यहोवा स इ संदेस मिला:

५ “हिजकिय्याह क लगे जा अउर ओहसे कहि द्या: इ सबइ बातन उ सबइ अहई जेनका तोहार वाप दाऊद क परमेस्सर यहोवा कहत ह, ‘मई तोहार पराथना सुनेउँ ह अउर तोहार दु:ख भरे आँसू लखेउँ ह। तोहरी जिन्नगी मँ मई पन्द्रह बरिस अउर जोड़त हउँ। ६ अस्सूर क राजा क हाथन स मई तोहका छोड़ाइ डाउब अउर इ नगर क रच्छा करब।”

७ फुन एह पइ यसायाह कहेस, “अंजीरन क आपुस मँ मसलवाइके ओकरे फोड़न पइ बाँधा। एहसे उ नीक होइ जाइ।”

८ किन्तु हिजकिय्याह यसायाह स पूछेस, “यहोवा कइती स अइसा कउन सा संकेत अहइ जउन साबित करत ह कि मई नीक होइ जाब? कउन सा संकेत अहइ जउन प्रमाणित करत ह कि मई यहोवा क मंदिर मँ जाइ क जोग्य होइ जाब?”

७ तोहका इ बात बतावइ बरे जउन बातन क उ कहत ह, ओनका उ पूरा करी। यहोवा कइती इ संकेत अहइ : ८ “लखा, आहाज क धूप घड़ी क उ छाया जउन अंसन पइ पड़त ह, मइ ओका दस अंस पाछे हटाइ देब। सूरज क उ छाया दस अंस तलक पाछे चली जाइ।”

हिजकिय्याह क गीत

१ इ हिजकिय्याह क उ पत्र अहइ जउन उ बेरामी स नीक होइ क पाछे लिखे रहा :

१० मइ आपन मन मँ कहेउँ कि मइ तब तलक जिअब जब तलक बूढ़ा होबउँ।

किन्तु मोर काल आइ गवा रहा कि मइ मउत क दुआरे स गुजरउँ।

अब मइ आपन समय हिऊँइ पइ बिताउबउँ।

११ एह बरे मइ कहेउँ, “मइ यहोवा याह क फुन कबहुँ जिअतन क धरती पइ नाही लखब।

धरती पइ जिअत भए लोगन क मइ नाही लखब।

१२ मोर घर, चरवाहे क अस्थिर तम्बू सा उखाड़िके गिरावा जात अहइ अउर मोहसे छीना जात अहइ।

अब मोर वइसा ही अन्त होइ गवा ह जइसे करघे स कपड़ा लपेटि के काट लीन्ह जात ह।

क्षिनभर मँ तू मोहका इ अंत तलक पहाँचाइ दिहा।

१३ मइ भोर तलक आपन क सान्त करत रहेउँ।

उ सेर क नाई मोर हाइन क तोरत अहइ।

एक ही दिन मँ तू मोर अन्त कइ डावत ह।

१४ मइ कबूतर स रोवत रहेउँ।

मइ एक पंछी जइसा रोवत रहेउँ।

मोर आँखिन थक गइन

तउ भी मइ लगातार अकासे कइती निहारत रहेउँ।

मोर सुआमी, मइ विपत्ति मँ हउँ

मोका उबारइ क बचन द्या।”

१५ मइ अउर का कहि सकत हउँ ?

मोर सुआमी मोका बताएस ह जउन कछू भी होइ,

अउर मोर सुआमी ही उ घटना क घटित करी।

मइ एन बिपत्तियन क आपन आतिमाँ मँ झेलेउँ ह

एह बरे मइ जिन्नगी भइ विनमूर रहब।

१६ हे मोर सुआमी, इ कस्ट क समय क उपयोग फुन स मोर चेतना क ससक्त बनावइ मँ करा।

मोरे मने क ससक्त अउर स्वस्थ होइ मँ मोर मदद करा।

मोका सहारा द्या कि मइ नीक होइ जाउँ।

मोर मदद करा कि मइ फुन स जी उठउँ।

१७ लखा! मोर बिपत्तियन खतम भईन!

अब मोरे लगे सान्ति अहइ।

तू मोहसे बहोत जियादा पिरेम करत ह।

तू मोका कबर मँ सड़इ नाही दिहा।

तू मोर सब पाप छिमा किहा।

तू मोर सब पाप दूर लोकाइ दिहा।

१८ तोहार स्तुति मेरे मनई नाही गावतेन।

मउत क देस मँ पड़े लोग तोहार यसगीत नाही गावतेन।

उ पचे मेरे भए मनई जउन कबर मँ समावा अहइँ, मदद पावइ क तोह पइ भरोसा नाही रखतेन।

१९ उ सबइ लोग जउन जिअत अहइँ जइसा आजु मइ हउँ तोहार जस गावत ही।

एक बाप क आपन सन्तानन क बतावइ चाही

कि तोह पइ भरोसा कीन्ह जाइ सकत ह।

२० एह बरे मइ कहत हउँ : “यहोवा मोका बचाएस ह

तउ हम आपन जिन्नगी भइ यहोवा क मन्दिर मँ गीत गाउब अउर बाजा बजाउब।”

बाबुल क सँदेसावाहक

३९ १ उ समय, बलदान क पूत मरोदक बलदान बाबुल क राजा भवा करत रहा। मरोदक

हिजकिय्याह क लगे पत्र अउर उपहार पठाएस। मरोदक ओकरे लगे उपहार एह बरे पठाए रहा

कि उ अनके रहा कि हिजकिय्याह बेराम रहा अउर फुन नंगा होइ गवा। २ एन उपहारन क

पाइके हिजकिय्याह बहोत खुस भवा। एह बरे हिजकिय्याह मरोदक क लोगन क आपन खजाने

क कीमती चिजियन देखाएस। हिजकिय्याह ओन लोगन क आपन सारी सम्पत्ति देखाएस। चाँदी,

सोना, कीमती तेल अउर इत्र ओनका देखाएस। हिजकिय्याह ओनका जुद्ध मँ काम आवइवाली

तरवारन अउर ढालन भी देखाएस। हिजकिय्याह ओनका सबहि चिजियन देखाएस जउन उ जमा

कइ रखे रहा। हिजकिय्याह आपन घरे क अउर आपन राज्ज क हर वस्तु ओनका देखाएस।

३ यसायाह नबी राजा हिजकिय्याह क लगे गवा अउर ओहसे बोला, “इ सबइ लोग का कहत अहइँ ? इ सबइ लोग कहाँ स आएन ह”

हिजकिय्याह कहेस, “इ सबइ लोग दूर देस स मोरे लगे आएन ह। इ सबइ लोग बाबुल स आएन ह।”

४ एह पइ यसायाह ओहसे पूछेस, “उ पचे तोहरे गहल मँ का लखेन ?”

हिजकिय्याह कहेस, “मोर महल क हर वस्तु उ पचे लखेन। मइ आपन सारी सम्पत्ति ओनका देखाए रहेउँ।”

५ यसायाह हिजकिय्याह स इ कहेस,
“सर्वसक्तीमान यहोवा क सब्दन क सुना।

६ भविस्स मैं जउन कछू तोहरे घर मैं अहइ, उ सब कछू बाबुल लइ जावा जाइ। अउर तोहरे बुजुर्गन क उ सारी धन दौलत जउन अचानक उ पचे बटोरिन ह, लइ लीन्ह जाइ। तोहरे लगे कछू नाही छोड़ा जाइ। सर्वसक्तिमान यहोवा इ कहेस ह।^७ बाबुल क राजा तोहरे पूतन क लइ जाइ। उ सबइ पूत जउन तोहसे पइदा होइहीं। तोहार पूत बाबुल क राजा क महल मैं हाकिम बनिहीं।”

५ हिजकिय्याह यसायाह स कहेस, “यहोवा क एन बचनन क सुन मोरे बरे बहोत उत्तम होइ।” (हिजकिय्याह अइसा एह बरे कहेस काहेकि ओकर विचार रहा, “जब मई राजा होब, तब सान्ति रही अउर कउनो उत्पात नाही होइ।”)

इस्राएल क सजा क अन्त

१ “चैन द्या, मोरे लोगन क चैन द्या!
तोहार पचन्क परमेस्सर कहत ह।

२ तू यरूसलेम स दाय्या स बातन करा।
यरूसलेम क बताइ द्या, ‘तोहरी सेवा क समय पूरा होइ चुका।’

तू आपन पापन क कीमत दइ दिहे अहा।
‘यहोवा यरूसलेम क कीन्ह भए पापन क दुइ गुणा दण्ड ओका दिहेस ह।’

३ सुना! एक मनई क जोर स गोहरावत भए सुर:
“यहोवा बरे बियावान मैं एक राह बनावा।
हमार परमेस्सर बरे बियावान मैं एक रास्ता चौरस करा।

४ हर घाटी क भरि द्या
हर एक पर्वत अउ पहाड़ी क समथर करा।
टेढ़-मेढ़ राहन क सोझ करा।
उबड़-खाबड़ क चौरस बनाइ द्या।

५ तब यहोवा क महिमा परगट होइ।
सब लोग एकट्ठा यहोवा क तेज क लिखिहीं।
हाँ, यहोवा खुद इ सबइ कहेस ह।”

६ एक वाणी मुखरित भइ, उ कहेस, “बोला।”
तउ मनई पूछेस, “मई का कहउँ?”
वाणी कहेस, “लोग सदा जिअत नाही रहिहीं।
उ सबइ रेगिस्ताने क घास क नाई अहइ।
ओनकर धार्मिकता जंगली फूल क समान अहइ।
७ एक सक्तिसाली आँधी यहोवा कइती स उ घासे पइ चलत ह,

अउर घास झुराइ जात ह, जंगली फूल नस्ट होइ जात ह।
हाँ सबहि लोग घास क समान अहइ।

८ घास मरि जात ह अउर जंगली फूल नस्ट होइ जात ह।
किन्तु हमरे परमेस्सर क बचन सदा बने रहत हीं।”

मुक्ति: परमेस्सर क सुसंदेश

१ हे, सिय्योन, तोहरे लगे सुसंदेश कहइ क अहइ।
तु पहाड़े पइ चढ़ि जा अउर ऊँचे सुर स ओका गोहरावा।

यरूसलेम, तोहरे लगे एक सुसंदेश कहइ क अहइ।
भयभीत जिन ह्वा, तू ऊँच सुर मैं बोला।

यहूदा क सारे नगरन क तू इ सबइ बातन बताइ द्या:

“लखा, इ रहा तोहार परमेस्सर!”

१० मोर सुआमी यहोवा सक्ति क संग आवत अहइ।

उ आपन सक्ति क उपयोग लोगन पइ सासन करइ मैं लगाइ।

यहोवा आपन लोगन क प्रतिफल देइ।

ओकरे लगे देइ क ओनकर मजदूरी होइ।

११ यहोवा आपन लोगन क वइसे ही अगुवाई करी जइसे कउनो गड़रिया आपन भेड़िन क अगुवाई करत ह।

यहोवा आपन बाहु क काम मैं लिआई अउर आपन भेड़िन क बटोरी।

यहोवा नान्ह भेड़िन क उठाइके गोद मैं थामी,
अउर ओनकर महतारिन ओकरे संग संग चलिहीं।

संसार क परमेस्सर रचेस: उ एकर सासक अहइ

१२ कउनो अँजुरी मैं भरिके समुद्र क नाप दिहेस?
कउन हाथे स अकास क नाप दिहेस?

कउन कटोरा मैं भरिके धरती क सारी धूरि क नाप दिहेस?

कउन नापइ क धागा स पर्वतन अउर चोटियन क नाप दिहेस?

इ यहोवा किहे रहा।

१३ यहोवा क आत्मा क कउनो मनई इ नाही बताएस कि ओका का करब रहा।

यहोवा क कउनो इ नाही बताएस कि ओका जउन उ किहेस ह, कइसे करब रहा।

१४ का यहोवा कउनो स मदद माँगेस?

का यहोवा क कउनो निस्पच्छता क पाठ पढ़ाएस ह?

का कउनो मनई यहोवा क गियान सिखाएस ह?
का कउनो मनई यहोवा क बुद्धि स काम लेब सिखाएस ह? नाही।

एन सबहिं बातन क यहोवा क पहिले ही स गियान अहइ ।

१५ लखा, जगत क सारे देस गगरी मँ एक नान्ह बूँद जइसे अहइ ।

जदि यहोवा सुदूरवर्ती देसन तलक क लइके आपन तराजू पइ धइ देइ,

तउ उ पचे नान्ह स रजकन जइसे लगिहीं ।

१६ लबानोन क सारे बूँद न भी काफी नाही अहइ कि ओनका यहोवा बरे बारा जाइ ।

लबानोन क सारे पसु काफी नाही अहइ

कि ओनका ओकर एक बलि बरे मारा जाइ ।

१७ परमेस्सर क तुलना मँ बिस्व क सबहिं रास्ट्र कछु भी नाही अहइ ।

परमेस्सर क तुलना मँ बिस्व क सबहिं रास्ट्र बिल्कुल बगैर कीमत क अहइ ।

परमेस्सर का अहइ, लोग कल्पना नाही कइ सकतेन

१८ का तू परमेस्सर क तुलना कउनो भी चीज स कइ सकत ह ? नाही ।

का तू परमेस्सर क चित्र बनाइ सकत ह ? नाही ।

१९ किन्तु कछु लोग अइसे अहइ जउन पाथर अउर काठे क मूरतियन बनावत हीं

अउर ओनका देवता कहत हीं ।

एक कारीगर मूरति क बनावत ह ।

फुन दूसर कारीगर ओह पइ सोना मढ देत ह अउर ओकरे बरे चाँदी क जंजीरन बनावत ह ।

२० तउ उ मनई आधार बरे एक खास तरह क काठ चुनत ह

जउन सड़त नाही ह ।

तब उ एक अच्छे काठे क कारीगर क हेरत ह ।

उ कारीगर एक अइसा देवता बनावत ह जउन लुढ़कत नाही ह ।

२१ निहचय ही, तू पचे फुरइ जानत अहा, बोला ?

निहचय ही तू पचे सुन्या ह ।

निहचइ ही बहोत पहिले कउनो तू पचन्क बनावस ह ।

निहचइ ही तू पचे जानत अहा कि धरती क कउन बताएस ह ।

२२ यहोवा ही सच्चा परमेस्सर अहइ । उहइ धरती क चक्र क ऊपर बइठत ह ।

ओकर तुलना मँ लोग टिड्डी स लगत हीं ।

उ अकासन क कउने कपड़े क टूकन क नाई खोल दिहस ।

उ अकासे क ओकरे खाले बइठइ क एक तम्बू क नाई तान दिहस ।

२३ सच्चा परमेस्सर सासकन क महत्वहीन बनावत ह ।

उ इ जगत क निआवकर्त्तन क पूरी तरह बियर्थ बनाइ देत ह ।

२४ उ सबइ सासक अइसे अहइ जइसे उ पचे पउधन जेनका धरती मँ रोपा गवा होइ,

किन्तु एहसे पहिले कि उ पचे आपन जड़न धरती मँ जमाइ पावई,

परमेस्सर ओनका बहाइ देत ह

अउर उ सबइ झुराइके मरि जात हीं ।

आँधी ओनका तिनका सा उड़ाइके लइ जात ह ।

२५ “का तू कउनो स भी मोर तुलना कइ सकत ह नाही ।

कउनो भी मोरे बराबर क नाही अहइ ।”

२६ ऊपर अकासन क लखा ।

कउन एँन सबहिं तारन क बनावस ?

कउन उ सबइ अकास क सेना बनावस ?

केका सबहिं तारन नाम-बनाम मालूम अहइ ?

सच्चा परमेस्सर बहोत ही सुदृढ़ अउर सक्तीसाली अहइ

एह बरे कउनो तारा कबहुँ निज मार्ग नाही बिसरा ।

२७ हे याकूब, इ सच अहइ ।

हे इसराएल, तोहका एका बिस्वास करइ चाही ।

तउ तू काहे अइसा कहत ह कि “जइसी जिन्नगी मई जिअत हउँ ओका यहोवा नाही लखि सकत ।

परमेस्सर मोका धइ नाही पाइ अउर न सजा दइ पाई ।”

२८ सचमुच तू सुन्या ह

अउर जानत ह कि यहोवा परमेस्सर बुद्धिमान अहइ ।

जउन कछु उ जानत ह ओन सबहिं बातन क मनई नाही सीख सकत ।

यहोवा कबहुँ थकत नाही,

ओका कबहुँ विस्राम क जरूरत नाही होत ।

यहोवा ही सबहिं दूरदराज क ठउर धरती पइ बनावस ।

यहोवा सदा जिअत ह ।

२९ यहोवा सक्तीहीनन क सक्तीसाली बनइ मँ सहायता देत ह ।

उ अइसे ओन लोगन क जेनके लगे सक्ति नाही अहइ, प्रेरित करत ह कि उ सक्तीसाली बनइ ।

३० नउजवान थक जात हीं अउर ओनका विस्राम क जरूरत पइजात ह ।

हिआँ तलक कि किसोर भी टोकर खात हीं अउर गिरत हीं।

३१ किन्तु उ सबइ जउन यहोवा क भरोसा करत अहई आपन सक्ति क प्राप्त कइ लेइ।

उ पचे उँचाई पइ उडि ओकर पखना बाज्र क नाई होइ।

उ पचे दौड़ी किन्तु कमजोर नाहीं होइ।

उ पचे चली किन्तु थकी नाहीं

यहोवा सृजनहार अहइ : उ अमर अहइ

४१ यहोवा कहा करत ह,
“सुदूरवर्ती देसो, चुप रहा अउर मोरे लगे आवा।

जातियो, फुन स सुदृढ़ बना।

मोरे लगे आवा अउर मोहसे बातन करा।

आपुस मँ मिलिके हम निहचय करी

कि उचित का अहइ।

२ कउन उ बिजेता क जगाएस ह, जउन पूरब स आइ ?

कउन ओहसे दूसर देसन क हरवावत अउर राजा लोगन क अधीन कइ देत ?

कउन ओकर तरवारन क एतना बढ़ाइ देत ह कि उ पचे अनगिनत होइ जात जेतना रेत-कण होत हीं ?

कउन ओकरे धनुसन क एतना अनगिनत कइ देत जेतना भूसे क छिलकन होत हीं ?

३ उ मनई पाछा करी अउर ओन रास्टरन क पाछा बगैर नोस्कान उठाए करत रही

अउर अइसे ओन ठहूरन तलक जाइ जहाँ उ पहिले कबहुँ गवा ही नाहीं।

४ कउन इ सबइ सब घटित करत ह ? कउन इ किहेस ?

कउन आदि स सबलोगन क बोलाएस ?

मई यहोवा एन सबइ बातन क किहेउँ।

मई यहोवा ही सबसे पहिला हउँ।

आदि क पहिले स मोर अस्तित्व रहा ह, अउर जब सब कछु चला जाइ तउ भी मई हिअँइ रहब।

५ सुदूरवर्ती देस एका लखिहीं

अउर भयभीत होईं।

दूर धरती क छोर क लोग

फुन आपुस मँ एक जुट होइके

भय स कोपि उठई।”

६ “काम करइवालन एक दूसर क मदद करत ह अउर मजबूत होइवइ बरे हिम्मत बढ़ावत ह।

७ मूर्ति बनावइ बरे एक कारीगर लकड़ी काटत अहइ। फुन उ मनई सुनारे क उत्साहित करत

ह। एक कारीगर हथौड़े स धातु क पत्तर बनावत अहइ। फुन उ कारीगर निहायी पइ काम करइवाले मनई क प्रेरित करत अहइ। इ आखिरी कारीगर कहत अहइ, काम अच्छा अहइ, किन्तु इ धातु बाहेर नाहीं निकरी।” किन्तु उ तउ प भी मूर्ति क आधार पइ कीले स जडि द्या, ताकि इ कबहुँ हिल-डुल तलक नाहीं पाई।”

यहोवा ही हमार रच्छा कइ सकत ह

५ यहोवा कहत ह: “हे मोर सेवक इस्राएल,

हे याकूब मोर मीत इब्राहीम क सन्तान

तोहका मई चुनेउँ ह,

१ मई तोहका भूँया क

दूर जगह स उठाएउँ।

मई तू पचन्क उ दूर देस स बोलाएउँ।

मई कहेउँ, ‘तू मोर सेवक अहा।’

मई तोहका चुनेउँ ह

अउर मई तोहका रद्व किहेउँ ह।

१० तू चिन्ता जिन करा, मई तोहरे संग हउँ।

तू भयभीत जिन ह्वा, मई तोहार परमेस्सर हउँ।

मई तोहका सुदृढ़ करब।

मई तोहका आपन नेकी क दाहिने हाथे स सहारा देब।

११ लखा, कछु लोग तोहसे नाराज अहई

किन्तु उ पचे लजइहीं।

जउन तोहार दुस्मन अहई उ पचे नाहीं रहिहीं, उ पचे सब हेराइ जइहीं।

१२ तू अइसे ओन लोगन क खोज करब्या जउन तोहरे बिरुद्ध रहेन।

किन्तु तू ओनका नाहीं पउब्या।

उ पचे सबइ लोग जउन तोहसे लड़ा रहेन,

पूरी तरह लुप्त होइ जइहीं।

१३ मई तोहार परमेस्सर यहोवा हउँ।

मई तोहार सीधा हाथ थाम रखे हउँ।

मई तोहसे कहत हउँ कि ‘जिन डेराउन।

मई तोहका सहारा देब।’

१४ कीमती यहूदा, तू निर्भय रहा।

हे मोर पिरय इस्राएल क लोगो! भयभीत जिन रहा।

फुरइ मई तोहका मदद देबउँ।”

खुद यहोवा ही इ सबइ बातन कहे रहा।

“इस्राएल क पवित्र परमेस्सर

जउन तोहार रच्छा करत ह, कहे रहा :

१५ लखा, मई तोहका एक नवे दाँवइ क औजार जइसा बनाएउँ ह।

इ औजारों में बहुत स दाँतन अहड़ँ जउन बहुत तीखे अहड़ँ।

किसान एका अनाज क छिलका उतारइ क काम में लिआवत हीं।

तू पर्वतन क गोड़न तले मसलब्या अउर ओनका धूरि में मिलाइ देब्या।

तू पर्वतन क अइसा कइ देब्या जइसे भूसा होत ह।

१६ तू ओनका हवा में उछरब्या

अउर हवा ओनका उड़ाइके दूर लइ जाइ अउर ओनका कहँ छितराई देइ।

तब तू यहोवा में टिकिके आनन्दित होब्या।

तोहका इस्राएल क पवित्र परमेस्वर प बहुत गर्व होइ।

१७ “गरीब जन, अउर जरूरतमंद जल हेरत हीं किन्तु ओनका जल नाही मिलत ह।

उ पचे पियासा अहड़ँ अउर ओनकर जीभ झुरान अहड़।

मइँ ओनकर बिनतियन क जवाब देब।

मइँ ओनका न ही तजब अउर न ही मरइ देब।

१५ मइँ झुरान पहाड़ पइ नदियन बहाइ देब।

घाटियन में स जलस्रोत बहाइ देब।

मइँ रेगिस्तान क जल स भरी झील में बदल देब।

उ झुरान धरती पइ पानी क सोतन मिलिहीं।

११ रेगिस्तान में देवदार क, कीकर क, जैतून क, सनावर क, तिघारे क, चीड़ क बृच्छ जमिहीं।

२० लोग अइसा होत भए लखिहीं

अउर उ पचे जानिहीं कि यहोवा क सकित इ सब किहेस ह।

लोग एनका लखिहीं अउर समुझब सुरू करिहीं

कि इस्राएल क पवित्र परमेस्वर इ बातन किहेस ह।”

यहोवा क लवार देवतन क चितउनी

२१ यहोवा, याकूब क राजा कहत ह, “आ, अउर मोका आपन मुकदमा द्या। आपन सबूत मोका

देखावा। तब हम इ निहचय करब कि का उचित अहड़ँ?” २२ तोहरे पचन्क मूरतियन क हमरे लगे

आइके, जउन घटत अहड़, उ बतावइ चाही। “सुरू में का कछू घटा रहा अउर भविस्स में का

घटइवाला अहड़। हमका बतावा हम बड़े धियान स सुनब। जेहसे हम इ जान जाइ कि अगवा का

होइवाला अहड़। २३ हमका ओन बातन क बतावा जउन घटइवाली अहड़। जेनका जानइ क हमका

इन्तजार अहड़ ताकि हम पतियायी कि फुरइ तू देवता अहा। कछू करा। चाहे भला चाहे बुरा ताकि

हम लखि सकी अउर जान सकी कि तू जिअत अहा अउर तोहार अनुसरण करी।

२४ “लखा, हे लवार देवता, तू पचे बेकार स भी जियादा बेकार अहा! तू पचे कछू भी नाही कइ सकत्या। केवल बेकार क भ्रस्ट लोग ही तू पचन्क पूजइ चाहत हीं।”

वस यहोवा ही परमेस्वर अहड़

२५ “जवाब में मइँ एक मनई क उठाएउँ ह।

उ पूरब स जहाँ सूरज उगा करत ह, आवत अहड़।

उ मोरे नाउँ क उपासना किया करत ह।

जइसे कोहार माटी रौंदा करत ह वइसे ही

उ बिसेस मनई राजा लोगन क रौंदी।

२६ “इ सबइ घटइ स पहिले ही हमका जउन बताएस ह, हमका ओका परमेस्वर कहइ चाही।

का हमका इ सबइ बातन तू पचन्क कउनो मूरति बताएस? नाही।

कउनो भी मूरति कछू भी हमका नाही बताए रही।

उ सबइ मूरतियन तउ एक भी सब्द नाही बोल पावत हीं।

उ सबइ लवार देवतन एक भी सब्द जउन तू पचे बोला करत ह नाही सुन पावत हीं।

२७ मइँ, यहोवा पहिले रहेउँ जउन इ बातन क बिसय में सिन्धोन क बताएउँ ह!

उ मइँ ही रहेउँ जउन दूत क इ बड़िया संदेस क साथ यरूसलेम पठएउँ!

“लखा, तोहार लोग वापस आवत अहड़ँ।”

२८ जइसा मइँ लखेस,

हुवाँ कउनो एक भी मौजूद नाही रहा जउन आपन तर्क पेस करी!

का एकर मतलब अहड़ कि ओन देवतन में स एक भी वकील न रही!

मइँ ओका प्रस्न पूछेस,

किन्तु ओनमाँ स कउनो भी कछू नाही बोलेस!

२९ लखा, इ सबइ देवतन बिल्कुल ही बियर्थ अहड़ँ!

उ पचे कछू नाही कइ पावतेन!

उ कछू नाही सिरिफ हवा अहड़।

यहोवा क बिसेस सेवक

४२ १ “मोरे दास क लखा।

मइँ ओकर हाथ सँभरेउँ ह।

उहड़ एक अहड़ जेका मइँ चुनेउँ ह,

मइँ ओहसे बहुत खुस हउँ।

मइँ आपन आतिमा ओह पइ रखत हउँ।

उ ही सब रास्ट्रन में निआव कइ सकत ह।

२ उ गलियन मैं जोर स नाही बोलि ।
 उ नाही गोहराई अउर न चीखी ।
 ३ उ विनमर होब्या, उ कुचाल भवा सरकण्डा तलक
 क नाही तोड़ी ।
 उ टिमटिमात भइ लौ तलक क भी नाही बुझाई ।
 उ सच्चाई स निआव क कायम करी ।
 ४ उ कमजोर या कुचरा भवा तब तलक नाही होइ
 जब तलक उ निआव क दुनियाँ मैं न लइ आवइ ।
 दूर देसन क लोग ओकर सिच्छन पइ बिस्सास
 करिही ।”

यहोवा जगत क सृजनहार अउर सासक अहइ

५ सच्चा परमेस्सर यहोवा इ सबइ बातन कहेस
 ह: (यहोवा अकासन क बनाएस ह । यहोवा अकास
 क धरती पइ तानेस ह । धरती पइ जउन कछू अहइ
 उ भी उहइ बनाएस ह । धरती पइ सबहि लोगन
 पइ उहइ पूरण फूँकत ह । धरती पइ जउन भी लोग
 चलत फिरत अहइ, ओन सबन क उहइ जिन्नगी
 पूरदान करत ह ।)

६ “मइ, यहोवा, तोहका नीक मकसद स बुलाएस
 रहा !

मइ तोहार हाथ थामब अउर तोहार रच्छा करब ।
 तू एक चिह्न इ प्रगट करइ क होब्या कि लोगन क
 संग मोर एक वाचा अहइ ।

तू सब लोगन पइ चमकइ क एक प्रकास होब्या ।

७ तू आँधरन क आँखी क प्रकास देब्य अउर उ
 सबइ लखइ लगिही ।

अइसे बहोत स लोग जउन जेल मैं पड़ा अहइ, तू
 ओन लोगन क अजाद करब्य ।

तू बहोत स लोगन क जउन अँधियारा मैं रहत
 ही, ओनका उ कारागार स तू बाहेर छुड़ाइ
 लउब्या ।

८ “मइ यहोवा हउँ ।

मोर नाउँ यहोवा अहइ ।

मइ आपन महिमा दूसर क नाही देब ।

मइ आपन ओन मूरतियन क उ तारीफ जउन मोर
 अहइ, नाही लेइ देब ।

९ सुरू मैं मइ कछू बातन जेनका घटब रहा, बताए
 रहेउँ

अउर उ सबइ घटि गइन ।

अब तोहका उ सबइ बातन घटइ स पहिले ही
 बताउब

जउन अगवा चलिके घटिहीं ।”

परमेस्सर क स्तुति

१० यहोवा बरे एक नवा गीत गावा,

तू पचे जउन दूर दराज क देसन मैं बसा अहा,
 तू पचे जउन सागरे पइ जलयान चलावत अहा,
 तू पचे समुद्र क सबहि जीवन, दूरवर्ती देसन क
 सबहि लोगन,

यहोवा क यसगान करा ।

११ हे रेगिस्तान एवं नगरन अउर केदार क गाँवन,

यहोवा क तारीफ करा ।

सेना क लोगो, आनन्द बरे गावा ।

आपन पर्वतन क चोटी स गावा ।

१२ यहोवा क महिमा द्या ।

दूर देसन क लोगो ओकर यसगान करा ।

१३ यहोवा वीर योद्धा स बाहेर निकरी उ मनई स
 जउन जुद्ध बरे तत्पर अहइ ।

उ बहोत उत्तेजित होइ ।

उ पुकारी अउर जोर स ललकारी उ गोहराई अउर
 जोर स ललकारी

अउर आपन दुस्मनन क पराजित करी ।

परमेस्सर धीरज रखत ह

१४ “बहोत समय स मइ कछू भी नाही कहेउँ ह ।

मइ अपने ऊपर नियन्त्रण बनाए रखेउँ ह अउर
 मइ चुप रहेउँ ह ।

किन्तु अब मइ ओतने जोर से चिल्लाब जेतने जोर
 स बच्चे क जनत भए मेहरारू चिल्लात ह ।

मइ बहोत तेज अउर जोर स साँस लेब ।

१५ मइ पर्वतन-पहाड़ियन क नस्ट कइ देब ।

मइ जउन पौधे हुवाँ उगत ही ।

ओनका झुराइ देबउँ, मइ नदियन क झुरान धरती
 मैं बदल देबउँ ।

मइ जल क सरोवरन क सुखाइ देब ।

१६ फुन मइ आँधरन क अइसी राह देखाँउब जेन
 पइ ओका कबहुँ नाही लइ जाइ गवा ।

मइ आँधर लोगन क अइसी जगह पइ लेइ जाब
 जहाँ उ पचे कबहुँ नाही भवा ।

ओनके बरे मइ अँधियारा क प्रकास मैं बदल
 देबउँ ।

ऊँच नीच धरती क मइ समथर बनाउब ।

मइ ओन कामन क करब जेनकर मइ बचन दिहेउँ
 ह ।

मइ आपन लोगन क कबहुँ नाही तजब ।

१७ किन्तु कछू लोग मोर अनुसरण करी तजि
 दिहेन ।

उ पचे सोना स मदी मूरतियन पइ विस्सास कइके
 आपन-आप क लज्जित किहेन ।

ओनसे उ पचे कहा करत ही कि ‘तू पचे हमार
 देवतन अहा ।’

उ पचे आपन लवार देवतन क बिस्सासी अहई ।
किन्तु अइसे लोग बस निरास ही होइहीं !”

इस्राएल परमेस्सर क नाही सुनेस

१८ “तू सबइ बहिर लोगन क मोर सुनइ चाही ।
तू सबइ आँधर लोगन क एहर दृस्टि डावइ चाही
अउर मोका लखइ चाही ।

१९ कउन अहइ ओतना आँधर जेतना मोर दास
अहई ? कउनो नाही ।

कउन अहइ ओतना बहिर जेतना मोर दूत अहइ ?
जेका मई इ संसार मँ पठाएँ ह कउनो नाही ।
इ आँधर कउन अहइ जेकरे संग मई वावा किहेउँ ?
इ पचे ऐतना आँधर अहई जेतना आँधर यहोवा क
दास अहइ ।

२० उ लखत बहोत ह,
किन्तु मोर हुकुम नाही मानत ।
उ आपन कानन स साफ साफ सुनि सकत ह
किन्तु उ मोर सुनइ स इन्कार करत ह ।”

२१ यहोवा उहइ चाहत ह जउन ओकरे सेवक
इस्राएल बरे बड़ियार होइ,
एह बरे उ (यहोवा) ओनका महान अउर अद्भुत
उपदेस देत ह ।

२२ किन्तु ओनका कइँती लखा ।
उ पचे हराइ दिहे गएन अउर ओनकर धन जुद्ध मँ
लूटि लिहे गएन ।

उ पचे सबहिं कारागार मँ बन्द कीन्ह गएन ।
लोग ओनसे ओनकर धन छीनी लिहेन ह ।
कउनो मनई ओकार रच्छा करइ क लाइक नाही
अहा ।

दूसर मनई ओकर धन क लूटि लिहेन ।
कउनो मनई अइसा नाही जउन कहइ
“एका वापिस करा ।”

२३ तू पचन्मँ स का कउनो मनई एका सुनत ह ?
का तू पचन्मँ स कउनो क भी इ बात क परवाइ
अहइ अउर का कउनो सुनत ह कि भविस्स मँ तू
पचन्क साथ का होइवाला अहइ ? २४ याकूब अउर
इस्राएल क सम्पत्ति लोगन क कउन लेइ दिहस ?
यहोवा ही ओनका अइसा करइ दिहस । हम यहोवा
क विरुद्ध पाप किहे रहे तउ यहोवा लोगन क
हमार सम्पत्ति छोरइ दिहस ? इस्राएल क लोग
उस ढंग स जिअब नाही चाहत रहेन जउने ढंग
स यहोवा चाहत रहा । इस्राएल क लोग ओकरी
सिच्छा पइ कान नाही दिहन । २५ तउ यहोवा ओन
पइ कोहाइ गवा । यहोवा ओनके खिलाफ भयानक
लड़ाइयन लड़ाइ दिहस । इ अइसे भवा जइसे
इस्राएल क लोग आगी मँ बरत होई अउर उ पचे

जान ही न पाए होई कि का होत अहइ । इ अइसा
रहा जइसे उ पचे बरत होई । किन्तु उ पचे जउन
वस्तुअन घटत रहिन, ओनका समुझावइ क जतन
ही नाही किहेन ।

परमेस्सर सदा आपन लोगन क साथ रहत ह

४३ १ याकूब, तोहका यहोवा बनाए रहा ।
इस्राएल, तोहार रचना यहोवा किहे
रहा । अब यहोवा कहत ह: “भयभीत जिन ह्वा ! मई
तोहका बचाइ लिहेउँ । मई तोहका नाउँ स पुकारेउँ
ह । तू मोर अहा । २ जब तोहे पइ बिपत्तियन पड़त
हीं, मई तोहरे संग रहत हउँ । जब तू नदी पार
करब्या, तू बहब्या नाही । तू जब आगी स होइके
गुजरब्या, तउ तू बरब्या नाही । लपटन तोहका
नोस्कान नाही पहोचइही । ३ काहेकि मई तोहार
परमेस्सर यहोवा हउँ । मई इस्राएल क पवित्तर
तोहार उद्धारकर्ता हउँ । तोहरे बदले मँ मई मिस्र
क दइके तोहका आजाद कराएँ ह । मई इथोपिया
अउ सबा क तोहका आपन बनावइ क दइ डाएँ ह ।
४ तू मोरे बरे बहोत महत्वपूर्ण अहा । एह बरे मई
तोहार आदर करब । मई तोहसे पिरिम करत हउँ,
ताकि तू जी सका, अउर मोर होइ सका । एकरे बरे
मई सबहिं मनइयन अउर जातियन क बदले मँ
देबउँ ।”

५ “एह बरे जिन डेराअ । मई तोहरे संग हउँ ।
तोहार बच्चन क एकट्टा कइके मई ओनका तोहरे
लगे लिआउब । मई तोहरे लोगन क पूरब अउ
पच्छिम स एकट्टा करब । ६ मई उत्तर स कहब:
मोर बच्चे मोका लौटाइ द्या ।” मई दक्खिन स
कहब: “मोरे लोगन क बंदी बनाइके जिन रखा ।
दूर-दूर स मोरे पूत अउर बिटियन क मोरे लगे
लिआवा । ७ ओन सबहिं लोगन क, जउन मोर
अहई, मोरे लगे लइ आवा अर्थात् ओन लोगन क
जउन मोर नाउँ लेत हीं । मई ओन लोगन क खुद
अपने बरे बनाएँ ह । ओनकर रचना मई किहेउँ ह
अउर उ पचे मोर अहई ।”

८ “अइसे लोगन क जेनकर आँखिन तउ अहई
किन्तु फुन भी उ पचे आँधर अहई, ओनका निकार
लिआवा । अइसे लोगन क जउन कानन क होत
भए भी बहिर अहई, ओनका निकार लिआवा ।
९ सबहिं लोगन अउ सबहिं रास्टरन क एक संग
बटोरा । अगर कउनो भी लवार देवता केबहुँ इ
कहेस कि प्रारम्भ मँ का भवा रहा अउर भूतकाल
मँ इ बताए रहा कि आगे का कछू होइ तउ ओनका
आपन गवाह लिआवइ द्या अउर ओनका सच

सावित करइ द्या। अगर उ सुन सकत ह तउ ओका आवइ द्या अउर सच्चाइ क कहइ द्या।”

१० यहोवा कहत ह, “तू ही लोग मोर साच्छी अहा। तू मोर उ सेवक अहा जेका मई चुनेउँ ह। मई तोहका एह बरे चुनेउँ ह ताकि तू समुझ ल्या कि ‘उ मई ही हउँ’ अउर मोह माँ विस्वास करइ। मई फुरइ परमेस्सर हउँ। मोसे पहिले कउनो परमेस्सर नाही होइ। ११ मई खुद ही यहोवा हउँ। मोरे अलावा अउर कउनो दूसर उद्धारकर्ता नाही अहइ, बस केवल मई ही हउँ। १२ उ मई ही हउँ जउन तोहसे बात किहे रहा। तोहका मई बचाएउँ ह। उ सबइ बातन मई तोहका बताए रहेउँ। जउन तोहरे संग रहा, उ कउनो अनजाना देवता नाही रहा। तू मोर साच्छी अहा अउर मई परमेस्सर हउँ।” (इ सबइ बातन यहोवा कहे रहा।) १३ “मई तउ सदा स ही परमेस्सर रहा हउँ। जब मई कछु करत हउँ तउ मोर कीन्ह क कउनो भी मनई नाही बदल सकत अउर मोर सक्ति स कउनो भी मनई कउनो क बचाइ नाही सकत।”

१४ इस्राएल क पवित्तर यहोवा तोहका छोड़ावत ह। यहोवा कहत ह, “मई तोहरे बरे बाबुल मँ फउज्जन पठउव। सबहिं ताले लगे दरवाजन क मई तोड़ देब। कसदियन क जीत क नारे दुःख भरी चीखन मँ बदल जइहीं। १५ मई तोहार पवित्तर यहोवा हउँ। इस्राएल क मई रचेउँ ह। मई तोहार राजा हउँ।”

यहोवा फुन आपन लोगन क रच्छा करी

१६ यहोवा सागर मँ राहन बनाई। हिआँ तलक कि पछाड़न खात भए पानी क बीच भी उ आपन लोगन बरे राह बनाई। यहोवा कहत ह, १७ “उ पचे लोग जउन आपन रथन, घोड़न अउर फउज्जन क लइके मोहसे जुद्ध करिहीं, पराजित होइ जइहीं। उ पचे फुन कबहुँ नाही उठि पइहीं। उ पचे नस्ट होइ जइहीं। उ पचे दीये क लौ क तरह बुझ जइहीं। १८ तउ ओन बातन क याद जिन करा जउन प्रारंभ मँ घटी रहिन। ओन बातन क जिन सोचा जउन कबहुँ बहोत पहिले घटी रहिन। १९ काहेकि मई चिजियन क नवा जइसा बनावत हउँ! अब एक नवे वृच्छ क नाई तोहार अंकुरन होइ। तू जानत अहा कि इ सच नाही अहइ! मई तोहार बरे रेगिस्ताने मँ फुरइ एक मारग बनाउव। मई फुरइ झुरान धरती पइ नदियन बहाइ देब। २० हिआँ तलक कि बनेर पसु अउर कुचकुचवा भी मोर आदर करिहीं। बिसालकाय पसु अउर पच्छी मोर आदर करिहीं। जब मरूभूमि मँ मई पानीरह देब तउ उ पचे मोर

आदर करिहीं। झुरान धरती मँ जब मई नदियन क रचना कइ देब तउ उ पचे मोर आदर करिहीं। मई अइसा आपन लोगन क पानी देइ बरे करब। ओन लोगन क जेनका मई चुनेउँ ह। २१ इ सबइ उ पचे लोग अहई अउर इ सबइ लोग मोर तारीफ क गीत गावा करिहीं।

२२ “याकूब, तू मोका नाही गोहराया। काहेकि हे इस्राएल, तोहार मन मोहसे भरि गवा रहा। २३ तू लोग भेड़ी क आपन बलियन मोरे लगे नाही लिआया। तू पचे मोर मान नाही रख्या। तू पचे मोका बलियन नाही अर्पित किहा। मोका अन्न बलियन अर्पित करइ बरे मई तू पचन पइ जोर नाही डावत हउँ। तू पचे मोरे बरे धूप भारत-भारत हार जाब्या, एकरे बरे मई तोह पइ दबाव नाही डावत। २४ तू पचे आपन बलियन क चर्बी स मोका तूत नाही करल्या मोका आदर देइ बरे चिजियन माल लेइ बरे आपन धने क उपयोग नाही करल्या। आपन बलियन क चर्बी स मोका तूत नाही करल्या। किन्तु तू मोहे पइ दबाव डावत अहा कि मई तोहरे दास क नाई आचरण करउँ। तू तब तलक पाप करत चला गया जब तलक मई तोहरे पापन स पूरी तरह तंग नाही आइ गएउँ।

२५ “मई उहइ हउँ जउन तोहरे पापन्क धोइ डावत हउँ। खुद आपन खुसी बरे मई अइसा ही करत हउँ। मई तोहरे पापन्क याद नाही रखब। २६ अब, मोका उ याद दिलावा कि का भवा! बहस व मुबाहिसा करइ बरे अउर इ फइसला लेइ बरे कि कउन सत्य अहइ हमका एक संग मिलइ द्या। तू आपन पच्छु मँ तर्क पेस किया ह एह बरे तू इ कोसिस किहा कि तू निर्दोस अहइ! २७ तोहार पचन्क आदि बाप पाप किहे रहा अउर तोहार हिमायतियन मोरे खिलाफ काम किहे रहेन। २८ मई तोहरे पचन्क पवित्तर सासकन क अपवित्तर बनाइ दिहेउँ। मई याकूब क लोगन क अभिसप्त बनाएउँ। मई इस्राएल क अपमान कराएउँ।

सिरिफ यहोवा ही परमेस्सर अहइ

१ “याकूब, तू मोर सेवक अहा। इस्राएल, मोर बात सुना। मई तोहका चुनेउँ ह। जउन कछु मई कहत हउँ ओह पइ धियान द्या। २ मई यहोवा हउँ अउर मई तोहका बनाएउँ ह। तू जउन कछु अहा ओहका बनावइवाला मई ही हउँ। जब तू महतारी क देह मँ ही रह्या, मई तबहिं स तोहार सहायता किहे

रहेउँ। मोर सेवक याकूब डेराअ जिन। यसरून (इस्राएल) तोहका मई चुनेउँ ह।

३ “जइसे मई पियासे लोगन बरे पानी बरसाउब अउर जइसे झुरान धरती पइ मई जलधारन बहाउब, उसी तरह तोहरी संतानन पइ मई आपन आतिमा डाउब। मोर आसीबाँद तोहार गंदेलन पइ अइसा ही बहब जइसा पानी क टंकी स पानी बहत ह।^४ उ पचे हर मोसम मँ चिनार क बृच्छन क नाई बढ़त भए होइहीं।

४ “लोगन मँ कउनो कही, ‘मई यहोवा क अहउँ।’ तउ दूसर मनई ‘याकूब’ क नाउँ लेइ। कउनो मनई आपन हाथे पइ लिखी, ‘मई यहोवा क हउँ’ अउर दूसर मनई ‘इस्राएल’ नाउँ क उपयोग करी।”

५ यहोवा इस्राएल क राजा अहइ। सर्वसक्तीमान यहोवा इस्राएल क रच्छा करत ह। यहोवा कहत ह, “परमेस्सर केवल मई ही हउँ। अन्य कउनो परमेस्सर नाही अहइ। मई ही आदि हउँ। मई ही अंत अहउँ।^७ मोरे जइसा परमेस्सर कउनो दूसर नाही अहइ अउर जदि कउनो अहइ तउ ओका अब बोलइ चाही। ओका आगे आइके कउनो प्रमाण देइ चाही कि उ मोरे जइसा अहइ। भविस्स मँ का कछू होइवाला अहइ ओका बहुत पहले ही कउन बनाइ दिहे रहा ? तउ उ पचे हम का अब बताइ देइ कि अगवा का होइ ?

६ “डेराअ जिन, चिंता जिन करा। जउन कछू घटइवाला अहइ, उ मई तू पचन्क सदा बताएउँ ह। तू लोग मोर साच्छी अहा। कउनो दूसर परमेस्सर नाही अहइ। केवल मई ही हउँ। कउनो दूसर ‘सरण स्थान’ नाही अहइ। मई जानत हउँ केवल मई ही हउँ।”

लबार देवता बेकार अहइ

७ कछू लोग मूरति (लबार देवता) बनाबा करत हीं। किन्तु उ पचे बेकार अहइ। लोग ओन भूतन स पिरैम करत हीं किन्तु उ सबइ भूत बेकार अहइ। उ सबइ लोग ओन बुतन क साच्छी अहइ किन्तु उ सबइ लख नाही पउतेन। उ पचे लज्जित होइहीं।

८ एन लबार देवतन क कउनो काहे गद्दी ? एन बेकार क बुतन क कउनो काहे ढाली ? ?? ओन देवतन क कारीगरन गढ़ेन ह अउर उ सबइ कारीगर तउ मातर मनई अहइ, न कि देवता। जदि उ पचे सबहिं एकजुट होइके पक्ति मँ आवइ अउर एन बातन पइ विचार क लेन-देन करइ तउ उ सबइ लजाइ जइहीं अउर डर जइहीं।

९ कउनो एक कारीगर कोयलन पइ लोहा क तपावइ बरे आपन अउजारन क उपयोग करत ह।

उ मनई धातु क पीटइ बरे आपन हथौड़ा कामे मँ लिआवत ह। एकरे बरे उ आपन बाँहन क सक्ति क प्रयोग करत ह। किन्तु उहइ मनई क जब भूख लागत ह, ओकर सक्ति जात रहत ह। उहइ मनई अगर पानी न पियइ तउ कमजोर होइ जात ह।

१० दूसर मनई आपन रेखा पटकइ क सूत क उपयोग करत ह। उ तख्ते पइ रेखा हींचइ बरे परकार क काम मँ लिआवत ह। इ रेखा ओका बतावत ह कि उ कहाँ स काटइ। फिन उ मनई निहानियन क उपयोग करत ह अउर काटे मँ मूरतियन क उभारत ह। उ मूरतियन क नापइ बरे परकार क प्रयोग करत ह अउर इ तरह उ कारीगर लकड़ी क ठीक मनई क रूप दइ देत ह। फुन मनई क सा इ मूरति घरे मँ बइटाइ दीन्ह जात ह।

११ कउनो मनई देवदार, सनोवर अथवा बाँज क बृच्छ क काट गिरावत ह। (किन्तु उ मनई ओन बृच्छन क उगावत नाही। इ सबइ बृच्छ बन मँ खुद अपने आप उगत हीं। जदि कउनो मनई बृच्छ उगावइ तउ ओकर बढवार बर्खा करत ह न कि उ मनई।)

१२ फुन उ मनई उ बृच्छ क आपन बारइ क काम मँ लिआवत ह। उ मनई उ बृच्छ क काटके काटे क मुद्दियन बनावत ह अउर ओनका भोजन बनावइ अउर खुद क गरमावइ क काम मँ लिआवत ह। मनई थोड़ी सी लकड़ी क आगी सुलगाइ के आपन रोटियन सेंकत ह। किन्तु तउ भी मनई उहइ लकड़ी स देवता क मूरति बनावत ह अउर फुन उ देवता क पूजा करइ लागत ह। इ देवता तउ एक मूरति अहइ जेका उ मनई बनाएस ह। किन्तु उहइ मनई उ मूरति क आगे आपन माथा नवावत ह।^{१३} उहइ मनई आधी लकड़ी क आगी मँ बारि देत ह अउर उ आगी पइ माँस पकाइके भर पेट खात ह अउर फुन अपने आप क गरमावइ बरे मनई उहइ लकड़ी क बारत ह अउर फुन उहइ कहत ह, “बहोत अच्छे ! अब मई गरम हउँ अउर आगी क लपटन क लखि सकत हूँ।”^{१४} किन्तु थोड़ी बहोत लकड़ी बच जात ह। तउ लकड़ी स मनई एक मूरति बनाइ लेत ह अउर ओका आपन देवता कहइ लागत ह। उ उ देवता क आगे माथा नवावत ह अउर ओकर पूजा करत ह। उ उ देवता स पराथना करत भए कहत ह, “तू मोर देवता अहा, मोर रच्छा करा।”

१५ इ सबइ लोग इ नाही जानतेन कि इ सबइ का करत अहइ ? इ सबइ का करत अहइ : इ सबइ लोग समझतेन नाही। अइसा अहइ जइसे एनकर आँखिन बंद होइँ अउर इ सबइ कछू लख ही नाही पावत होइँ। एनकर मन समुझइ क जतन ही

नाहीं करत। १९ एन वस्तुअन क बारे मँ इ सबइ लोग कछु सोचत ही नाही ह। इ सबइ लोग ना समुझ अहइ। एह बरे एन लोग आपन मने मँ कबहुँ नाही सोचेन। “आधी लकड़ियन मई आगी मँ बारि डाएउँ। दहकत कोयलन क प्रयोग मई रोटी सेकइ अउर मांस पकावइ मँ किहेउँ। फुन मई मांस खाएउँ अउर बची भइ लकड़ी क प्रयोग मई भ्रूस्ट वस्तु (मूर्ति) बनावइ मँ किहेउँ। अरे, मई तउ एक लकड़ी क टूका क पूजा करत हउँ।”

२० इ तउ बस उ राख क खाइ जइसा अहइ। उ मनई इ नाही जानत कि उ का करत अहइ? उ भ्रूम मँ पड़ा भवा अहइ। एह बरे ओकर मन ओका गलत राह पइ लइ जात ह। उ मनई आपन बचाव नाही कइ पावत ह अउर उ इ देख नाही पावत ह कि उ गलत काम करत अहइ। उ मनई नाही कही, “इ मूर्ति जेका मई थामे हउँ एक लबार देवता अहइ।”

सच्चा परमेस्वर यहोवा
इस्राएल क सहायक अहइ

२१ “हे याकूब, इ सबइ बातन याद रखा।

इस्राएल, याद रखा कि तू मोर सेवक अहा।

मई तोहका बनाएउँ, तू मोर सेवक अहा।

एह बरे इस्राएल, मई तोहका नाही बिसराउब।

२२ तोहार पाप एक बड़के बादर जइसे रहन।

किन्तु मई तोहरे पापन्क उड़ाइ दिहेउँ।

तोहार पाप बादर क नाई हवा मँ बिलाइ गएन।

मई तोहका बचाएउँ

अउर तोहार रच्छा किहेउँ।

एह बरे मोर लगे लउटि आवा।”

२३ अकास खुस अहइ, काहेकि यहोवा महान काम किहेस।

धरती अउ हिआँ तलक कि धरती क तले बहोत गहिर ठउर भी खुस अहइ।

पर्वत परमेस्वर क धन्यवाद देत भए गावा।

बने क सबहिं बृच्छ, तू पचे भी खुसी गवा।

काहेकि यहोवा याकूब क बचाइ लिहस ह।

यहोवा इस्राएल बरे महान कार्य किहे अहइ।

२४ जउन कछु भी तू अहा यहोवा तोहका बनाएस।

यहोवा इ किहेस जब तू अबहिं महतारी क गरम मँ ही रह्या।

यहोवा तोहार रखवारा कहत ह, “मई यहोवा सब कछु बनाएउँ।

मई ही हुआँ अकास तानेउँ ह,

अउर आपन समन्वा धरती क बिछाएउँ।”

२५ लबार नबी सगुन देखाया करत ही किन्तु यहोवा दर्सावत ह कि ओकर सगुन झूठ अहइ। जउन लोग जादू टोना कइके भविस्स बतावत ही, यहोवा ओनका मूरख सिद्ध करी। यहोवा तथाकथित बुद्धिमान मनइयन तलक क भ्रम मँ डाइ देत ह। उ पचे सोचत ही कि उ पचे बहोत कछु जानत ही किन्तु यहोवा ओनका अइसा बनाइ देत ह कि उ पचे मूरख देखाइ देई। २६ यहोवा आपन सेवकन क लोगन क सन्देश सुनावइ बरे पठवत ह अउर फुन यहोवा ओन सन्देशन क फुरइ कइ देत ह। यहोवा लोगन क का करइ चाही ओनका इ बतावइ बरे दूत पठवत ह अउर फुन यहोवा देखाइ देत ह कि ओनकर सम्मति अच्छी अहइ।

परमेस्वर कुसू क यहूदा क पुनःनिर्माण बरे चुनत ह यहोवा यरूसलेम स कहत ह, “लोग तोहमाँ आइके फुन बसिही।”

यहोवा यहूदा क नगरन स कहत ह, “तोहार फुन स निर्माण होइ।”

यहोवा ध्वस्त भए नगरन स कहत ह, “मई तू सबइ नगरन क फुन स उठाउब।”

२७ यहोवा गहिर सागर स कहत ह, “झुराइजा मई तोहार जल धारन क सूखा बनाइ देब।”

२८ यहोवा कुसू स कहत ह, “तू मोर चरवाहा अहा। जउन मई चाहत हउँ तू उहइ काम करब्या।

तू यरूसलेम स कहब्या, ‘तोहका फुन स बनावा जाइ।’

तू मन्दिर स कहब्या, ‘तोहार नीवन क फुन स निर्माण होइ।’”

परमेस्वर कुसू क इस्राएल क मुक्ति बरे चुनत ह

४५ ? इ सबइ उ बातन अहइ जेनका यहोवा आपन चुने भए राजा कुसू कहत ह,

“मई कुसू क दाहिन हाथ थामव।

मई राजा लोगन क सक्ति छोरइ मँ ओकर मदद करब।

नगर दुआर कुसू क रोक नाही पइहीं, मई नगर क दुआर खोल देब, अउर कुसू भीतर चला जाइ।

२ कुसू, तोहार फउजन अगवा बदिहीं अउर मई तोहरे अगवा चलब।

मई पर्वतन क समथर कइ देब।

मई काँसे क नगर-दुआर क तोड़ डाउब।

मई दुआरे पइ लगी लोहा क आँगल क काट डाउब।

३ मई अंधियारा कमरा मँ रखी भइ दौलत तोहका देब ।

मई तोहका उ छिपा भवा धन देब ।

मई अइसा करब ताकि तोहका पता चलि जाइ कि मई यहोवा इस्राएल क परमेस्सर हउँ,

अउर मई तोहका तोहार नाउँ स पुकारेस हउँ ।

४ मई इ सबइ बातन आपन सेवक याकूब बरे करत हउँ ।

मई इ सबइ बातन इस्राएल क आपन चुने भए लोगन बरे करत हउँ ।

कुसू, यद्यपि तू मोका नाही जानत अहा, किन्तु मई तोहका तोहार नाउँ स पुकारे हउँ,

यहाँ तलक कि तोहार आपन नाउँ स पुकारे हउँ ।

५ मई यहोवा हउँ, मई सिरिफ परमेस्सर हउँ ।

मोरे सिवा दूसर कउनो परमेस्सर नाही अहइ ।

मई तोहका मजबूत बनाए हउँ, **

यद्यपि तू मोका नाही पहिचानत ह ।

६ मई इ काम करत हउँ ताकि सब लोग जान जाइ कि मई ही परमेस्सर हउँ ।

पूरब स पच्छिम तलक सबहि लोग इ सबइ जानिही कि मई यहोवा हउँ

अउर मोरे सिवा दूसर कउनो परमेस्सर नाही ।

७ मई प्रकास क बनाएउँ अउर मई ही अंधियारा क रचेउँ ।

मई सान्ति क सृजेउँ अउर विपत्तियन भी मई ही बनाएउँ ह ।

मई यहोवा हउँ, मई ही इ सबइ बातन करत हउँ ।

८ ऊपर अकासे मँ निआव अइसे बरसब

जइसे मेघ स बर्खा बरसत ह ।

धरती खुल जात ह ।

मुक्ति अइसा फलब फूलब जइसा कउनो पउधा धरती स उगत ह ।

पुण्य कर्म आपन चारिहुँ कइती बढब !

मई यहोवा ही इ सबइ कइ क कारण हउँ ।

परमेस्सर आपन सृस्टि क नियन्त्रण करत ह

१. "धिक्कार अहइ एँन लोगन क, इ सबइ उहइ स बहस करत अहइ जउन एँतका बनाएस ह । इ सबइ कउनो टूटे भए घडे क ठीकरन जइसे अहइ । कोहार नरम गीली माटी स घड़ा बनावत ह पर माटी ओहसे नाही पूछत, 'अरे, तू का करत अहा ?' वस्तुअन जउन बनाई गइ अहइ, उ सबइ इ सक्ति

नाहीं रखतिन कि आपन बनावइवाले स सवाल पूछइ । इ सबइ लोग भी माटी क टूटे घड़न क ठीकरन क जइसे अहइ । १० या, बच्चा आपन बाप स इ नाही पूछ सकतेन कि 'तू हमका जिन्नगी काहे देत अहा ?' बच्चा आपन महतारी स इ सवाल नाही कइ सकत ही कि 'तू हमका काहे पइदा करति अहा ?'"

११ यहोवा इस्राएल क परमेस्सर पवित्र अहइ । उ इस्राएल क बनाएस । यहोवा कहत ह, "का तू मोहसे मोरे बच्चन क बारे मँ पूछब्या अथवा

तू मोका आदेस देब्या ओनके ही बारे मँ जेका मई आपन हाथन स रचेउँ ।

१२ तउ लखा, मई धरती बनाएउँ

अउर उ पचे सबहि लोग जउन एह पइ रहत हीं, मोर बनाए भए अहइ ।

मई खुद आपन हाथन स अकासन क रचना किहेउँ, अउर मई अकास क सितारन क आदेस देत हउँ ।

१३ मई हउँ जउन वास्तव मँ ओका इ काम करइ बरे उकसाएस ह ।

मई ओकर रास्ता क सहल बनाउबउँ ।

मई आपन नगर क फुन स बनाव ।

उ मोरे क लोगन बिना किसी रिस्वत दिए या बिना कउनो मोल चुकाए अजाद कइ देइ !"

सर्वसक्तीमान यहोवा इ सबइ बातन कहेस ।

१४ यहोवा कहत ह, "मिस्र अउ कूरुस बहोत वस्तुअन रचेस रहेन,

किन्तु हे इस्राएल, तू उ सबइ वस्तुअन पउब्या ।

सेबा क लम्बे लोग तोहार होइही ।

उ पचे आपन गर्दन क चारिहुँ कइती जंजीर लिए भए तोहरे पाछे-पाछे चलिही ।

उ सबइ लोग तोहरे समन्ना निहरिही,

अउर उ पचे तोहसे बिनती करिही ।

इस्राएल, परमेस्सर तोहरे संग अहइ,

अउर ओका तजिके कउनो दूसर परमेस्सर नाही अहइ ।"

१५ हे परमेस्सर, तू उ परमेस्सर अहा जेका लोग लख नाही सकतेन ।

तू ही इस्राएल क उद्धार कर्ता अहा ।

१६ बहोत स लोग मिथ्या देवता बनावा करत ही ।

किन्तु उ सबइ लोग तउ निरास ही होइही ।

उ सबइ सबहि लोग तउ लजाइ जइही ।

** ४५:५ मई तोहका मजबूत बनाए हउँ मूलार्थ, "मई एक कमरबंध (तोहार कमर क चारिहुँ कइती) डालब ।" आमतौर पर लोग कमरबंध क अपने कमर मँ आपन मांसपेसी क अतिरिक्त बल प्रदान करइ बरे बांधा करत ह । एह बरे इ अर्थ क साथ एक मुहावरा बन गवा । "कउनो मनई क आपन काम करइ बरे मजबूत अउर तइयार होना ।"

१७ किन्तु इस्राएल यहोवा क जरिये बचाइ लीन्ह जाइ ।

उ मुक्ति जुगन तलक बनी रही ।

फुन इस्राएल कबहुँ भी लज्जित नाही होइ ।

१८ यहोवा ही परमेस्सर अहइ ।

उ अकास रचेस ह, अउर अहइ धरती बनाएस ह ।
यहोवा ही धरती क अपने जगहिया पइ टेकाएस ह ।

जब यहोवा धरती बनाएस उ इ सबइ नाही चाहेस कि धरती खाली रहइ ।

उ एका रचेस ताकि एहमाँ जिन्नगी रहइ ।

मई यहोवा हउँ ।

मोरे अलावा कउनो दूसर परमेस्सर नाही अहइ ।

१९ मई अकेल्ले इ सबइ बातन नाही किहेउँ, मई अजाद भाव स कहेउँ ह ।

संसार क कउनो भी अधियारा मँ मई आपन बचन नाही छुपावत ।

मई याकूब क लोगन स नाही कहेउँ कि

उ पचे मौका बीरान जगहन पइ हेरइ ।

मई परमेस्सर हउँ अउर मई फुरइ बोहात हउँ ।

मई उहइ बातन कहत हउँ जउन फुरइ अहइ ।

यहोवा सिद्ध करत ह कि उ ही परमेस्सर अहइ

२० “तू लोग दूसरी जातियन स बच पराया । तउ आपुस मँ बटुर जा अउर मोरे समन्वा आवा । (इ सबइ लोग अपने संग मिथ्या देवन क मूरतियन रखत हीं अउर एन बेकार क देवतन स पराथना करत हीं । किन्तु इ सबइ लोग इ नाही जानतेन कि उ पचे का करत अहइ ? २१ एन लोगन क मोरे लगे आवइ क कहा । एन लोगन क आपन तर्के पेस करइ या ।)

“उ पचे बातन बहुत दिनन पहिले घटी रहिन, ओनके बारे मँ तू पचन्क कउन बोलाएस ? बहोत-बहोत दिनन पहिले ही एन बातन क लगातार कउन बतावत रहा ? उ मई यहोवा ही हउँ जउन इ सबइ बातन बताए रहा । मई ही एकमात्र यहोवा हउँ । मोरे अलावा कउनो अउर परमेस्सर नाही अहइ ? का अइसा कउनो अउर अहइ जउन आपन लोगन क रच्छा करत ह नाही, अइसा कउनो दूसर परमेस्सर नाही अहइ । २२ हे हर कतहुँ क लोगो, तू पचन्क एन लबार देवतन क पाछे चलब छोड़ देइ चाही । तू पचन्क मोर अनुसरन करइ चाही अउर होइ जाइ चाही । मई परमेस्सर हउँ । मोहसे दूसर कउनो दूसर परमेस्सर नाही अहइ । परमेस्सर केवल मई ही हउँ ।

२३ “मई खुद आपन सक्ति क साच्छी कइके प्रतिग्या किहेउँ ह । इ एक उत्तिम बचन अहइ । इ एक आदेस अहइ जउन पूरा होइ ही । हर मनई मोर (परमेस्सर क) आगे निहुरी अउर हर मनई मोर अनुसरण करइ क बचन देइ । २४ यहोवा आपन आप स सपथ लेइ के मोसे वाचा किहेस, ‘अच्छाई अउर मजबूती तोहमाँ आउव्या ।’”

उ सबइ जउन ओहे (कुसूरू) पइ कोहाइ उ अपमानित होइ । २५ यहोवा अच्छे करम करइ बरे इस्राएल क लोगन क बिजयी बनाई अउर लोग ओकर तारीफ करिही ।

लबार देव बियर्थ अहइ

४६ १ बेल अउर नेबो तोहरे अगवा निहुराइ दीन्ह ह अहइ । लबार देवता तउ बस केवल मूरति अहइ । लोग एन बुतन क जानवरन क पीठ पइ लाद दिहेन ह । इ सबइ बुत बस एक बोझ अहइ, जेनका ढोउब ही अहइ । इ सबइ लबार देवता कछू नाही कइ सकतेन । बस लोगन क थकाइ सकत हीं । २ एन सबहिं लबार देवतन क निहुराइ दीन्ह जाइ । इ सबइ बचिके कहुँ नाही पराइ सकिहीं । ओन सबहिं क बन्दियन क तरह लइ जावा जाइ ।

३ “याकूब क परिवार, मोर सुना । हे इस्राएल क लोगो जउन अबहिं जिअत अहा, सुना । मई तू पचन्क तब स धारण किहे अहउँ जब अबहिं तू पचे महतारी क गर्भ मँ ही रह्या । ४ मई तू पचन्क तबइ स धारण किहे हउँ जब स तू पचन्क जन्म भवा ह अउर मई तू पचन्क तबइ भी धारण करब, जब तू पचे बुढ़वा होइ जाव्या । तोहार पचन्क बार सफेद होइ जइहीं, मई तब भी तू पचन्क धारण किहे रहब काहेकि मई तोहार पचन्क रचना किहेउँ ह । मई तू पचन्क धारण किहे रहब अउर तोहार पचन्क रच्छा करब ।

५ “केकर संग तू मोर तुलना कइ सकत ह ? कउनो भी मनई नाही अहइ जेकर तुलना मोहसे कीन्ह जाइ सकी ! तोहार तुलना मँ स कउनो भी मोर सही तरीका स वर्णन नाही कइ सकत हीं । ६ कछू लोग सोना अउ चाँदी आपन थैलियन स निकालेस, उ पचे ओनका तराजुअन स तौलेस अउर ओनका लबार देवता बनावइ बरे सोनार जेका उ मजदूरी पइ आपन बरे मूर्तियन बनावइ बरे लाएस ह क देत हीं । तब फुन उ सबइ लोग उहइ लबार देवतन निहुरत हीं अउर ओकर सम्मान करत हीं । ७ हाँ उ सबइ लोग लबार देवतन लेव्या अउर ओका आपन काँधन पइ रखिके लइ

चलब्या। किन्तु जब उ पचे एका धरती पइ थापिब, इ न ही उठ सकत या हिल-डुल कइ पावत। इ नाही कइ सकत काहेकि इ मूर्ति अहइ। लोग आपन लवार देवतन क समन्वा मदद बरे चिचियात हीं, किन्तु इ कबहुँ जबाव नाही देइ। इ लोगन क ओनकर विपत्तियन अउर कस्टन स नाही उबार सकत।

५ “तू लोग पाप किहा ह। तू पचन्क एन बातन क फुन स याद करइ चाही। एन बातन क याद करा अउर सुदृढ होइ जा।^१ ओन बातन क सुमिरा जउन बहोत पहिले घटी रहिन। याद राखा कि मई परमेस्सर हउँ। कउनो दूसर अन्य परमेस्सर नाही अहइ। उ सबइ लवार देवता मोरे जइसे नाही अहइ।

१० “सुरू मँ मई तू पचन्क ओन बातन क बारे मँ बताइ दिहे रहेउँ जउन अंत मँ घटी। बहोत पहिले स ही मई तू पचन्क उ सबइ बातन बताइ दिहे हउँ, जउन अबहिँ घटी नाही अहइ। जब मई कउनो बात क कउनो जोजना बनावत हउँ तउ उ घटत ह। मई उहइ करत हउँ जउन करइ चाहत हउँ।^{११} लखा, पूरब दिसा स मँ एक मनई क बोलावतहउँ उ मनई एक उकाब क समान होइ। उ एक दूर देस स आई अउर उ ओन कामन क करी जेनका करइ क जोजना मई बनाएउँ ह। मई तू पचन्क बतावत हउँ कि मई एका करब अउर मई ओका करब ही। काहेकि ओका मई ही बनाएउँ ह। मई ओका लिआउब ही।

१२ “तू पचन मँ स कछू सोचा करत हीं कि तू पचन सक्ति अहइ किन्तु तू पचे भले काम नाही करत अहा। मोर सुना।^{१३} मई भले काम करब। मई हाली ही आपन लोगन क रच्छा करब। मई आपन सिष्योन अउर आपन अद्भुत इस्राएल क बरे उद्धार लिआउब।”

बाबुल क परमेस्सर क संदेस

४७ ^१ “हे बाबुल क कुंवारी पुत्री, खाले धूरि मँ गिरि जा अउर हुँवा पइ बइठ जा।

अब तू रानी नाही अहा।

लोग अब तोहका कोमल अउर सुन्नर नाही कहा करिहीं।

२ अब तोहका आपन कोमल ओढ़ना उतारिके कठिन परिस्मर करइ चाही।

अब तू चक्की ल्या अउर ओह पइ आटा पीसा।

तू आपन घाघरा इतना ऊपर उठावा कि लोगन क तोहार टाँगन देखाइ लग जाइँ अउर नंगी टाँगन स तू नदी पार करा।

तू आपन देस तजि द्या।

३ लोग तोहरे बदन क लखिहीं अउर उ पचे तोहार भोग करिहीं।

तू अपमानित होबू।

मई तोहसे बुरे कर्मन क मोल देवाउब जउन तू किहा ह।

तोहरी मदद क कउनो भी मनई अगवा नाही आइ।”

४ “मोर लोग कहत हीं, ‘परमेस्सर हम लोगन क बचावत ह।

ओकर नाउँ, इस्राएल क पवित्तर सर्वसक्तीमान अहइ।’

५ “हे बाबुल, तू बइठ जा अउर कछु भी जिन कहा। बाबुल क बिटिया, चली जा अँधियारा मँ। काहेकि अब तू अउर जियादा ‘राज्जन क रानी’ नाही कहवाइ।

६ “मई आपन लोगन पइ किरोध किहे रहेउँ।

इ सबइ लोग मोर आपन रहेन,

किन्तु मई कोहान रहेउँ, एह बरे मई ओका अपमानित किहेउँ।

मई ओनका तोहका दइ दिहेउँ, अउर तू ओनका दण्ड दिहा।

तू ओन पइ कउनो करुणा नाही दर्साया अउर तू ओन बूढ़न पइ भी बहुत कठिन काम क जुआ लाद दिहा।

७ तू कहा करत रहिउ, ‘मई अमर हउँ मई सदा रानी रहब।’

किन्तु तू ओन बुरी बातन पइ धियान नाही दिहा

जेनका तू ओन लोगन क संग किहे रह्या।

तू कबहुँ नाही सोच्या कि पाछे का होइ।

८ एह बरे अब, ओ ‘मनोहर मेहरारू,’ मोर बात तू सुन ल्या।

तू आपन क सुरच्छित जाना अउर अपने आप स कहा।

केवल मई ही महत्वपूर्ण मनई हउँ, मोरे समान कउनो दूसर बडका नाही अहइ।

मोका कबहुँ भी विधवा नाही होब अहइ, मोरे सदैव बच्चन होत रहिहीं।’

९ इ सबइ दुइ बातन तोहरे संग मँ घटित होइहीं : पहिले, तोहार बच्चन तोहसे छूट जइहीं अउर फुन तोहार पति भी तोहसे छूट जाइ।

हाँ, इ सबइ बातन तोहरे संग जरूर घटिहीं।

तोहार सबहिं जादू अउर सक्तीसाली टोनन
तोहका नाही बचाइ पइहीं।

१० तू बुरे काम करति अहा, फुन भी तू आपन क
सुरच्छित्त समुझति अहा।

तू कहा करति अहा कि तोहार बुरे काम क कउनो
नाहीं लखत।

तू बुरे काम करति अहा किन्तु तू सोचति अहा
कि तोहार बुद्धि अउर तोहार गियान तोहका
बचाइ लेइहीं।

तू खुद क सोचति अहा कि बस एक तू ही महत्वपूर्ण
अहा।

तोहरे जइसा अउर कउनो भी दूसर नाही अहइ।

११ "किन्तु तोह पइ बिपत्तियन अइहीं।

तू नाही जानतिउ कि उ कब होइ जाइ, किन्तु
बिनास आवत अहइ।

तू ओन बिपत्तियन क रोकइ बरे कछू भी नाही कइ
पउबिउ।

तोहार बिनास एतना हाली होइ कि तोहका तक
भी न चली कि का कछू तोहरे संग घट गवा।

१२ जादू अउर टोना क सीखइ मँ

तू कठिन मेहनत करत भए जिन्नगी बिताइ दिहा।

तउ अब आपन जादू अउर टोना क चला।

संभव अहइ टोने टोटके तोहका बचाइ लेइँ।

समंभ अहइ-ओनसे तू कउनो क डेराइ द्या।

१३ तोहरे लगे बहोत स सलाहकार अहइँ।

का तू ओनकर सलाहन स तंग आइ चुकी अहइ ?

तउ फुन ओन लोगन क जउन सितारन बाँचत ही,
बाहेर पठवा।

जउन बताइ सकत हीं महीना कब सुरू होत ह।

तउ संभव अहइ उ पचे तोहका बताइ पाँवइ कि
तोह पइ कब विपत्तियन पड़िहीं।

१४ किन्तु उ सबइ लोग तउ खुद आपन क बचाइ
नाहीं पइहीं।

उ पचे घासे क तिनकन जइसे भक स बरि जइहीं।

उ पचे एतना हाली बरिहीं कि अंगार तलक कउनो
नाहीं बची जेहमाँ रोटी सेकी जाइ सकइ।

कउनो आगी तलक नाही बची जेकरे लगे बइठिके
उ पचे खुद क गर्माइ लेइँ।

१५ अइसा ही हर वस्तु क साथ मँ घटी जेनके बरे
तू कड़ी मेहनत किहा।

तोहरे जिन्नगी भइ जेनसे तोहार वइपार रहा,

उ पचे ही मनइयन तोहका तजि देइहीं, हर कउनो
आपन-आपन राह चला जाइ।

कउनो भी मनई तोहका बचावइ क नाही बची।”

परमेस्सर आपन जगत पइ राज करत ह

४८ १ यहोवा कहत ह, “याकूब क परिवार,
तू उहइ जाति अहइ जेका

‘इस्राएल’ कहा जात ही, मोर बात सुना!

तू पचे यहूदा क घराने स जउन बचन देइ बरे
यहोवा क नाउँ लेत अहा,

तू पचे इस्राएल क परमेस्सर क बारे मँ बोलत
अहा,

किन्तु सच्चाई अउर निस्टावानी स नाही।

२ “तू लोग आपन क पवित्र नगरी क नागरिक
कहत अहा।

तू पचे इस्राएल क परमेस्सर क भरोसे रहत अहा।
ओकर नाउँ सर्वसक्तीमान यहोवा अहइ।

३ “मइँ तू पचन्क बहोत पहिले ही पहिले क ओन
घटना क बारे मँ ओका घटइ स पहिले ही
बताइ दिहे रहा,

तू पचन्क ओन घटना क बारे मँ बताइ दिहे रहा कि
इ होइ सकत ह।

मइँ अचानक ओन बातन घटाइ दिहेउँ! इ सबइ
बातन वइसा ही भवा जइसा मइँ बताए रहा।

४ मइँ तोहका इ सबइ बातन क पहिले ही बताए
दिहे रहेउँ काहेकि मोका मालूम रहा कि तू
पचे बहोत जिद्दी अहा।

मइँ जउन कछू भी बताए रहेउँ ओहे पइ बिस्सास
करइ स तू पचे इन्कार किहा, तू पचे बहोत
जिद्दी रह्या, जइसे लोहा क छड़ नाही
निहुरत ह।

इ बात अइसी रही जइसे तोहार मूँड काँसा क बना
भवा होइ।

५ एह बरे मइँ तू पचन्क पहिले ही ओन घटना क
बारे मँ बताइ दिहे रहेउँ जउन घटी सकत ह।

अइसा एह बरे किहे रहेउँ ताकि तू नाही कहि सकइ
कि

‘इ सबइ काम हमार देवतन किहेन।’

तू इ नाही कहि सकत्या कि ‘हमार मूर्तियन, हमार
देवतन,’

इ सबइ बातन घटाइ क आदेस दिहे रहेन।”

इस्राएल क पवित्र करइ बरे परमेस्सर क ताइब

६ “तू ओन सबहिं बातन क जउन होइ चुकी अहइँ,
लख्या अउर सुन्या ह।

एह बरे तोहका इ सबइ खबरियन दूसरन क बतावइ
चाही।

अब मइँ तोहका नई बातन बतावइ सुरू करत हउँ।
जेनका तू अबहिं नाही जानत अहा।

७ इ सबइ उ सबइ बातन नाही अहइँ जउन पहिले घटि चुकी अहइँ ।

इ सबइ बातन अइसी अहइँ जउन अब सुरू होत अहइँ, आजु स पहिले तू इ सबइ बातन नाही सुन्या ।

तउ तू नाही कहि सकत्या, 'हम तउ एहसे पहिले ही जानित ह ।'

८ किन्तु तब पर भी, तू कबहुँ ओह पइ कान नाही दिहा जउन मइँ कहेस ।

तू मोह स कछु नाही सीख्या ! तू कछु नाही सुन्या जउन मइँ कह्या ।

किन्तु मइँ तोहका ओन बातन क बारे मँ बताएउँ काहेकि मइँ जानत नाही रहेउँ कि तू मोरे विरोध मँ होब्या ।

तू तउ विदरोही रह्या जब स तू पइदा भवा ।

९ "किन्तु मइँ धीरज धरब ।

अइसा मइँ अपने बरे करब ।

मोका किरोध नाही आवा एकरे बरे लोग मोर जस गइही ।

मइँ आपन किरोध पइ काबू करब कि तोहार नास न करउँ ।

तू मोर बाट जोहत भए मोर गुण गउब्या ।

१० "लखा, मइँ तोहका सुद्ध करब ।

चाँदी क सुद्ध करइ बरे लोग ओका आग मँ डावत ही ।

किन्तु मइँ तोहका विपत्ति क भट्ठी मँ डाइके सुद्ध करब ।

११ इ मइँ खुद अपने बरे करब ।

तू मोरे संग अइसे नाही बरतब्या, जइसे मोर महत्व न होइ ।

कउनो मिथ्या देवता क मइँ आपन तारीफ नाही लेइ देब ।

१२ "याकूब, तू मोर सुना ।

हे इस्राएल क लोगो, मइँ तू पचन्क आपन लोग बनवइ क बुलाएउ ह ।

तू एह बरे मोर सुना ।

मइँ परमेस्सर हउँ, मइँ ही सुरूआत हउँ

अउर मइँ ही अन्त हउँ ।

१३ मइँ खुद आपन हाथन स धरती क रचना किहेउँ ।

मोरे दाहिन हाथे अकास क बनाएस ।

जदि मइँ ओनका गोहराउबउँ

तउ दुइनउँ साथ-साथ मोरे समन्वा अइहीं ।

१४ "एह बरे तू सबहिँ जउन आपुस मँ एकट्ठा भए अहा मोर बात सुना ।

का कउनो लबार देवता तोहसे अइसा कहेस ह कि आगे चलिके अइसी बातन घटिही ? नाही ।"

यहोवा इस्राएल स जेका, उ चुनेस ह, पिरम करत ह उ जइसा चाही वइसा ही बाबुल अउर कसदियन क साथ करी ।

१५ "यहोवा कहत ह कि "मइँ तोहसे कहे रहेउँ ।

मइँ ओका बोलाउब ।

मइँ ओका लिआउब अउर ओका सफल बनाउब ।

१६ आवा अउर मोर सुना,

मइँ सुरू से ही एकर बारे मँ साफ-साफ बोलेस ह ।

मइँ उ समय हुवाँ पइ मौजूद रहा

जब बाबुल क नीव पड़ी रहन ।"

तउ नबी कहेस, "अब मोर सुआमी यहोवा मोका आपन आतिमा क संग एन बातन क तू पचन्क बतावइ बरे पठएस ह ।" १७ यहोवा जउन मुक्तिदाता अहइ अउर इस्राएल क पवित्र अहइ, कहत ह,

"मइँ तोहार यहोवा परमेस्सर अहउँ ।

मइँ तोहका सिखावत हउँ कि का हितकर अहइ ।

मइँ तोहका राहे पइ लिये चलत हउँ जइसे तोहका चलइ चाही ।

१८ अगर तू मानत अहा

तउ तोहका ओतनी सान्ति मिल जात

जेतनी नदी भरिके बहत ह ।

तोह पइ उत्तम चिजियन अइसी छाइ जात

जइसे समुद्र क तरंग होइ ।

१९ जदि तू मानत्या तउ

तोरे सन्तानन बहोत बहोत होतिन, तोहार सन्तानन वइसे अनगिनत होइ जातिन जइसे रेत क असंख्य कण होत ही ।

जदि तू मोर मानत्या तउ तउ तू नस्ट नाही होत्य ।

तू भी मोर संग बना होत्य ।"

२० हे मोरे लोगो, तू पचे बाबुल क तजि द्या ।

हे मोर लोगो, तू पचे कसदियन स पराइ जा ।

खुसी मँ भरिके तू पचे लोगन स इ खबरिया क कहा ।

धरती पइ दूर-दूर इ खबर क फइलावा ।

तू पचे लोगन क बताइ द्या,

"यहोवा आपन दास याकूब क उवारि लिहेस ह ।

२१ यहोवा आपन लोगन क रेगिस्ताने मँ राह देखाएस,

अउर उ सबइ लोग कबहुँ पियासे नाही रहेन ।

काहेकि उ आपन लोगन बरे

चटान फोड़िके पानी बहाइ दिहस ।"

२२ किन्तु परमेस्सर कहत ह,

"दुस्टन क सान्ति नाही अहइ ।"

आपन बिसेस सेवक क परमेस्सर क बोलावा

४९

१ हे दूर देसन क लोगो, मोर बात सुना।
हे धरती क निवासियो, तू सबहिं मोर
बात सुना।

मोरे जनम स पहिले ही यहोवा मोका आपन सेवा
बरे बोलाएस।

जब मई आपन महतारी क गरभ मँ ही रहेउँ,
यहोवा मोर नाउँ रख दिहे रहा।

२ यहोवा मोर जरिया स लोगन स बात किहेस।
उ मोर जीव क तेज तरवार क नाई बनाएस ह,
किन्तु उ मोका आपन हाथ क छाया मँ छुपाएस
ह।

उ मोका तेज तीर क समान बनाएस ह,
किन्तु उ आपन तीरन क तरकास मँ राखिके मोर
रच्छा किहेस ह।

३ यहोवा मोका बताएस ह, “इस्राएल, तू मोर
सेवक अहा।

मई तोहरे संग मँ अजुबा काम करब।”

४ मई कहेस, “महँ कड़ी मेहनत किहे रहे हउँ,
किन्तु मई कछु भी पूरा नाहीं किहस।

मई आपन सब सक्ति लगाइ दिहेस,
किन्तु मई कउनो काम पूरा नाहीं कइ सकेउँ!
एह बरे यहोवा क मोर बरे जरूर निआव करइ
चाही।

मोर परमेस्सर क मोरे प्रतिफल क निर्णय जरूर
करइ चाही।

५ यहोवा ही एक अहइ जउन मोका अपना सेवक उ
टेम मँ बनाएस ह जे टेम मई आपन महतारी
क गर्भ मँ रहा।

उ मोका बनाएस ताकि मई याकूब क लोगन क
ओकरे लगे लउटाइके लइ आउँ बरे,
अउर इस्राएलियन क धर्म-संध मँ जमा कइ बरे
लउटाइके लइ आउँ।

यहोवा मोका मान देइ।

मई परमेस्सर क स्तुति गीत गाएस।” ††

६ अब, यहोवा कहत ह: ६ “याकूब क पुनःस्थापित
करइ

अउर इस्राएल क बचा भवा क जेका परमेस्सर
बचाएस रहा

वापिस लइ आवइ महत्वपूर्ण अहा।

किन्तु मोर सेवक मोरे लगे तोहरे बरे एह स जियादा
महत्वपूर्ण कार्य अहइ।

मई तोहका पूरे धरती क उद्धार करइ बरे
‘रास्टर बरे एक प्रकास’ बनाएउँ ह।”

७ इहइ इस्राएल यहोवा ह, इस्राएल क पवित्तर
ह,

इस्राएल क रच्छा करत ह अउर यहोवा कहत ह,
“मोर दास विनम्र अहइ

जउन सासकन क सेवा करत ह,

अउर लोग ओहसे घिना करत हीं।

राजा ओकर दर्सन करिहीं अउर ओकरे सम्मान मँ
खड़ा होइहीं।

महान नेता भी ओकरे समन्ना निहुरिहीं,”

काहेकि यहोवा बिस्सवासी अहइ। इस्राएल ही
एक पवित्तर अहइ जेका यहोवा चुनेस ह।

मुक्ती क समय

८ यहोवा कहत ह,

“उचित समय आवइ पइ मई तोहार पराथनन क
जबाव देब।

मई तोहका सहारा देब।

मुक्ति क दिनन मँ मई तोहार रच्छा करब

अउर तू एकर प्रमाण होब्या

कि लोगन क संग मँ मोर वाचा अहइ।

अब देस उजड़ चुका अहइ,

किन्तु तू इ धरती एकरे सुआमियन क
लउटवउब्या।

९ तू बन्दियन स कहब्य,

‘तू पचे आपन जेलि स बाहेर निकरि आवा।’

तू ओन लोगन स जउन अँधियारा मँ अहई,
कहब्या,

‘अँधियारा स बाहेर आइ जा।’

उ पचे चलत भए राहे मँ भोजन कइ पइहीं।

उ पचे वीरन पहाड़न मँ भी भोजन पइहीं।

१० लोग भूखा नाहीं रहिहीं, लोग पियासा नाहीं
रहिहीं।

गर्म सूरज, गर्म हवा ओनका दुःख नाहीं देइहीं।

काहेकि उहइ जउन ओनका चैन देत ह, (परमेस्सर)
ओनका राह देखाँइ।

उहइ लोगन क पानी क झरनन क पास-पास लइ
जाइ।

११ मई आपन लोगन बरे एक राह बनाउब।

पर्वत समथर होइ जइहीं

अउर दबी राहन ऊपर उठि अइहीं।

††४९:५ मई परमेस्सर ... गाएस या “मोर परमेस्सर मोर सक्ति अहइ।” हिब्रू सव्द क अरथ अहइ
“सक्ति” या “गीत जउन दूसर के सक्ति क स्तुति बरे गावा जात ह।”

१२ “लखा, दूर दूर देसन स लोग हिआँ आवत अहई।

उत्तर स लोग आवत अहई अउर लोग पच्छिम स आवत अहई।

लोग मिस्र मँ स्थित असवान स आवत अहई।”

१३ हे आकासो, हे धरती, तू खुस होइ जा।

हे पर्वतो, आनन्द स जयकारा बोला!

काहेकि यहोवा आपन लोगन क सुख देत ह।

यहोवा आपन दीन हीन लोगन बरे बहुत दयालु अहइ। सिय्योन: तजी गइ मेहरारू

१४ किन्तु अब सिय्योन कहेस, “यहोवा मोका तजि दिहस।

मोर सुआमी मोका बिसरि गवा।”

१५ किन्तु यहोवा कहत ह,

“का कउनो मेहरारू आपन ही बच्चन क भूल सकत ह? नाही।

का कउनो मेहरारू उ बच्चा क जउन ओकर ही कोख स जन्मा ह, भूल सकत ह? नाही।

सम्भव अहइ कउनो मेहरारू आपन सन्तान क बिसरि जाइ।

परन्तु मई (यहोवा) तोहका नाही बिसरि सकत हउँ।

१६ लखा जरा, मई आपन हथेली पइ तोहार नाउँ खोद लिहे हउँ।

मई सदा तोहरे विसय मँ ही सोचा करत हउँ।

१७ तोहार सन्तानन तोहरे लगे लउटि अइहीं।

जउन लोग तोहका पराजित किहे रहेन, उ पचे ही मनइयन तोहका अकेल्ले तजि जइहीं। इस्राएलियन क वापसी

१८ आपन आखँनि क ऊपर उठावा अउ चारिहुँ कइँती लखा।

तोहार सबहि गदेलन आपुस मँ एकट्ठी होइके तोहरे लगे आवति अहई।”

यहोवा क इ कहब अहइ, “आपन जिन्नगी क कसम खाइके मई तू पचन्क इ सबइ बचन देत हउँ,

तोहार गदेलन ओन रत्नन जइसी होइहीं जेनका तू अपने गले मँ पहिरत अहा।

तोहार गदेलन वइसी ही होइहीं जइसा उ वंठहार होत ह जेका दुलहिन पहिरत ह।

१९ “आजु तू नस्ट अहा अउर आजु तू पराजित अहा।

तोहार भुइँया तबाही मँ अहइ।

किन्तु कछु ही दिनन पाछे तोहरी धरती पइ बहोत सारे लोग होइही

अउर उ सबइ लोग जउन तोहका उजारे रहेन, दूर बहोत दूर चला जइहीं।

२० जउन गदेलन तू खोइ दिहा, ओनके बरे तोहका बहोत दुःख भवा किन्तु उहइ पचे गदेलन तोहसे कहिहीं।

‘इ जगहिया रहइ क बहोत छोटी अहइ।

हमका तउ कउनो फइली जगहिया द्या।’

२१ फुन तू खुद अपने आप स कहब्या,

‘एन सर्बहि गदेलन क मोरे बरे कउन जन्माएस? इ तउ बहोत अच्छा अहइ।

मई दुःखी रहा अउर अकेल्ला रहा। मई हारा भवा रहा।

मई आपन लोगन स दूर रहा।

तउ इ सबइ गदेलन मोरे बरे कउन पालेस ह लखा तनिक, मई अकेल्ला छोड़ा गवा हउँ।

इ सबइ एँतने सबइ गदेलन कहाँ स आइ गएन?”

२२ मोर सुआमी यहोवा कहत ह,

“लखा, आपन हाथ उठाइके इसारे स मई सारे ही देसन क बुलावे क संकेत देत हउँ।

मई आपन झण्डा उठाउब कि सब लोग ओका लखइँ।

फुन उ पचे तोहार गदेलन क तोहरे लगे लिअइहीं। उ सबइ लोग तोहरे गदेलन क आपन काँधे पइ उठइहीं

अउर उ पचे ओनका आपन बाँहे मँ उठाइ लेइहीं।

२३ राजा तोहरे गदेलन क सिच्छुक होइहीं अउर सबइ राजकन्या ओनकर धियान रखिहीं।

उ सबइ राजा अउर ओनकर सबइ राजकन्या दुइनउँ तोहरे समन्वा माथा नवइहीं।

उ पचे तोहरे पाँवन भी धूरि क चुम्बन करिहीं।

तबहि तू जनब्या कि मई यहोवा हउँ।

तबहि तोहका समुझ मँ आई कि हर अइसा मनई जउन मोहमाँ भरोसा राखत ह, निरास नाही होइ।”

२४ जब कउनो सक्तिसाली जोधा जुद्ध मँ जीतत ह

तउ का कउनो ओकर जीती भइ वस्तुअन क ओहसे लइ सकत ह?

जब कउनो विजेता फउजी कउनो बन्दी पइ पहरा देत ह,

तउ का कउनो पराजित बन्दी बचिके भरा सकत ह?

२५ किन्तु यहोवा कहत ह,

“उ बलवान सैनिक स बन्दीयन क छोड़ाइ लीन्ह जाइ

अउर जीत क चिजियन ओहसे छोरि लीन्ह जाइ।

इ भला काहे क होइ ? मई तोहरे जुद्धन क लड़ब अउर तोहरी सन्तानन बचाव ।
 २६ अइसे ओन लोगन क जउन तू पचन्क कस्ट देत ही
 मई अइसा ही कइ देब कि उ पचे आपुस मँ एक दूसर क बदन क खाई ।
 ओनकर खून दाखरस बन जाइ जेहसे उ पचे धुत होइहीं ।
 तब हर कउनो जानी कि मई उहइ यहोवा हउँ जउन तोहका बचावत ह ।
 सारे लोग जान जइहीं कि तोहका बचावइवाला याकूब क समर्थ अहइ ।”

इस्राएल क ओकरे पापन्क दण्ड

५० १ यहोवा कहत ह,
 “हे इस्राएल क लोगो, तू पचे कहा करत रह्या कि मई तोहार महतारी यरूसलेम क तलाक दिहेउँ ।
 किन्तु उ तलाकपत्र कहाँ अहइ जउन साबित कइ देइ कि मई ओका तलाक दिहेउँ ह ।
 हे मोरे गदेलो, का मई कउनो क कर्जदार अहउँ ? का आपन कउनो कर्ज चुकावइ बरे मई तोहका बेचेउँ ह ?
 नाही, तू बिका रह्या एह बरे कि तू बुरे करम किहे रह्या ।
 एह बरे तोहार महतारी दूर पठइ गइ रही काहेकि तू बुरा करम किहे रह्या ।
 २ जब मई घरे आवा रहेउँ, मई हुआँ कउनो क नाही पाएउँ ।
 मई बार-बार गोहराएउँ किन्तु कउनो जबाव नाही दिहस ।
 का तू पचे सोचत अहा कि तोहका मई नाही बचाइ सकत हउँ ?
 मई तोहार बिपत्तियन स तोहका पचन्क बचावइ क सक्ति धरत हउँ ।
 लखा, जदि मई समुद्र क झुराइ क आदेस देउँ तउ उ झुराइ जाइ ।
 मछरियन परान तजि देइहीं काहेकि हुवाँ जल न होइ
 अउर ओनकर देह सड़ि जाइ ।
 ३ मई अकासन क करिआ कइ सकत हउँ ।
 अकास वइसे ही करिआ होइ जइहीं जइसे सोक वस्त्र होत ही ।”

परमेस्सर क सेवक परमेस्सर क भरोसे

४ मोर सुआमी यहोवा मोका सीख देइ क जोग्यता दिहस ह । एह बरे मई थका भवा लोगन क प्रोत्साहित करत हउँ अउर ससकत बनावत हउँ । हर भिसारे उ मोका जगावत ह अउर एक छात्र क नाई सिच्छा देत ह । ५ मोर सुआमी यहोवा सीखइ मँ मोर सहायक अहइ अउर मई ओकर विरोधी नाही बना अहउँ । मई ओकरे पाछे चलब नाही तजब । ६ ओन लोगन क मई आपन पिटाइ करइ देब । मई ओनका आपन दाढ़ी क बार नोचइ देबउँ । उ सबइ लोग जब मोरे बरे अपसब्ब कइहीं अउर मोह पइ थूकिहीं तउ मई आपन मुँह नाही मोडब । ७ मोर सुआमी, यहोवा मोर मदद करी । एह बरे ओनकर अपसब्ब मोका दुःख नाही पहुँचइहीं । मई सुदृढ़ रहब । मई जानत हउँ कि मोका निरास नाही होइ पड़ी ।

५ एक उ जउन कउनो मोका दोख रहित बनाएस ह उ मोर संग अहइ, एह बरे कउन मनई मोका अपराधी साबित कइ सकत ह । जदि कउनो मनई सोचत ह कि उ मोर खिलाफ कउनो सिकायत रखत ह, तउ उ मनई क मोरे लगे आवइ द्या अउर अपना तर्क रखइ द्या । १ किन्तु लखा, मोर सुआमी यहोवा मोर मदद करत ह । एह बरे कउन मनई अहइ जउन इ सिद्ध कइ सकी कि मई दोखी हउँ ? उ सबइ सबहि लोग वइसे ही बाहर फैंकइ जाइ जइसे पुरान कपड़न क जेका किरवन चट कइ जातहीं ।

१० अगर कउनो मनई जउन यहोवा क आराधना करत ह अउर ओकर सेवक क संदेस भी सुनत ह, मगर अबहुँ तलक अंधेरे मँ बिना प्रकास क चलत ह, एका अपने यहोवा क नाउँ मँ बिस्सास रखइ चाही अउर ओका आपन परमेस्सर पइ जरूर भरोसा रखइ चाही ।

११ “लखा, तू लोग आपन ही ढंग स जिअइ चाहत अहा । आपन आगी अउर आपन मसालन क तू पचे खुद बारत अहा । तू पचे आपन ही ढंग स रहइ चाहत अहा । किन्तु तू पचन्क सजा दीन्ह जाइ । तू पचे आपन ही आगी मँ भहराब्या अउर तोहार पचन्क आपन ही मसालन तू पचन्क बारि डइहीं । अइसी घटना मई घटवाउब ।”

इस्राएल क इब्राहीम क जइसा होइ चाही

५१ १ “मोर सुन्या, तोहमाँ स जउन लोग उत्तिम जिन्नगी जिअइ क कठिन प्रयत्न करत अहा अउर यहोवा क मदद खोजत अहा । अगर तू सही तरीके से जिअइ क उदाहरण चहात

ह, लखा चट्टा (इब्राहीम) क जेहसे तू पचन्क काटि गवा अहइ, लखा खोखला चट्टान (सारा) क जेहसे तू पचन्क तरासत भवा अहइ।^२ हाँ, लखा आपन पिता इब्राहीम अउर आपन माँ सारा क जउन तू पचन्क जन्म दिहेस ह। उ इब्राहीम ही अकेला रहा जेका मई बोलाए रहा। किन्तु मई ओका वरदान दिहा अउर ओका एक बड़के रास्टर बनाइ दिहस।^३

^३ सिय्योन पर्वत क यहोवा वइसे ही आसीर्वाद देइ। यहोवा क यरूसलेम अउर ओकरे खंडहरन क बरे खेद होइ अउर उ नगर बरे कउनो बहोत बड़ा काम करी। यहोवा रेगिस्तान क बदल देइ। उ रेगिस्तान अदन क उपवन क जइसे एक उपवन मँ बदल जाइ। उ उजाड़ स्थान यहोवा क बगीचे जइसा होइ जाइ। लोग बहोत जियादा खुस होइहीं। लोग हुवाँ आनन्द परगट करिहीं। उ सबइ लोग धन्नबाद अउर विजय क गीत गइहीं।

^४ “हे मेरे लोगो, मोर सुना! मई तू पचन क आपन उपदेसन क देब।

मई आपन नेमन क प्रकास क तरह बनाउब जउन लोगन क देखइहीं कि कइसे ठीक तरह स जिया जात ह।

^५ मई हाली ही परगट करब कि मई निआव स पूर्ण हउँ।

मई हाली ही तोहार पचन्क रच्छा करब।

मई आपन सक्ति क काम मँ लिआउब अउर मई सबहिं रास्टरन क निआव करब।

सबहिं दूर-दूर क देस मोर बाट जोहत अहइँ।

ओनकर मोर सक्ति क प्रतीच्छा अहइ जउन ओनका बचाई।

^६ ऊपर अकासन क लखा,

अकास अइसे लोप होइ जाइ जइसे धुआँ क एक बादर खोइ जात ह।

अउर धरती अइसे ही बेकार होइ जाइ जइसे पुरान ओढ़ना बगैर कीमत क होत हीं।

धरती क वासी आपन प्राण तजिहीं

किन्तु मोर मुक्ति सदा ही बनी रही।

मोर उत्तिमता कबहुँ नाहीं मिटी।

^७ अरे ओ उत्तिमता क समुझइवाले लोगो, तू पचे मोर बात सुना।

अरे ओ मोर सिच्छन पइ चलइवालो, तू पचे उ सबइ बातन सुना जेनका मई बतावत हउँ।

दुट्ट लोगन स तू पचे जिन डेराअ।

ओन बुरी बातन स जेनका उ पचे तू पचन्स कहत हीं, तू पचे भयभीत जिन ह्वा।

^८ काहेकि उ पचे पुराना कपड़न क नाई होइहीं।

ओनका किरवन खाइ जइहीं, उ पचे ऊन क जइसे होइहीं जेका किरवन चाट जइहीं।

संसार क लोग मरिहीं, किन्तु मोर मुक्ति सदा ही बना रही।

मोर अच्छाइ निरन्तर बनी रही।^९

परमेस्सर क सामर्थ्य ओकरे लोगन क रच्छा करत ह

^९ यहोवा क भुजा जाग-जाग।

आपन सक्ति क सज्जित करा।

तू आपन सक्ति क प्रयोग करा।

तू वइसे जाग जा जइसे तू बहोत बहोत पहिले जागा रह्या।

तू उहइ सक्ति अहा जउन रहाब क छक्कन छुड़ाए रहा।

तू भयानक मगरमच्छ क ध्वारे रह्या।

^{१०} तू सागरे क सुखाया।

तू गहिर समुद्र क जलहीन बनाइ दिहा।

तू सागर क गहिर सतह क एक राहे मँ बदल दिहा अउर तोहार लोग उ राह स पार भएन अउर बच गए रहेन।

^{११} यहोवा आपन लोगन क रच्छा करी।

उ पचे सिय्योन पर्वत कइती आनन्द मनावत भए लउटि अइहीं।

इ सबइ सबहिं आनन्द मँ मगन होइहीं।

सारे ही दुःख ओनसे दूर कहुँ भाग जइहीं।

^{१२} यहोवा कहत ह, “मई उहइ हउँ जउन तू पचन्क चइन दिया करत ह।

एह बरे तू पचन्क दूसर लोगन्स काहे डेराइ चाही ? उ पचे तउ बस मनइयन अहइँ जउन जिया करत हीं अउर मरि जात हीं।

उ पचे वइसे मरि जात हीं जइसे घास मरि जात ह।^{१३}

^{१३} यहोवा तू पचन्क रचेस ह।

उ निज सक्ति स इ धरती क बनाएस ह।

उ निज सक्ति स धरती पइ अकास तान दिहस।

किन्तु तू पचे ओका अउर ओकर सक्ति क बिसरि गवा।

एह बरे तू पचे सदा ही उ मनइयन स भयभीत रहत ह जउन तू पचन्क हानि पहुँचावत हीं।

तोहार नास करइ क ओन लोग जोजना बनाएन, किन्तु आजु उ पचे कहाँ अहइँ ? उ पचे सबहिं चलि गए रहेन!

^{१४} लोग जउन बन्दी अहइँ, हाली ही मुक्त होइ जइहीं।

ओन लोगन क मउत काल कोठरी मँ नाहीं होइ अउर न ही उ पचे कारागार मँ सड़त रइहीं। ओन लोगनक लगे खाइके पर्याप्त होइ।

१५ “मई ही यहोवा तोहार पचन्क परमेस्सर हउँ। मई ही सागर क झकोरत हउँ अउर मई ही लहरन उठावन हउ।”

ओकर नाउँ सर्वसक्तीमान यहोवा अहइ।

१६ “मोर सेवक, मई तोहका उ सबइ सब्द देब जेनका मई तोहसे कहलवावइ चाहत हउँ। मई तोहका आपन हाथन स ढकिके तोर रच्छा करब। मई तोहसे नवा अकास अउ नई धरती बनवाउब। मई तू पचन क जरिये सिय्योन क इ कहलवा वइ बरे कि तू पचे मोर लोग अहा, तोहार उपयोग करब।”

परमेस्सर इस्राएल क दण्ड दिहस

१७ जागा। जागा।

यरूसलेम जाग उठा।

यहोवा तोहसे बहोत ही कोहान रहा।

एह बरे तोहका दण्ड दीन्ह गवा।

उ दण्ड अइसा रहा जइसा जहर क कउनो पियाला होइ अउर उ तोहका पिअइ पड़इ

अउर ओका तू पी लिहा।

१८ यरूसलेम मँ बहोत स लोग हुआ करत रहेन किन्तु ओनमाँ स कउनो भी मनई ओकर अगुवाई नाहीं कइ सका। उ पाल-पोसके जउन गदेलन क बड़ा किहे रहा, ओनमाँ स कउनो भी ओका राह नाहीं देखाइ सका। १९ दुइ जोड़ा विपत्ति यरूसलेम पइ टूट पड़ी अहइ, लूटपाट अउर अनाज क परेसानी अउर भयानक भूख अउ सबइ हत्तिया।

जब तू विपत्ति मँ पड़ी रही, कउनो भी तोहका सहास नाहीं दिहस, कउनो भी तोह पइ तरस नाहीं खाएस। २० तोहार लोग दुर्बल होइ गएन। उ पचे हुवाँ धरती पइ भहराइ पड़ा अहइ अउर हुँवइ पड़ा रइहीं। उ सबइ लोग हर गली का नुक्कड़ पर पड़ा अहइ। उ सबइ लोग अइसे अहइ जइसे कउनो जाल मँ फँसा हरिन होइ। ओन लोगन पइ यहोवा क कोप क मार तब तलक पड़त रही, जब तलक उ पचे अइसन न होइ गएन कि दण्ड झेल ही न सकइ। परमेस्सर जब कहेस कि ओनका अउर दण्ड दीन्ह जाइ तउ उ पचे बहोत कमजोर होइ गएन।

२१ बेचारे यरूसलेम, तू मोर सुन। तू कउनो धूत्त मनई क समान दुर्बल अहा किन्तु तू दाखरस पीके धूत्त नाहीं भवा अहा, बल्कि तू तउ “जहर क उ पियाला का पीके” अइसा दुर्बल होइ गवा अहा।

२२ तोहार पचन्क परमेस्सर अउर सुआमी उ यहोवा आपन लोगन बरे जुद्ध करी। उ तू पचन्क कहत ह, “लखा! मई ‘जहर क इ पियाला’ (दण्ड) क तू पचन्स दूर हटावत हउँ। मई आपन किरोध क तू पचन्पइ स हटावत अहउँ। अब मोरे किरोध स तू पचन्क अउर दण्ड नाहीं भोगइ क होइ। २३ अब मई आपन किरोध क मार ओन लोगन पइ डाउब जउन तू पचन्क दुःख पहींचावत हीं। उ सबइ लोग तू पचन्क मार डावइ चाहत रहेन। ओ लोग तू पचन्स कहे रहेन, हमरे अगवा निहुरि जा। हम तू पचन्क कुचरि डाउब। आपन समन्वा निहुरावइ बरे उ पचे तू पचन्क मजबूर किहन। फुन ओ लोग तू पचन्क पीठ क अइसा बनाइ डाएन जइसे धूर-माटी होइ ताकि उ पचे तू पचन्क रौंद सकइ। ओनके बरे चलइ क वास्ते तू पचे कउनो राहे क जइसा होइ गए रह्या।”

इस्राएल क उद्धार होइ

२२ ? जाग उठा! जाग उठा हे सिय्योन! आपन वस्त्र क धारण करा, तू आपन सक्ति स भरा।

हे पवित्रर यरूसलेम, तू खड़ा होइ जा।

अइसे उ सबइ लोग जेनका परमेस्सर क अनुसरण करब कबूल नाहीं अहइ अउर जउन स्वच्छ नाहीं अहइ, तोहमाँ फुन प्रवेश नाहीं कइ पइहीं।

२ तू धूरि झाड़ द्या, तू आपन सुन्नर ओढ़ना धारण करा।

हे यरूसलेम, हे सिय्योन क बिटिया, तू एक बन्दिनी रहिउ

किन्तु अब तू खुद क आपन गटई मँ बँधी जंजीरन स मुक्त करा।

३ यहोवा क कहत ह,

“तोहका धन क बदले मँ नाहीं बेचा गवा रहा,

एह बरे जब मई तोहका आजाद करब तउ कउनो धन नाहीं देइ पड़ी।”

४ मोर सुआमी यहोवा कहत ह, “मोर लोग बस जाइ बरे पहिले मिस्र मँ गवा रहेन, अउर फुन उ पचे दास बन गएन। पाछे अस्सूर ओनका बेकार मँ ही दास बनाइ लिहे रहा। ५ अब लखा, इ का होइ गवा अहइ। अब कउनो दूसर रास्टर मोरे लोगन क लइ लिहे अहइ। मोरे लोगन क लइ जाइ बरे इ देस कउनो भुगतान नाहीं किहे रहा। इ देस मोरे लोगन पइ हुकुमत करत ह अउर ओनकर हँसी उड़ावत ह। हुवाँ क लोग सदा ही मोरे बरे बुरी बातन कहा करत हीं।”

६ यहोवा कहत ह, “अइसा एह बरे भवा कि मोरे लोग मोरे बारे में जानई। मोरे लोगन क पता चलि जाइ कि मई कउन हउं? मोरे लोग मोर नाउं जान जइहीं अउर ओनका इ भी पता चल जाइ कि उ मई ही हउं जउन ओनसे बोलन हउं।”

७ सुसमाचार क संग पहाड़न क उपर स आवत भए संदेसवाहक क लखब निहचय ही एक अद्भुत बात अहइ। कउनो संदेसवाहक क इ घोसणा करत भए सुनब केतना अद्भुत अहइ: “हुवाँ सान्ति क निवास अहइ, हम बचाइ लीन्ह गए अही। तोहार परमेस्सर राजा अहइ।”

८ नगर क रखवारे जयजयकार करइ लागेन ह। उ पचे आपुस में मिलिके आनन्द मनावत अहइ। काहेकि ओनमाँ स हर एक यहोवा क सिष्योन क लउटिके आवत भए लखत अहइ।

९ यरूसलेम तोहार उ सबइ भवन जउन बर्बाद होइ चुके अहइ फुन स खुस होइ जइहीं।

तू पचे सबहिं आपुस में मिलिके आनन्द मनउब्या। काहेकि यहोवा यरूसलेम पइ दयालु होइ जाइ, यहोवा आपन लोगन क उद्धार करी।

१० यहोवा सबहिं रास्टरन क ऊपर आपन पवित्तर सक्ति दसाइ अउर सबहिं उ सबइ देस जउन दूर-दूर बसा अहइ, लखिहीं कि परमेस्सर आपन लोगन क रच्छा कइसे करत ह।

११ तू लोगन क चाही कि बाबुल छोड़ जा।

उ जगह छोड़ द्या।

हे लोगो, ओन वस्तुअन क लइ चलइवाले जउन उपासना क काम आवति हीं,

अपने आप क पवित्तर करा।

अइसी कउनो भी वस्तु जउन पवित्तर नाही ओका जिन छुआ।

१२ तू पचे बाबुल तजब्या

किन्तु हाली मैं तजइ क तू पचन्पइ कउनो दबाव नाही होइ।

तू पचे चलिके बाहेर जाब्या अउर यहोवा तू पचन्क संग संग चली।

तू पचन्क क अगुवाइ यहोवा ही करी

अउर तोहार पचन्क रच्छा बरे इस्राएल क परमेस्सर पाछे-पाछे भी होइ।

परमेस्सर क सेवक कस्ट सहत

१३ “मोरे सेवक कइँती लखा। इ बहोत सफल होइ। इ बहोत महत्वपूर्ण होइ। अगवा चलिके लोग ओका आदर देइहीं अउर ओकर सम्मान करिहीं।” १४ किन्तु बहोत स लोग जब मोरे सेवक

क लखेन तउ उ पचे भौचक्के रहि गएन। मोर सेवक एतना बुरी तरह स सतावा ग रहा कि उ पचे ओका एक मनई क रूप में बड़ी दिक्कत स पहचान पाएन। १५ किन्तु बहोत सारे रास्टरन भी चकित होइहीं। राजा ओका लखिके अचरजे में पड़ि जइहीं अउर एक सब्द भी नाही बोल पइहीं। उ मोर सेवक क बारे में नाही सुनी ही किन्तु जउन कछू भवा रहा उ पचे ओका लख रहेन। उ लोग ओकर बारे में सुने भर नाही रहेन किन्तु ओका समझे रहेन।”

१६ हम जउन बातन बताए रहे, ओनकर फुरइ कउन बिस्सास किहस? यहोवा क दण्ड क फुरइ कउन कबूलेस?

२ यहोवा क समन्वा एक नान्ह पउधन क तरह ओकर बढ़वार भइ। उ एक अइसी जड़ क समान रहा जउन झुरान धरती में फूटति रही। उ कउनो खास, नाही देखाइ देत रहा। न ही कउनो ओकर कउनो वैसेस महिमा रही। जदि हम ओका देखिन तउ हमका ओहमा कउनो अइसी वैसेस बात नाही देखाइ देत, जेहसे हम ओका चाह सकित। ३ ओहसे घिना कीन्ह गइ रही अउर ओकर मीतन ओका तजि दिहे रहेन। उ एक अइसा मनई रहा जउन पीरा क जानत रहा। उ बीमारी क बहोत अच्छी तरह पहिचानत रहा। लोग ओका एतना भी आदर नाही देत रहेन कि ओका देख तउ लेइ। हम तउ ओह पइ धियान तलक नाही देत रहे।

४ किन्तु उ हमार पाप अपने उपर लइ लिहस। उ हमार पीरा क हमसे लइ लिहस अउर हम इहइ सोचत रहे कि परमेस्सर ओका दण्ड देत अहइ। हम सोचा परमेस्सर ओह पइ ओकरे करमन बरे मार लगावत अहइ। ५ किन्तु उ तउ ओन बुरे कामन बरे बेधा जात अहइ, जउन हम किहे रहे। उ हमार अपराधन बरे कुचरा जात रहा। जउन कर्जा हमका चुकावइ क रहा, यानी हमार दण्ड रहा, ओका उ चुकावत रहा। ओकरी सबइ यातना क बदले मैं हम चंगे (छिमा) कीन्ह ग रहे। ६ किन्तु ओकरे एतना करइ क पाछे भी हम सब भेड़िन क तरह एहर-ओहर भटक गए। हम मैं स हर एक आपन-आपन राह चला गवा। यहोवा क जरिये हमक हमार अपराधन स मुक्त कइ दीन्ह जाइ क पाछे अउर हमरे अपराध क आपन सेवक स जोड़ देइ पर भी हम अइसा कीन्ह।

७ ओका सतावा गवा अउर दण्डित कीन्ह गवा। किन्तु उ ओकरे विरोध मैं आपन मुँह नाही खोलेस। उ बध बरे लइ जाइ जात भइ मेमना क समान चुप रहा। उ उ मेमना क समान चुप रहा जेकर ऊन उतारा जात रहा होइ। उ कबहुँ आपन

मुँह नाही खोलेस।^५ लोग ओह पइ बल प्रयोग किहन अउर ओका लइ गएन। ओकरे साथ खरेपन स निआव नाही कीन्ह गवा। ओकर भावी परिवार बरे कउनो वुछ नाही कहि सकत काहेकि सजीव लोगन क धरती स ओका उठाइ लीन्ह गवा। मोर लोगन क पापन्क भुगतान करइ बरे ओका दण्ड दीन्ह गवा रहा।^६ ओकर मउत होइ गइ अउर दुट्ट लोगन क संग ओका गाड़ा गवा। धनवान क बीच ओका दफनावा गवा। उ कबहुँ कउनो हिंसा नाही किहेस। उ कबहुँ झूठ नाही बोलेस किन्तु फुन भी ओकरे साथ अइसी बातन घटिन।

^७ यहोवा ओका कुचर डावइ क निहचय किहेस। यहोवा निहचय किहेस कि उ सबइ यातना झेलइ। तउ सेवक आपन प्रान तजइ क खुद क सौपेस। किन्तु उ एक नवा जीवन अनन्त-अनन्त काल तलक बरे पाई। उ आपन लोगन क लखी। यहोवा ओका जउन करइ चाहत ह, उ ओन बातन क पूरा करी।^८ उ आपन आतिमा मँ बहोत सी पीरन झेली किन्तु उ घटइवाली अच्छी बातन क लखी। उ जउने बातन क गियान प्राप्त करत ह, ओनसे संतुट्ट होइ।

मोर उ उत्तम सेवक बहोत स लोगन क ओनके अपराधन स छुटकारा दिलवाई। उ ओनके पापन्क अपने सिरन पइ लइ लेइ।^९ एह बरे मइँ ओका बहोतन क संग पुरस्कार क सहभागी बनाउब। उ सबइ चिजियन क उ लोगन क बीच मँ बाँटब जउन मजबूत अहइ। काहेकि उ आपन जिन्नगी दूसरन बरे दइ दिहस। उ अपने आप क अपराधियन क बीच गना जाइ दिहस। जबकि उ वास्तव मँ बहुतेरन क पापन्क दूर किहस अउर अब उ पाप बरे ओनकर रच्छक क रूप मँ बोलत ह।

परमेस्सर आपन लोगन क वापस लिआवत ह

५४ ^१ हे बाँझ मेहरारू, तू खुस होइ जा। तू गदेलन क जन्म नाही दिहा, किन्तु फुन भी तोहका बहोत खुस होइ चाही। यहोवा कहेस, “जउन मेहरारू अकेल्ली अहइ, ओकर जियादा सन्तानन होइहीं बनिस्वत उ मेहरारू क जेकरे लगे ओकर पति अहइ।”

^२ आपन तम्बू फइलावा, आपन दुआर पूरा खोला। आपन तम्बू क बढइ स जिन रोका। आपन रस्सियन बढ़ावा अउर खूंटन मजबूत करा।

^३ काहेकि तू आपन बंस-बेल दाहिन अउ बाएँ फइलाई।

तोहार सन्तानन अनेकानेक रास्ट्रन क धरती क लइ लेइहीं अउर उ सबइ सन्तानन ओन नगरन मँ फुन बसिहीं जउन बर्बाद भ रहेन।

^४ तू ससाउ जिन, तू लज्जित नाही होबिउ।

आपन मन जिन हारा काहेकि तोहका अपमानित नाही होइ क होइ।

जब तू जवान रहिउ,

तू लज्जित भइ रहिउ

किन्तु उ लज्जा क अब तू बिसरब्या।

अब तोहका उ लाज नाही याद राखब अहइ तू जेका उ काल मँ भोग्या रहा

जब तू आपन भतार खोया रह्या।

^५ काहेकि तोहार भतार उहइ रहा!

जउन तोहका रचे रहा।

ओकर नाउँ सर्वसक्तिमान यहोवा अहइ।

उहइ इस्राएल क रच्छा करत ह, उहइ इस्राएल क पवित्तर अहइ

अउर उहइ समूची धरती क परमेस्सर कहवावत ह।

^६ तू एक टु अइसी मेहरारू क जइसी रहिउ जेका ओकर ही भतार तलाक दिहे रहा।

तोहार मन बहोत भारी रहा किन्तु तोहका यहोवा आपन बनावइ बरे बोलाए रहा।

तू उहइ मेहरारू क समान अहा जेकर बचपने मँ ही बियाह भवा

अउर जेका ओकर भतार तलाक दिहेस ह।

किन्तु परमेस्सर तू पचन्क आपन बनावइ बरे बोलाएस ह।

^७ तोहार परमेस्सर कहत ह, “मइँ तोहका थोड़े समय बरे तजे रहेउँ।

किन्तु अब मइँ तोहका फुन स अपने पास आउब अउर आपन महा करुणा तोह पइ दर्साउब।

^८ मइँ बहोत कोहाइ गवा अउर थोड़े स समय क बरे तोहसे छुप गवा

किन्तु आपन महाकरुणा स मइँ तोहका सदा चैन देब।”

तोहार उद्धारकर्ता यहोवा इ कहेस ह।

^९ परमेस्सर कहत ह, “इ ठीक वइसा ही अहइ जइसे नूह क काल मँ मइँ बाढ़ क जरिये दुनिया क दण्ड दिहे रहेउँ।

मइँ नूह क वरदान दिहेउँ कि फुन स मइँ दुनिया पइ बाढ़ नाही लाउब।

उहइ तरह तोहका, मइँ उ वचन देत हउँ, मइँ तोहसे
 कुपित नाही होब
 अउर तोहसे फुन कठोर वचन नाही बोलब ।”
 १० यहोवा कहत ह, “चाहे पर्वत लुप्त होइ जाई
 अउर इ पहाड़ियन रेत मँ बदल जाई
 किन्तु मोर करुणा तोहका कबहुँ भी नाही तजी ।
 मइँ तोहसे मेल करब
 अउर उ मेल क कबहुँ अंत न होइ ।”
 यहोवा तोह पइ करुणा देखावत ह अउर उ यहोवा
 ही उ सबइ बातन बताएस ह ।
 ११ “हे नगरी, हे दुखियारी !
 तोहका तूफानन सतायन ह
 अउर कउनो तोहका चैन नाही दिहेस ह ।
 मइँ तोहार कीमती पाथरन स फुन स निर्माण
 करब ।
 मइँ तोहार नींव फिरोजन
 अउ नीलम स धरब ।
 १२ मइँ तोहार देवारन चुनइ मँ माणिक क लगाउब ।
 तोहरे दुआरन पइ दमकत भए रत्नन क जइब ।
 तोहरी सबहिँ देवारन मइँ कीमती पाथरन स
 उठाउब ।
 १३ तोहार सन्तानन यहोवा ब्दारा सिच्छित
 होइहीं ।
 तोहार सन्तानन क सम्पन्नता महान होइ ।
 १४ मइँ तोहार निर्माण खरेपन स करब
 ताकि तू दमन अउर अन्याय स दूर रहा ।
 फुन कछू नाही होइ जेहसे तू डरब्या ।
 तोहका नोस्कान पहाँ चावइ कउनो भी नाही आई ।
 १५ मोर कउनो भी सेना तोहसे कबहुँ जुद्ध नाही
 करी ।
 अउर जदि कउनो सेना तोह पइ चढ बइठइ क
 प्रयत्न करइ तउ तू उ सेना क पराजित कइ
 देब्या ।
 १६ “लखा, मइँ लोहार क बनाएँ ह । उ लोहे
 क तपावइ बरे धौकनी धौकत ह । फुन उ तपे
 लोहे स जइसे चाहत ह, वइसे औजार बनावत ह ।
 उहइ प्रकार मइँ ‘विनासकर्ता’ क बनाएँ ह जउन
 वस्तुअन क नस्त करत ह ।
 १७ “तोहका हरावइ बरे लोग हथियार बनइहीं
 किन्तु उ सबइ हथियार तोहका कबहुँ हराइ नाही
 पइहीं । कछू लोग तोहरे विरोध मँ बोलिहीं । किन्तु
 हर अइसे मनई क बुरा साबित कीन्ह जाइ जउन
 तोहरे विरोध मँ बोली ।”
 यहोवा कहत ह, “यहोवा क सेवकन क का
 मिलत ह ओनका निआव क विजय मिलत ह इ
 ओनका मोहसे मिलत ह ।”

परमेस्सर अइसा भोजन देत ह
 जेहसे सच्ची तृप्ति मिलत ह
 १ “हे पियासे लोगों, आवा पानी पिआ ।
 अगर तोहरे पचन्क लगे नाही धन ही
 अहइ,
 तउ एकर चिन्ता जिन करा ।
 आवा, खाना ल्या अउर खा ।
 तू पचन्क एकर कीमत देइ क जरूरत नाही अहइ ।
 बिना कउनो कीमत क दूध अउ दाखरस ल्या ।
 २ बियर्थ ही आपन धन अइसी कउनो वस्तु पइ
 काहे बर्बाद करत अहा जउन सच्चा भोजन
 नाही अहइ ?
 अइसी कउनो वस्तु बरे काहे स्मर करत अहा
 जउन फुरइ मँ तू पचन्क तृप्त नाही करती ?
 मोर बात धियान स सुना ।
 तू पचे सच्चा भोजन पउब्या ।
 तू पचे उ भोजन क आनन्द लेब्या जेहसे तोहार
 पचन्क मन तृप्त हो जाइ ।
 ३ जउन कछू मइँ कहत हउँ, धियान स सुना ।
 मोर सुना ताकि तोहार आतिमा जिअब ।
 तू पचे मोरे पास आवा अउर मइँ तोहरे सबन्क साथ
 एक करार करब जउन सदा-सदा क बरे बना
 रही ।
 इ करार वइसी ही होइ जइसी करार दाऊद क संग
 मइँ किहे रहेउँ ।
 मइँ दाऊद क वचन दिहे रहेउँ कि मइँ ओह पइ सदा
 करुणा करब ।
 अउर तू पचे उ वचन पइ बिस्सास कइ सकत ह ।
 ४ मइँ आपन उ सक्ति क दाऊद क साच्छी बनाए
 रहेउँ जउन सबहिँ रास्ट्रन बरे रही ।
 मइँ दाऊद क बहोत देसन क पूरसासक अउर
 ओनकर सेनापति बनाए रहेउँ ।”
 ५ अनेक अग्यात देसन मँ अनेक अनजानी
 जातियन अहइँ ।
 तू ओन सबहिँ जातियन क बोलउब्या,
 जउन जातियन तोहसे अपरिचित अहइँ
 किन्तु उ पचे पराइके तोहरे पास अहइ ।
 अइसा घटी काहेकि तोहार परमेस्सर यहोवा
 अइसा ही चाहत ह ।
 अइसा घटी काहेकि उ इस्राएल क पवित्तर
 तोहका मान देत ह ।
 ६ तउ तू पचे यहोवा क हेरा ।
 कहुँ बहोत देर न होइ जाइ ।
 अब तू पचे ओका गोहराइ ल्या
 जब तलक उ तोहरे पचन्क लगे अहइ ।

७ हे पापियो ! आपन पापपूर्ण जिन्नगी क तजा ।
 तू पचन्क चाही कि तू पचे बुरी बातन सोचब तजि
 द्या ।
 तू पचन्क चाही कि तू पचे यहोवा क लगे लउटि
 आवा ।
 जब तू पचे अइसा करब्या तउ यहोवा तू पचन्क क
 सुख देइ ।
 ओन सबहि क चाही कि उ पचे यहोवा क सरन मँ
 आवई
 काहेकि परमेस्सर हमका छिमा करत ह ।

लोग परमेस्सर क नाही समुझ पइही

५ यहोवा कहत ह, “तोहार पचन्क विचार वइसे
 नाही, जइसे मोर अहई ।
 तोहार पचन्क राहन वइसे नाही जइसी मोर राहन
 अहई ।
 १ जइसे धरती स ऊँच सरग अहई वइसे ही तोहार
 राहन स मोर राहन ऊँच अहई ।
 अउर मोर विचार तोहरे पचन्क विचारन स ऊँच
 अहई ।”
 इ सबइ बातन यहोवा ही कहेस ह ।
 १० अकासे स बर्खा अउर हिम गिरा करत हीं अउर
 उ पचे फुन नाही लउट जातेन जब तलक उ
 पचे धरती क नाही छुइ लेत हीं,
 अउर धरती क गीला नाही कइ देत हीं ।
 फुन धरती पउधन क अंकुरित करत ह अउर
 ओनका बढावत ह अउर उ सबइ पउधन
 किसानन क बरे बीज उपजावत हीं
 अउर लोग ओन बीजन स खाइ बरे रोटियन
 बनावत हीं ।
 ११ अइसे ही मोर मुख मँ स मोर सब्द निकसत
 हीं अउर जब तलक घटनन क घटाइ नाही
 लेतेन,
 उ पचे वापस नाही आवत हीं ।
 मोर सब्द अइसी घटनन क घटावत हीं जेनका मई
 घटवावइ चाहत हउँ ।
 मोर सब्द उ सबइ सबहि बातन पूरी कराइ लेत हीं
 जेनका करवावइ क मई ओनका पठवत हउँ ।
 १२ “जब तू पचन्क आनन्द स भरिके सान्ति अउर
 एकता क साथ मँ उ धरती स छुड़ाइके लइ
 जावा जाइ रहा होइ जेहमँ तू पचे बन्दी
 रह्या,
 तउ तोहरे पचन क समन्वा खुसी मँ पहाइ फट
 पडिही अउर थिरकइ लगिही ।
 पहाड़ियन नाच मँ फूटि पडिही ।

तोहार पचन्क समन्वा जंगल क सबहि वृच्छ
 अइसे हलइ लगिही जइसे तालियन पीट
 रहा होइ ।
 १३ जहाँ कैटेरी झाड़ियन जमा करत हीं हुवाँ
 देवदार क बिसाल वृच्छ जमिही ।
 जहाँ खरपतवार जमा करत रहेन, हुवाँ हिना क
 वृच्छ जमिही ।
 इ सबइ बातन यहोवा क प्रसिद्ध करिही ।
 इ सबइ बातन प्रमाणित करिही कि यहोवा
 सक्तिपूर्ण अहइ, इ प्रमाण कबहुँ नस्ट नाही
 होइ ।”

सबहि जातियन यहोवा क अनुसरण करिही

५६ १ यहोवा इ सबइ बातन कहे रहा, “सब
 लोग क साथ उहइ काम करा जउन
 निआव स पूर होइ । काहेकि मोर उद्धार हाली ही
 तोहरे पचन्क लगे आवइ क अहइ । सारे संसार
 मँ मोर छुटकारा हाली ही परगट होइ ।” २ अइसा
 मनई जउन सबित क दिन क पालन एका बिना
 दूसित कइ भए करत ह अउर उ मनई जउन बुरा
 नाही करी आसोबाद पाइही ।

३ उ गौर यहूदी लोग जउन यहोवा क लोगन
 मँ सामिल होइ पसन्द करत ह । अइसे मनइयन
 क इ नाही कहइ चाही : “यहोवा मोर संग आपन
 ‘वास्विक’ लोगन अलग थलग जइसा बेउहार
 करब्या । उ असल मँ मोका आपन अपना लोगन
 मँ स एक क रूप मँ स्वीकार नाही करब्या !” कउनो
 हिंजडे क इ नाही कहइ चाही : “मई काटे क एक
 झुरान टुका हउँ अउर मई कउनो गदिला क बाप
 नाही बन सकब ।”

४ एन हिंजड़न क अइसी बातन नाही कहइ
 चाही काहेकि यहोवा कहे रहा : “एनमाँ स कछू
 हिंजडे सबित क नेमन क पालन करत हीं अउर
 जउन मई चाहत हउँ, उ पचे वइसा ही करइ चाहत
 हीं । उ पचे सच्चे मन स मोरी वाचा क पालन करत
 हीं । एह बरे मई आपन मंदिर मँ ओनके बरे यादगार
 क एक टु पाथर लगाउब । मोरे नगर मँ ओनके
 नाउँ क याद कीन्ह जाइ । हाँ ! मई ओनका पुत्र-
 पुत्रियन स भी कछू अच्छा देबउँ । ओन हिंजड़न
 क मई एक नाउँ देबउँ जउन सदा-सदा बना रही ।
 मोर लोगन स उ पचे काटिके अलग नाही कीन्ह
 जइही ।”

५ कछू अइसे लोग जउन यहूदी नाही अहई,
 अपने आप क यहोवा स जोरिही । उ पचे अइसा
 एह बरे करिही कि यहोवा क सेवा अउर यहोवा क
 नाउँ क पिरम कइ पावई । यहोवा क सेवक बनइ बरे

उ पचे खुद क ओहसे जोड़ लेइही। उ पचे सबित्त क दिन क उपासना क एक बिसेस दिन क रूप में माना करिहीं अउर उ पचे मोर करार क गंभीरता स पालन करिहीं।^७ यहोवा कहत ह, “मई ओन लोगन क आपन पवित्र पर्वत पइ लिआउब। आपन पराथना भवन में मई ओनका आनन्द स भरि देब। उ पचे जउन भेंट अउर बलियन मोका अपित्त करिहीं, मई ओनसे खुस होब। काहेकि मोर मंदिर सबहिं रास्टरन क लोगन क पराथना क घर कहावा जाइ।”^८ इ उह अहइ जउन मोर सुआमी करत ह,

“मई उहइ हउँ जउन देस निस्कासित कीन्ह भवा इस्राएलियन क जेका सताया गवा अहइ एकट्टा किहेउँ ओनकर संग ओन सबहिं बिदेसियन क जोड़इ जउन बिदेसियन ओकर संग एकट्टा भए अहा।”

^९ हे वन क पसुओ।

तू पचे सबहिं खइया पइ आवा।

^{१०} इ सबइ धरम क रखवारे (नबी) सबहिं नेत्रहीन अहइँ।

ओनका पता नाही कि उ पचे का करत अहइँ।

उ पचे उ गूंगे कूकुर क नाई अहइँ जउन नाही जानत कि कइसे भौवां जात ह?

उ पचे धरती पइ लउटत हीं अउर सोइ जात हीं।

हाय! ओनका नींद पियारी अहइ।

^{११} उ सबइ लोग अइसे अहइँ जइसे भुखान कूकुर होइँ।

जेनका कबहुँ भी तृप्ति नाही होत।

उ पचे अइसे चरवाहन अहइँ जेनका पता तलक नाही कि उ पचे का करत अहइँ?

उ पचे ओकर आपन ओन भेड़िन जइसे अहइँ

जउन आपन रास्ता स भटकके कहुँ खोइ गइन।

उ पचे लालची अहइँ ओनका तउ बस आपन पेट भरब भावत ह।

^{१२} उ पचे कहा करत हीं,

“आवा तनिक दाखरस ल्या

अउर ओका पिआ यव सुरा भरपेट पिआ।

हम भियान भी इहइ करब,

भियान तनिक अउर जियादा पिअब।”

इस्राएल परमेस्सर क नाही मानत ह

^१ अच्छे लोग चला गएन

५७ किन्तु एक भी अइसा नाही अहइ जउन एह पइ धियान दिहस।

लोग समुझत नाही अहइँ कि का कछू घटत अहइ।

भले लोग बटोरा गएन।

लोग समुझतेन नाही कि बिपत्तियन आवत अहइ।

ओनका पता तलक नाही अहइ कि भले लोग रच्छा बरे बटोरा गएन।

^२ किन्तु सान्ति आइ अउर लोग अराम स आपन बिछुउनन में सोइहीं

अउर लोग उहइ तरह जिइही जइसे परमेस्सर ओनसे चाहत ह।

^३ “हे चुड़ैलियन क गदेलनों, एँह कइती आवा।

तोहार पचन्क पिता बिभिचार क पापी अहइ।

तोहार पचन्क महतारी आपन देह यौन बइपार में बेचा करत ह। एहर आवा।

^४ हे विद्रोहियो अउर झूठी सन्तानों,

तू पचे मोर हँसी उडावत अहा।

मोह पइ आपन मुँह चिढावत अहा।

तू पचे मोह पइ जिभिया निकारत अहा।

^५ तू पचे सबहिं हरिअर बूच्छन क खाते

लबार देवतन क कारण कामातुर होत अहा।

हर नदी क तीर पइ तू पचे बाल बंध करत अहा

अउर चट्टानी जगहियन पइ ओनकर बलि देत अहा।

^६ नदी क गोल बट्टियन क तू पूजइ चाहत अहा।

तू ओन पइ दाखरस ओनकर पूजा बरे चढावत अहा।

तू ओन पइ बलियन क चढावा करत अहा किन्तु तू ओनके बदले बस पाथर ही पावत अहा।

का तू इ सोचत अहा कि मई एहसे खुस होत हउँ? नाही।

इ मोका खुस नाही करत अहइ।

तू हर कउनो पहाड़ी अउर हर ऊँच पर्वत पइ आपन बिछुउना बनावत अहा।

^७ तू ओन ऊँची जगहन पइ जावा करत अहा

अउर तू हुवाँ बलियन चढावत अहा।

^८ अउर फुन तू ओन बिछुउनन क बीच जात अहा

अउर मोरे विरुद्ध तू पाप करत अहा।

ओन देवन स तू पिरम करत अहा।

उ पचे देवता तोहका भावत हीं।

तू मोरे संग रह्या किन्तु ओनके संग होइ क बरे तू मोका तजि दिहा।

ओन सबहिं बातन पइ तू परदा डाइ दिहा जउन तोहका मोर याद दिआवत ह।

तू ओनके दुआरन क पाछे अउर दुआर क चउखटन क पाछे छुपाया

अउर तू ओन लबार देवतन क लगे ओनके संग वाचा करइ जात अहा।

१ तू आपन तेल अउ फुलेल लगावत अहा
ताकि तू आपन लबार देवता मोलक क समन्वा
नीक देखाअ।

तू आपन दूत दूर-दूर देसन क पठया ह
अउर एहसे तू ही नरक मँ, मउत क देस मँ गिरब्या।
इस्राएल क परमेस्सर पइ बिस्सास करइ
चाही मूरति यन पइ नाही

१० एन बातन क करइ मँ तू परिसरम किहा ह।
फुन भी तू कबहुँ नाही थक्या।

तोहका नई सक्ति मिलत रही
काहेकि एन बातन मँ तू रस लिहा।

११ तू मोका कबहुँ नाही याद किहा
हिआँ तलक कि तू मोह पइ धियान तलक नाही
दिहा।

तउ तू केकरे बारे मँ चिन्तित रहा करत रह्या ?
तू केहसे भयभीत रहत रह्या ?

तू झूठ काहे कहत रह्या ?

लखा मइँ बहोत दिनन स चुप रहत आवा हउँ
अउर फुन तू मोर आदर नाही किहा।

१२ मोका तोहार 'अच्छे कर्मन' अउर तोहरे ओन
उपलब्धियन क तारीफ करत रहइ क लाइके
होइ चाही।

किन्तु उ सबइ बातन जउन तू किहेस ह बेकार
अहइ अउर तोहका कउनो लाभ नाही देत ह।

१३ जब तोहका सहारा चाटी तउ

तू ओन लबार देवन क जेनका तू आपन चारिहुँ
कईती जुटाया ह,

काहे नाही गोहरावत अहा।

किन्तु मइँ तोहका बतावत हउँ कि ओन सब क
आँधी उड़ाइ देइ।

हवा क एक झोका ओनका तोहसे छोर लइ जाइ।

किन्तु उ मनई जउन मोरे सहारे अहइ,
धरती क पाई।

अइसा ही मनई मोर पवित्रर पर्वते क पाई।”

यहोवा आपन भकतन क रच्छा करी

१४ रास्ता साफ करा। रास्ता साफ करा।

मोरे लोगन बरे राह साफ करा।

१५ उ जउन ऊँच अहइ अउर जेहका ऊपर उठावा
गवा ह,

उ जउन अमर अहइ,

उ जेकर नाउँ पवित्रर अहइ,

उ इ कहत ह: “मइँ एक ऊँच अउर पवित्रर जगह
पइ रहा करत हउँ

किन्तु मइँ ओन लोगन क बीच रहा करत हउँ जउन
दुःखी अउर विनमर अहइ।”

अइसे ओन लोगन क मइँ नई जिन्नगी देब जउन
मने स विनमर अहइ।

अइसे ओन लोगन का मइँ नई जिन्नगी देब जउन
हिरदय स दुःखी अहइ।

१६ मइँ सदा-सदा ही मुकद्दमा लइत रहब।

सदा-सदा ही मइँ तउ किरोधित नाही रहब।

जदि मइँ कोहान ही रहउँ

तउ मनई क आतिमा यानी उ जिन्नगी जेका मइँ
ओनका दिहेउँ ह, मोरे समन्वा ही मरि जाई।

१७ उ पचे लालच स हिंसा स भरा स्वारथ साथे
रहेन

अउर मोका किरोधित कइ दिहे रहेन।

मइँ इस्राएल क दण्ड दिहेउँ।

मइँ ओका निकार दिहेउँ

काहेकि मइँ ओह पइ कोहान रहेउँ अउर इस्राएल
मोका तजि दिहस।

जहाँ कहुँ इस्राएल चाहत रहा, चला गवा।

१८ मइँ इस्राएल क राहन लखि लिहे रहेउँ।

किन्तु मइँ ओका छिमा करब।

मइँ ओका चैन देब अउर अइसे बचन बोलब जेहसे
ओका आराम मिलइ अउर मइँ ओका राह
देखाउब।

फुन ओका अउर ओकरे लोगन क दुःख नाही छुइ
पाई।

१९ ओन लोगनक मइँ एक नवा सव्द सान्ति
सिखाउब।

अउर मइँ ओन सबहि लोगन क आसीर्वाद देब
जउन सान्ति क साथ मोरे पास या दूर
अहइ।”

यहोवा इ सब कहेस,

“मइँ ओन सबहि लोगन क छिमा करब।”

२० किन्तु दुट्ट लोग किरोधित सागरे क जइसे
होत ही।

उ पचे चुप या सान्त नाही रहि सकतेन।

उ पचे किरोधित रहत ही

अउर समुद्र क तरह कीचा उछारत रहत ही।

२१ मोर परमेस्सर क कहब अहइ:

“दुट्ट लोगन बरे कहुँ कउनो सान्ति नाही अहइ।”

लोगन स कहा कि उ पचे
परमेस्सर क अनुसरण करइ

५८ १ जोर स नरिआअ, जेतना तू गोहराइ
सका, आपन क जिन रोका।

जोर स गोहरावा जइसे नरसिंहा बजावत ह।

लोगन क ओनके बुरे कामन क बारे मँ जउन उ पचे
किहेन ह, बतावा।

याकूब क घराने क ओनके पापन क बारे मैं बतावा ।
 २ हरेक अइसा देखाइ देत ह जइसा उ बहोत धर्मी
 अहइ : हर दिना लोग मोर मदद तलास करत
 हीं ।

उ पचे मोर राहन क समुझइ चाहत हीं ।
 उ पचे ठीक वइसा ही देखाइ देत ह जइसे उ सबइ
 लोग कउनो अइसी जाति क होई
 जउन उहइ करत ह जउन उचित होत ह
 अउर जउन अपने परमेस्सर क कानूनन क
 उल्लंघन नाहीं किहेस ह ।
 उ पचे मोहसे चाहत हीं कि ओनकर निआव
 निस्पच्छ होइ अउर परमेस्सर ओनके संग
 रहइ ।

३ अब उ सबइ लोग कहत हीं, “तोहरे बरे आदर
 देखावइ क बरे हम पचे भोजन करब बंद कइ देइत
 ह । तू हमार कइती लखत्या काहे नाहीं ? तोहरे बरे
 आदर परगट करइ क बरे हम आपन देह क छति
 पहोचावत अही । तू हमरी कइती धियान काहे
 नाहीं देत्या ?”

किन्तु यहोवा कहत ह, “उपवास क ओन दिनन
 मैं उपवास रखत भए तू पचन्क आनन्द आवत
 ह किन्तु ओनहीं दिनन तू पचे आपन दासन क
 खून चूसत अहा । ४ तू पचे भोजन बरे भूखा नाहीं
 अहा । तू पचन्क आपुस मैं झगड़इ बरे अउर आपुस
 मैं लड़इ बरे उपवास रखत अहइ । तू पचे आपन
 अत्याचार क हाथन स लोगन क पीटइ बरे भूखा
 रहत ह । जदि तू पचे चाहत अहा कि सरग मैं
 तोहार पचन्क परार्थना क सुनइ जाइ तउ उपवास
 रखइ क इ तरीका नाहीं अहइ । जइसे तू पचे आजु
 कल रखत अहा । ५ तू पचे का इ सोचत अहा कि
 भोजन नाहीं करइ क ओन बिसेस दिनन मैं बस
 मई लोगन क अपने तने क दुःख देत भए लखइ
 चाहत हउं ? का तू पचे अइसा सोचत अहा कि
 मई लोगन क दुःखी लखइ चाहत हउं ? का तू
 पचे इ सीचत अहा कि मई लोगन क मुरझाए
 भए पउधन क तरह सिर अउर सोक ओढ़ना पहिरे
 लखइ चाहत हउं ? का तू इ सोचत अहा कि मई
 लोगन क आपन दुःख परगट करइ क बरे राखी
 मैं बडठे लखइ चाहत हउं ? इहइ तउ उ सब कछू
 अहइ जउन तू खइया क न खाइ क दिनन मैं करत
 अहा । का तू अइसा सोचत अहा कि यहोवा तोहसे
 बस इहइ चाहत ह ?

६ “मई तोहका बताउब कि मोका कइसा बिसेस
 दिन चाही-एक अइसा दिन जब लोगन क अजाद
 कीन्ह जाइ । मोका एक अइसा दिन चाही जब तू
 लोगन क बोझ क ओनसे दूर कइ द्या । मई एक

अइसा दिन चाहत हउं जब तू दुःखी लोगन क
 अजाद कइ द्या । मोका एक दिन अइसा चाही जब
 तू ओनके काँधन स भार उतारि द्या । ७ मई चाहत
 हउं कि तू भुखान लोगन क संग आपन खाइके
 चिजियन बाँटा । मई चाहत हउं कि अइसे गरीब
 लोगन क हेरा जेनके लगे घर नाहीं अहइ अउर
 मोर इच्छा अहइ कि तू ओनका आपन घरन मैं लइ
 आवा । तू जब कउनो अइसे मनई क लखा, जेनके
 लगे ओढ़ना न होइ तउ ओका आपन ओढ़ना दइ
 डावा । ओन लोगन क मदद स मुँह जिन मोड़ा,
 जउन तोहार आपन होई ।”

८ जदि तू एन बातन क करब्या तउ तोहार
 प्रकास प्रभात क प्रकास क समान चमकइ
 लागी । तोहार जखम भर जइहीं । तोहार “नेकी”
 (परमेस्सर) तोहरे आगे-आगे चलइ लागी अउर
 यहोवा क महिमा तोहरे पाछे-पाछे चली आइ ।
 ९ तू तबइ यहोवा क जब पुकरब्या, तउ यहोवा
 तोहका जवाब देइ । जब तू यहोवा क गोहरउब्या
 तउ उ कही, “मई हिआँ हउं ।”

तोहका लोगनक दमन करब अउर लोगन क
 दुःख देब तजि देइ चाही । तोहका लोगन स कउनो
 बातन बरे कड़ुआ सब्द बोलब अउर ओन पइ
 लाँछन लगाउब तजि देइ चाही । १० तोहका भूखन
 क भूख बरे दुःख क अनुभव करत भए ओनका
 भोजन देइ चाही । दुःखी लोगन क सहायता करत
 भए तोहका ओनकर जरूरत क पूरा करइ चाही ।
 जब तू अइसा करब्या तउ अँधियारा मैं तोहार
 रोसनी चमक उठी अउर तोहका कउनो दुःख नाहीं
 रहि जाइ । तू अइसे चमक उठब्या जइसे दुपहर क
 समय धूप चमकत ह ।

११ यहोवा सदा तोहार अगुवाई करी । रेगिस्तान
 मैं भी उ तोहरे मने क पियास बुझाई । यहोवा
 तोहार हाड़न क मजबूत बनाई । तू एक अइसे बाग
 क समान होब्या जेहमाँ पानी क बहुतायत अहइ ।
 तू एक अइसे झरना क नाई होब्या जेहमाँ सदा
 पानी रहत ह ।

१२ बहोत बरिसन पहिले तोहार नगर उजाड़
 दीन्ह ग रहेन । एन नगरन क तू नवा सिरे स
 बसउब्या । एन नगरन क निर्माण तू एकर पुरान
 नेबन पइ तू करब्या । “तू टूटे भए परकोट क
 बनावइवाले कहवउब्या अउर तू मकानन अउर
 रास्टरन क बहाल करइवाले कहवउब्या ।”

१३ अइसा उ समय होइ जब तू सवित क बारे
 मैं परमेस्सर क नेमन क तोड़इ छोड़ देब्या, जब
 तू जात्रा करइ अउर अइसा करइ क जइसा तू
 चाहत ह आराम क दिन मैं छोड़ देब्या । सवित क

दिन क तोहका खुसी क साथ यहोवा क आदर करइ चाही, तोहका जात्रा नाही करइ चाही, तोहका उ काम नाही करइ चाही जेका तू आपन खुसी बरे करत ह, या तोहका दूसर लोगन क आपन बरे काम करइ क आदेस नाही देइ चाही।^{१४} तब तू यहोवा मँ खुसी पउव्या, अउर मई यहोवा धरती क ऊँच-ऊँच ठउरन पइ, तोहका लइ जाब। मई तोहार पेट भरव। मई तोहका अइसी ओन वस्तुअन क देब जउन तोहार बाप याकूब क लगे हुआ करत रहिन। इ सबइ बातन यहोवा बताए रहा।

दुटल लोगन क आपन जिन्नगी बदलइ चाही

५९ ^१लखा, तोहार रच्छा बरे यहोवा क सक्ति काफी अहइ। जब तू मदद बरे ओका गोहरावत ह तउ उ तोहार सुन सकत ह।^२ किन्तु तोहार पचन्क पाप तू पचन्क परमेस्सर स अलग करत हीं अउर इहइ बरे उ तोहरे पचन्क तरफ स कान बन्द कइ लेत ह।^३ तोहार पचन्क हाथ गन्दा अहइ, उ सबइ खून स सने भए अहइ। तोहार पचन्क अँगुरियन अपराधन स भरी अहइ। आपन मुँहे स तू पचे झूठ बोलत अहा। तोहार पचन्क जिभियन बुरी बातन करत हीं।^४ दूसर मनइ क बारे मँ कउनो मनई फुरइ नाही बोलत। लोग अदालत मँ एक दूसर क खिलाफ मुकदमा करत हीं। आपन मुकदमा जीतइ बरे उ पचे झूठे तर्कन पइ आसरा करत हीं। उ पचे एक दूसर क बारे मँ परस्पर झूठ बोलत हीं। उ पचे कस्ट क गर्भ मँ धारण करत हीं अउर बुराइयन क जनम देत हीं।^५ उ पचे सरप क बिख भरे अण्डन क समान बुराई क सेवत हीं। अगर ओनमाँ स तू एक अण्डा भी खाइ ल्या तउ तोहार मउत होइ जाइ अउर अगर तू ओनमाँ स एक अण्डा फोड़ घा तउ एक जहरीला नाग बाहेर निकरि पड़इ।

लोग झूठ बोलत हीं। इ झूठ मकड़ी क जालन जइसी कपड़े नाही बन सकतेन।^६ ओन जालन स तू आपन क ढाँपि नाही सकतेन।

कछू लोग बदी करत हीं अउर आपन हाथन स दूसरन क नोस्कान पहाँचावत हीं।^७ अइसी लोग आपन गोड़न क प्रयोग बदी क लगे पहाँचइ बरे करत हीं। इ सबइ लोग निर्दोख मनइयन क मारि डावइ क जल्दी मँ रहत हीं। उ पचे बुरे विचारन मँ पड़े रहत हीं। उ पचे जहाँ जात हीं बिनास अउ बिध्वंस फइलावत हीं।^८ अइसे लोग सान्ति क मारग नाही जानतेन। ओनकर जिन्नगी मँ नेकी तउ होत ही नाही। ओनकर रास्तन ईमानदारी क नाही होतेन। कउनो भी मनई जउन ओनके

जइसा जिन्नगी जिअत ह, आपन जिन्नगी मँ कबहुँ सान्ति नाही पाई।

इस्राएल क पापन स बिपत्ति क आउब

^१ एह बरे परमेस्सर क निआव अउर मुक्ति हम स दूर अहइ।

हम प्रकास क बाट जोहत अही।

पर बस केवल अन्धकार फइला अहइ।

हमका चमकत प्रकास क आसा अहइ।

किन्तु हम अँधियारा मँ चलत अही।

^२ हम अइसे लोग अही जेनके लगे आँखिन नाही अहइ।

नेत्रहीन लोगन क तरह हम देवारन क टटोरित चलत अही।

हम ठोकर खात अही अउर गिर जात अही जइसे इ रात होइ।

दिन क प्रकास मँ भी

हम मुर्दन क भाँति गिर पड़ित ह।

^३ हम सब बहोत दुःखी अही।

हम सब अइसे कराहत अही जइसे कउनो रीछ अउर कउनो कबूतर कराहत ह।

हम अइसे उ समय क बाट जोहत अही जब लोग निस्पच्छ होइहीं

किन्तु अबहिँ तलक तउ कतहुँ भी नेकी नाही अहइ।

हम उद्धार क बाट जोहत अही

किन्तु उद्धार बहोत-बहोत दूर अहइ।

^४ काहेकि हम आपन परमेस्सर क विरोध मँ बहोत पाप किहे अही।

हमार पाप बतावत हीं कि हम बहोत बुरे अही।

हमका एकर पता अहइ

कि हम एन बुरे करमन क करइ क अपराधी अही।

^५ हम पाप किहे रहे

अउर हम आपन यहोवा स मुँह मोड़ लिहे रहे।

यहोवा स हम विमुख भए अउर ओका तजि दीन्ह।

हम बुरे करमन क जोजना बनाए रहे।

हम अइसी ओन बातन क जोजना बनाए रहे

जउन हमरे परमेस्सर क विरोध मँ रही।

हम पचे उ सबइ बातन सोचे रहे

अउर दूसरन क सतावइ क जोजना बनाए रहे।

^६ हमसे नेकी क पाछे ढकेला गवा।

निस्पच्छता दूर ही खड़ी रही।

गलियन मँ सच्चाई गिर पड़ी रही

माना नगर मँ अच्छाई क प्रवेस नाही भवा।

^७ सच्चाई चली गइ

अउर उ सबइ लोग लूटे गएन जउन भला करइ
चाहत रहेन।

यहोवा हेरे रहा किन्तु कउनो भी,
कहीं भी अच्छाई न मिल पाई।

१६ यहोवा हेर लखेस किन्तु ओका कउनो मनई
नाहीं मिला जउन लोगन क संग खड़ा होइ
अउर ओनका सहारा देइ।

एह बरे खुद आपन सक्ति क अउर खुद आपन नेकी
क प्रयोग किहस

अउर यहोवा लोगन क बचाइ लिहस।

१७ यहोवा नेकी क कवच,
उद्धार क सिरस्तरण (टोप),
दण्ड क वस्त्र,

अउर आपन मजबूत पिरेम क चोगा पहिरेस।

१८ यहोवा आपन दुस्मन पइ कोहान अहइ तउ
यहोवा ओनका अइसा दण्ड देइ जइसा
ओनका मिलइ चाही।

यहोवा आपन दुस्मनन स कोहान अहइ
तउ यहोवा सबहि दूर-दूर क देसन क लोगन क
सजा देइ।

यहोवा ओनका वइसा दण्ड देइ जइसा ओनका
मिलइ चाही।

१९ फुन पच्छिम क लोग यहोवा क नाम क आदर
देइहीं

अउर पूरब क लोग यहोवा क महिमा स भय
विम्हित होइ जइहीं।

यहोवा अइसे ही हाली आइ जाइ जइसे तेज नदी
बहत भइ आइ जात ह।

इ उ तेज हवा क रफ्तार सा होइ जेका यहोवा उ
नदी क तूफान बहावइ बरे पठवत ह।

२० तब सिय्योन पर्वत पइ एक छुड़ावइवाला आइ।
उ याकूब क ओन लोगन क लग आइ जउन पाप
तउ किहे

रहेन, किन्तु जउन परमेस्सर कइती लउटि आए
रहेन।

यहोवा इ सबइ बातन क कहेस।

२१ यहोवा कहत ह, “मई ओन लोगन क संग
एक वाचा करब। मई बचन देत हउँ मोर आतिमा
अउर मोरे सब्द जेनका मई तोहरे मुखे मँ रखत हउँ
तोहका कबहुँ नाहीं छोड़िहीं। उ पचे तोर संतानन
अउर तोहार बच्चन क बच्चन क संग रहिहीं। उ
पचे आजु तोहरे साथ रहिहीं अउर सदा-सदा तोहरे
साथ रहिहीं।”

परमेस्सर आवति अहइ

६० १ “हे यरूसलेम, हे मोर प्रकास, तू उठि
जागा।

तोहार प्रकास (परमेस्सर) आवत रहा बाटइ।

यहोवा क मिहिमा तोहरे ऊपर चमकी।

२ आजु अधियारा सारा जहान अउर ओकरे लोगन
क ढक रखे अहइ।

मुला यहोवा क तेज परगट होइ

अउर तोहरे ऊपर चमकी।

ओकर तेज तोहरे ऊपर देखाई देइ।

३ उ समय सबहि देस तोहरे प्रकास क लगे
अइहीं।

राजा तोहरे भव्य तेज क लगे अइहीं।

४ आपन चारिहुँ कइती लखा।

लखा, तोहरे चारिहुँ कइती लोग एकट्ठा होत
अहइ अउर तोहरी सरण मँ आवत अहइ।

इ सबइ सबहि लोग तोहार पूत अहइ जउन दूर
बहोत दूर स आवत अहइ

अउर ओनके संग तोहार बिटियन आवत अहइ।

५ “अइसा भविस्स मँ होइ अउर अइसे समय मँ
जब तू आपन लोगन क लखब्या

तब तोहार मुँह खुसी स चमक उठिहीं।

पहिले तू उत्तेजित होब्या किन्तु फुन आनन्दित
होब्या।

समुद्र पार देसन क सारी

धन दौलत तोहरे समन्वा धरी होई।

तोहरे लगे देसन क सम्पत्तियन अइहीं।

६ मिद्यान अउर एपा देसन क ऊँटत क झुण्ड
तोहार धरती क ढाँपि लेइहीं।

सिबा क देस स ऊँटन क लम्बी कतारन तोहरे
हिआँ अइहीं।

उ पचे सोना अउर सुगन्ध लइहीं।

लोग यहोवा क खुसी क गीत गइहीं।

७ केदार क भेड़िन एकट्ठी कीन्ह जइहीं

अउर तोहका दइ दीन्ह जइहीं।

नबायोत क मेढ़न तोहरे बरे लिआवा जइहीं।

उ पचे मोर वेदी पइ स्वीकार करइ क लायक
बलियन बनिहीं

अउर मई आपन अद्भुत मन्दिर

अउर जियादा सुन्नर बनाउवउँ।

८ एन लोगन क लखा!

इ सबइ तोहरे लगे जल्दी मँ आवत अहइ जइसे
मेघ अकास क जल्दी पार करत हीं।

इ सबइ अइसे देखात अहइ जइसे आपन घोंसलन
कइती उड़त भए कपोत होईं।

१ सुदूर देस मोरी प्रतीच्छा मैं अहउँ।
 तर्सीस क बड़के बड़के जलयान जाइ क तत्पर
 अहउँ।
 इ सबइ जलयान तोहरे संतानन क दूर-दूर देसन स
 लिआवइ क तत्पर अहउँ।
 अउर एन जहाजन पइ ओनकर सुवर्ण ओनके संग
 आई अउर ओनकर चाँदी भी इ सबइ जहाज
 लिअइहीं।
 अइसा एह बरे होइ कि तोहार परमेस्सर यहोवा क
 आदर होइ।
 अइसा एह बरे होइ कि इस्राएल क पवित्र
 अद्भुत काम करत ह।
 १० दूसर देसन क संतानन तोहार देवारन फुन
 उठइहीं
 अउर ओनकर सासक तोहार सेवा करिहीं।
 “जब मई तोहसे कोहान रहेउँ, मई तोहका दुःख
 दिहेउँ
 किन्तु अब मोर इच्छा अहइ कि तोह पइ कृपालु
 बनउँ।
 एह बरे मई तोहका चैन देबउँ।
 ११ तोहार दुआर हमेसा ही खुला रहिहीं।
 उ सबइ दिन अथवा राति मैं कबहुँ बन्द नाहीं
 होइहीं।
 देस अउर राजा तोहरे पास धन लिअइहीं।
 १२ कछू जाति अउर कछू राज्ज तोहार सेवा नाहीं
 करिहीं
 किन्तु उ सबइ जातियन अउर राज्ज नस्ट होइ
 जइहीं।
 १३ लबानोन क सबहिँ महा वस्तुअन तोहका अर्पित
 कीन्ह जइहीं।
 लोग तोहरे लगे देवदार,
 तालीसपत्र अउर सरन क बृच्छ लिअइहीं।
 इ ठउर मोरे सिंहासन क समन्वा एक चौकी सा होइ
 अउर मई एका बहोत मान देबउँ।
 १४ उ सबइ ही लोग जउन पहिले तोहका दुःख
 दिया करत रहेन,
 तोहरे समन्वा निहुरिहीं।
 उ सबइ ही लोग जउन तोहसे घिना करत रहेन,
 तोहरे चरणन मैं निहुर जइहीं।
 उ सबइ ही लोग तोहका कहिहीं,
 ‘यहोवा क नगर,’ ‘सिय्योन नगर इस्राएल क
 पवित्र क बाटइ।’
 १५ “फुन तोहका अकेल्ला नाहीं छोड़ा जाइ।
 फुन कबहुँ तोहसे घिना नाहीं होइ।
 तू फुन स कबहुँ भी उजड़िबिउ नाहीं।

तू महान रहबिउ, तू हमेसा अउर सर्वदा आनन्दित
 रहबिउ।
 १६ तोहार जरूरत क चिजियन तोहका जातियन
 प्रदान करिहीं।
 इ एतना ही सहल होइ जइसे दूध मुँह बच्चा क
 महतारी क दूध मिलत ह।
 वइसे ही तू सासकन क सम्पत्तियन ‘पिउबीउ।’
 तब तोहका पता चली कि इ मई यहोवा हउँ जउन
 तोहार रच्छा करत ह।
 तोहका पता चल जाइ कि उ याकूब क महामहिम
 तोहका बचावत ह।
 १७ “फिलहाल तोहरे पास ताँबा अहइ
 परन्तु एकरी नगह मई तोहका सोना देब।
 अबहिँ तउ तोहरे लगे लोहा अहइ,
 पर ओकर जगह तोहका चाँदी देब।
 तोहार लकड़ी क जगह मई तोहका ताँबा देबउँ।
 तोहार पाथरन क जगह तोहका लोहा देबउँ
 अउर तोहका दण्ड देइ क जगह मई तोहका सुख
 चैन देबउँ।
 जउन लोग अबहिँ तोहका दुःख देत हीं उ सबइ
 ही लोग तोहरे बरे अइसा काम करिहीं जउन
 तोहका सुख देइहीं।
 १८ तोहरे देस मैं हिंसा अउर तोहरी सबइ सीमा
 मैं तवाही अउर बरबादी कबहुँ नाहीं सुनाई
 पड़ी।
 तोहरे देस मैं लोग फुन कबहुँ तोहार वस्तुअन
 नाहीं चोरइहीं।
 तू आपन परकोटन क नाउँ ‘उद्दार’ रखब्या
 अउर तू आपन दुआरन क नाउँ ‘स्तुति’ रखब्या।
 १९ “दिन क समय मैं तोहरे बरे सूरज क प्रकास
 नाहीं होइ
 अउर रात क समय मैं चाँद क प्रकास तोहार
 रोसनी नाहीं होइ।
 काहेकि यहोवा ही सदैव तोहरे बरे प्रकास होइ।
 तोहार परमेस्सर तोहार महिमा बनी।
 २० तोहार ‘सूरज’ फुन कबहुँ भी नाहीं छुपी।
 तोहार ‘चाँद’ कबहुँ भी करिआ नाहीं पड़ी।
 काहेकि यहोवा क प्रकास सदा सर्वदा तोहरे बरे
 होइ
 अउर तोहार दुःख क समय खतम होइ जाइ।
 २१ “तोहार सबहिँ लोग उत्तम बनिहीं।
 ओनका सदा बरे धरती मिलि जाइ।
 मई ओन लोगन क रचा ह।
 उ सबइ अद्भुत पउधन
 मोर आपन ही हाथन स लगाए भए अहउँ।
 २२ छोटा स छोटा भी विसाल घराना बन जाइ।

छोटा स छोटा भी एक सक्तीसाली रास्टर बन जाइ।

जब उचित समय आइ,
मई यहोवा हाली ही आइ जाब
अउर मई इ सबइ बातन घटित कइ देबउँ।”

यहोवा क मुक्ति संदेश

६१ यहोवा क सेवक कहत ह, “मोर सुआमी यहोवा मोहमाँ आपन आतिमा धरेस ह। उ मोका एक खास करइ बरे अभिसेक किहेस ह। उ मोका विनमूर लोगन क अच्छी खबर देइ बरे, टुटे हिरदइवालन क उत्साह बढ़ावइ बरे, बन्दी क आजाद करइ बरे, अउर कैदी क मुक्त करइ बरे पटाएस ह।^१ उ समय क घोसणा करब जब यहोवा आपन करुणा परगट करी ; उ समय क घोसणा करब जब हमार परमेस्सर दुस्टन क दण्ड देइ ; दुःखी लोगन क पुचकारब; ^२सिथ्योन क दुःखी लोगन क आदर देब (अबहिं तउ ओनके लगे बस राखी अहइ); सिथ्योन क लोगन क खुसी क स्नेह प्रदान करब; (अबहिं तउ ओनके पास बस दुःख अहइ) सिथ्योन क लोगन क परमेस्सर क स्तुति क गीत प्रदान करब (अबहिं तउ ओनके लगे बस ओनके दर्द अहइ); सिथ्योन क लोगन क उत्सव क ओढ़ना देब (अबहिं तउ ओनके लगे बस ओनकर दुःख ही अहइ।) ओन लोगन क ‘उत्तिमता क वृच्छ’ क नाउँ देब; ओन लोगन क यहोवा क अद्भुत वृच्छ क संज्ञा देब।’

^३ “उ समय, ओन पुरान नगरन क जेनका उजाड़ दीन्ह गवा रहा, फुन स बसावा जाइ। ओन नगरन क वइसे ही नवा बनाइ दीन्ह जाइ जइसे उ पचे सुरु मँ रहेन। उ सबइ नगर जेनका बरिसन पहिले हटाइ दीन्ह गवा रहा, नवे जइसे बनाइ दीन्ह जइहीं।

^४ “फुन तोहार पचन्क दुस्मन तोहरे पचन्क लगे अइहीं अउर तोहार पचन्क भेड़िन चरावा करहीं। तोहार पचन्क सतरुअन क सन्तानन तोहरे पचन्क खेतन अउर तोहरे पचन्क बगियन मँ काम किया करहीं।^५ तू पचे ‘यहोवा क याजक’ कहवउब्या। तू पचे ‘हमरे परमेस्सर क सहायक’ कहवउब्या। धरती क सबहिं देसन स आई भइ सम्पत्ति क तू प्राप्त करब्या अउर तू पचन्क इ बात क गर्व होइ कि उ तोहार सम्पत्ति अहइ।

^६ “बीते समय मँ लोग तू पचन्क लज्जित करत रहेन अउर तोहरे पचन्क बारे मँ बुरी बुरी बातन बनावा करत रहेन। तू पचे एतना लजान रह्या जेतना अउर कउनो दूसर मनई नाहीं रहा। एह बरे

तू पचे आपन धरती मँ दूसर लोगन स दुगुना हींसा प्राप्त होइ। तू पचे अइसी खुसी पउब्या जेकर कबहुँ अंत नाहीं होइ।^७ अइसा काहे घटित होइ ? काहेकि मई यहोवा हउँ अउर मोका नेकी स पिरेम अहइ। मोका चोरी स अउर हर उ बात स, जउन अनुचित अहइ, घिना अहइ। एह बरे लोगन क, जउन ओनका मिलइ चाही, उ भुगतान मई देबउँ। आपन लोगन क संग सदा सदा बरे मई इ वाचा करत हउँ कि ? सबहिं देसन क हर कउनो मनई मोर लोगन क जान जाइ। मोर जाति क बंसजन क हर कउनो जान पाइ। हर कउनो मनई जउन ओनका लखी, जान जाइ कि यहोवा ओनका आसीर्वाद देत अहइ।”

यहोवा क सेवक उद्धार अउर
उत्तिमता लावत अहइ

^{१०} “यहोवा मोका बहोत खुस करत ह। मोर संपूर्ण व्यवितत्व परमेस्सर मँ टिका अहइ अउर खुसी मँ मगन अहइ।

यहोवा उद्धार क ओढ़ना स मोका ढाँपि लिहेस। उ पचे अइसे ही भव्य अहइ जइसे भव्य वस्त्र कउनो मनसेधू आपन सादी क मौके पइ पहिरत ह।

यहोवा मोका नेकी क चोगा स ढकि लिहेस ह। इ चोगा वइसा ही सुन्नर अहइ जइसा सुन्नर कउनो नारी क विवाहे क वस्त्र होत ह।

^{११} धरती पउधन उगावत ह।

लोग बगियन मँ बिआ डावत हीं अउर उ बगिया ओन बिअन क उगावत ह।

वइसे ही यहोवा नेकी क उगाई।

इ तरह मोर सुआमी सबहिं जातियन क बीच स्तुति क बढ़ाई।”

नवा यरूसलेम: नेकी का एक नगर

६२ ^१ “मोका सिथ्योन स पिरेम अहइ। एह बरे मई ओकरे समर्थन मँ बोलत रहब।

मोका यरूसलेम स पिरेम अहइ,

एह बरे मई चुप न होबउँ।

मई उ समय तलक बोलत रहब जब तलक नेकी क चीन्ह चमकत भइ जोति सी नाहीं चमकी।

मई उ समय तलक बोलत रहब जब तलक उद्धार आगी क लपट सा भव्य बनिके नाहीं धधकी।

^२ फुन सबहिं देस तोहरी नेकी क लिखहीं।

तोहरे सम्मान क सब राजा लिखहीं।

तबहिं तू एक नवा नाम पउब्या।

खुद यहोवा तू लोगन बरे उ नवा नाम पाई।
 ३ यहोवा क तू लोगन पइ बहोत गर्व होइ।
 तू पचे यहोवा क हाथन मँ सुन्नर मूकुट क समान होब्या।
 ४ फुन तू पचे कबहुँ अइसे जन नाही कहवउब्या,
 “परमेस्सर क तजे भए लोग।”
 तोहार पचन्क धरती कबहुँ अइसी धरती नाही कहवाइ जेका परमेस्सर उजाड़ेस।
 तू लोग “परमेस्सर क प्रिय जन” कहवउब्या।
 तोहार पचन्क धरती “परमेस्सर क दुलहिन” कहवाई।
 काहेकि यहोवा तू पचन्स प्रेम करत ह
 अउर तोहार पचन्क धरती ओकर होइ जाइ।
 ५ जइसे एक युवक कुँवारी क बीहत ह।
 वइसे ही तोहार पचन्क पूत तोहका बियाह लेइहीं।
 अउर जइसे दुल्हा आपन दुलहिन क संग आनन्दित होत ह
 वइसे ही तोहार पचन्क परमेस्सर तोहरे पचन्क संग खुस होइ।”
 ६ यरूसलेम क चारदीवारी पइ मई रखवारे (नवी) बइढाइ दिहेउँ ह कि ओकर धियान रखई।
 इ सबइ रखवारे मूक नाही रहिहीं।
 इ सबइ रखवारे यहोवा क तोहरी पचन्क जरूरतन क याद दियावत हीं।
 हे रखवारी, तू पचन्क चुप नाही होइ चाही।
 ७ तू पचन्क यहोवा स पराथना करब बन्द नाही करइ चाही।
 तू पचन्क सदा ओकर पराथना करत ही रहइ चाही।
 जब तलक उ फुन स यरूसलेम क निर्माण न कइ दे,
 तब तलक तू पचे ओकर पराथना करत रहा।
 यरूसलेम एक अइसा नगर अहइ
 जेकर धरती क सबहि लोग जस गइहीं।
 ८ यहोवा खुद आपन सक्ति क प्रमाण बनावत भए वाचा कइती यहोवा आपन सक्ति क प्रयोग स ही उ वाचा क पाली।
 यहोवा कहे रहा, “मई तू पचन्क बचन देत हउँ कि मई तोहरे पचन्क खइया क कबहुँ तोहरे पचन्क दुस्मनन क न देबउँ।
 मई तू पचन्क बचन देत हउँ कि तोहार पचन्क बनाई दाखरस तोहार पचन्क दुस्मनन कबहुँ नाही लइ पाई।
 ९ जउन मनई खाना जुटावत ह, उहइ ओका खाई अउर उ मनई यहोवा क गुण गाई।

उ मनई जउन अंगूर बीनत ह, उहइ ओन अंगूरन क बनी दाखरस पिई।
 मोर पवित्तर धरती पइ अइसी बातन हुआ करिहीं।”
 १० दुआरे स होत भए आवा।
 लोगन बरे राहन साफ करा।
 मारग क तइयार करा।
 राहे पइ क पाथर हटाइ द्या,
 लोगन बरे संकेत क रूप मँ झण्डा उठाइ द्या।
 ११ यहोवा सबहि दूर देसन बरे बोलत अहइ।
 “सिय्योन क लोगन स कहि द्या,
 ‘लखा, तोहार पचन्क उद्धारकर्ता आवत अहइ।
 उ तोहार पचन्क प्रतिफल लिआवत अहइ।
 उ अपने संग तोहरे बरे प्रतिफल लिआवत अहइ।”
 १२ ओकर लोग बोलावइ जाइ : “पवित्तर जन,”
 “यहोवा क सुरच्छित लोग।”
 यरूसलेम बोलावइ जाइ :
 “उ नगर जेसे यहोवा प्रेम करत ह,”
 “उ नगर जेका अउर तजि नाही जाइ।”

यहोवा आपन लोगन क निआब करत ह

६३ ?इ कउन अहइ जउन एदोम स आवत अहइ?
 इ बोस्रा क नगरी स लाल धब्बन स युक्त ओढ़ना पहिरे आवत अहइ।
 उ आपन ओढ़नन मँ अति भव्य देखात अहइ।
 उ लम्बे डग बढ़ावत भवा
 आपन महासक्ति क साथ आवत अहइ
 अउर मई सच्चाई स बोलत हउँ।
 २ “तू अइसे वस्त्र जउन लाल धब्बन स युक्त अहइ, काहे पहिरत अहा ?
 तोहार वस्त्र अइसे लाल काहे अहइ जइसे उ मनई क जउन अंगूर स दाखरस बनावत ह”
 ३ उ जवाब देत ह, “दाखरस क कुण्डे मँ मई अकेले ही दाख रौदेउँ।
 कउनो भी मोका मदद नाही दिहस।
 मई कोहान रहेउँ अउर मई लोगन क रौदेउँ जइसे अंगूर दाखरस बनावइ बरे रौदा जात हीं।
 रस छिटके मोरे ओढ़ना मँ लाग।
 ४ मई रास्टरन क दण्ड देइ बरे एक समय चुनेउँ।
 मोर उ समय आइ गवा कि मई आपन लोगन क बचाउँ अउर ओनकर रच्छा करउँ।
 ५ मई चकित भएउँ कि कउनो भी मनई मोर समर्थन नाही किहस।

एह बरे मई आपन सक्ति क प्रयोग
 आपन लोगन क बचावइ बरे किहेउँ।
 खुद मोर आपन किरोध ही मोर समर्थन किहस।
 ६ जब मई कोहान रहा, मई लोगन क रौंद दिहे
 रहेउँ।
 जब मई किरोध मँ पागल रहा, मई ओनका दण्ड
 दिहेउँ।
 मई ओनकर लहू धरती पइ उड़ेर दिहेउँ।”

यहोवा आपन लोगन पइ दयालु रहा

७ इ मई याद राखब कि यहोवा दयालु अहइ
 अउर मई यहोवा क स्तुति करब याद राखब।
 यहोवा इस्राएल क घराने क
 बहोत स वस्तुअन प्रदान किहस।
 यहोवा हमरे बरे बहोत ही कृपालु रहा।
 यहोवा हमरे बरे दाया देखाएस।
 ८ यहोवा कहे रहा, “इ सबइ मोर लोग अहइँ।
 इ सबइ बच्चन कबहुँ झूठ नाही कहत हीं।”
 एह बरे यहोवा ओन लोगन क बचाइ लिहस।
 ९ ओनका सब संकटन स
 कउनो भी सरगदूत नाही बचाए रहा।
 उ खुद ही आपन पिरेम
 अउर आपन दाया स ओनका छुटकारा दिआए
 रहा।
 १० किन्तु उ सबइ लोग यहोवा स मुँह मोड़ चलेन।
 उ पचे ओकर पवित्तर आतिमा क बहोत दुःखी
 किहस।
 तउ यहोवा ओनकर दुस्मन बन गवा।
 यहोवा ओन लोगन क विरोध मँ जुद्ध किहस।
 ११ किन्तु यहोवा अब भी पहिले क समय याद करत
 ह।
 यहोवा मूसा क अउर ओकर लोगन क याद करत
 ह।
 यहोवा उहइ रहा जउन लोगन क सागर क बीच
 स निकारि के लिआवा।
 यहोवा आपन भेड़िन क अगुवाई क बरे आपन
 चरवाहन क प्रयोग किहस।
 किन्तु अब उ यहोवा कहाँ अहइ
 जउन आपन आतिमा क मूसा मँ रख दिहे रह्या।
 १२ यहोवा आपन दाहिन हाथे स मूसा क अगुवाई
 किहस।
 यहोवा आपन अद्भुत सक्ति स मूसा क राह
 देखाएस।
 यहोवा जल क चीर दिहे रहा।
 जेहसे लोग सागर क पैदल पार कइ सके रहेन।

इ अद्भुत कार्य क कइके यहोवा आपन नाउँ
 प्रसिद्ध किहे रहा।
 १३ यहोवा लोगन गहिर सागर क बीच स पार
 किहस।
 उ पचे अइसे चला रहेन
 जइसे रेगिस्तान क बीच स घोड़ा बिना लइखड़ाए
 चला जात ह।
 १४ जइसे मवेशी घाटियन स उतरत
 अउर आराम क ठउर पावत ही वइसे ही यहोवा
 क प्राण हमका विस्राम क जगहिया दिहस
 ह।
 हे यहोवा, इ ढंग स तू आपन लोगन क राह देखाया
 अउर तू आपन नाउँ अद्भुत कइ दिहा।

ओकरे लोगन क मदद बरे यहोवा स पराथना

१५ हे यहोवा, तू अकासे स खाले लखा ओन बातन
 क लखा जउन घटत अहइँ।
 तू हमका आपन महान पवित्तर घरे स जउन
 अकासे मँ अहइ, खाले लखा।
 तोहार सुदृढ़ पिरेम हमरे बरे कहाँ अहइँ?
 तोहार सक्तिसाली कार्य कहाँ अहइ?
 तोहार हिरदय क पिरेम कहाँ अहइ?
 मोरे बरे तोहार कृपा कहाँ अहइ?
 तू आपन करुण पिरेम मोहसे कहाँ छुपाइ रखा
 अहइ?
 १६ लखा, तू हमार पिता अहा!
 होइ सकत ह इब्राहीम हम पच क नाही पहिचान
 सकी।
 होइ सकत ह इस्राएल हमका नाही जान सकी कि
 हम पचे कउन अहउँ।
 किन्तु यहोवा तू हमार पिता अहा।
 तू उहइ यहोवा अहइ जउन हमका सदा छोड़ाएस
 ह!
 १७ हे यहोवा, तू हमका आपन स दूर काहे ढकेलत
 अहा?
 तू हमरे बरे आपन अनुसरण करइ क काहे कठिन
 बनावत अहा?
 यहोवा तू हमरे लगे लउटि आवा।
 हम तउ तोहार दास अही।
 हमरे पास आवा अउर हमका सहारा द्या।
 हमार परिवार तोहार अहइँ।
 १८ थोड़े समय बरे हमार दुस्मनन तोहार पवित्तर
 लोगन पइ कब्जा कइ लिहे रहेन।
 हमार दुस्मनन तोहरे मन्दिर क कुचरि दिहे रहेन।
 १९ कछू लोग तोहार अनुसरण नाही करत हीं।
 उ पचे तोहरे नाउँ क धारण नाही करत हीं।

जइसे उ सबइ लोग

हम भी वइसे हुआ करत रहे।

६४ १ जदि तू अकास चीरके धरती पइ खाले
उतरि आवा

तउ सब कछु ही बदल जाइ।

तोहरे समन्वा पर्वत टेघर जाइ।

२ पहाड़न मँ लपट उठिहीं। उ सबइ अइसे बरिहीं
जइसे झाड़ियन बरत ही।

पहाड़ अइसे उबलिहीं जइसे उबलत पानी आगी
पइ रखा गवा होइ।

तब तोहार दुस्मन तोहरे बारे मँ समुझिहीं।

जब सबहिं जातियन तोहका लखिहीं तब उ पचे
भय स थर-थर काँपिहीं।

३ किन्तु हम फुरइ नाहीं चाहित ह
कि तू अइसे कामन क करा कि तोहरे समन्वा पहाड़
पिघल जाइ।

४ फुरइ तोहार ही लोग तोहार कबहुँ नाहीं सुनेन।
जउन कछु तू बातन कहया फुरइ तोहार ही लोग
ओनका कबहुँ नाहीं सुनेन।

तोहार जइसा परमेस्सर कउनो भी नाहीं लखेस।
कउनो भी दूसर परमेस्सर नाहीं, बस सिरिफ तू ही
अहा।

जदि लोग धीरा धइके तोहरे सहारे क बाट जोहत
रहइं,

तू ओनके बरे बड़े काम कइ देब्या।

५ जेनका अच्छे काम करइ मँ मजा आवत ह, तू
ओन लोगन क संग अहा।

उ सबइ लोग तोहरे जिन्नगी क रीति क याद करत
हीं।

पर लखा, बीते दिनन मँ हम तोहरे विरूद्ध पाप
किहा ह।

एह बरे तू हमके कोहाइ ग रह्या।

अब भला कइसे हमार रच्छा होइ ?

६ हम सबहिं पाप स मैला अही।

हमार सब "नेकी" पुरान गन्दे कपड़न स अहइ।

हम झुरान मुरझाए पत्तन स अही।

हमार पाप हमका आँधी स उड़ाये अहइ।

७ हम तोहार उपासना नाहीं करित ह।

हम का तोहरे नाउँ मँ बिस्सास नाहीं अहइ।

हम मँ स कउनो तोहार अनुसरण करइ क उत्साही
नाहीं अहइ।

एह बरे तू हमस मुँह मोड़ लिहा ह।

काहेकि हम पाप स भरा अही एह बरे हम तोहरे
समन्वा असमर्थ अही।

८ किन्तु, यहोवा तू हमार पिता अहा।

हम माटी क लौंदा अही अउर तू कोमहार अहा।

तोहरे ही हाथन हम सबक रचा ह।

९ हे यहोवा, तू हमेसा कुपित जिन बना रहा।

तू हमरे पापन क सदा ही याद जिन रखा।

कृपा कइके तू हमरी कइती लखा।

हम तोहार ही लोग अही।

१० तोहार पवित्तर नगरियन उजड़ी भई अहइं।

आजु उ सबइ नगरियन अइसी हो गइ अहइं जइसे
रेगिस्तान होइं।

सिध्दोन रेगिस्तान होइ गवा अहइ।

यरूसलेम ढल गवा अहइ।

११ हमार पवित्तर मन्दिर भसम होइ ग अहइ।

उ मन्दिर हमरे बरे बहोत ही महान रहा।

हमार पूर्वज हुवाँ तोहार उपासना करत रहेन।

अउर हम लोगन क सबइ बहुमुल्य वस्तुअन नास
होइ ग अहइ।

१२ का इ सबइ वस्तुअन सदैव तोहका आपन पिरेम
हम पइ परगट करइ स दूर रखिहीं।

का तू कबहुँ कछु नाहीं कहब्या ?

का तू अइसे ही चुप रह जाब्या ?

का तू सदा हमका दण्ड देत रहब्या ?

परमेस्सर क बारे मँ सबहिं लोग जनिहीं

६५ १ यहोवा कहत ह, "मई ओन लोगन क
भी सहारा दिहेउँ ह जउन उपदेस ग्रहण
करइ बरे कबहुँ मोरे लगे नाहीं आएन। जउन लोग
मोका प्राप्त कइ लिहन, उ पचे मोरी खोज मँ नाहीं
रहेन। मई एक अइसी जाति स बात किहेउँ जउन
मोर नाउँ धारण नाहीं करत रही। मई कहे रहेउँ,
'मई हिआँ हउँ। मई हिआँ हउँ।'

२ "जउन लोग मोहसे मुँह मोड़ गए रहेन, ओन
लोगन क अपनावइ बरे मई तत्पर रहेउँ। मई इ
बात क प्रतीच्छा करत रहेउँ कि उ सबइ लोग
मोरे लगे लउटि आवइं। किन्तु उ पचे जिन्नगी
क एक अइसी राह पइ चलत रहेन जउन अच्छी
नाहीं अहइ। उ पचे आपन मन क मुताबिक काम
करत रहेन। ३ उ सबइ लोग मोरे समन्वा रहत हीं
अउर सदा मोका गुस्सैल करत रहत हीं। आपन
बिसेस बागन मँ उ पचे लोग मिथ्या देवतन क
बलियन क अर्पन करत हीं अउर अगारबत्ती बारत
हीं। ४ उ सबइ लोग कवरन क बीच बइठत हीं
अउर मरे भए लोगन स संदेस पावइ क प्रतीच्छा
करत रहत हीं। हिआँ तलक कि उ पचे मुदंन क
बीच रहा करत हीं। उ पचे सुअर क माँस खात
हीं। ओनकर पियालन मँ अपवित्तर वस्तुअन क
सोरबा अहइ। ५ किन्तु उ सबइ लोग दूसर लोगन
स कहा करत हीं, 'मोरे लगे जिन आवा, मोका उ

समय तलक जिन छुआ, जब तलक मई तू पचन्क पवित्तर न कइ देउँ ।^१ मोर आँखिन मँ उ सबइ लोग धुएँ क जइसे अहई अउर ओनकर आगी हर समय बरा करत ह ।”

इस्राएल क दण्डित होइ चाही

६ “लखा, इ एक हुण्डी अहइ जेका पुनः भुगतान जरूर करइ क होइ । इ हुण्डी बतावत ह कि तू आपन पापन बरे अपराधी अहा । मई उ समय तलक चुप नाही होबउँ जब तलक इ हुण्डी क भुगतान न कइ देउँ । अउर मई इ हुण्डी क भुगतान नेम क अनुसार करब ।^७ तोहार पचन्क पाप अउर तोहार पचन्क पुरखन एक ही जइसे अहई । तोहार पचन्क पुरखन जब पहाड़न मँ धूप अगरबत्तियन बारे रहेन, तबहि एन पापन क किहे रहेन । ओन पहाड़न पइ उ पचे मोका लज्जित किहे रहेन अउर सबसे पहिले मई ओनका दण्ड दिहेउँ । जउन दण्ड ओनका मिलइ चाही रहा, मई ओनका उहइ दण्ड दिहेउँ ।” परमेस्सर इस्राएल क पूरी तरह नष्ट नाही करी

^८ यहोवा कहत ह, “अंगूरन मँ जब नई दाखरस हुवा करत ह, तब लोग ओका निचोड़ लिया करत ही, किन्तु उ पचे अंगूरन क पूरी तरह नष्ट तउ नाही कइ डउतेन । उ पचे एह बरे अइसा करत ही कि अंगूरन क उपयोग तउ फिन भी किया जाइ सकत ह । आपन सेवकन क साथ मई अइसा ही करब । मई ओनका पूरी तरह नष्ट नाही करबः^९ इस्राएल क कछू लोग क मई बचाए रखब । यहूदा क कछू लोग मोरे पर्वतन क प्राप्त करिही । मोरे सेवकन क हुवाँ निवास होइ । मोर चुने भए लोगन क धरती मिली ।^{१०} फुन तउ सारोन क घाटी हमार भेड़ी-बोकरियन क चरागाह होइ तथा आकोर क तराई हमरे मवेसियन क आराम करइ क जगह बन जाइ । इ सबइ सब बातन मोरे लोगन क बरे होइहीं । ओन लोगन बरे जउ मोर खोज मँ अहई ।

^{११} “किन्तु तू लोग, जउन यहोवा क तजि दिहेन ह, दण्डित कीन्ह जाब्या । तू अइसे लोग जउन मोरे पवित्तर पर्वत क बिसराइ दिहन ह । तू अइसे लोग अहा जउन भाग्य क मिथ्या देवता क पूजा करत अहा । तू पचे भाग्यरूपी लवार देवता क सहारे रहत अहा ।^{१२} किन्तु तोहरे पचन्क भाग्य क निर्धारन तउ मई करत हउँ । मई तरवार स तोहका दण्ड देबउँ । जउन तू पचन्क दण्ड देइ । तू पचे सबहि ओकरे अगवा मिमिआइ लगब्या । मई तू पचन्क गोहराएउँ किन्तु तू पचे कउनो जवाब नाही

दिहा । मई तू पचन्स बातन किहेउँ किन्तु तू पचे सुन्या तलक नाही । तू पचे ओन कामन क ही करत रह्या जेनका मई बुरा कहे रहेउँ । तू पचे ओन कामन क करइ क ही ठान लिहा जउन मोका नीक नाही लागत रहेन ।”

^{१३} तउ मोर सुआमी यहोवा इ सबइ बातन कहेस ।

“मोर दास भोजन पइहीं,

किन्तु तू पचे भूखा मरब्या ।

मोर दास पीहीं किन्तु अरे दुस्टो,

तू पचे पियासा मरब्या ।

मोर दास खुस होइहीं किन्तु अरे ओ दुस्टो,

तू पचे लज्जित होब्या ।

^{१४} मोरे दासन क मन खरे अहई एह बरे उ सबइ खुस होइहीं ।

किन्तु अरे ओ दुस्टो,

तू पचे रोया करब्या काहेकि तोहरे पचन्क मने मँ पीरा बसी ।

तू पचे आपन टूटे भए मन स बहोत दुःखी रहब्या ।

^{१५} तोहार पचन्क नाउँ मोरे लोगन क बरे गालियन क जइसे होइ जइहीं ।”

मोर सुआमी यहोवा तू पचन्क मारि डाइ

अउर उ आपन दासन क एक नवे नाउँ स बोलाया करी ।

^{१६} जब लोग दूसर क आसीस देइ, उ पचे धरती क नाउँ लइ के आसीस देइ ।

किन्तु अगवा आवइवाले दिनन मँ उ पचे दूसर क बिस्सासी परमेस्सर क नाउँ लेइ के आसीस देइ ।

अबहि लोग धरती क सक्ति क भरोसे रहा करत ही जब उ पचे कउनो बचन देत ही ।

किन्तु भविस्स मँ, उ सबइ बिस्सासी परमेस्सर क भरोसे रहा करिहीं ।

काहेकि पिछले दिनन क सबहि विपत्तियन भुलाइ दीन्ह जइहीं ।

लोग फुन ओन पिछली विपत्तियन क याद नाही करिहीं ।

एक नवा समय आवत अहइ

^{१७} “लखा, मई एक नवे सरग अउर नई धरती क रचना करब ।

लोग मोरे लोगन क पिछली बात याद नाही रखिहीं ।

ओनमाँ स कउनो बात याद मँ नाही रही ।

^{१८} मोर लोग दुःखी नाही रहिहीं ।

नाहीं, उ पचे आनन्द मँ रहिहीं अउर उ पचे सदा खुस रहिहीं ।

मई जउन बातन रचब जउन आनन्द स परिपूर्ण होइ

अउर मई ओनका एक प्रसन्न जाति बनाउब ।

१९ “फुन मई यरूसलेम स खुस रहब ।

मई आपन लोगन स खुस रहब ।

तब उ नगरी में फुन कबहुँ विलाप

अउर कउनो दुःख नाही होइ ।

२० उ नगरी में कउनो बच्चा अइसा नाही होइ जउन पइदा होइके पाछे कछू दिन जिई ।

उ नगरी क कउनो भी मनई आपन छोटी उमर में नाही मरी ।

हर पैदा भवा बच्चा लम्बी उमर जिई अउर उ नगरी क प्रत्येक बुढ़वा मनई एक लम्बे समय तलक जिअत रही ।

हुवाँ सौ साल क मनई भी जवान कहा जाइ ।

किन्तु कउनो भी अइसा मनई जउन सौ साल स पहिले मरी अभिसप्त कहा जाइ ।

२१ “लखा, उ नगरी में अगर कउनो मनई आपन घर बनाई तउ उ मनई आपन घरे में बसी ।

अगर कउनो मनई हुवाँ अंगूरे क बाग लगाई तउ उ आपन बाग क अंगूर खाई ।

२२ हुवाँ अइसा नाही होइ कि कउनो आपन घर बनावइ

अउर कउनो दूसर निवास करइ ।

अइसा भी नाही होइ कि बाग कउनो दूसर लगावइ अउर उ बाग क फल कउनो दूसर खाइ ।

मोर लोग एतना जीइहीं जेतना इ सबइ वृच्छ जिअत हीं ।

अइसा मनई जेनका मई चुनेउँ ह,

ओन सबहिं वस्तुअन क आनंद लेइहीं जेनका उ पचे बनाए अहई ।

२३ फुन लोग बियर्थ क परिस्त्रम नाही करिहीं ।

लोग अइसे ओन बच्चन क जन्म नाही देइहीं जेनके बरे उ पचे मने में डेरइहीं कि उ पचे कउनो अचानक बिपत्ति क सिकार न होइ ।

मोर सबहिं लोग यहोवा क आसीस पइहीं ।

मोर लोग अउर ओनकर संतानन आसीबाद पइहीं ।

२४ मोका ओन सबहिं वस्तुअन क पता होइ जाइ जेनकर जरूरत ओनका होइ, एहसे पहिले कि उ पचे ओनका मोसे माँगइ ।

एहसे पहिले कि उ पचे मोहसे मदद क पराथना पूरी कइ पइहीं, मई ओनका मदद देब ।

२५ बिगवन अउर मेमनन एक संग चरत फिरिहीं ।

सिंह भी मवेशियन क जइसे ही भूसा खाइहीं

अउर भुजंगन क भोजन बस माटी ही होइ ।

मोर पवित्र पर्वत पइ कउनो केउ क भी नोस्कान नाहीं पहाँचाइ अउर न ही ओनका नस्त करी ।”

इ यहोवा कहेस ह ।

परमेस्सर सबहिं जातियन क निआव करी

६६ यहोवा इ कहत ह, “अकास मोर सिंहासन अहइ ।

धरती मोरे पाँव क चौकी बनी अहइ ।

तउ का तू इ सोचत अहा कि तू मोरे बरे भवन बनाइ सकत अहा ?

नाहीं, तू नाही बनाइ सकत्या ।

का तू मोका बिस्राम क जगह दइ सकत ह नाहीं, तू नाहीं दइ सकत्या ।

२ मई खुद ही सारी वस्तुअन रचेउँ ह ।

इ सबइ सारी वस्तुअन हिआँ टिकी अहई काहेकि ओनका मई बनाएउँ ह ।”

यहोवा इ सबइ बातन कहे रहा ।

“मोका बतावा कि मई कइसे लोगन क चिन्ता किया करत हूँ ?

मोका दीन हीन लोगन क चिन्ता अहइ ।

इ सबइ ही उ सबइ लोग अहूँ जउन बहोत दुःखी रहत हीं ।

अइसे ही लोगन क चिन्ता मई किया करत हूँ ।

जउन मोरे बचनन क पालन किया करत हीं ।

३ मोका बलि क रूप में अर्पित करइ क कछू लोग बर्धा क बध किया करत हीं

किन्तु उ सबइ लोगन स मारपीट भी करत हीं ।

मोका अर्पित करइ क इ सबइ भेड़िन क मारत हीं

किन्तु इ सबइ कुकुरन क गर्दन भी तोड़न हीं

अउर सुअरन क लहू इ सबइ मोह पइ चढ़ावत हीं ।

अइसे लोगन क धूप स बारइ क याद बनी रहा

करत ह

किन्तु उ सबइ बियर्थ क आपन सबइ प्रतिमा स पिरेम करत हीं ।

अइसे इ सबइ लोग आपन मनचीती राहन पइ चला करत हीं,

मोरी राहन पइ नाहीं ।

उ पचे पूरी तरह स आपन घिनौने मूरति क पिरेम में बूड़ा अहई ।

४ एह बरे मई इ निहचय किहेउँ ह कि मई ओनकर जूती ओनहीं क सिर करब ।

मोर इ मतलब अहइ कि मई ओनका दण्ड देब ओन वस्तुअन क काम में लिआवत भए जेनसे उ पचे बहोत डेरात हीं ।

मई ओन लोगन क गोहराए रहेउँ किन्तु उ पचे
नाहीं सुनेन ।

मई ओनसे बोले रहेउँ

किन्तु उ पचे सुनेन ही नाहीं ।

एह बरे अब मई भी ओनके संग अइसा ही करब ।
उ सबइ लोग ओन सबहिं बुरे कामन क करत रहत
हीं जेनका मई बुरा बताए रहेउँ ।

उ पचे अइसा काम करइ क चुनेन जउन मोका
नाहीं भावत रहेन ।”

५ हे लोगो, यहोवा क भय विम्हय मानइवालो
अउर यहोवा क हुकुमन क अनुसरण करइवालो,
ओन बातन क सुना ।

यहोवा कहत ह, “तोहसे तोहार पचन्क भाइयन
घिना किहेन

काहेकि तू पचे मोरे पाछे चला करत रह्या, उ पचे
तोहरे पचन्क विरूद्ध होइ गएन ।

तोहार पचन्क बंधु कहा करत रहेन, ‘जब यहोवा
सम्मानित होइ हम पचे तोहरे सबन्क पाछे
होइ लेव ।

फुन तोहरे सबन्क साथ मँ हम भी खुस होइ जाब ।’
अइसे ओन लोगन क सजा दीन्ह जाइ ।

दण्ड अउर नई नीति

६ “सुनन तउ, नगर अउर मन्दिर स एक ऊँच
आवाज सुनाइ देत अहइ । यहोवा क जरिये आपन
विरोधियन क, जउन दण्ड दीन्ह जात अहइ । उ
आवाज उहइ क अहइ । यहोवा ओनका उहइ दण्ड
देत अहइ जउन ओनका मिलइ चाहीं ।

७-८ “अइसा तउ नाहीं भवा करत रहा कि
प्रसव पीरा स पहिले ही कउनो मेहरारू बच्चा
पइदा करत होइ । अइसा तउ कबहुँ नाहीं भवा
कि कउनो मेहरारू कउनो पीरा क अनुभव करइ
स पहिले ही आपन पूत क पइदा भवा लखे होइ ।
अइसा कबहुँ नाहीं भवा । इहइ प्रकार कउनो भी
मनई एक दिन मँ कउनो नवा संसार आरम्भ होत
भाए नाहीं लखेस । कउनो भी मनई कउनो अइसी
नई जाति क नाउँ कबहुँ नाहीं सुने होइ जउन एक
ही दिन मँ सुरू होइ गई होइ । धरती क बच्चा
जनई क दर्द जइसी पीरा निहचय ही पहिले सहइ
क होइ । इ प्रसव पीरा क पाछे ही उ धरती आपन
संतानन-एक नई जाति क जनम देइ । ९ जब मई
कउनो मेहरारू क बच्चा जनइ क पीरा देत हउँ तउ
उ बच्चा क जनम दइ देत ह ।”

तोहार पचन्क यहोवा कहत ह, “मई तू पचन्क
बच्चा जनइ क पीरा मँ डाइके तोहार पचन्क
गर्भद्वार बंद नाहीं कइ देत । मई तू पचन्क इहइ

तरह एन विपत्तियन मँ बिना एक नई जाति
प्रदान किए, नाहीं डाउब ।”

१० हे यरूसलेम, खुस रहा ।

हे लोगो, यरूसलेम क प्रमियो, तू पचे निहचय ही
खुस रहा ।

यरूसलेम क संग संग दुःख क बातन घटी रहिन
एह बरे तू पचन्क स कछू लोग भी दुःखी
अहई ।

किन्तु अब तू पचन्क चाही कि तू पचे बहोत बहोत
खुस होइ जा ।

११ काहेकि अब तू पचन्क दाया अइसी मिली

जइसे छाती स दूध मिला जाया करत ह ।

तू पचे यरूसलेम क वैभव क

सच्चा आनंद पउब्या ।

१२ यहोवा कहत ह,

“लखा, मई तू पचन्क सान्ति देब ।

इ सान्ति तू पचन तलक अइसे पहोंची जइसे
कउनो महानदी बहत भी पहुँच जात ह ।

सब धरती क रास्ट्रन क धन-दौलत बहत भइ तू
पचन्तलक पहोंच जाइ ।

इ धन-दौलत अइसे बहत भाए आई जइसे कउनो
बाढ़ क धारा ।

तू पचे नान्ह बच्चन स होब्या, तू पचे ‘दूध’ पीब्या,
तू पचन्क उठाइ लीन्ह जाइ अउर गोदी मँ
थाम लीन्ह जाइ,

तू पचन्क घुटनन पइ उछारा जाइ ।

१३ मई तू पचन्क दुलारब जइसे महतारी आपन
बच्चा क दुलारत ह ।

अउर तू पचे यरूसलेम क भीतर चैन पउब्या !”

१४ तू पचे उ वस्तुअन क लखब्या जेनमाँ तू पचन्क
रस आवत ह

तू पचे अजाद होइके घास क तरह बढ़ब्या ।

यहोवा क सक्ति क ओकर लोग लखिही,

किन्तु यहोवा क दुस्मन ओकर किरोध देखिहीं ।

१५ लखा, आगी क साथ यहोवा आवत अहइ ।

धूरि क बादलन क साथ यहोवा क फउजन आवति
अहई ।

यहोवा आपन किरोध स ओन मनइयन क सजा
देइ ।

यहोवा जब कोहाइ जाइ तउ ओन मनइयन क
दण्ड देइ बरे आगी क लपटन क प्रयोग
करी ।

१६ यहोवा लोगन क निआत करी अउर फिन आगी
अउर आपन तरवार स उ अपराधी लोगन क
नस्ट कइ डाइ ।

यहोवा ओन बहोत स लोगन क नस्ट कइ देइ ।

उ आपन तरवार स ल्हासन क अम्बार लगा देइ ।

१७ यहोवा क कहब अहइ, “उ सबइ लोग जउन आपन बगीचन क पूजइ बरे स्नान कइके पवित्तर होत हीं अउर एक दूसर क पाछे परिक्रमा करत हीं, उ पचे जउन सुअर क गोस खात हीं अउर मूस जइसे घिनौने जीव जन्तुअन क खात हीं, एन सबहिं लोगन क नास होइ ।” यहोवा इ सबइ बातन कहे रहा ।

१८ “बुरे बिचारन मँ पड़े भए उ सबइ लोग बुरे काम किया करत हीं । एह बरे ओनका सजा देइ क मई आवत हउँ । मई सबहिं जातियन अउर सबहिं लोगन क बटोरब । परस्पर एकट्ठा भए सबहिं लोग मोर सक्ति लखिहीं । १९ कछू लोगन पइ मई एक चीन्हा लगाइ देब, मई ओनकर रच्छा करब । एन रच्छा कीन्ह लोगन मँ स कछू लोगन क मई तर्सीस लिब्या अउर लूदी क लोगन क पास पठउब । (एन देसन क लोग धनुधारी हुआ करत हीं ।) तुबाल, यूनान अउर सबहिं दूर देसन मँ मई ओनका पठउब । दूर देसन क ओन लोग मोर उपदेस कबहुँ नाहीं सुनेन । ओन लोग मोरी महिमा क दर्सन भी नाहीं किहेन ह । तउ उ सबइ बचाए गए लोग ओन जातियन क मोरी महिमा क बारे मँ बतइहीं । २० उ पचे तोहार पचन्क सबहिं भाइयन अउर बहनन क सबहिं देसन स हिआँ लइ अइहीं । तोहार पचन्क भाइयन अउर बहनन क उ पचे मोर

पवित्तर पर्वत पइ यरूसलेम मँ लइ अइहीं । तोहार पचन्क भाई बहिन हिआँ घोड़न, खच्चरन, ऊँटन, रथन अउर पालकियन मँ बइठिके अइहीं । तोहार पचन्क उ सबइ भाई बहिन उहइ प्रकार स उपहार क रूप मँ लिआवा जइहीं जइसे इस्राएल क लोग सुद्ध थालन मँ रखिके यहोवा क मन्दिर मँ उपहार लिआवत हीं । २१ एन लोगन मँ स कछू लोगन क याजकन अउर लेवियन क रूप मँ चुन लेब । इ सबइ बातन यहोवा बताए रहा ।

नवा अकास अउर नई धरती

२२ “मई एक नये संसार क रचना करब । इ सबइ नवे अकास अउर नई धरती सदा-सदा टिकी रहिहीं अउर उहइ प्रकार तोहार पचन्क नाउँ अउर तोहार पचन्क बंसजन भी सदा मोरे संग रहिहीं । २३ हर सबित क दिन अउर महीने क पहिले दिन उ सबइ सबहिं लोग मोर उपासना बरे आवा करिहीं ।” इ सबइ बातन यहोवा बताए रहा ।

२४ “इ सबइ लोग मोर पवित्तर नगरी मँ होइहीं अउर कबहुँ उ पचे नगर स बाहेर जइहीं, तउ ओनका ओन लोगन क ल्हासन देखाई देइहीं जउन मोरे विरुद्ध पाप किहेन ह । ओन ल्हासन मँ किरवन पड़ा हुवा होइहीं अउर उ सबइ किरवन कबहुँ नाहीं मरिहीं । ओन देहन क आगी बारि डाई अउर उ आगी कबहुँ खतम नाहीं होइ ।”